

Эл севган адиб

**(Ўткир Ҳошимов
замондошлар наздида)**

**Тошкент
«MUMTOZ SO‘Z»
2011**

УДК: 821.512.133(092) Ҳошимов

ББК: 83.3 (5Ў)6

Нашрга тайёрловчи:
Ҳамидулла БОЛТАБОЕВ

Масъул муҳаррир:
Иброҳим ҒАФУРОВ

Тақризчилар:
Умарали НОРМАТОВ,
Абдуғафур РАСУЛОВ

83.3(5Ў)6

Б83

Эл севган адаб (Ўткир Ҳошимов замондошлар наздида) /
нашрга тайёрловчи Ҳ.Болтабоев; масъул муҳаррир И.Ғафуров. – Т.:
«MUMTOZ SO‘Z», 2011. – 230+12 б.

I Болтабоев Ҳамидулла.

ББК 83.3 (5Ў)6
УДК: 821.512.133(092) Ҳошимов

ISBN 978-9943-398-15-3

*«Эл севган адаб» (Ўткир Ҳошимов), 2011
«MUMTOZ SO‘Z», 2011*

ЭЛ СЕВГАН АДИБ ва ЗАМОНДОШЛАРИ НИГОҲИ

Дунёда адиб зоти борки, ўз асарларининг ўқилиши, уқилиши ва китобхонлар томонидан тушунилишини истайди. “Сени тушунишса, катта баҳт” деган ҳикмат аслида ёзувчилик қисматига даҳлдор. Ҳатто Ҳазрат Навоийдай даҳо санъаткор ҳам “Эл нетиб топғай мениким...” каби андишаларга боргани ва муножот пайтида Яратганга ёзғуриб, “Илоё дегонимни улуска марғуб эт...” дея мусалло қилгани ҳамманинг ёдида. Ижод ва ижодкор қисматига боғлиқ бу сўзлар нафақат мумтоз адибларга, балки замонавий руҳда асарлар ёзиб, эл эъзозига мушарраф бўлган адибларга ҳам хос. Шундай экан, замонавий адиб ҳам ўз асарларини замондошлари томонидан қабул этилишини истаса не айб?! Ўзбекистон ҳалқ ёзувчиси, севимли адибимиз Ўткир Ҳошимов бу борада шундай ёзади: “Ҳамиша бир орзу билан яшайман. Шунаقا китоб ёзсангки, уни ўқиган китобхон ҳамма нарсани унутса, асар қаҳрамонлари ҳаёти билан яшаса. Китобни ўқиб бўлган куни кечаси билан ухломай, тўлғониб чиқса. Орадан йиллар ўтиб асарни қайтадан қўлига олганида тағин ҳаяжонланса, янги маънолар топса. Энг катта орзум шу” (Ўткир Ҳошимов. Саккизинчи мўъжиза. Т., 2009. 31-бет).

Адибнинг мана шу орзуси қандай ушалаётганини замондошлари талқинида кузатайлик: “Истеъдодли, аллақачон ҳалқ меҳрига сазовор бўлган ёзувчи Ўткир Ҳошимов ... қандай китоблар ёзгани тўғрисида гапириб ўтириш ортиқча. Улар ўзбек ва қардош ҳалқлар мулкига айланиб кетган. Шундоқ бўлса ҳам бу истеъдодли адибнинг асарларини тилга олмаслик инсофдан бўлмас. «Бахор қайтмайди», «Қалбингга қулоқ сол», «Нур борки, соя бор», «Дунёнинг ишлари», «Икки эшик ораси», «Тушда кечган умрлар», «Икки карра икки – беш» каби қисса ва романлари, юздан ортиқ дилбар ҳикоялари, комедия ва фожиалари ҳалқ орасида жуда машҳур бўлиб кетган” (Сайд Аҳмад).

Чиндан ҳам Ўткир аканинг қисса ва романларини ўқиётганингизда уларнинг ҳаёти нафақат кўз ўнгингизда намоён бўлади, балки асарни ўқиб бўлганингиздан сўнг китобхон онгингиз ва шуурингизда қайта тирилади. Сиз билан диллашади, ҳис-туйғуларингизга таъсир этиб бир неча вақт давомида уни бошқаради. Анча вақтга қадар мана шу асарлар таъсирида юрасиз, унинг

қаҳрамонлари билан баҳслашасиз, нимадандир кўнглингиз тўлмагандай бўлиб, хатто баъзи қаҳрамонлар тарафига ўтиб олиб, уларнинг мухолифлари билан курашасиз. Бадиий асарнинг таъсир кучи, китобхон қалбини ишғол этиш мўъжизаси мана шунда кўринади.

Машҳур бўлишиликнинг сиру сабаблари (Хуршид Дўстмуҳаммад) нимада экан? Илк асари биланоқ Абдулла Қаҳҳордай улуғ адибларнинг назарига тушишида ёки Озод Шарафиддиновдай қилни қирқ ёрадиган устоз мунаққид китобимни ўқиб нима деркин, деган андиша билан қўлга қалам олишидами? Ёки ҳар бир асарида имкон борича халқ кўнглидагини топиб айтишга, дилидаги пинҳон дардларни оқ қофозга кўчиришга бўлган иштиёқдами? Ёхуд Аллоҳ берган истеъдодни куну тун парвариш қилиб, фақат эзгулик ишига, яхши асарлар ёзишга сарф қилишидами?

“Ўткир Ҳошимов ижодида майнлик, нафосат бор. Айниқса, муҳаббат мавзусидаги асарларида инсон туйғулари жуда мулоҳимлик, нағислик билан чизилади. Бу жиҳатдан адибни прозанинг шоири деса бўлади. Шу билан бирга Ўткиржон жуда серқирра ижодкор. Унинг асарларида катта исён бор. Адолатсизликка, зулмга қарши тутғён бор. Ёзувчи биринчи асари биланоқ Абдулла Қаҳҳордек талабчан устознинг назарига тушган эди. Шундан бери у ҳеч қачон китобхон назаридан четда қолмай келмоқда” (Эркин Воҳидов). Китобхон назаридан четда қолмаслик, доимо унинг кўз ўнгида туриш, ёзганларини эл назаридан ўтказиб, унинг баҳосию талаблари даражасида асарлар ёзиш учун биргина устозларининг оқ йўлию замондошларининг хайриҳоҳлиги камлик қиласи. Адиб узоқ ва машаққатли ижодий йўлни босиб ўтди. Бу йўлнинг ҳар бир бекати қанчадан қанча тўлғанишару изтиробларга, масрурлигу ташвишларга тўла. Ижод, унинг сир асрорлари ҳакида Ўткир Ҳошимов: “Ижод ўта мураккаб, ўта масъулиятли, олис ва машаққатли йўл” деб ёзаркан, ижодий сафарга отланган йўлчи (ижодкор) йўл (ижод жараёни)нинг барча баланд- пастликларини олдиндан тасаввур қила олиши, унинг нотекисларидан ҳайиқмай юриши, жиддий тўсиқлар учраганда ҳам уларни енгиб, олдинга интилиши ва оқибат натижада китобхон қалби деган “финиш”га эсон-омон етиб олиши керак. Бироқ у (ижод) “юз метрли масофада ким ўзарга югуриш ҳам эмас”. Унда “ким ўзарлик” тезроқ маррага етиб, рақибларини доғда қолдириш – етакчи моҳият касб этмайди. Биринчилик тезликда, тез шухрат қозонишда ёки қизил лентани узуб

ўтишда эмас, балки китобхон қалбига кира олишда, унинг ўйташвишларини асарларига сингдира билишда, оддий ўқувчидан тортиб зукко академиклар томонидан ўша ижодкор истеъдодининг эътироф этилишидадир.

Ўткир Ҳошимов ижоди эл, юрт томонидан эътироф этилди. Унинг роман ва қиссалари миллий ҳудуддан ташқарига чиқиб умуминсоний қадриятлар қаторига қўшилди. Асарлари ўнлаб хорижий тилларга таржима этилиб, Гоголь, Фолкнер, В.Распутин каби жаҳоний адилар асарларига менгзалди (М.Шарафутдинова). Бироқ, менинг назаримда, ҳали асарлари қатидаги бадиийлик сирларию адаб лабораториясидаги ижодий жараёнларни тўла ўрганганимизча йўқ. Уларни ўрганиш, тадқиқ этиш нафақат адабиётшунос олимлар зиммасида, балки ёш ижодкорлар ҳам адаб маҳорати қирраларини ўзига мактаб билиб, унинг тажрибасидан амалда, ўз ижодларида фойдалана билишида кўринади. Қолаверса, олий ҳакам – бешафқат ВАҚТ ҳукми ҳам борки, унинг олдидан не-не улуғ адилар “оқиб кетишган”. Бу ҳақиқатни англаб етган ижодкор, нафақат бугунги қунини ўйлайди, балки эртанги қунга ҳам асқотарли асарлар ёзиш, ҳалқ орзуларини келажакка муҳрлаш пайида бўлади. Бу ҳақда яна адебнинг ўзидан тинглаймиз: “Қаламкаш учун китобхон озми-кўпми эзгулик нурини олиб кириш, унинг қувонч ва ташвишлари, муҳаббат ва нафратини ҳалол, таъсирчан тасвирлашдан ортиқ баҳт йўқ. Зоро, ҳар қандай китобнинг холис баҳосини китобхон ва вақт белгилайди. Шу маънода айтиш мумкинки, асарнинг эгаси ёзувчи эмас. Асарнинг эгаси – ўқувчи. Ўқувчиси йўқ асар эгаси ташлаб кетган ҳовлига ўхшайди...”

Асарнинг ҳақиқий эгаси – китобхон экан, ёзган китобларимиз кутубхонаю китоб жовонларини тўлдириб, безаб туриш учун эмас, балки ўқувчилар томонидан “шавқ билан ўқилиши” (Абдулла Қаҳҳор), уларнинг кўнгил мулкига айланиб, миллат маънавий хазинасидан муносиб ўрин олиши учун ёзилади. Чунки китобхон диди ва савияси, маънавияти ва руҳий дунёсини эътиборда тутиш биргина бозор талаби эмас, балки унга ижодий ҳамкор сифатида қараш ҳамдир: “Ёзувчи ва китобхон муносабатларида ёзувчи ёзади, китобхон ўқийди. Лекин китобхон бирон бир нарсани ҳал қиласидими, – деган савол қўяди мунаққид И.Фафуров ва бу саволнинг жавобида: – Ёзувчи... китобхонга тенглашишни эмас, балки китобхондан баландроқ туришга интилади. Шунинг учун

китобхонни ҳайратга солади, ёзувчи китобхонга эмас, китобхон ёзувчига қараб ҳайрат бармоғини тишлайди ва ўзи илгари кўрмаган, билмаган нотаниш оламларга киради. Китобхон ўrnак излайди. Ёзувчи ўrnак беради... Ўткир Ҳошимов ўз ўқувчиси билан муттасил изчил алоқада ишлайди. У кимга ёзаётганини билади. Ўқувчиси унинг учун мавҳум шахс эмас, жуда жонли ва жуда фаол фикрловчи кимса. Ўқувчинини ўзининг ижодий ишларига шерик деб тушунади. Маърифатли муносабатга маърифатли муносабат билан жавоб беради”.

Маърифатли китобхон тарбиялаш, унинг дидини ўстириш ва маънавиятини бойитиш ҳар бир адиднинг вазифаси. Чунки ижодкор асарларининг сифати сифатли ўқувчиларни ҳам тарбиялаб етиширади, муаллифнинг қалб бисотидаги гўзалликлар ўқувчи онгигага кўчиши баробарида эзгулик ва гўзаллик сари оҳорли йўл қурилади. Ёзувчининг машаққатли сафари китобхонни ҳам шундай сафарга ундейди, унга ҳамроҳ бўлишликни тақозо қиласди.

Шундай экан, эл севган адид Ўткир Ҳошимовнинг ижод йўлидаги баркамоллик унинг ўқувчиларининг ҳам камолот сари тутинган йўли билан туташади. Мана шу мураккаб йўлнинг етмисинчи бекатини босиб ўтган севимли адидимизга унга доимий ҳамроҳ бўлишга арзирли, бетакрор истеъдодига муносиб истеъдодли китобхонлар тилаймиз.

*Филология фанлари доктори, профессор
Ҳамидулла БОЛТАБОЕВ*

ЭЪТИРОФЛАР

Сайд АҲМАД
Ўзбекистон Қаҳрамони, ҳалқ ёзувчиси

ИЖОД ВА ЖАСОРАТ

Ўзингга яқин ва қадрдон одам ҳақида бирон гап айтиш шунчалар қийин бўлишини билмас эканман. Ҳар куни кўришадиган, неча марталаб гаплашадиган дўстингнинг фазилатлари сенга жуда оддий бир нарса бўлиб қоларкан. У сахийми, баҳилми, бағри кенгми, феъли торми, дўстига вафодорми, бироннинг қайғусига қайғудошми, негадир эътибор бермас экансан. Бу ҳаммага хос одат-да, деб қўяқоларкансан.

Истеъодли, аллақачон ҳалқ меҳрига сазовор бўлган ёзувчи Ўткир Ҳошимов тўғрисида бир нима ёзай, деб шунча уринаман, қани бирон сатр ёзолсан.

Бир донишманд агар азamat чинорни бўй-басти билан кўраман десанг, сал наридан туриб қара, агар ёнидан қарасанг, унинг фақат бир бўлагини кўрасан, узоқдан қарасанг бутун салобати билан кўрасан, деган экан. Бу жуда доно гап. Рассом ҳам яратоётган асарини неча марталаб, орқага бир-икки қадам чекиниб кузатади.

Мен ҳам Ўткирни сал наридан туриб кўрмоқчи бўлдим... Ана шундан кейин мўъжизага ўхшаган бир ҳолатни сездим. Мен унчалик писанд қилмаган, баъзан назаримга илмаган ёзувчи бола кўз олдимда юксалиб, чинакам санъаткорга айланди. Энди мен уни бор бўйи билан, жами фазилатлари билан, ўзбек адабиёти ривожига, мустақил жумҳуриятимизнинг камолига қўшаётган муносиб ҳиссаси билан аниқ кўра бошладим.

Ўткир қандай китоблар ёзгани тўғрисида гапириб ўтириш ортиқча. Улар ўзбек ва қардош ҳалқлар мулкига айланиб кетган. Шундок бўлса ҳам бу истеъодли адабнинг асарларини тилга олмаслик инсофдан бўлмас. «Баҳор қайтмайди», «Қалбингга қулоқ сол», «Нур борки, соя бор», «Дунёнинг ишлари», «Икки эшик ораси», «Тушда кечган умрлар», «Икки карра икки – беш» каби қисса ва романлари, юздан ортиқ дилбар ҳикоялари, комедия ва фожиалари ҳалқ орасида жуда машхур бўлиб кетган.

Тоталитар тузумнинг оқоваси бижғиб, оқиб турган бир пайтда «Ўзбек иши», «Давлат сири», «Дўстлик ҳурматдан бошланади» каби ўнлаб мақолаларни ёзиш учун катта жасорат керак эди. Ўткир

ҳар қандай зарбадан, ҳужумлардан қўрқмай, баъзан ҳатто ҳаётини хавф остида қолдириб, халқ дилида түфён уриб турган гапларни очиқ-ошкора айта олди.

Москва матбуоти тарқатаётган тухмат ва ҳақоратлардан сабр косаси тошган Ўткир Ҳошимов собиқ Компартиянинг XXVIII съезди минбаридан туриб баралла овоз билан уларни фош қилди: «...Ўзбек иши» деган гапни ким ўйлаб топди? Нима учун «Арман иши», «Молдаван иши» эмас-да, айнан, «Ўзбек иши»? Ўзбек нима ёмонлик қилди? Кўшиб ёзишлар бошқа жойда йўқми? «Ўзбек иши» туфайли армиядаги қанчадан қанча йигитларимиз нобуд бўляпти. Темир тобутлар фақат Афғонистондан эмас, Совет Иттифоқининг турли чеккаларидан ҳам келиб туритти. Бизнинг фарзандларимизга «босмачи», «қўшиб ёзувчи», «порахўр» деб қарашяпти ва очиқдан очиқ ўлдиришяпти. «Ўзбек иши» деган ҳақоратли гапни ўйлаб топганлар ҳали тарих олдида жавоб берадилар».

Қаршисида олтин погонли генераллар, маршаллар шоп-шалопи билан тикилиб турган бир пайтда, уларнинг кўзига қараб туриб, шу гапларни айтиш учун ҳеч енгигб бўлмас ирова, жасорат керак эди. Ўткир бу обрўли шахслар олдида эсанкирамади, чўчимади, халқ дардини бор овози билан айта олди. Она халқининг дардига ҳамдард, қувончига шерик бўла оладиган, ҳар қандай мушкул шароитда ҳам уни ҳимоя қила оладиган ижодкоргина меҳрга, иззат-хурматга сазовор бўлади.

«Шарқ юлдузи» жумҳуриятимизда нашр қилинадиган адабий-бадиий, ижтимоий-сиёсий журналлар ичида энг машҳур – оммавий журналдир. Ўткир шу журналнинг бош муҳаррири сифатида актив фаолият қўрсатади.

Улуғ бобомиз Амир Темур шахсига тошлар отилаётган бир пайтда Ўткир у ҳақда қатор мақолалар эълон қила бошлади. Ҳужумлардан, дўқ-пўписалардан чўчимаган бош муҳаррир буюк саркарда фаолиятини изчил ёритишда давом этди. Бир вақтлар бадном қилинган «Темур тузуклари», «Зафарнома» «Кеча ва кундуз» асарлари шу журналда эълон қилинди. Журналда Куръони каримнинг ўзбекча таржимаси осонликча босилгани йўқ. Бу савобли ишга шахсан юртбошимизнинг ўзи раҳнамолик қилгани ва журнал таҳририяти сайъ-ҳаракати билан Аллоҳ қаломи икки йилдан ортиқ вақт ичида нашр этилгани жиддий воқеа бўлди. Ундан олдинроқ эса Ўзбекистон телевидениесида ташкил этилган «Баҳс» кўрсату-

вини Ўткир Ҳошимов қарийб ўн йил бошқарди. «Бахс»да ҳаёти-миздаги ижтимоий мавзулардан ташқари, оила ва муҳаббат масалалари кенг ва қамровли ёритилди. Ҳаммани қизиқтирган масалалар унда дадил ва ҳозиржавоблик билан айтилди. Бу ерда ҳам Ўткир Ҳошимов кимгадир ёқмаслиги мумкин, деган андишага бормай, миллионлаб телетомошибинлар дилидан тилига чиқолмай турган, чирсиллаган гапларни дадил айта олди. Бу кўрсатувлар Ўткир Ҳошимовга катта обрў келтирди. Телеэкран олдида ўтирган миллионлаб киши уни адолат учун курашувчи, жасур ижодкор деб баҳоладилар.

Агар сиз унинг китобларини диққат билан ўқисангиз, ижоди ҳалқ ҳаёти билан нақадар ҳамоҳанг эканига, саҳифалар қатидан нечалаб инсонлар тақдири бош қўтариб чиқишига гувоҳ бўласиз. Унинг ёзганлари афсона ҳам, эртак ҳам эмас. Соф ҳақиқат. Китобхон унда ё отаси, ё акаси ва ёки яқин бир кишиси билан учрашади. Уларнинг кураш ва меҳнатда ўтган тарихларига рўбарў келади. Оламдан ном-нишонасиз ўтиб кетган, аммо шон-шараф билан яшаган кишилар кўз олдимиизда пайдо бўлади. Уларнинг қувончларидан кўксимиз қалқиб-қалқиб кетади, ғаму андуҳларидан кўзларимиздан ёш тўкилади.

«Икки эшик ораси» романи қайта-қайта нашр қилинганига қарамай, китоб дўконларида туриб қолмади. Талаш бўлиб кетди-я. Романда уруш ва урушдан кейинги йиллардаги қишлоқ ҳаёти, урушнинг жами оғирликларини, маҳрумларини азamat елкасида кўтарган, ўзи емай топганини жангчилар оғзига тутган, фидойи дехқонлар жасорати мадҳ қилинган. Никоҳ кечасининг эртасига куёвини жангга жўнатиб келинлик либосини иш кийимига алмаштирган чиллали келинларнинг оғир, машаққатли меҳнатлари, ота ўрнига кетмон қўтариб далага чиқсан норасида гўдаклар, ўғли ўрнига ер чопган букчайган чол-кампирлар кўз олдингизда пайдо бўлади. Сиз уларнинг овозини эшитасиз, саратон жазирасида терлаган серажин юзларини кўрасиз. Уларнинг қаддини тик ушлаб турган куч ғалабага ишонч эди. Уруш йўлларида нигорон кўз тиккан чол-кампирлар тонг отгунча: Эй, Худо, ўқлар тагида юрган болагинамни ўз паноҳингда асра, дея дуо қиласдилар. Очлик, юпунлик, айриликлар, эрта ҳазон бўлган муҳаббат аламлари, жудолик, қарғиш, йиғи, ғазаб – ҳамма-ҳаммаси романда ниҳоятда ишонарли тасвиранган.

«Икки эшик ораси» романи ўзбек адабиёти хазинасида ўз ўрнини топган асарлардан бири бўлиб қолди. Бу асар халқлар бошига кулфат солган иккинчи жаҳон уруши тўғрисида ёзилган аччиқ ва аламли йилномадир.

Ўткир Ҳошимов халқимизнинг фидойи, ростгўй ёзувчиси сифатида ҳамиша ўз мавзуи бўлиб келган халқ ҳаётини узлуксиз кузатади ва унда айтиш ниҳоятда зарур бўлган нуқталарини қаламга олади.

Ватанимизнинг мустақилликка эришиши адиб ижоди учун янги имкониятлар берди. Шўро замонида ёзилмаган қонун бор эди. «Совет адабиёти ва драматургиясида комедия ёзиш мумкин, драма ёзиш мумкин, аммо фожиа ёзиш мумкин эмас. Чунки шўро ҳаётида фожиа йўқ!» Холбуки фожиа ҳар қадамда бор эди. Саксонинчи йилларда марказдан келиб Ўзбекистонда қирғинбарот ўтказган Гдлян ва Иванов деган қаллоблар қилган хунрезликлар ҳам бориб турган фожиа эди. Ўткир Ҳошимовнинг «Қатағон» фожиаси «ўзбек иши» деган бўхтон ва унинг қурбонлари ҳақидаги шиддатли асар бўлди. Фожиа бугунги ёш авлодни ота-боболарнинг бошига тушган кечаги фожиалардан огоҳ бўлинг, истиқлолнинг қадрига етинглар, деб огоҳ қилаётган хитобга ўхшайди.

Истиқлол йилларида ёзилган «Тушда кечган умрлар» романи эса етмиш йил давом этган адолатсизликларни, топталган қисматларни рўй-рост, бадиий теран акс эттирган асардир. Пишиб етилган анорни кафтиңгизга қўйиб, яхшилаб тикилганмисиз? Доналари пўстини туртиб туради. Сал вакт ўтса, шу қалин пўстлар ички турткilarга дош беролмай, ёрилади. Ўткирнинг ихчамгина «Тушда кечган умрлар» романида ҳам воқеалар шунчалик зички, муқовасини ёриб юбораман, деб турганга ўхшайди. Романинг анчагина бобларида афғон уруши тасвирланади. Адиб бу адолатсиз урушнинг бутун фожиасини, ғайриинсонийлигини рўй-рост тасвирлайди. Мина портлаганда қўли бир томонга, боши бир томонга учиб кетган йигитнинг жон таслим қилиши, юртини соғинган аскарнинг нуқул ўлимни туш кўриши, ҳимоясиз афғон қишлоқларининг кули кўкка совурилиши манзаралари ўқувчи қалбини ларзага солади. Роман қаҳрамонларидан бири Рустам ўз «интернационал» бурчини ўтаётганидан мамнун эди. Бироқ у бу қонли манзаралар қархисида ўйга толади. Бу уруш халқларга фақат кулфат олиб келиши мумкинлигини тушуниб қолади. Бироқ у ўз жонини сақлаш учун қон

тўкиши шарт. Акс ҳолда унинг ўзи қурбон бўлади. У бегуноҳ афғон аёлини отиб қўйганда қанчалар гуноҳга ботганини англайди. Изтироб, алам оташида ёнади. Унинг фожиаси бу билан тугамайди. Оғир яраланиб уйига қайтганда яна бир даҳшатли фожиа устидан чиқади. Бир умр меҳнатдан боши чиқмаган, партия қаерга ташласа ўша ерни меҳр билан гуллатган, қўша-қўша орденлар олган отасини «қўшиб ёзувчи» сифатида қамашганини эшитиб, ҳайрону лол бўлиб қолади. Дунё кўзига қоронғу бўлиб кетади. Рустамнинг адолат қидириб, елиб-югуришлари бехуда кетади. Ҳеч ким унинг арzdодига эътибор қилмайди. Қайтага «Зўравонлигингни афғонга бориб қил, бу ерда кетмайди», деб эрмак қиладилар. У икки йил йўлига интизор кўз тиккан севгилиси Шаҳнозага уйланганида бутун ҳаёти фожиага айланганини билади. У афғондан «яроқсиз» эр бўлиб қайтганини сезади. Рустам севган қизини баҳтли қилишдан мосуво бўлган. Йигит киши учун бундан ортиқ фожиа бўлиши мумкинми?

Отасини тухматлардан қутқаришга ожиз, севгилисини баҳтли қилишдан ожиз Рустам ўз жонига қасд қилишдан бошқа илож тополмайди. Ёзувчи фожиаларнинг илдизлари чуқур, ҳамма гап мустабид тузумнинг моҳиятида эканини очиб ташлайди. Романдаги Комиссар образи орқали сўнгги эллик йил ичида юз берган золимликлар намоён бўлади. Коллективлаштириш йилларидағи сургунлар, 37– ва 50– йиллардаги қатағонлар, афғон уруши, ва ниҳоят «ўзбек иши» деган жирканч тухмат, биз сиғинган тузум адолатсизлик ва зулм пойдевори устига қурилганини ва нураб, ер билан яксон бўлиш арафасида охирги нафасини олаётгани жуда ишонарли тасвиrlанганига икрор бўламиз. Комиссар ҳам ўзи суюнган тузум билан баробар нураб бораяпти. Роман охирида ғалати бир эпизод бор. Комиссар фаррош Курбоной билан шунчаки гаплашиб қолади. Бу аёлнинг бошига ёғилган кулфатларга шу одам сабабчи. Бир вақтлар эшон деб бобосини, халқ душмани, деб дадасини қаматган. Онасини зўрлаган. Онаси номусга чидолмай, ўзини осган. Курбонойнинг бу мараз кимсани кўрарга кўзи йўқ.

Улар орасида шундай сухбат бўлиб ўтади:

- Ўзингиз тузукмисиз? – деди Курбоной бошқа гап тополмай.
- Менми? – Комиссар кулди. – Хэх-хэх-хэх! Қачон ўласан, демоқчимисан? Овора бўласан! Мен ўлмайман. Хэх!..

Назаримда, бу гап тагида жуда катта маъно яшириниб ётибди. Ёзувчи бизни огоҳ қиляпти. Етмиш йиллик умримиз-ку қўрқинчли туш каби ўтди. Зулм ва мустабидликка асосланган тузумнинг комиссарлари ҳали осонликча жон таслим қилмайди, ўғри мушукдек пайт пойлаб ётади, хушёр бўлайлик, Ватан мустақиллигига нияти бузуқ, ёмон қўзлардан асралик, демоқчи.

Ўқувчи бу асарни қоқинмасдан, туртинмасдан, диққати сусаймасдан ўқиб чиқади. Бир неча саҳифа ўқиганингиздан кейин кўнглингизга қандайдир мунгли куй кириб қолганини, бу куй то охирги саҳифаларгача сизни таъкиб қилаётганини сезмайсиз. Асар қаҳрамонлари тирик инсонлардек кўз олдингиздан ўтади. Овозларини ҳам эшитаётгандек бўласиз. Бирига муҳаббат қўяси, биридан нафратланасиз.

Бундай асарлар китоб жавонида ётиб қолмайди. Жуда тез қўлма-қўл бўлиб кетади. «Тушда кечган умрлар» романи 75 минг нусхада босилиб, жуда тез тарқаб кетгани ҳам, кейин ҳам қайта-қайта нашр этилгани бу гапимни тасдиқлади.

Ўткир – сўз санъаткори. Юқорида тилга олганимиз романларида халқ тили шунчалар равон, шунчалар ифодалики, ҳар бир сатри шеърдай равон оқади.

Ўткирнинг атиги учта асарини тилга олдим, холос. Телевидение орқали неча марталаб намойиш қилинган, миллионлаб томошабинларга манзур бўлган «Баҳор қайтмайди», «Нур борки, соя бор», «Инсон садоқати» каби асарлари, ўнлаб дилбар ҳикояларини томошабин ва китобхонлар хукмига ҳавола қилдим. Айниқса, «Дунёнинг ишлари» асарини қисса эмас, достон деб аташни истардим. У қўшиқдай ўқилади. Уни ўқиб туриб, ўз оналаримизни ўйлаб кетамиз. Шу мушфик, шу жафокаш оналаримиз олдидаги бир умр узиб бўлмас қарзларимизнинг ақалли биттасини уза олдикми, деган бир андиша, бир савол кўз олдимизда қўндаланг туриб олади. Қисса бизни инсофга, инсонни қадрлашга, хурмат қилишга чақиради.

Ўткир фақат талантли ёзувчигина эмас, ажойиб дилбар инсон ҳамdir. Мен у билан жумҳуриятимизнинг ҳамма вилоятларини, туманларини неча марталаб айланиб чиқканман. Каерга бормайлик, уни одамлар ўраб олади, китобларидан олган таассуротларини тўлиб-тошиб гапириб берадилар ва албатта, у билан дўст-қадрдон бўлиб қоладилар. Унинг суҳбатига орзуманд бўлганлар доираси

борган сари кенгайиб бораверади. Эсдалик учун суратга тушиш ниятида фоточини чақириб келадилар. Айниқса, ёш китобхонларнинг шундоқ машҳур ёзувчи билан сухбатлашганларидан кўзлари яшнаб кетади.

Ҳар галги сафаримизда дўстларимиз қаторига дўст қўшилади. Улар Тошкентга келиб унинг уйида меҳмон бўладилар. Ўз юртларидаги янгиликлардан гапириб берадилар. Ва шу билан бирга ёзувчининг янги эълон қилинган асарларидан олган таассуротларини ҳам тўлиб-тошиб айтиб берадилар.

Бир йили Ўткир шоир Эркин Воҳидов билан Қашқадарё вилояти туманларида китобхонлар билан учрашувга боради. Шундай учрашувлардан бири Мирақида бўлади. Кўллари меҳнатда қадоқ бўлиб кетган бир колхозчи аёл ўрнидан туриб, йиғлаб-йиғлаб шундай дейди:

– Ҳозир Худодан ваҳий келсаю, «сенинг пешонангда яна йигирма йил яшаш бор, мабодо умрингнинг қолган қисмини бировга беришга тайёрмисан», деса ўша йигирма йил умримни шу ука-ларимга бўлиб беришга тайёрман, деб жавоб қилардим.

Ўша аёлнинг қўлида муқовалари қийшайиб, саҳифалари сарғайиб кетган «Дунёнинг ишлари» қиссаси бор эди. Афтидан у қиссани шу бугун ўқиб тутатган. Сўнгги саҳифаларни ўқигану йиғинга келган.

...Кува туманида китобхонлар билан учрашув бўлганди. Ўшанда Мушаррафхон деган қора кийинган бир аёл ўрнидан туриб Ўткирнинг олдига келди.

– Болам, мен ху анаву мактабда фаррошман. Гўдаклар ивир-ситган синфларни ювиб, тозалайман. Сенинг онанг Пошша опа ҳам фаррош бўлган эканлар, илоё жойлари жаннатда бўлсин. Буни мен мактаб кутубхонасидан олган манабу китобни ўқиб билдим. У қўлида ушлаб турган «Дунёнинг ишлари» китобини кўрсатди. – Инсоннинг боши тошдан бўлар экан, бир ўғлим Афғон урушида нобуд бўлди, чидадим, чидамай иложим қанча. Кел болам, ўғлим ўрнига ўғил бўл. Ёзувчи ўғлим бор, деб юпаниб юрай... У шундай деб нимчасининг қўйнидан марғилон нусха дўппи олиб, кўзида ёш билан, илоё бошинг омон бўлсин, деб Ўткирга кийдирди.

Бир неча йил аввал Фарғона водийси туманларида китобхонлар билан учрашувлар бўлди. «Ўзбекистон» туманининг маркази Яйпандаги учрашувда «Ғаниобод» давлат хўжалигининг пилла

бригадаси бошлиғи Жаъфарали Пайғамов деган йигит ҳам сўзга чиқиб Ўткирнинг асарларини севиб ўқишини, китобларининг ҳаммасини авайлаб сақлашини айтди. У бир адабиёт мухлиси сифатида Ўткир учун пландан ташқари яна бир қути пилла қурти боқишига жамоа олдида сўз берди. Орадан икки ой ўтиб Жаъфаралидан Ўткирга телеграмма келди. Яна Ўткир номидан Тинчлик жамғармасига пул ўтказгани тўғрисида почта квитанциясини ҳам юборган эди.

Мен Ўткир Ҳошимовни жасоратли, қўрқмас, ҳақиқатни ҳар қандай шароитда ҳам айта оладиган ёзувчи деб атадим. Бу таъбириимни иккиланмай ҳар ерда дадил айта оламан. Бор бўйини кўрмоқ учун сал орқага чекиниб туриб Ўткирга қарадим. Шунда неча йиллар бирга ижод қилган, бирга сафарларда юрган қадр-донимни бўй-бости билан, ўзини ардоқлаган халқига қилган хизматлари билан аниқ кўрдим. Олдингдан оқкан сувнинг қадри йўқ. Шу пайтгача менга оддий ёзувчи бўлиб кўринган бу ижодкор тўғрисида шунча гап биларканман, билганларим шунчалар кўп эканки, сизга фақат бир шингилиниги гапириб бердим холос.

Халқ ёзувчиси, Давлат мукофоти совриндори «Буюк хизматлари учун» ордени соҳиби Ўткир Ҳошимов қўлидаги кичкинагина, аммо тоғларни қўпоришга қодир қалами билан она халқига, мустақил юртимиз хизматига доим шайдир.

*Озод ШАРАФИДДИНОВ,
Ўзбекистон Қаҳрамони, профессор*

ЭЛ АРДОҚЛАГАН АДИБ

Бу воқеа Қувадаги бир колхозда рўй берганди. Дала ший-понида, тушлик вақтида китобхонлар билан учрашув бўляпти. Авжи саратон. Қуёш роса забтига олган. Чоққина ҳовуз теварагидаги толлар ҳам, дид билан саралаб экилган анвойи гуллар ҳам иссиқдан толикқандек қилт этмайди. Лекин учрашувга тўпланганларни жазира машина шаштидан қайтаргани йўқ. Олис бригадалардан ҳам, ҳатто қўшни хўжаликлардан ҳам одамлар келишган. Бир маҳал, одмигина кийингин ўрта ёшлардаги аёл минбарга кўтарилиди. Чехрасида чўнг бир мусибатнинг муҳри илғаниб турган бу аёлнинг исми Мушарраф ая экан.

— Ўткиржон, сиз менинг ўғлимсиз, — деди у ҳаяжон ичидан. — Ҳайрон бўлманг, менинг ўғлим бор эди. Афғондан темир тобути келди. Йиғлай-йиғлай кўзимда ёш қолмади. Мусибат мени енгиши аниқ эди. Бир куни қўлимга бир китоб тушди. "Дунёнинг ишлари". Уни ўқидиму руҳим енгил тортгандай бўлди. Аёлнинг, Онанинг улуғлигини яна бир бор ҳис қилдим. Шунда сизни ўғлим ўрнига ўғлимдек қабул қилдим. Аллоҳдан ўғлим яшаёлмаган умрини сизга бағишлишини тиладим. Шу тилак билан сизга атаб дўппи тикдим...

Мушарраф ая гапини тугатиб, Ўткирнинг ёнига борди ва оқ докага ўралган дўппини олиб, бошига кийгизди. Йўқ, гулдурос қарсаклар янгарамади, кимлардир бўғзига келган йиғини ютиб, кўзларини пирпиратди, кимларнингдир кўзларига ёш қалқди.

Оддий қишлоқ аёлининг адибга бунчалик меҳри мени ҳанузгача ҳаяжонга солади. Бора-бора оддий одамларнинг Ўткирга бағоят эҳтиром кўрсатишига кўнишиб ҳам кетдим. Чунки ҳар йили камида бир-икки марта бундай ҳодисаларнинг гувоҳи бўла бошладим... Бир куни Жаъфарали Пайғамов деган одамдан телеграмма келди. У киши Ўткирнинг номига атаб бир қути ортиқ пилла тутипти ва унга олган 828 сўм пулни Ўткирнинг номидан Тинчлик фондига ўтказипти. У пайтларда 828 сўм катта пул эди. Бир куни йўлимиз Қўқонга тушганда, Жаъфаралини излаб топдик. У шундоққина Қўқоннинг биқинида, "Ўзбекистон" туманидаги Ғаниобод совхозида истиқомат қилар экан. Уйига бордик. Хийлагина аёл-

манд одам экан. Ҳовлида бир гала бола-бакра чангга беланиб ўйнаб юришипти. Ҳовли-жойнинг ўзи ҳам ҳашаматли эмас. Ҳар қандай, 828 сўм зинҳор-базинҳор ортиқчалик қилмайдиган рўзгор. Гап айланиб, Жаъфаралидан нега бундай қилганини сўрадик. "Билмасам, – дея кулибгина жавоб берди у. – Шу ёзувчи менга ёқади. Ҳурматимни билдириб қўяй дедим-да..."

Бир гал Самарқанддан қайтаётиб, Ғаллаоролда тўхтадик. Бизни шу туманлик Маматқул aka билан таништиришди. Ўрта ёшлардаги қотмадан келган бу одам тумандан беш-олти чақирим нарида, сувсиз адирлар бағрида боғ қилипти. Маматқул aka бизни боғига олиб борди. Ярим гектарча жойда турфа дaraohлар яшнаб кўкариб ётипти. Маматқул aka уларни кўкартириш учун роса меҳнат сарф қилипти – аввал адирнинг тепасида қор ва ёмғир сувлари тўпланадиган сардоба, сўнг артезиан қудук қазипти, унинг устини ёпибди ва катта-кичик қувурлар орқали сувни қуйига оқизиб, ниҳолларга тарапти... Лекин бизни бошқа нарса ҳайрон қолдирди – шунча меҳнат сарфлаб барпо қилган боғини Маматқул aka Ўткирнинг номига атапти, боғнинг кираверишидаги шийпон пештоғига эса адебнинг суратини илиб қўйибди. Табиийки, ўзи қурувчи бўлган, адабиётга ишқи тушиб қолган Маматқул aka Ўткирнинг ҳамма асарларини ўқиган, ҳамма сухбатларини тинглаган ва унга чин юракдан тан бериб, ихлос қўйган экан.

Бундай мисолларни яна кўплаб келтириш мумкин. Уларнинг кўпчилигига ўзим гувоҳ бўлганман. Қарангки, жумҳуриятимизнинг ҳар хил вилоятларида, шаҳар ва қишлоқларида, тоғли жойларда ва водийларда, ёшлар ва кексалар, эркаклар ва аёллар ўртасида касби кори адабиётга алоқадор одамлар ҳам, адабиётдан узоқ турадиганлар ҳам Ўткирни ана шундай самимият билан севадилар. Кимларнингдир "уюштириш"и, кимларнингдир буйруғи билан эмас, ўз қалбларининг ами билан севадилар.

Ўткир Ҳошимов – эл ардоқлаган адаб. Унинг бахти шундаки, у адабиётга кириб келганидан бери ижодда ғирромлик ва мўлтонилик йўлидан юрмади, виждонига хиёнат қилмади, истеъдодини шахсий манфаатларига қурбон қилмади. Унинг қалбига қулоқ солмай, виждонига хилоф равишда ёзган, ёлғонга ва ёмонликка хизмат қилувчи ёки китобхонни лоқайд қолдирувчи биронта асари йўқ.

Ўткир Ҳошимов 1941 йилнинг 5 августида Тошкентнинг Дўмбиравот деган жойида туғилди. Унинг аждодлари ўз замонасининг

етук инсонлари бўлишган. Бобокалони Абулқосимхон эшон Чор Россиясининг Туркистонга қилган босқинига қарши турган уламолардан бўлиб, ўн тўққизинчи аср ўрталарида ўз маблағига катта мадраса қурдирган. Унда юздан ортиқ талаба илм олган. Абулқосимхон эшон ахли илмнинг ётогидан тортиб кундалик турмуши учун нафака (стипендия) ҳам тўлаб борган. Бу даргоҳда Абдулла Қодирий ҳам ўқиган, таҳсил кўрган. Абулқосимхон мадрасаси ноёб тарихий обида сифатида ҳозир ҳам сақланиб турибди.

Бўлажак адабнинг отаси Атаулла Ҳошимов эса оддий ишчи бўлган – у умрининг қўп қисмини Тошкент тўқимачилик комбинатида, кейин шу комбинат қошидаги пионерлар лагерида ишлаб ўтказган. "Отам эскича алифбедаги китобларни ҳам, замонавий газеталарни ҳам муттасил ўқиб борар, камгап, хийла тажанг, аммо ниҳоятда ҳақпараст одам эди... Бирон ноҳақликни кўрса, лоп этиб ёниб кетар, "падарингга лаънат", "кўрсатиб қўйиш керак", деб шовқин кўтарарди". Отасидаги стихияли ҳақпарастлик кейинчалик фарзандига кўчган бўлса, асарларидаги жиғибийронлик, ҳақсизликни ёниб қоралаш,adolatни ҳимоя қилиш шу отамерос ҳақпарастликнинг оқибати бўлса не ажаб.

Ўткир Ҳошимов "Машаққатли сафар" деган таржимаи ҳолида оиласидаги отаси билан боғлиқ яна бир ҳолатни алоҳида таъкидлайди. Бу ҳолат чиндан ҳам ғоят ибратли бўлгани учун унга тўхтаб ўтишни маъқул билдим: "Отамдан қаттиқ ҳайиқар эдик, – деб ёзади адаб. – Отам бирон марта ҳам бир тарсаки урган эмас (оиласа фарзандлар бир қиз, тўрт ўғил бўлишган – О.Ш.). Отани қаттиқ иззат қилишни онам ўргатган: "Ҳозир аданг келадила, уйни супуриб қўй", "Адангни жаҳллари ёмон, тинч ўтиинглар", "Адангни кетмонига тегма", "Адангни соатига қўл тегизма..." Билмадим, ҳозирги замонавий оиласарга бу ҳолат "феодализм" бўлиб туюлар. Аммо бизнинг оиласизда ота шахсига сифиниш фарзандларга зиён келтирганини эслай олмайман".

Бўлғуси адабнинг онаси Ҳакима Ҳошимова уй бекаси эди. Бу аёл мадраса кўрмаган бўлса ҳам, ғоятда зеҳни ўткир, жуда хушфеъл аёл бўлган. "Онам эса, аксинча, ниҳоятда ювош, жуда меҳрибон эди. Қўшнининг мушуги туғса ҳам, жони оғригандир, деб ачинар, кўчада бирон бола йиғлаб ўтирган бўлса, албатта, тепасига бориб бошини силар, бирон сабаб билан биз – болаларни қарғаса, ўзи ҳам йиғлаб юборар, ўша заҳоти кўнглимизни олишга

ҳаракат қиласы". У нихоятда фариштали, диёнатли аёл бўлгани учун маҳалла-кўйда уни ёшу қари баравар хурмат қиласы. Одамлар ўртасида бу ажойиб инсон "Пошша ойи" деган ном билан шуҳрат топганди. Айтганча, бу киши қанақа одам бўлганини Ўткирнинг ўзи "Дунёнинг ишлари" деган китобида мендан юз чандон ўтказиб, маҳорат билан тасвирлаб қўйган.

Ўткир маҳаллада ҳашар йўли билан қурилган бир қаватли мактабда ўқиган. Бироқ унинг мактабдаги ҳаёти ҳам осон кечган эмас. У мактабга борганида уруш тугаганига бор-йўғи уч йил бўлган, мамлакат оғир жароҳатларини ҳали даволаб улгурмаган эди. Кийим-кечакнинг тайини йўқ, қорни бир кун тўқ бўлса, бир кун оч, чалакурсоқ. Сал тикроқ болалар ўқишдан кўра рўзғор тебратишга қарашишга мажбур, улар ҳар куни бўлмаса ҳам, кунора ё уч кунда бир эшак миниб, олис Бешёғоч бозорига қатнайди, узумми, нокми, олмами сотиб, рўзғорга керакли нарсаларни харид қилиб келишади. Бироқ шароит ҳар қанча оғир бўлмасин, ўқиш мароқли эди. Ўқиши мороқли қилганлар эса, биринчи навбатда, ўқитувчилар эди. Улар ҳам ўқувчиларига ўхшаган юпун, чалакурсоқ эдилар, улар ҳам рўзғор тебратишлари, бола-чақа боқиши дардида бошлирини минг тешикка урмоқлари лозим эди. Лекин улар, айни чоқда, ўз ишига дил-дилдан берилган, болаларни жон-дилидан яхши кўрадиган, уларга ўзларининг фарзандлариdek муомала қиладиган, ёшларга таълим-тарбия беришни муқаддас иш деб биладиган фидойи одамлар эдилар. Ўткир мактабдаги ўқитувчиларини қайта-қайта эҳтиром билан тилга олади: "...Ўқитувчиларимиз биз учун идеал эди. Кийиниши ҳам, юриши ҳам... Айни пайтда домларимиз дарс ўтатуриб темир печкага ўтин ташлаб қўйишдан ҳам эринмасди. "Алифбе"ни ўргатган Маъсуда опани, фақат директор эмас, ҳақиқий тарғиботчи бўлган Одил акани, Зухриддин ака, Абдуусмон ака, Кўчқор ака, Марям опа, Абдували ака деган ўқитувчиларимни унута олмайман".

Ўткир болалигига учувчи бўлишни орзу қилган бўлса-да, мактабда ўқиб юрган кезлариданоқ адабиёт уни асир эта бошлаган. У биринчи шеърни 5-синфда ўқиб юрганида ёзди. Шундан кейин борган сари ундаги истеъдод куртак ёза бошлади ва унда ёзиш иштиёқи кучайгандан-кучая борди. Шунинг учун ўткир мактабни олтин медаль билан битиргач, "ёзувчи тайёрлайдиган" ўқув юртига кириш кўйига тушди. Бундай ўқув юртини излай-излай, Ўткир

Тошкент дорилфунуннинг филология факультетига, аниқроғи, унинг журналистика бўлумига борди. Бу ерда аввал сиртдан ўқиди, кейин кундузги бўлумга ўтди ва 1964 йилда уни журналист дипломи билан битириб чиқди. Аммо унинг меҳнат фаолияти аввалроқ бошланган эди – отанинг вафотидан кейин рўзғор ишлари ночорроқ аҳволга тушиб қолган ва ўғилларнинг қўлидан иш келадиганлари меҳнат қилишга мажбур бўлганди. Кўпгина машҳур ёзувчиларнинг ҳаёт йўли билан танишсангиз, ёшлиқда уларнинг қилмаган ишлари қолмаганини, тирикликининг ҳар хил кўчала-рига кириб чиқишига мажбур бўлганликларини билиб оласиз. Ўткирда ҳам шундай бўлган. У ишни бир газетада курьер вазифа-сидан бошлади. Буни ўзимизнинг тилга кўчирсак, "дастёр" дегани бўлади. Кейин корректорга ёрдамчи бўлди, ундан адабий ходим-ликка кўтарилди. Фақат 1966 йилга келибгина Ўткир айлана-ай-лана ўз қозиғини топган – уни "Тошкент оқшоми" гезатасида ада-биёт бўлимининг бошлиғи этиб тайинлашгандан сўнг, шу лаво-зимда роса ўн олти йил меҳнат қилди. Кейин эса Ғафур Ғулом но-мидағи Адабиёт ва санъат нашриётида бош муҳаррир муовини бўлди. 1985 йилдан 1995 йилгача "Шарқ юлдوزи" журналида бош муҳаррир бўлиб ишлади. 1995 йилдан 2005 йилгача Ўзбекистон Республикаси Олий Мажлисида Матбуот ва ахборот қўмитасини бошқарди. Истиқлол замонига мос қатор қонунларни яратишда фаол иштирок этди.

Ўткир Ҳошимовнинг ижоди анча аввал бошланган бўлса ҳам, "Пўлат чавандоз" деб аталган биринчи китобчаси 1962 или чиқ-қан. Лекин адабнинг ўзи ижоди бошланган йилни 1963 йил деб ҳи-соблайди. Негаки худди шу или "Шарқ юлдози" журналида унинг "Чўл ҳавоси" деб аталган ихчамгина қиссаси босилди-ю, Ўткир бир зумда китобхонлар орасида машҳур бўлди-қўйди. Ўткирнинг асар-ларини кутадиган, улар ҳақида талашиб-тортишиб баҳс юритади-ган турфа хил саволларга шу китоблардан жавоб излайдиган ихлос-манделар армияси пайдо бўлди. Мана, ёзувчининг адабиёт дар-гоҳига қадам қўйганига анча йиллар бўлди. Шу йиллар мобайнида унинг етмишга яқин китоби нашр қилинди. Буларнинг бир қисми рус ва бошқа қардош тилларда, ажнабий тилларда чоп этилди. Китобларнинг умумий тиражи икки миллион нусхадан ошиб кетди. Икки миллион нусха-я! Бу китобларнинг ҳаммаси аллақачон тар-қаб кетган – бугун китоб дўконларидан унинг асарларини қидириб

топиш амримаҳол. Шу китоблар ёнига Ўткирнинг тўртта драмасини қўшсак, ўнлаб асарларни таржима қилганини айтсак, ўнлаб публицистик асарлар ҳам яратганини эсласак, унинг ижодий фаолияти нечоғли самарадор ва салмоқли эканлигига амин бўламиз. Ҳа, сўнгги эллик йил мобайнидаги ўзбек адабиётини Ўткирнинг ижодисиз тасаввур қилиб бўлмайди. Адиб ижоди юксак тақдирланди. "Баҳор қайтмайди", "Қалбингга қулоқ сол" қиссалари учун Республика ёшлар мукофотига, "Дунёning ишлари" китоби учун Ойбек номидаги адабий мукофотга, "Икки эшик ораси" романни учун эса Давлат мукофотига сазовор бўлди. Ўткир Ҳошимов Ўзбекистон халқ ёзувчиси деган юксак унвон, "Меҳнат шуҳрати", "Буюк хизматлари учун" орденлари билан тақдирланди.

Ўткир Ҳошимов ҳамма қатори оиласи. Унинг рафиқаси Ўлмасхон Ҳошимова Ўткир билан бирга ўқиган. Кўп йиллардан бери Тошкент Педагогика коллежида дарс беради. Ўғли Фарруҳ, қизи Юлдуз ҳавас қилса арзигулик фарзандлар. Юлдуз ҳиндшунос ва юрист. Ўзбекистон телевидениесида олиб борилган жиддий кўрсатувлар муаллифи, Фарруҳ филолог ва иқтисодчилик касбини чуқур эгаллаган. Ўткиржон билан Ўлмасхон бир неча набиранинг меҳрибон бобоси ва бувиси...

* * *

1963 йилнинг кеч кузи. Эрталаблар тушган қиров қишини яқинлаб келаётганидан дарак берса-да, пешинга бориб ҳаво илиб кетади. Уфқа туташ ҳудудсиз пахта далаларида талабалар меҳнат қилишяпти. Бўйи ўртадан пастроқ, яноқлари бир оз бўртиб чиқкан, жиккаккина йигитча бошини кўтармай пахта тераяпти. У ҳар ҳамласида лўппи-лўппи очилган беш-олтита кўсакнинг пахтасини олади-да, бўз фартуғига солади. Ўн-үн беш қадам шу алфозда боргач, қаддини ростлаб, бир керишиб қўяди. Кейин яна теримга тушиб кетади. Шу пайт узоқдан бир қора кўринди. Дам ўтмай яқин келди. Ўткир таниди. Бу – икки кун аввал жавоб олиб, уйига кетган курсдош жўраси Тўлқин Алимов эди.

– Ўткиржон, суюнчини чиқаринг! – деди жўраси. – Сизга Абдулла Қаҳҳордан хат келибди. Очишга қўлим бормай, уйга ташлаб келдим.

Ўткир севинчдан ўзини қўйгани жой тополмай қолди. Гарчанд ҳали хатни ўқимаса-да, Абдулла Қаҳҳордек алломадан хат келиши-

нинг ўзи унинг учун байрам эди. Икки курсдош улуғ адибнинг мактубини пахтадан қайтгач, ҳаяжондан қўллари титраб ўқидилар.

"Ўткир!

"Чўл ҳавоси"ни ўқиб суюниб кетдим. Бирдан лов этиб аланга билан бошланган ижоднинг келажаги порлоқ бўлади, қисса жуда соф, самимий, илиқ, табиий, роҳат билан ўқилади.

Қиссанинг хат шаклида бўлиши кўп жойларда ритмни бузади, сизни чеклаб қўяди. Ҳикоя биринчи шахсадан олиб борилса ҳам шундай бўлар эди. Буни ўйланг, ҳисобга олинг.

Шу аланга ҳеч қачон пасаймасин, ижодингиз ҳеч қачон тутамасин!

Хурмат билан: Абдулла Қаххор"

Ўткир суюнганидан ўзини қўярга жой тополмай қолди – гўё бирдан бўйи ўсиб кетгандай, қўлини чўзса юлдузларга етадигандай ҳис қилди. Ахир, кимсан – Абдулла Қаххордан ҳар куни мактуб олавермайсан-да! Сени адабиётимизнинг "улуғвор чинори" деб таърифи кетган устоз ёзувчи тан олиб турипти-я!

Чиндан ҳам "Чўл ҳавоси" мақтаса мақтагудек эди. Қисса ёшлар ҳаётига бағишлиланган бўлиб, унда илк муҳаббат, тотли висол онлари, дастлабки изтироблар ҳақида ҳикоя қилинган эди. Бу кичик қисса журналда эълон қилиниши билан кўпчилик ёшларнинг эътиборини жалб қилди, унинг тўғрисида қизғин баҳслар бошланди. Шунинг учун Абдулла Қаххорнинг бу қиссага эътибор берганига ажабланмаса ҳам бўлади. Лекин шундок бўлса-да, барибир савол туғилади: ёшларга бағишлиланган, уларнинг ҳаётдаги дастлабки мустақил қадамларини, илк изланишларини тасвирлаган ҳикоя ва қиссалар, ўша кезларда жуда кўп бўлмаса ҳамки, ҳар ҳолда бор эди. Нега энди Абдулла Қаххор уларнинг ичидан Ўткирникини ажратиб олди? Услубининг равонлигими? Тилининг дилраболигими? Баёндаги самимиятми? Айтмоқчи бўлган гапининг салмоқдорлигими? Қахрамонларининг инсоний жозибасими? Тасвирланаётган ҳодисаларини яхши билишими? Эҳтимол... Эҳтимол, шуларнинг бири, ёхуд бир нечаси, ёки ҳаммаси жам бўлиб, катта ёзувчининг завқини қўзғагандир. Яна савол туғилади: аслини олганда, бадиий асар нимаси билан кишини ром қиласи?

Ёки "ижод" деган нарсанинг бирор кўзга чалинмас сири борми? Бор бўлса, бу сир нимада?

Жуда кўп одамлар санъатининг сири борлигини ҳеч иккиланмай тан олишади ва бу сирни истеъдод деб ҳисоблашади. Ўтмишда ҳам, бизнинг замонамиизда ҳам минглаб мутафаккирлар, зукко ақл эгалари шу "истеъдод" деган нарсанинг моҳиятини аниқлашга, унинг қаердан келиб чиқишини билишга, табиатини белгилашга уринишган. Айниқса, шоирлар, адиллар, мунаққидлар бу чистонни чақишига кўп уринганлар. "Истеъдод" деган нарсага берилган таърифлар бир жойга жамланса, бир неча жилдлик китоб бўлади. Ўткирнинг ўзи ҳам бу масалада, анча бош қотирган. У ёзади: "Бир тоифа одамлар бор. Мен ҳаётда кўп нарса кўрдим, энди китоб ёзсанм бўлаверади, дейди. Яна бир тоифа бор. Мен кўп китоб ўқидим, илмим етарли, ёзувчилик қиласерсанм бўлади, дейди. Иккала фикр ҳам хато. Кўп нарса кўрган билан, кўп нарса ўқиган билан одам ёзувчи бўлиб қолмайди. Бунинг учун талант керак. Талантнинг биринчи белгиси – чидаб бўлмас дард демакдир. Дард эса ҳавас эмас, зарурат!"

Ўткир ҳақида ёзилган қатор мақолаларда адабнинг жозиба сирини очиб беришга интилиш бор. Мунаққидлар адаб услубининг энг жозибали, энг ярқироқ томони сифатида, асарларига ажаб бир тароват баҳш этиб турган омил сифатида адаб қаҳрамонларини бевосита ҳаётдан олишини, тасвирлаётган воқеалари ҳам ҳаётда рўй берган ёхуд рўй бериши мумкин бўлган воқеалар эканини, хуллас, адаб ҳамиша ҳаёт ҳақиқатига оғишмай амал қилишини айтишади. Бинобарин, ёзувчи қанчалик ҳаётга ўхшатиб ёзса, шунча яхши. Бир қараашда, бу гапларнинг бари тўғри, ижоднинг сирини очиб берадиган гапларга ўхшайди. Дарҳақиқат, ҳар қандай ёзувчи ҳаётдан келиб чиқади, ҳаётга таянади, ҳаётни акс эттиради. Шу билан бирга бу гапни ижоднинг бирдан-бир қонуни, яккаю ёлғиз талаби деб ҳам бўлмайди. Агар шундай бўлганда ёзувчи санъаткор бўлмай қоларди, оддий нусхакаш даражасидан кўтарила олмас эди.

Яна Ўткирга мурожаат қиласлиқ: "...Тасаввур қилинг: сиз китоб ўқияпсиз. Оқ қофозда қора чизиқлар – ҳарфлардан бўлак ҳеч қанақа ранг йўқ. Ҳеч ким куй ҳам чалмайди. Аммо асарни ўқишига киришишингиз билан кўз ўнгингизда рангин манзаралар пайдо бўлади; қулоғингиз остида ажаб оҳанглар жаранглай бошлайди. Ўзингиз билмаган ҳолда қаттиқ ҳаяжонга тушасиз... Ҳеч шубҳасиз, адабиёт – дунёдаги саккизинчи мўъжиза!" Йўқ, Ўткиржон, адашяпсиз, саккизинчи эмас, биринчи мўъжиза!" "Аввал Қалом бўлган",

деган гап ҳам бор-ку... Ахир бадиий адабиёт мўъжиза бўлса, унда уни яратадиган одамлар ҳам ўзимиз қатори жўн одамлар эмас, алланечук мўъжизакор одамлар бўлиб чиқади-ку! Кўйинг-чи, санъаткор бўлмоқ учун санъаткорнинг бошқа оддий одамларнидан фарқ қиласидиган ўзгача кўзи бўлмоғи, ўзига хос қалби, ўзига хос кўнгли бўлмоғи лозим. Оддий одам оддий кўзи билан, масалан, бепоён денгиз бағрида сузиб бораётган оқ кемани кўради, санъаткор эса айнан шу манзарага қўшимча тарзда шу кема дарғасини отаси деб фараз қилган, ундан нажот ва ҳимоя кутиб, балиққа айланиб кема кетидан сузиб кетаётган болани кўради. Кўрадигина эмас, уни ўз қалби орқали ўтказиб, ўз ҳаяжони, ўз қувончлари, ўз изтиробларига буркаб, бошқаларнинг юрагини жизиллатиб куйдирадиган тарзда тасвирлаб ҳам беради. Ҳа, ҳар қандай ҳаёт ҳодисаси, ҳар қандай инсон тақдири санъаткор қалби орқали ўтибгина, унинг қалбига кайта ишлангандагина санъат ҳодисасига айланиши мумкин. Ўткир айтган мўъжиза худди шу жараён оқибатида рўй беради, санъаткорнинг сири ёхуд сехру жодуси айни шу жараён замирида яширгандир. Эсингиздами, бир эртак бўларди: учта ўртоқ сафарга чиқишипти. Бир жойда тунайдиган бўлишибди ва галма-гал навбатчилик қилишибди. Биринчи йигит бекор ўтирмай деб, ёғочдан қўғирчоқ ясади. Иккинчи йигит, унга либос ясад, қиз боладек кийинтирибди. Учинчи йигит эса Аллоҳдан қўғирчоққа жон ато қилишини тилабди. Кейин... сахар чоғи уларни соҳибжамол бир пари уйғотади... Санъатда ҳам ижодкорнинг қалби ҳаётдан олинган қўғирчоққа жон ато этади, уни тирилтиради. "Қандай қилиб тирилтиради?" деб сўрарсиз. Мен буни билмайман ва ўйлайманки, буни ҳеч ким билмайди, ҳатто санъаткорнинг ўзи ҳам ҳар қанча тиришмасин, буни сизга аниқ-тиник тушунтириб беролмаса керак. Ва яна ўйлайманки, шу сир ижодга, санъаткорга алоҳида бир фавқулоддалик, ақл бовар қилмайдиган сехру жоду, оташнафаслик, борингки, истасангиз, алланечук илоҳийлик бахш этади. Ахир, биз ҳазрат Алишер Навоийни, ёхуд ҳазрат Аҳмад Яссавийни ўзимиз билан бир сафга қўйиб, уларни жўн, ўзимиз қатори одамлар дея олмаймиз-ку! Буни хаёлга келтиришнинг ўзи алланечук осийлик, ғалати бир шаккоклик бўлмайдими? Шундай экан, замондош адибу шоирларимизга ҳам бу иборани қўллашдан чўчимайлик.

Мен юқорида Ўткир Ҳошимовни ҳаммамиз қатори оддий одам, деб атагандим. Лекин бу гапнинг бир қисми эди, холос, ҳали "бер-

дисини" айтганим йўқ. Ҳолбуки, унинг асарлари билан танишганда, уларда қалбингизга жон ато қилувчи нафасни хис қилганда Ўткир ҳам Эркин ва Абдулла, Ҳалима ва Омон каби Хизр назар қилган одам эканига, у яратган кўпгина асарлар томирида илоҳий қон оқаётганига имон келтирасиз. Менимча, ўзи чинакам санъаткор бўлган Абдулла Қаҳҳор худди шу сабабдан Ўткирнинг биринчи қиссасини умумий оқимдан ажратиб ола билди. Худди шу сабабдан адиб кейинчалик элу юрт ардоғига сазовор бўлди.

* * *

Ўткир ўзига хос санъаткорлик истеъдодига эга. Аммо массаланинг мураккаблиги шундаки, истеъдод ҳали ўз-ўзидан муваффақиятни таъминлаёлмайди. Истеъдод – Худо берган бир имконият холос, уни рўёбга чиқара билиш керак. Бунинг учун эса истеъдод эгасидан яна бир талай нарса талаб қилинади. У сурункасига меҳнат қилиш қобилиятига, оқ қоғоз билан яккама-якка ҳарб олишиш иқтидорига эга бўлмоғи лозим. Унинг зеҳни ўткир, ҳофизаси мустаҳкам, билими теран, тажрибаси бой, тафаккури баркамол бўлмоғи шарт. Истеъдодли одам санъатда ҳеч қачон бошқалар очган тайёр йўлдан бормайди, у ҳеч қачон ўз ихтиёрини оқимга топшириб қўймайди. Истеъдод – кашф этмоқ, турфа хил йўлларию сўқмоқлари сероб санъат мулкида ўз йўлини барпо этмоқдир.

Ўткир йиллар давомида яратган катта-кичик асарларининг ҳаммасида шу йўлни кашф этишга, ўз услубини яратишга ва мукаммаллаштиришга интилиб келди. Унинг асарларида, айниқса, қисса ва романларида биз муқаррар тарзда икки хусусиятнинг уйғуналашиб кетганини кўрамиз. Буларнинг биринчиси шуки, Ўткир бадиий асарни енгил ташвиқот воситасига, оддий тарғибот қуролига айлантирмайди, шу куннинг долзарб масалалари ҳақида бадиийлашган шиорлар ва хитоблар айтиш йўлидан бормайди, балки ҳар бир асарида замонавий реалийлар мухитида бирон мухим умумисоний муаммони ўртага қўйишга интилади. Унинг асарларида унтутилиб кетган ёки унутилаётган инсоний қадриятлар етакчи ўрин тутади. Муаллиф, кўпинча, инсон ҳаётнинг ўзак масалаларини қўйиб, ҳар бир фикрловчи одамни ташвишга солмай қўймайдиган жиддий саволларга жавоб излайди. Иккинчидан эса, шу муаммоларнинг ҳаммаси, энг мураккаб саволларга жавоб излаш кишини ҳаяжонга солувчи юксак бадиий шаклларда амалга оширилади,

ҳаётдан олинган, бизга таниш, ўзимиз теварак-атрофимизда тез-тез учратиб турадиган одамларнинг тақдирида ифодаланади. Энг муҳими эса, бу одамлар қуруқ ғоялар тажассуми эмас, ўз қиёфасига, шаклу шамойилига, тақдирига эга бўлган, инсоний жозибаси кучли шахслар сифатида намоён бўладилар. Социалистик реализмнинг темир қонунлари асосида яратилган ҳиссиз, кишини ўзига жалб қилолмайдиган, қуруқ схемадан нарига ўтмайдиган қаҳрамонлар кўпайиб кетган бир шароитда Ўткир асарларида ҳаётий характер эгалари, албатта, китобхонга манзур бўлмаслиги мумкин эмас эди. Бунга амин бўлмоқ учун Ўткирнинг айrim асарлари билан танишайлик.

Ўткир Ҳошимовнинг "Чўл ҳавоси", "Шамол эсаверади", "Одамлар нима деркин?", "Қалбингга қулоқ сол" каби қиссалари ижодининг илк босқичида яратилган бўлиб, ёшлар ҳаётига бағишланган. Уларнинг қаҳрамонлари – мактаб ўқувчилари, талабалар, аспирантлар, ёш домлалар. Улар эндиғина ҳаётда мустақил қадам қўя бошлиған авлод вакиллари. Улар севадилар, севгиларида мақсадлариға ҳам етадилар, адашадилар ҳам. Шафқатсиз ҳаёт уларни илк қадамлариданоқ машаққатли синовларга рўпара қиласди. Баъзилари имтиҳон қозонларида қайнаб, пишиб чиқади, баъзилари эса устлариға ёпирилган бало тошлариға бардош қилолмай, фожиага йўлиқадилар. Мана, "Қалбингга қулоқ сол" қиссасидаги воқеа. Чарос талаба. Ёш. Табиийки, унинг қалбида илк муҳаббат уруғлари уна бошлайди. У Ёдгор деган талабани севиб қолади. Аммо маълум бўладики, Ёдгор аввал уйланган экан, олти ой турмуш қуриб, ажралган экан. Буни Чарос катта бир фожиадай қабул қиласди. Фақат кетма-кет синовларга дуч келгандан кейингина Чарос Ёдгорнинг чин инсон эканига, юксак маънавий фазилатлар эгаси эканига амин бўлади ва уни севиб тўғри қилганига ишонади. Бироқ энди унинг ички ҳаётига онаси Васила Назаровна аралашади. Асардаги энг салмоқли гап шу аёл образида мужассам топган. Мактабда илмий мудир бўлиб ишлайдиган бу аёл қизини жони дилидан яхши кўради, унинг бахтли бўлишини истайди, аммо унинг қалби кўр, у бошқаларнинг юрагини нозик ҳис қилолмайди. Чарос, албатта, онанинг измида бўлмоғи керак, ҳар бир қадамини унинг раъйига қараб қўймоғи шарт. Васила Назаровна, фақат Чаросга нисбатан эмас, мактабдаги ўқувчиларга нисбатан ҳам шундай муомала қиласди. У тўққизинчи синфда ўқийдиган Дилфузанинг севгилисига ёзган ха-

тини тортиб олиб, унга "тарбия бера бошлайди". Қизнинг нозик қалби бундай дағалликка, қўпол муомалага, ҳақоратга чидаёлмайди ва у ўз жонига қасд қилади. Худди шундай воқеа Ёдгорнинг ҳам бошига тушади. Институтдаги "хушёр" раҳбарлар уни хотинини қўйиб, бошқа бир ёш қизнинг бошини айлантиришда айлашади ва Ёдгорнинг ахлоқий бузуқлигини "бўйнига қўйиб" институтдан ҳайдашмоқчи бўлишади. Яқин-яқинларда ҳам бундай воқеалар ҳаётимизда тез-тез учраб турарди. Бу – инсонни қадрламаслик, унга расмий муомала қилишнинг оқибати эди. Биз қурган жамиятимизни "ривожланган социализм" деб атасак-да, аслида у ашаддий феодал психологияси устиворлик қилган жамият эди, чунки унда инсон эркин учун ўрин йўқ эди, инсон хоҳишлари қадрланмасди, унинг дахлсиз бир дунёси бўлиши мумкинлиги, у чиннидек покизава мўрт эканини, унга дағал ва кир қўллар билан дахл қилиб бўлмаслигини хаёлимизга ҳам келтирмас эдик. Ҳар бир инсон катта машинанинг бир мурвати эди, холос. Шундай қилиб, Васила Назаровна, Чарос, Ёдгор, Азиза, Дилфуз, Искандаровлар ўртасида рўй берган оддий бир воқеа тимсолида муаллиф инсонни ҳурмат қилиш, севиш, уни авайлаш сабоқларини беради. Шунинг учун бу кичик қисса жуда зўр гуманистик пафосга эга.

Ўткир услубига хос бу фазилат қиссадан қисага кучайиб боради. Масалан, унинг "Баҳор қайтмайди" қиссасининг ўз вақтида катта шухрат қозонгани, унинг асосида яратилган видеофильм ҳам тилларга тушганининг боиси шундан. Бу қисса ҳам биринчи қарашда жўн кўринадиган, турмушда тез-тез учраб турадиган воқеа асосига қурилган бўлса-да, жуда муҳим масалага – ҳар қандай инсон ҳаётида тақдирини белгиловчи характер касб этиши мумкин бўлган муаммога бақишлиланган. Уч-тўрт одамнинг ўзаро муносабатларини, уларнинг силсиласидан ташкил топадиган тақдирларни таҳлил қилиб, ёзувчи яна умумбашарий қадриятлар ҳақида мулоҳаза юритади, китобхонни ҳам ахлоқий-маънавий муаммолар ҳақида ўйлашга ундейди. Албатта, "Баҳор қайтмайди" қиссаси ҳақида, айниқса, унинг бадиий хусусиятлари тўғрисида муайян баҳс юритиш мумкин. Жумладан, унинг финали айрим китобхонларда норозилик туғдириши мумкин. Қисса охирида Алимардоннинг ҳалок бўлиши шартми? Бу қиссага бир оз мелодраматик рух бағишимайдими? Адиб "яхшилик, албатта, тақдирланади, ёмонлик албатта, жазоланади" деган ақидага амал қилмаяптимикин? Ахир,

ҳаётда Алимардондек одамлар ҳаммавақт ҳам виждан азобига тушавермайди, ҳаммавақт ҳам жонига қасд қилавермайди-ку? Халқ ўртасида тарқалган "Ёмонга ўлим йўқ" деган гап ҳам бежиз эмас-дир, ахир? Лекин бу мулоҳазалар шунчаки мулоҳазалар, холос. Асарни қандай тугатиш тўлалигича муаллиф ихтиёрида. Иккинчидан, Алимардон, мабодо, ҳалокатга учрамай, соғ қолганида ҳам, асарнинг умумий қимматига, салмоғига путур етмаган бўларди. Хуллас, гап финалда эмас, балки қисса қаҳрамонларининг кўз ўнгимизда содир бўладиган муносабатларида, шу муносабатлар замиридаги ҳаёт ҳақиқатидаги. Гап шундаки, табиат Алимардонга бебаҳо неъмат инъом этган. У фавқулодда истеъдод эгаси. У истеъдодини ишга солиб, миллионлаб одамларнинг кўнглини овлаши, уларга завқ-шавқ улашиши мумкин. Лекин Алимардон бундай қилмади. У ўз истеъдодига ҳам, ўзининг тақдирига ҳам, садоқатли дўстти Анварнинг, севимли рафиқаси Муқаддамнинг, жондан ортиқ кўрган ўғли Шавкатжоннинг тақдирига ҳам беписанд қарайди. Негаки, у болалигидан фақат ўзини ўйлайдиган, фақат ўз жонининг ҳузурини кўзлайдиган бўлиб ўсган. Кейин эса шухрат унинг бошини айлантириб қўйган. У истеъдодини чакана пуллаш йўлига киради, ўз устида ишламайди, изланмайди, ўзини ҳаммадан юқори қўяди. Анвар унинг кўзига бўш-баёв, ландавур кўринади. Муқаддамга уйлангач, уни хўрлай бошлайди, ўзига-ўзи маҳлиё бўлиб, томошабинларини, халқини ҳам менсимай қўяди. Масъулиятсизлик, эътиқодсизлик, ўткинчи майларга берилиш, умуминсоний қадриятларни менсимаслик Алимардонни фожиага олиб келади. Қиссанинг таъсир кучини таъминлайдиган омил шундаки, муаллиф бошқа образлар каби бош қаҳрамон Алимардонни ҳам турфа хил ранглар билан тасвирлайди. У ҳаётида қанча адашмасин, хатолари туфайли яқинлари бошига қанча кулфат келтирмасин барибир одам. Асар давомида бирор саҳифада биз Алимардоннинг хатти-ҳаракатларида сунъийлик кўрмаймиз, ҳаёт мантиғига зид келувчи сифатларга гувоҳ бўлиб ранжимаймиз. Алимардон – хатолари кўпайиб, боши берк кўчага кирган сайин, ундан халос бўлишни ҳам ўйлайди. Ҳар қандай нормал одамда бўладигандек, ўз-ўзини таҳлил қилиш, ўз қилмишларини сарҳисоб қилиш Алимардонни ҳам ўзилигида инсонни қидиришга мажбур этади. Бу эса ундаги вижданнинг уйғониши эди. Тўғри, бу уйғониш ҳаддан ташқари кечиккани учун унинг бошига тушган фожианинг олдини ололмайди. Лекин

бу қаҳрамонга муайян бир жозиба баҳш этадики, унга ишончимизни мустаҳкамлайди. Ҳар ҳолда, китобхон Алимардондан нафратланишдан кўра, унга ачинади, унга раҳми келади, шундай истеъдод эгасининг ўткинчи "қадриятларга" қурбон бўлиб кетганига, у билан бирга Анвар ва Муқаддамларнинг ҳам турмуш зарбалариға дучор бўлганига таассуфланади. Менимча, қиссанинг энг қимматли томони ҳам шунда. Худди шу таассуф туйғуси китобхоннинг қалбини юмшатади, ундаги одамийлик сифатларини кучайтиради ва унга қимматли маънавий сабоқ бўлади.

Ўткир Ҳошимов бошқа адиблар каби кўпгина қиссалар ва ҳикоялар ёзиб, анча тажриба орттиргач, йирик эпик жанрга – роман жанрига мурожаат қилди. Аммо, назаримда, уни роман жанрида кучини синаб кўришга унданган сабаб, фақат шу эмас эди. 70-йилларнинг бошларида ёқ турғунлик даврининг иллатлари "мана мен" деб кўрина бошлади. Албатта, фармонбардор маъмурий тузум боргандан сари чок-чокидан сўклилиб бораётган иқтисодиётни ҳали бир амаллаб эплаб турарди, лекин ижтимоий иллатлар тобора чуқурлашиб бормоқда эди. Масалан, жамиятда порахўрлик авж олди, одамлар ўз ишини бажариш ўрнига таъмагирлик йўлига ўта бошладилар, савдо тизими халқقا эмас, айрим шахсларнинг бойишига хизмат қила бошлади, пахта яккаҳокимлигининг даҳшати рўйирост намоён бўла бошлади, қишлоқ аҳолиси ақл бовар қилмайдиган даражада қашшоқлашди, экология фожиавий ҳолга тушди, мактаб ўқувчилари ва аёллар аёвсиз эксплуатация қилинди ва ҳоказо, ва ҳоказо... Муайян ижтимоий табақалар ўртасида шивир-шивир тарзизда бўлса ҳамки, норозилик билдирила бошланди.

Хуллас, аҳвол шу даражага бориб етдики, виждонли ёзувчи ҳар хил ман этишлар ва тўсиқларга қарамай, йирикроқ шаклдаги асарда халқ дилида тўпланиб қолган дардни баралла айтмаслиги мумкин эмас эди. Шундай бўлди ҳам. Худди шу йилларда жуда кучли ижтимоий мазмунга эга бўлган, халқ ҳаётини ҳаққоний ёритган, чинакам жасорат билан ёзилган анчагина асарлар пайдо бўлди. Табиийки, Ўткир Ҳошимов ҳам бундан четда қололмас эди. Унинг "Нур борки, соя бор" романи шундай шароитда майдонга келди.

Албатта, ҳар қандай ёзувчининг ҳам биринчи романни ҳар жиҳатдан баркамол бўлавермайди. Назаримда, "Нур борки..." ҳам муайян қусурлардан холи эмас. Бу қусурлар менга, биринчи навбатда, роман композициясининг етарли даражада пишиқ эмасли-

года қўринади. Жумладан, бош қаҳрамоннинг Помирга саёҳати чуқур лиризм билан суғорилган ҳолда анча нафис тасвирланганига қарамай, асарнинг бош ғоясига хизмат қилмайди, унинг бошқа қисмларидан ажралиб туради. Аммо, бу – менинг фикрим, холос. Адиб романнинг китоб вариантига бу бобларни киритмай тўғри қилди. Қисқа муддат ичидаги роман ўзбек тилида бир неча марта босилди, рус тилида таржима қилиниб, Москвада чоп этилди, турк тилига ўгирилди, роман асосида видеофильм яратилди...

Роман ҳақида ҳар қанча баҳс қилинмасин, унда Ўткир Ҳошимовнинг ўз халқининг фидойи фарзанди сифатида гражданик туйғуси балоғатга етганини, энг зиддиятли муаммоларни қаламга олишдан чўчимайдиган, жасоратли санъаткор бўлиб қолганини кўрмаслик ва тан олмаслик мумкин эмас. Бу роман чиқсан вақтда, яъни 70-йилларнинг ўрталарида ҳақиқатгўйлик қилувчи кишилар ҳар хил таъқиб ва тазиикларга учарди.

* * *

Ўткир Ҳошимовнинг навбатдаги ижодий муваффақияти 1986 йилда нашр этилган "Икки эшик ораси" романи билан боғлиқ. Роман нисбатан қисқа фурсатда қайта-қайта уч юз мингдан ортиқ нусхада нашр қилинди. Шунинг ўзи ҳам асар китобхонлар ўртасида катта эътибор топганидан дарак беради. Ушбу роман Тошкент яқинидаги қишлоқлардан бирининг чорак асрли ҳақида ҳикоя қиласиди. Ундаги воқеалар уруш арафаларида бошланади, уруш йилларида ва урушдан кейинги даврда давом этади, 1966 йилдаги Тошкент зилзиласи билан тугайди. "Икки эшик ораси" бир қатор бадиий фазилатларга эга. Муаллиф воқеалар тасвирида уларнинг табиий оқимини сақлашга интилади. Бу воқеалар замирида салмоқли умумлашмалар, одамлар ҳаётининг муҳим томонларини ифодаловчи фикрлар ётади. Муаллиф, биринчи навбатда, урушни қоралайди, унинг аксилиансоний моҳиятини очади, унинг жароҳатлари кўп йиллар мобайнида одамларга озор етказишини кўрсатади. Шу билан бирга муаллиф оддий одамларнинг, айниқса, уруш йилларида ёрқин намоён бўлган фазилатларини, ватанпарварлигини, бардошини, матонатини кўрсатади.

Ўткир Ҳошимов ўзи тасвирлаётган муҳитни ҳам, одамларни ҳам яхши билади – шунинг учун тасвирда баландпарвозликка, патетикага берилмайди. Унинг услуби табиийлиги ва самимийлиги

билан ажралиб туради. Романнинг композицияси ҳам оригинал. У етти қисмдан иборат, бу қисмлар қирқ етти бобдан ташкил топган. Бу боблар эса қаҳрамонларнинг тилидан ҳикоя қилинган. Романдаги воқеаларни ҳикоя қилишда тўққизта персонаж иштирок этади. Бундай тасвир усули анча қийин, воқеалар тарқалиб кетиши, улар орасида узилиш юз бериши ҳеч гап эмас. Лекин муаллиф асарнинг охиригача "калаванинг учини қўлдан чиқармайди". Натижада, романда муайян ички яхлитлик пайдо бўлади. Бундай композицион қурилишнинг битта афзаллиги ҳам бор – ҳар қайси боб бирор персонажнинг ички монологи тарзида берилгани учун китобхон уларнинг ички дунёсини, ахволи руҳиясини тўлароқ кўриш имконига эга бўлади.

"Икки эшик ораси" романи персонажларга бой. Уларнинг орасида Ориф оқсоқол, Ҳусан Дума, Комил табиб кабилар ажралиб туради. Муаллиф, айниқса, Ориф оқсоқол образини мукаммал чизишга муваффақ бўлган. У халқ ўртасида катта обрўга эга, энг оғир дамларда ҳам одамларни қийин ишларга отлантира олади. У кўпгина ўзбек қариялари каби ташаббускор ва донишманд. Айни чоқда, ҳақиқатни юзга айтишдан чўчимайдиган шартаки, жасоратли одам. У одамларни баҳолашда ўз меъёрига эга – одамнинг белида белбоғи бўлиши керак. Белбоғ унинг учун мардлик, тантилик, одамлик белгиси. У ҳатто аёлларни ҳам шу ўлчов билан баҳолайди.

Романда Кимсан Ҳусанов образи ҳам муваффақиятли чиқкан. У роман воқеаларида бевосита кам иштирок этса-да, икки бобдаги ҳикояси орқали китобхон тасаввурида тугал образ сифатида гавдаланади. У ҳам мард, танти, ориятли, белида белбоғи бор йигит. Кимсан урушда ҳалок бўлади. Романда аёллар образига ҳам кенг ўрин берилган. Улар ичида, айниқса, "Қора амма" ажралиб туради. Муаллиф унинг тавсифи учун жуда ўринли деталлар топган. Шунингдек, Робия ҳам тугал ва мукаммал ишланган образдир. Адид унинг оғир кечган ҳаёт йўлини тасвирлар экан, бу аёлдаги софлини, ҳалолликни, маънавий баркамолликни жуда яхши очиб берган.

Романнинг марказий қаҳрамонлари Музaffer Шомуродов ва Мунаввар Алиевалар. Урушдан кейин туғилган бу икки ёш бирбирини самимий севади. Аммо аллақачон тугаб кетган урушнинг қора шарпаси уларнинг баҳтига чангл солади. Романда Музaffer ва Мунавварнинг фожиаси анча кенг ва ишонарли кўрсатилган. Муаллиф уруш йилларидағи ўзбек қишлоғини тасвирлар экан,

ундаги қийинчиликларни хаспўшламай қаламга олади. Бу қийинчиликлар фақат иқтисодий характерга эга эмас. Романда колхозга янги сайланган раис Умар Хўжаев образи бор. У қаерларданdir урилиб, сурилиб келган. Бу одам кўпчилик манфаатини эмас, ўз ҳузур-ҳаловатини ўйлайдиганлар тоифасидан. Шунинг учун ҳам уруш йилларида хўжадикка бағритошлиқ билан раҳбарлик қиласи. Ҳар қадамда, ҳар ишда унинг қамчисидан қон томиб туради. Унинг тенги йигитлар фронтда душман билан олишиб, жон олиб, жон бериб юрганда, у ўзгаларнинг хотинига кўз олайтиради, хийла-найранглар билан уларни йўлдан уради.

Романдаги асосий қаҳрамонлардан бири – Шомуроднинг жуфти ҳалоли Раъно эрига хиёнат қиласи. Умар закунчининг ҳийласига учиб, унга ўйнаш бўлади. Муаллиф бу воқеалардан муҳим маънавий хуносалар чиқаради – Умар закунчи бағри тошлиги, нопоклиги учун, Раъно субутсизлиги, ўйламай иш қилиши, ўз баҳтини ардоклаб авайламагани учун кейинчалик бутунлай баҳтсиз бўлишади. Улар одамларнинг назаридан қолиб, изтиробларга, руҳий қийноқларга тўла ҳаёт кечиришга мажбур бўлишади. Бу икки образни яратар экан, муаллиф бир томонлама йўл тутмайди, фақат қора бўёқларни ишлатиш йўлидан бормайди, балки Умар закунчининг ҳам, Раъононинг ҳам инсоний жиҳатларини-да кенг тасвирлайди. Шу тариқа уларнинг фожиаси янада чуқурроқ очилади.

Роман пухта бадиий асар сифатида олий ўқув юртлари ва мактаб дарсликларига киритилди. Муҳими, бу китоб ҳам минглаб ўқувчилар ўртасида қўлма-қўл бўлиб кетди. Муаллифга саноқсиз хатлар келди. Шулардан иккитасида, менимча, айниқса теран ҳақиқат бор. "Мен уруш кўрган одамман. Кўзингиз тушган бўлса, Константин Симоновнинг "Халхинголдан Берлингача" китобида менинг ҳам номим бор. Уруш ҳақидаги кўп асарларни ўқиганман. Аммо "Икки эшик ораси" романи менга бутунлай бошқача таъсир қилди. Ҳамма-ҳаммаси ҳаққоний акс эттирилган. Китобни ўқирканман, ўша машаққатларни яна бир бор кўргандек бўлдим... Била-ман, сиз ёшсиз, урушга бормагансиз. Аммо китобни ўқиб туриб, бу одам чиндан ҳам урушга борган, деб ишонгим келди... Бу китобни ҳамма ўқишини хоҳлардим. Токи биз кўрган кунларни ёшлар кўрмасин! Роман ҳеч қачон уруш бўлшмаслиги керак, деб огоҳлантиришдир... Ҳасан Абдуллаев. Уруш ногирони. Тўракўрғон". Мана бу мактуб эса ўзининг содда-самиийлиги билан кишини лол қолдиради.

"Китоб чиқарадиган идоранинг бошлиғига. Ариза. Берилди ушбу ариза шул ҳақдаким, биз – кампирлар сумалак ва бошқа ҳар хил йиғинларда болаларимизга китоб ўқитиб эшитардик. Айниқса, "Икки эшик ораси"ни йиғлаб-йиғлаб эшитардик. Афсус, қишлоғимиздаги биттаю-битта китобни қайси бир уйингга буғдой тўлгур ўғирлаб кетибди. Жон болам, шу китобни қўпроқ чиқариб берсанг... Андижон вилояти Хўжаобод тумани, Ширмонбулоқ қишлоғи кампирлари: С.Хамроқулова, Э.Мусаева, П.Фозилова, С.Акрамова, Ш.Мусаева..." (Жами ўт етти имзо).

Менимча, бу хат изоҳ талаб қилмайди.

Хуллас, "Икки эшик ораси" романи ҳаётийлиги, табиийлиги билан ажралиб туради. Бу роман ҳалқ ҳаётининг муҳим жиҳатларини очиб бериши, одамларимизнинг гўзал ва баркамол маънавий қиёфаларини қўрсатиши билан катта бадиий қиммат касб этади.

Ўткир Ҳошимов 1992 йилда "Тушда кечган умрлар" деган янги романини эълон қилди. Бу роман муаллифнинг тинимсиз излашишлар йўлидан бораётганидан, унинг қалами муттасил ўткирлашаётганидан далолат беради. "Тушда кечган умрлар" теран бир дард билан ёзилган асар. Унда муаллифнинг ҳаётга қарашлари янада чуқурлашганини кўрамиз, у ўз кузатишларидан ғоят ибратли ва ҳаққоний умумлашмалар чиқаради, инсоннинг руҳий дунёсига ҳам бошқа асарларидағига қараганда янада теранроқ қилиб боради.

Романинг бош қаҳрамони – Рустам Шоматов. У эндиғина 22 ёшга тўлган Алномишдек девқомат, навқирон йигит. У ўз жонига қасд қиласди-ю, оламдан ўтади. Хўш, нега? Нега ўн гулидан бир гули очилмаган, эндиғина онгли ҳаётга қадам қўйган, эндиғина севгилисининг висолига етган, тўйиб-тўйиб баҳт нашидасини тотиши керак бўлган йигит ақл бовар қилмайдиган ғайритабиий ишга қўл уради – жонига қасд қиласди? Роман, аслида, шу саволга жавоб бериш учун ёзилган. Адіб секин-аста Рустам ҳаётини кўз ўнгимизда гавдалантира борар экан, биз унинг турмуши одам боласи чидаши мумкин бўлмаган тарзда оғир кечганини кўрамиз. "Тақдирини қўл билан яратур инсон" деган ҳикмат бор. Лекин Рустам ўз тақдирини ўзи яратишга улгурмайди – муҳит, у яшаган тузум Рустамни тўлалигича ўзига бўйсундириб олган, уни бир япроқ мисоли чирпирак қилиб айлантиради, даҳшатли тегирмонга солиб, кукунга айлантиради. Романинг бир жойида автор персонаж тилидан "уруш – тескари ҳақиқат" деган фикрни айтади.

Қолаверса, Рустамнинг афғон урушида кечган умригина эмас, йигирма икки йиллик бутун хаёти ана шу "тескари ҳақиқат" шароитида ўтган. Романда Рустам билан баравар ҳаракат қиласидиган Комиссар образи бор. У асарнинг ғоявий концепциясини англаб олиш учун ғоят муҳим аҳамиятга эга. Соат Фаниев деган бу кимса инқилобдан олдин туғилган. Ҳозир "Иттифоқ миқёсидағи пенсионер". Миллати йўқ. Сўққабош. 1941 йилдан партия аъзоси. Отаси инқилобчи бўлган, кейин йигирма бешмингчилар қатори қишлоққа келган ва бу ерда ўта шафқатсизлик билан "синфий душман"га қарши курашган. Соат Фаниев отасининг "инқилобий" фалолиятини кўриб улғайган ва "ўн беш ёшидаёқ" комиссар бўлган. У ўша кезлардаёқ қўшнисининг девори нима учун ўзлариникидан баландлигини сўрайди. Отаси қўшниси Эшоннинг синфий душманлигини, сирларини комиссарлардан яширмоқ учун деворини баланд урдирганини айтади. Соатнинг тафаккури биринчи қадамлариданоқ ана шундай қийшиқ йўлдан кетади. Секин-аста у ўз принципларини ишлаб чиқади – у органларда ишлар экан, ҳаммага душман деб қарайди, ҳаммадан гумон қилишни ўзининг олий бурчи деб билади. "Юз фоиз ҳаммадан, ҳатто ўзининг хотинидан, боласидан гумон қиласиди". Шу тарзда Комиссар ёшлигида бирга ўйнаб катта бўлган болаларнинг устидан тухматлар уюштириб, уларни қаматади, ўзининг тузумга садоқатини исбот қилиш учун қўпгина яқин одамларининг ёстигини қуритиш билан чекланмай, сўроқ пайтида уларни жисмонан азоблашнинг жуда даҳшатли йўлларини ўйлаб топади. Комиссар ҳар қандай инсоний жозибадан маҳрум. У, ҳатто нафақага чиққандан кейин ҳам теварагидаги одамларнинг ҳаётини заҳарлашда давом этади. Авваламбор шуки, Рустам ана шундай "комиссарлар" ҳукмронлик қилган шароитда туғилди ва уларнинг "қош-қовоғига қараб" улғайди. Бу "комиссарлар" кўпчилик қатори Рустамни ҳам ўз измларига бўйсунадиган бир мурватга айлантириб олишганди. Рустам вояга етгач, уни афғонга жўнатадилар. Бу ерда у совет ҳарбий сиёсатининг жамики иккиюзламачилигини, шафқатсизлигини кўради, совет қуролининг сохта шон-шуҳратини яратишда иштирок этади. Рустамнинг афғонда кўрган-кечирганлари унинг ҳаёт ҳақидаги имон ва инсоф, виждан ваadolat тўғрисидаги ҳамма тасаввурларини ағдар-тўнтар қилиб юборади. Рустам йўлини йўқотиб, эътиқодидан адашиб, руҳан мажрухланиб юртига қайтади. Аммо, бу ерда ҳам яна у ҳақсиз-

ликка,adolatsizlikka dut keladi. Endi uning yortida "uzbekishi" keng қuloch ёябошлаган, minglab halol mehnatkaš odamlar tuhmatga қолиб, porahўrlikda ёхуд пора bérişda aiblanaётgan, қamalaётgan va boşqa jazolapga dutor қiliňaётgan edi. Adib turli personajlar xarakteri orkali bu машъum voqealarning moxiatini очади, soxta bainalmilallik, ёлғон "halqlar дўстилиги"ning avra-astrarini afgadaradi. Kўп йиллар halol kommunist bўlgan, siddiqidildan mehnat қilgan Rustamning otasi tuhmat bilan қamalgandan keyin, ўғliga xat ёzadi: "ўйлаб қarasam, ўтган umrim – umr emas, tush ekан. Gўё men esimni taniб-tanimay birov uйку dori ichirgan-u tush kўrib yoraverganman: gox shirin, gox xatarli tush kўrib. Уша "birov" қaёқka sudrasa ketidan ergashiб ketaverganman... Uйgonishga esa kўrkqanman... Mana endi, uйgonib, ёnverimga қarasam menga ўxshaganlar kўp ekан..." Bu sўzlар daҳsatliadolatsizliklarni kўrib kўzi ochilgan keksa raissining xulosasi – ўzi bosiб ўtgan haёт йўli ustidan, ўzini vояга etkazgan muhit ustidan chiqargan xukmi. Lekin bu xukm faqat raissikigina emas – roman personajlarining kўpchiliги, ҳatto minglab odamlarni қon-қora қaқшatgan komissarlар umrinini tushda kechirgan odamlar. Ular ҳaётlarining қai bir nuktalariда uйgonib amin bўladilarki, shu paitgacha ҳaёт deb bilganlari ҳaёт emas, balkisovuk va kўrkinqchli bosiнkiresh. Bunday xulosha esa ўz nавbatida jana fожia tuғdiradi – inson uchun ўzi bosiб ўtgan ҳaёт йўlinning maъnisiz ekaniга amin bўliшdan alamliroq taқdir йўқ. Roman oxiриda Rustam oillaviy ҳaётдagi omadsizligi uchun ўzini ўzi nobud қiladi – daҳsatli afon urushi, unda қўllangan turli-tuman қurollaru, dorilar Rustamni ota bўliш baxtidan maҳrum қiliб қўйgan, u oillada erlik burchinib ўtolmайдиган bўlib қolganidi. Biroq Rustamni ўlimga etaklagan sabab faqat bu emas, biringchi nавbatda, uning tushda kechgan umrinning maъnosizligi va ҳechligidir. Shunday қiliб, Utqir Xoшимovning romani konkret insonlar taқdiri orkali farmonbardor maъmuriy tizim deb atalgan tuzumning, xukmron kommuunistik maфkuranning faiриinsoniy moxiatini foш қiluvchi romanidir. Insон эркини top托vchi, insон shaxsияtinipоймол қiluvchi, insон xukuklarini rad etuvchi жamiat mukarrap ravišda millionlar boшига ҳam жисмоний, ҳam ruҳий fожialar soladi.

Шубҳасиз, "Tushda kechgan umrlar" ijtimoiy йўналиши жихатidan ҳam, insoniy mazmunining teranligiga kўra ҳam, badiy

фазилатлари билан ҳам Ўткир Ҳошимов ижодида янги бир босқич бўлди ва адабиётимизга катта ҳисса бўлиб қўшилди.

* * *

Менинг назаримда, Ўткир Ҳошимовнинг бошқа асарларини камситмаган ҳолда айтиш мумкинки, "Дунёning ишлари" қиссаси ҳар жиҳатдан мукаммаллиги билан ажralиб туради. Ҳажман унча катта бўлмаган бу қиссада Ўткирнинг инсонпарварлиги ҳам, миллатсеварлиги ҳам, услубига хос фазилатлар ҳам ўз ифодасини топган. Ҳар ҳолда, бу қисса ҳақида тўлароқ тасаввурга эга бўлган одам ёзувчининг санъаткорлиги ҳақида анча тугал тушунчага эга бўлади.

Назаримда, истеъдоднинг илоҳийлиги "Дунёning ишлари" қиссасида жуда аниқ кўринади – энг жўн, энг оддий ҳаёт воқеалари санъаткорлик сехри туфайли китобхоннинг бутун вужудини қамраб оладиган, уни ҳаяжонга солиб завқлантирадиган қудрат касб этган. Қисса китобхоннинг тафаккурига, онгигагина эмас, ҳис-туйғуларига, қалбига ҳам чуқур таъсири кўрсатгани учун узоқ вақтлар унинг энг қадрдон дўсти, ҳамрози бўлиб қолади.

Қисса чиққан кезларда мен батафсил бир тақриз эълон қилган эдим. Мазкур мақолани ёзишга тайёрланаётib, уни қайта ўқиб чиқдим. Тақриз эскирмагандай, бугуннинг руҳига мос келадигандай кўринди. Шунинг учун қисса ҳақида батафсилроқ маълумот олмоқчи бўлганларга ўша мақоламни тавсия этаман-да, Ўткир ҳақидаги ҳикоямни давом эттираман.

* * *

Фарғона водийсидаги сафарларимиздан бирида йўлимиз айланиб, Яйпанга бориб қолдик. Ўша пайтнинг таомилига биноан салом-алик қилиш мақсадида аввал райкомга кирдик. Бизни райком котиби Алижон Пайғомов кутиб олди. Мен бу кишини кўрмасдан олдин номини икки-уч эшитган эдим, у киши тўғрисида "истеъдодли раҳбар, тажрибаси катта, ишнинг кўзини билади", деган маънодаги мақолалар ўқиган эдим. Аммо кўрганим, ҳамма эшитганимдан ортиқ бўлиб чиқди. Бу одам ташқи қиёфасига қараганда райком котибидан кўра бутун умри еру кетмон билан иноқлиқда ўтган асл дехқонча табиати яққол сезилиб турарди. У туманнинг туриш-турмуши ҳақида, эртанги куни тўғрисида батафсил гапириб берди, гап орасида "қишлоққа раҳбарликни нутқлар ва мажлислар

орқали эмас, амалий намуналар кўрсатиб қилиш керак", деди ва бизни райком ҳовлисига таклиф қилди. Ҳовлида эса унинг ўзи ясатган иссиқхона бор экан – ҳали эрта баҳор бўлишига қарамасдан, иссиқхонада бодринг ва помидорлар пишиб ётибди, ҳар хил кўкатлар яшнаб турибди, гуллар очилган. Иссиқхонанинг бир бурчаги полизга ажратилган экан. У ерда ҳандалаклар кўзни ўйнатади.

– Қани, мәҳмонлар, ҳандалакдан ўз қўлларинг билан узуб олинглар. Гашти бошқача бўлади, – деб таклиф қилди Алижон ака.

Ўшанда мен бу одамнинг тадбиркорлигига қойил қолган эдим. Бироқ, ростини айтсам, яна бир нарса мени кўпроқ лол қолдирди ва шу туфайли мен Алижон акани бир умр ҳурмат қиласидиган бўлдим. Райком биносини айланиб юриб, бир неча жойда деворга илиб кўйилган мурожаатномага ўхшаш бир нарсага кўзим тушди. Улардан бирини ўқий бошладим. Каттагина оқ қофозга анча йирик ҳарфлар билан босилган, чиройли рамкага солинган мурожаатнома аслида Ўткир Ҳошимовнинг "Қалбнинг оппок дафтари" деган мақоласи экан. Мақола чиққанига беш-олти ой ўтган бўлса-да, унинг теварагидаги гап-сўзлар ҳали тўхтамаган, қўпчиликда мақола ўйғотган ҳаяжон ҳали босилганича йўқ эди. Публицистик мақоланинг плакат тарзида тарғиб қилинишини биринчи қўришим. Менинг бир оз ажабланганимни кўриб, Алижон ака изоҳ бергандай бўлди:

– Ўткиржоннинг мақоласида ҳозирги куннинг ўзак масаласи кўтарилиган. Биз "пахта-пахта" деб юриб, ҳалқнинг маънавиятини унутиб қўйибмиз. Бугунги кунда мактаб жуда оғир, жуда ночор аҳволда. ўқитувчи эса ҳаддан ташқари қадрсизланган. Бугунги жамиятимизда ўқитувчидан пастроқ турадиган бошқа табақа йўқ. Ҳатто хўжалик бригадири ҳам унга хўжайин, унга истаган буйруғини беради. Йўқ, бу аҳволга ортиқ чидаб бўлмайди, агар биз истиқболни ўйласак, Ўзбекистоннинг эртасини ўйласак, минг йиллик маданиятимизнинг йўқолиб кетиши истамасак, ўқитувчининг обрўйини қайта тикламоғимиз лозим.

Алижон ака "лекция ўқиб юборганига" бир оз хижолат чекди шекилли, гапдан тўхтаб қолди. Аслида, у ҳаяжонга тушган ва гапирган сари ҳаяжони кучайиб борарди. Бир оз сукут қилиб, ҳаяжонини босиб олди-да, гапини якунлади:

– Мен мақолани ўқигач, уни минг нусхада бостириб, ҳамма мактабларда, ҳамма маҳаллаларда, ҳамма чойхоналарда, маданият клубларида, идораларда илиб қўйишни буюрдим. Бу мақолани

ўқимаган, унда кўтарилиган гаплардан бехабар бирон одам қолмаслиги керак. Туман кўламида ўқитувчиларнинг кенгашларида унинг муҳокамалари бўлди. Ўқитувчиларимиз ҳам роса тўлиб юришган экан, ҳамма дардларини тўкиб солишиди.

Кейинчалик туманда кезиб юриб, ўқитувчилар ва бошқа зиёлилар билан учрашдик. Бундай учрашувларда, албатта, ўша мақола қайта-қайта тилга тушарди. Қўйинг-чи, Алижон Пайғомовнинг гаплари тўғри экани тўла тасдиқланди. Ўшанда Ўткир ижодининг яна бир қирраси кўз ўнгимда бутунлай янгича намоён бўлган эди.

Ўткир Ҳошимов 60-йилларданоқ публицистика соҳасида кучини синай бошлигар. Аммо, очигини айтганда, унинг бу соҳадаги муваффақиятлари кўпайган сари, тобора менинг хавотирим ошиб, уни ички бир безовталик билан кузата бордим. Эсингизда бўлса керак, саксонинчи йилларда Ўзбекистон телевидениеси "Бахс" деган номда туркум кўрсатувлар уюштирган эди. Уларни Ўткир Ҳошимов олиб бораради. Қисқа муддатда кўрсатувнинг шухрати кенг ёйилди. Одамлар кўрсатув кунини интиқиб кутадиган, ҳамма ишларини йиғиштириб, уни томоша қиласиган бўлиб қолишиди. "Бахс"да кўтарилиган масалалар ҳақида студияга мактублар ёғилиб кетди. Бунинг сабаби бор эди, албатта. Ўша кезларда оммавий ахборот воситаларида коммунистик мафкурунинг ҳокимлиги зўр эди, жиндай қуюшқондан чиқадиган гап учун катта маҳкамага чақириб, телевидение мутасаддиларининг таъзири берилар, улар ўз навбатида қўллари остидаги ходимларни така-така қилишарди. Ортиқча ғалвага кимнинг ҳам тоқати бор, дейсиз. Ундан кўра, оч қорним, тинч қулоғим, деган гапга амал қилган маъқул. Ўткир олиб борган "Бахс" кўрсатувида эса борган сари рост гаплар, "қалтис" гаплар кўпроқ гапирила бошлади. Шунинг учун бўлса керак, гўзал кунларнинг бирида "Бахс" кўрсатуви белгиланган фурсатда эфирга чиқмади. Шу-шу кўрсатув сувга ургандек йўқ бўлди-кетди. На миллионлаб томошабинларга, на кўрсатув мутасаддисига бунинг сабаби тушунирилди. Ҳозирга қадар вилоятлар ва туманлардаги учрашувларда "Бахс" нега тўхтаб қолди?" деган савол, албатта, ўртага тушади. Бу биргина мисол, холос. Публицистикага қўл урадиган одам мана шундай ошкора ва хуфёна зарбалар ҳамда зарбачаларга тайёр турмоғи лозим.

Ўткирда жасорат ҳам, бардош ҳам бор экан. У танлаган йўлидан қайтмади ва "Оқ камалак", "Товус гўштини еб бўладими?",

"Муқаддас қасамни бузганлар", "Қобиллик ва қодирлик" каби жуда ўткир, ғоят ҳаётий ва фойдали мақолаларини ёзди. Шўро даврининг сўнгги йилларида Ўткир Ҳошимов публицистикаси янги босқичга кўтарилиди. Биз унинг мақолаларида ижтимоий рух тобора чуқурлашиб бораётганини қўрамиз. Ўткир илгари тилга олиш мумкин бўлмаган мавзуларга қўл ураркан, ҳаётий воқеалар, реал факларни далил сифатида келтиради ва жуда муҳим умумлашмалар чиқаради. Масалан, у ўзбек дехқонининг ҳаётини тасвирлар экан, пахта яккаҳокимлиги бутун халқни гадо қилганини айтади. Бир килограмм пахтадан ўн хиллаб маҳсулот чиқарилгани ва бу маҳсулотлардан қўплаб даромад қилингани холда минг хил азоб ичида шу пахтани етиштирган дехқоннинг меҳнати сарик чақага баҳоланишини афсусу надоматлар билан ёзади. Пахтанинг нархи каби жузъий масаладан ижтимоийadolat масаласи келиб чиқади. Гарчи мақолада ўзбек дехқоннинг ўта шафқатсиз эксплуатация остида эзилиб ётгани очик айтилмаган бўлса-да, китобхоннинг ўзи мустақил равишда шундай хulosага келади.

"Авлодларга нима деймиз?" деган мақола ҳам яна пахтакор меҳнати ҳақида нақл қиласди. Бироқ бу гал бу масала табиатни асраш масаласи билан бирга қўйилади. Бизнинг ўйламай иш юритишимиз, мутлақо масъулиятсизлигимиз табиатни қон-қора қақшатаётганини қўпгина ҳаётий мисолларда очади.

"Бир-биримизни асройлик" деган мақола, биринчи қарашда, жузъийроқ масалага – ёзувчиларнинг ўзаро муносабатларига бағишилангандек кўринади. Аслида эса бу мақола ҳам жуда чукур гуманистик пафосга эга – унда инсоннинг кўнгил шишаси бенихоя нозик экан, ўринсиз койиш, ножӯя бир гап билан, тўқимтабиатлик билан унга ўнгланилмас шикаст етказиб қўйиш мумкинлиги айтилади.

"Мантиқ қани?" номли мақола ҳам жуда муҳим ижтимоий қимматга эга бўлди. Унда ҳам адабнинг теран қузатишлари қўп. У "соалистик турмуш тарзи" деб кўкрагимизга уриб, ҳаммага мактаниб юрганимиз ҳаётнинг ғайриинсоний моҳиятини, том маънода "тескари ҳаёт" эканини кўрсатган. Коммунистик партиянинг "доно" раҳбарлиги остида барпо этилган ҳаётимизнинг энг муҳим қонунияти шундаки, унда иккюзламачилик принципи ҳукмрон – қоғозда ёзилган ёхуд оғизда айтилган гап ҳеч қачон амалдаги ишга тўғри келмайди, "соалистик жамиятда ҳамма нарса инсон учун,

инсондан улуғ бойлик йўқ", деб эълон қилинади, амалда эса, ҳамма нарса инсонни хуноб қилиш, таҳқирлаш, қадрсизлантириш сари йўналтирилган бўлади.

"Қўрқув салтанати" деган мақола ҳам "Мантиқ қани?" билан мантиқан боғланиб кетади. Бу мақола С–Я 928 рақамли собиқ "сиёсий маҳбус", "собиқ халқ душмани", Ўзбекистон халқ ёзувчиси Сайд Аҳмад билан сухбат бўлиб, унда Сталин зулми билан яратилган салтанатнинг даҳшатлари очиб берилган. Бу салтанатга "инсон ҳуқуқи" деган нарса бутунлай ёт, унда қўрқув хукмрон, бу салтанатнинг энг ардоқли "қадрият" – хушомад, тилёғламалик, чақув, букаlamунлик. Бу жамиятда имонини сотиб, хиёнат йўлига кирганларгина, виждонининг овозини бўғиб, муҳитга мослашганларгина "бахтиёр" бўлиши мумкин.

Адибнинг жасорати нечоғлик кучайиб бораётганини тасаввур қилмоқ учун унинг яна бир мақоласини кўриб ўтиш керак. Бу – "Дўстлик ҳурматдан бошланади" деган мақола. Маълумки, бизнинг ташвиқотимиз етмиш йил мобайнида халқлар дўстлиги ҳақида гапириб келди. Албатта, халқлар дўстлиги муҳим ва зарур. Дарҳақиқат, шўролар даврида халқларнинг ўзаро дўстлиги борасида анча-мунча реал ютуқларга эришдик. Бироқ шу билан бирга дўстликни янада мустаҳкамлашга халақит берган омиллар ҳам кўп эди. Айниқса, халқларни "улуғ оға"га ва "кичик ука"га ажратиш ҳаётда кўп ҳолларда ёмон оқибатларга олиб келди. Хукмрон мафкурамиз эса бунга ўхшаш масалаларни қаламга олиш бир ёқда турсин, хаёлга келтиришга ҳам рухсат бермас эди. Ўткир мазкур мақолада чинакам байналминалчи мавқеида туради, халқлар ўртасидаги чинакам қардошликини улуғлайди, дўстлик ғояларини тасдиқлайди ва айни чоқда, бир миллатни бошқа бир миллат томонидан пастга урилишини қоралайди, катта миллатларда учраб турадиган, уларнинг айрим вакилларининг суюк-суягига сингиб кетган улуғ давлатчилик шовинизмини кескин фош қиласди. Энг муҳими шундаки, Ўткир шовинизмнинг олий минбарлардан айтиладиган ваъзларда ёхуд салобатли китоблардагина эмас, балки жуда оддий нарсаларда ҳам, биринчи қарашда арзимасдек кўринадиган ишларда ҳам на-моён бўлишини аниқ ҳаётий мисолларда қўрсатиб берган. Жумладан, у "Клуб служебного собаководства" деб аталган ва Москвада 1979 йилда чоп этилган китобдаги И.Духновский деган кимсанинг "Итларга қандай лақаб қўйиш керак?" деган мақоласига мурожаат

қилади. Бу итшунос "зот" итларга Акбар, Алишер, Анвар, Араб, Арман, Асқар, Ботир, Бек, Жўра, Комила, Лола, Мухтор, Наим, Нодир, Наргис, Нодира, Умар, Падар, Рафиқ, Садир, Султон, Тоҳир, Тоир, Ҳайдар, Ҳасан, Шайх, Амир, Майна каби номлар кўйишни тавсия этади. Мақола муаллифи бундай тавсиялар И.Духновскийнинг саводсизлиги ёхуд фаросатсизлигининг оқибати эмас, балки бошқа халқларга менсимай қарап, уларни ошкора камситиш оқибати эканини ёзди ва бошқа шунга ўхшаш "саводсизликлар", "нодонликлар" билан бирикиб (уларнинг мисоллари мақолада анча-мунча келтирилган), пухта ўйланилган бир сиёсатга айланиб кетганини исбот қилади.

Кўринадики, Ўткир Ҳошимовнинг публицистикаси ҳам бадиий асарлари каби жуда катта қимматга эга – улар энг долзарб, энг ҳаётий муаммолар ҳақида баҳс юритиб, миллатнинг фикрини очади ва миллий психологиямизнинг шаклланишига ҳисса қўшади. Миллий ифтихор туйғуси йўқ халқ ҳеч қачон аҳил бўлолмайди, бинобарин, аҳил бўлмаган халқ ҳар хил тажовузкор кучлар қаршисида ожиз қолаверади.

Ўткир Ҳошимовнинг ижодий қиёфасини тўлароқ чизмоқ учун унинг "Шарқ юлдузи" журналида бош муҳаррир сифатидаги фаолиятини ҳам жиндай бўлса-да, ёритмоқ лозим. Гап шундаки, журналлар, айниқса, ижтимоий ривожланишнинг муайян босқичларида жуда катта роль ўйнайди. Бундай ҳолларда улар умумхалқ манфаатига хизмат қилади, бутун миллатни улуғ ғоялар теварагига бирлаштиради, ҳақиқат ва адолат минбарига айланади. Бир сўз билан айтганда, журнал миллий тараққиётнинг байроқдори бўлиб қолиши мумкин ва айни шу сифати билан у халқнинг ўз-ўзини танишига йўл очиб, уни ғофиллик уйқусидан уйғотмоғи мумкин.

Ўткир "Шарқ юлдузи"га 1985 йилда, яъни шўролар ютида бошланган қайта қуриш билан бирга келди. Бироқ қайта қуришнинг энг асосий самараси деб ҳисоблаган ошкоралиқ, ижод, эркинлигининг тўла эмас, қисман даражада жорий бўлиши ҳам бизда бениҳоя қийин кечди. Ўткир Ҳошимовнинг ҳам ҳар қандай бош муҳаррир каби журналдаги биринчи ва энг муҳим вазифаси яхши асарларни бостириб чиқариш эди. Аммо шу муҳим вазифани бажаришда у минг хил тўсиқларни енгишга, минг хил чиғириқлардан ўтишга мажбур бўлди. Ўткирнинг саъи ҳаракати билан журналда "Куръони карим"нинг ўзбекча таржимаси, Аҳмад Яссавий, Сўфи

Оллоҳёр асарлари, "Темур тузуклари" босилди. Албатта, ўша йилларнинг ошкоралиги бўлмаса, бундай асарларнинг босилиши ҳақида гап ҳам бўлиши мумкин эмас эди. Шундоқ бўлса ҳам, юқоридаги асарларнинг ҳар бири жуда шиддатли курашлар оқибатида дунё юзини қўрди. Масалан, Пиримқул Қодировнинг "Авлодлар довони" романи икки марта терилган жойида тўхтатиб қўйилди, катта маҳкамадаги "доно" раҳбарларга бу роман ёқмади, чунки у Бобурнинг ўғли Ҳумоюн ҳақидаги, унинг бошқа фарзандлари образини чизадиган роман эди. Романда ҳинд ва ўзбек халқларининг дўстлиги ҳақида оташин гаплар айтилган, асар бошдан-оёқ гуманистик ғоялар билан сугорилган бўлса-да, шоҳлар ва шаҳзодалар қаҳрамон қилиб олингани учун "қалтис" ҳисобланарди. Романнинг фойдали ва керакли эканини катталарга тушунтириб, ижозат олгунча Ўткир қанчадан-қанча раҳбарларга совуқ кўринди, қай бир мансабдорларнинг гапини қайтарди, улар билан айтишишдан чўчимади.

Ёхуд Чўлпон асарларини нашр этиш масаласини олайлик. Бу шўрпешона шоир 1956 йилда тўла оқлаганган бўлса-да, қайта қуриш йилларида ташкил қилинган маҳсус комиссия асарларини босиш керак, деган қатъий хulosаса чиқарган бўлса-да, Марказий Комитетдаги "ака"лар "Кеча ва кундуз" романини эълон қилишга икки йил розилик бермадилар. Бунда ҳам бош муҳаррир казо-казо мажлисларда романни эълон қилмаса бўлмаслигини тушунтириб, раҳбарлар тутган йўл замон руҳига бутунлай зид эканини исботлаб, том маънода жанг қилишга мажбур бўлди. Шундан кейингина муайян қисқартишлар билан, Чўлпоннинг "хатолари"ни халқقا тушунирадиган маҳсус мақола билангина романни босишига рухсат берилди.

Яна бир мисол. Гарчи, баъзи бирорлар Қуръони каримни бошқа тилларга таржима қилиш тўғри эмас, гуноҳ бўлади, деб ҳисобласалар-да, бошқа халқлар тилларида нашр этиш бениҳоя зарур ва савоб ишдир. Қуръони карим татар, турк, уйғур ва бошқа тилларга таржима қилинган. Шунинг учун "Шарқ юлдузи" саҳифаларида Қуръон таржимаси эълон қилина бошлаганини кўриб бошимиз осмонга етганди. Аммо кўп ўтмай бу масала атрофида жанжал бошланди – бир гуруҳ олимлар таржимани босишини тўхтатишни талаб қилиб, "катта идора"га мурожаат қилишди. Бош муҳаррир ва журналнинг баҳтига ҳал қилувчи сұхбат давлатимиз раҳбари

Ислом Каримовнинг ҳузурида бўлди. Юртбошимизнинг жонкуярлиги ва қўллаб-қувватлаши билан муқаддас китобнинг ўзбек тилидаги маънолар таржимаси тарихда биринчи марта "Шарқ юлдози"да чоп этилди. Ўша кезлари мен Тошкент вилоятининг Оққўргон, Фарғонанинг Бешариқ, Ўзбекистон ва бошқа туманларида, республиканинг қатор шаҳар ва қишлоқларида бўлиб, Куръони карим таржимасининг чоп этилиши ҳақида ким қандай фикрда эканини турли соҳа вакилларидан суриштиредим. Уларнинг ҳаммаси бу – халқимизнинг маънавий ҳаётида жуда катта тарихий воқеа эканини бир оғиздан эътироф этдилар.

Ўткир Ҳошимов журналнинг замон билан ҳамнафас бўлиши устида ҳам жиддий қайғурди. Бу, айниқса, журналнинг публицистика бўлимида аниқ кўринади. Унда экология, бозор муносабатлари, миллий алоқалар, иқтисодиёт муаммолари, тарихнинг ўқилмаган ёки хато ўқилган саҳифалари тўғрисида жуда салмоқли мақолалар эълон қилинди. Айрим мақолаларда ўзбек халқига нисбатан йўл қўйилган ижтимоий адолатсизликлар, тухмат ва бўхтонлар фош этилди. Буларнинг ҳаммасини таҳлил қилиш эмас, шунчаки санаб чиқиш ҳам қийин. Шундоқ бўлса-да, босмачилик ҳаракатининг талқинига бағишлиланган давра сухбатини алоҳида таъкидлаш лозим. Чунки унда совет ҳокимияти йилларида ҳам мустамлакачилик сиёсати изчил давом этирилгани, "босмачилик" ҳаракати эса шу сиёсатга қарши қаратилган миллий озодлик кураши бўлгани, фақат коммунистик мафкура тазиғи туфайли бу факт етмиш йил давомида соҳталаштирилиб келингани аниқ далиллар асосида очиб берилган.

Ўткир Ҳошимовнинг бош муҳаррир сифатида иккинчи вазифаси ҳам бор эди. Бу ҳам ўта муҳим ва ўта қийин вазифа – бош муҳаррир адабиётнинг манфаатини ўйласа, китобхонни ҳамиша юксак санъат асарлари билан таъминлаб турishiни ўйласа, унда муайян характердаги асарларнинг босилишига йўл қўймаслиги керак. Гап шундаки, мутлақо истеъдодга эга бўлмаган, баъзан саводи оддий бир дуойи салом ёзишга ҳам кифоя қилмайдиган одамлар баъзан "ёз-ёз" вассасасига тушиб қолишади. Бундай ҳолларда улар жазавага тушиб, бир зумда юзлаб саҳифаларни қоралаб ташлайдилар. Уларнинг ёзганини лоақал тўрт бетини чидаб ўқиб чиқолмайди киши. Бироқ бу билан уларнинг иши йўқ. Уларнинг назарида ўzlари ёзган нарсалар – дохиёна асарлар, кимда-ким

бунинг фаҳмига етмаса, ўзидан кўрсин. Шундай қилиб, "асар" тайёр бўлгач, муаллиф уни қўлтиқлаб, журналга югуради. Чинакам жасоратли муҳаррир, албатта, унақа асарни босищдан бош тортади-ю, балога қолади... Ёки нима бўлишини атоқли грузин адиби Нодар Думбадзе "Абадият қонуни" романида киноя билан жуда чиройли тасвирлаган. Эсингиздами? Бош муҳаррир хонасига қимтиниб-симтиниб... маймун кириб келади ва камсуқумлик билан бир асар ёзганини айтиб, уни босиб чиқаришни илтимос қилади. "Сен маймунсан, ёзувчи бўлишинг мумкин эмас, қўй бу ишни", деган панд-насиҳатлар унга кор қилмайди. У ялиниб-ёлвориб ўз мақсадига эришади. Орадан икки ҳафтача ўтгач, яна шу аҳвол такрорланади. Маймуннинг "асари" яна босилади. Бу беш-олти марта қайтарилади. Бир маҳал, қарабисизки, кечаги маймун ёзувчи бўлибди-қолибди. Одамлар унинг ёзувчи эмас, маймунлигини билишса ҳамки, "кел, менга нима!" деб индашмайди ва бора-бора унинг ёзувчилигига кўнишиб ҳам кетишади. Бош муҳаррирнинг кўнгилчанлиги маймун – "ёзувчилар"нинг уруғи қўпайиб кетишига сабаб бўлади. Афсуски, "ёз-ёз" дардига чалингарлар оз эмас, улар йўлларида ҳеч қандай тўсиқни тан олмай, журналга қудратли тўлқиндай оқиб келаверишади. Энг ёмони шундаки, уларнинг ичидаги ҳар хил катта-кичик амалдорлар бўлади. Ўз вақтида ҳатто Брежневнинг ўзлари ҳам шу дардга чалиниб, "Кичик ер", "Кўриқ" дегандек "урдоналар" яратган, кейин бир-икки мажлисда "биз – ёзувчилар..." дея қўкрагига уриб гапирганди. Албатта, бундай ҳолларда халтуранинг йўлини тўсишга бош муҳаррир ҳам ожизлик қилиб қолади.

Ўткирнинг баҳтига у муҳаррирлик қилабошлагандан кейин бундайлар ёзувчиликдан тийилиброқ қолишли. Лекин мундоқроқлари ёзишда давом этаверди. Ўткир қўлидан келганича бунақаларнинг асарларини чиқармасликка ҳаракат қилди. Бироқ бу унга осон бўлгани йўқ. Асари қайтарилган адаб борки, ҳаммаси енг шимариб, Ўткирнинг устидан шикоятлар ва мактублар ёза бошлайди. Уларда Ўткирнинг устига ағдарилмаган фиску фасод ва бўхтон қолмайди. Мен ўзим Марказий Комитетда бир қалин делони кўрган эдим – унда Ўткир устидан ёзилган шикоятлар тикиб қўйилган экан. Салкам 500 саҳифа! Бунга "ёзадиган, вақт сарфлайдиган, бош қотирадиган бошқа одам, ёзса ёзавермайдими?" деб қўл силтаб қўяқолса бўларди. Бироқ шўро замонида ҳар гал ариза тушганда, Ўткир катта идорага чақирилар ва у ерда ўзининг туже эмаслигини

бошқатдан исботлар эди. Катта идорадагилар ҳам "Ўткирни ўзимиз биламиз-ку, у бунақа эмас, аксинча, ёзган одамнинг ашаддий разил экани ҳаммага маълум, уни койиб, ҳайдаб солайлик-да, можарога нуқта қўяйлик", дейишмасди. Бинобарин, яна қанчадан-қанча изтироб, руҳий азоблар, ҳозирги замон таъбири билан айтсак, йўқ ердан орттирилган стресслар.

Ҳар қандай вазиятда ҳам ҳақиқат томонида туриш унчалик осон юмуш эмас. Ўткир Ҳошимовда шундай феъл – ҳақпараматлик бор.

Яратганга шукроналар бўлсин. Ватанимиз мустақилликка эришди. Узоқ йиллар "сифиниб келингган" шўро тузумининг миси чиқди. Юқорида эслатилган қатор асарларида Ўткир айнан шу ёруғ ният – мустақиллик ғоясини илгари сурди. Истиқлолнинг биринчи йилларида яратилган "Тушда кечган умрлар" романи мустақиллик бўлмаса, дунё юзини кўрмас, мабодо нашр этилса ҳам муаллифни жазога тортишлари аниқ эди. Чунки асарда етмиш йиллик истибдод бутун даҳшати билан тасвирланган. Ўтган аср охирларида саҳналаштирилган "Қатағон" фожиасида ҳам кечаги кун фожиалари тасвирланган, ёш авлодни мустақилликни қадрлашга чақириқ каби янграйди, бу асар. Қайта-қайта нашр этилган "Дафтар ҳошиясидаги битиклар" китоби ҳам адабнинг сара асарларидан бўлиб қолади.

Юқорида биз Ўткир қилган ишларни бир сарҳисоб қилишга уриниб кўрдик. Ўйлайманки, шу айтилганларнинг ўзиёқ адаб ижодий фаолияти ғоят самарали бўлганини, бугунги адабиётимизни унинг ижодисиз тасаввур қилиш мумкин эмаслигини кўрсатиб турибди. Бироқ ёзувчилик касбининг ғалати томонлари бор. Жумладан, ёзувчи одам учун энг яхши асари энди ёзадиган асари бўлиб туюлаверади. Бу – жуда яхши нарса. Донолар ўз-ўзидан қоник маслик туйғусини инсонни янги уфқларга ундейдиган муқаддас туйғу деб ҳисоблашган. Ўткирда ҳам навбатдаги – энг яхши асарини ёзиш истаги доим қалбida яшайди. "Шундай асар ёзсангки, китобхон уни ўқиётганида ҳамма нарсани унутса, асар қаҳрамонлари ҳаёти билан яшаса. Китобни ўқиб бўлган куни кечаси билан ухламай, тўлғониб чиқса... Вақти келиб ўша китобни яна қўлига олганида қайтадан ҳаяжонга тушса... Орзум шу...", деб ёзган эди Ўткир Ҳошимов. Нима дейиш мумкин бу тилакка? Орзуинг ҳамиша сенга йўлчи юлдуз бўлсин, дўстим. Адабиётимиз баҳтига кўп йиллар омон бўл!

**Пиримқул ҚОДИРОВ,
Ўзбекистон халқ ёзувчиси**

САНЪАТКОР АДИБ

Бундан салкам 50 йилча муқаддам эндиғина ёш ёзувчи бўлиб танила бошлаган Ўткир Ҳошимовнинг “Чўл ҳавоси” деб номланган асарини журналда қизиқиб ўқидим. Асари қизиқтирган ёзувчининг ўзини ҳам кўриб билгингиз келади. Шу тарзда Ўткир Ҳошимов билан биринчи марта кўришиб танишган эдик. Унинг менга ёққан энг муҳим фазилати – ҳар бир сўзини самимият ва маҳорат билан ёзганлиги бўлди. Аксарият қаҳрамонлари ҳам ҳалол, самимий одамлар эканлигини ҳис этасиз. Айни вақтда “Чўл ҳавоси”нинг мусаффолиги ва илиқлигини тасвирлаганда Ватан туйғуси, она ерга бўлган меҳр яққол сезилиб туради. Чўлда ишлаётган қаҳрамонлар ҳам ҳалол, беғубор, жозибали кишилар эканлигини юракдан ҳис қилиб, завқ оласиз.

Мана шу асар сабаб бўлиб Ўткиржон билан яқинлашиб қолдик. У янги ёзган асарларини бизникага олиб келиб, ўқишга берадиган бўлди. Мен унинг қўлёзмаларини эътибор билан ўқирдим ва қўлимдан келганича маслаҳатлар берардим. Изланувчан ва ҳар бир сўзга маъсулият билан қарайдиган ёш адиб асарларини янада мукаммал қилишга интиларди.

Шу тариқа истеъдодли адиб Ўткир Ҳошимов ёзган асарлар Абдулла Қаҳхордек буюк сўз саънаткори эътиборига тушди. Атоғли устоз адибнинг ўша кезларда Ўткир Ҳошимовга ёзган тилаклари ёш ёзувчига қанчалик қанот баҳш этгани ҳақида кўп адабий даврларда эҳтиром билан тилга олинади.

Ўткир Ҳошимовнинг кўпчилик китобхонлар меҳрини қозонган ажойиб асари “Дунёнинг ишлари” деб аталган қиссаси бўлди. Қарийб ўттиз йилдирки, бу асарни қизиқиб ўқимаган китобхон бўлмаса керак. Чунки унда Она образига муаллиф ўз онасини прототип қилиб олган ва ниҳоятда самимият билан тасвирлаган. Бу асардаги Она образи орқали ўзбек миллий характерининг жозибали қирралари жуда таъсирили қилиб акс эттирилган.

Асар қаҳрамонларидан бири бўлган ўғил ҳам шўро мафкураси таъсирида улғайган. Дастлаб ўз онасининг миллий фазилатларини унчалик теран англай олмайди ва кутилган даражада қадрига

етмайди. Онаизордан жудо бўлгач, унинг бутун оламини ўзгача англайди. Яъни, ўзбекона раҳмдиллик ва ҳақиқий меҳрибонлик фазилатлари ўғилга кейинроқ беҳад қадрли туюлгани асар охирида жуда таъсирли тасвиранган. Нақадар ҳаётийлиги ва жозибадорлиги билан “Дунёнинг ишлари” асари китобхонлар қалбидан жой олди. Адабий жамоатчилик томонидан матбуотда бу асар ҳақида кўп илиқ фикрлар билдирилди.

Карши Давлат университети аспиранти Гулчехра Исмоилова “Дунёнинг ишлари” ва Одил Ёкубовнинг “Диёнат” романлари асосида номзодлик диссертацияни муваффақиятли ёқлади. Унга қизим илмий раҳбарлик қилган эди. Изланувчан ёш олиманинг бу икки асар ҳақида олиб борган илмий тадқиқоти айрим боблари кейинчалик китоб ҳолида чоп этилди. Матбуотда у ҳақда ҳам ижобий фикрлар билдирилди.

Ўткир Ҳошимовнинг бу каби эл меҳрини қозонган асарлари кам эмас. Бугун 70 ёшга тўлаётган адабимиз ярим асрлик ижоди давомида ўзбек адабиётига салмоқли ҳисса қўшди. Бир қатор ҳикоялар, қиссалар, романлар, драмалар айниқса, китобхонлар томонидан зўр қизиқиш билан кутиб олинган “Дафтар ҳошиясидаги битиклар” асари билан миллий адабиётимизни янада бойитди. У истиқлол даври адебидир. Турли даврда яратган асарларида айнан миллий истиқлол нафаси уфуриб туради.

Ҳақиқий ёзувчи жамият билан ҳамнафас бўлиб яшайди. Ўткир Ҳошимов жамоат арбоби сифатида ҳам эътибор қозонган. У қатор йиллар Ўзбекистон Республикаси Олий Мажлиси депутати ва қўмита раиси сифатида фаолият кўрсатган кезларда ОАВига оид бир қанча қонун лойиҳаларини тайёрлашда фаол иштирок этди. Мазкур қонунлар лойиҳалари ҳақида парламент мажлисларида маърузалар қилди ва уларни ҳаётга тадбиқ этишда фаоллик кўрсатди.

ОНАГА ТАЪЗИМ

«Шарқ юлдузи» журнали Ўткир Ҳошимовнинг «Дунёниг ишлари» номли қиссасини эълон қилди. Бундай қараганда биографик қисса адибнинг ёшлиқ даврларини акс эттирадиган асарга ўхшайди. Асардан биз Ўткир Ҳошимовнинг оила мухити, тенгдошлар сафи, қўни-қўшнилар куршови ҳақида батафсил маълумот оламиз. Адид ўсиб улғайган давр, Улуғ Ватан урушидан кейинги оғир йиллар, бу даврдаги оддий меҳнаткаш оиласининг турмуш тарзи ҳақида фикр ва мулоҳазаларни биламиз. Бу маълумотлар ёзувчи қаламининг кучи билан ва жозибали шаклда акс эттирилади. Бироқ ёзувчи ўзини биринчи планга чиқармайди. Асаддаги воқеа ва ҳодисаларни фақат ўзи билан боғлайвермайди. У она олдида одоб сақлагандек кўринади. Қиссанинг ҳар бир бети, ҳар бир жумласи марказида улуғ инсон – она образи, унинг ёрқин қиёфаси туради.

Оналар ҳақида асарлар кўп яратилган, баъзан йирик-йирик асарларда она образига кенг ўрин ажратилганини биламиз. Бироқ ўзбек адабиётида бу даражада тўла ва батафсил лирик планда ёритилган дея олмаймиз. Қиссада она қиёфаси китобхон кўзи олдида ўзининг сонсиз-саноқсиз жилолари билан намоён бўлади. Қизифи шундаки, ҳар бир новеллада автор она ҳақида олдинги ҳислатларини такрор қилмайдиган қандайдир янги қирраларини топиб акс эттиради. Бунинг учун фақат онани севиш, уни улуғлаш нияти етмас эди, албатта. Бунинг учун адид қиссадан ҳисса чиқара оладиган, яқин-йироқ кишилар хатти-ҳаракатидан маъно топа олишга қодир истеъдод эгаси бўлиши керак эди. Ўткир Ҳошимов бу асарида шу холдаги истеъдод эгаси сифатида кўзга ташланади. Асарнинг бошларидаги битта деталга эътибор қилинг: она-бала хаёл суришиб, ой ва юлдузларни кузатишади. Ажойиб лирик кайфият. Ўғил бепоён осмондан ўзига юлдуз танлайди. Унинг танлагани етти оғайнини орасидаги энг ёруғ юлдуз. Она эса бир чеккада етим боладек ёлғиз турган кичкинасини танлайди. Бу деталда катта маъно бор: хусусан, болалар олдида камсуқум, сабр қаноатли, болага овқатнинг кўпини ва ширинини бергандек, юлдузнинг ҳам «энг ёруғини» болага бағишилаб, ўзи етимча юлдузга рози.

Она факат яратувчи эмас. У биринчи тарбиячи. Тарбияни у бола туғилган кундан бошлайди. Она боласига сўз ўргатади, бироқ буни «ур, сўк, юл, торт» сўзларини ўргатишдан бошламайди. У биринчи бўлиб «ассалом дегин», «ота дегин», «она дегин» сўзларидан бошлайди. Бола гап-сўзга тушуна бошлаган заҳоти она ерга муҳаббат уйғотишига, уни чексиз ўлка ҳақида тушунчага қўнигиради. «Тошкентни яхши кўришиниг учун ўзимизнинг Дўмбировотни яхши кўргин, хўпми» – мана қиссада она болага ўргатадиган Ватан ҳақидаги оддий ҳақиқат. Ватандек улуғвор, муқаддас нарса ҳақида оддий ва ифодали тушунча!

Яхши ва ёмонни ҳам фарзандга оддий қилиб тушунтира олади. Қаранг: «...Шундай қилиб, офтоб бор экан. Лекин ер юзига ҳеч ҳам чиққиси келмас экан. Ҳар куни эрталаб Худога нола қиларкан. Ер юзида ифлос нарсалар кўп, ҳеч кўргим келмайди, дер экан. Тангри уни овитар экан. Сен чиқавергин, ер юзини ифлос нарсалардан тозалайдиган одамлар бор, деркан. Шунинг учун ким ер юзини тозаласа, ўша энг яхши одам бўларкан».

Яхшилик ва ёмонлик ҳақида кўп эшитганмиз. Бироқ онанинг болага насиҳати сифатида шу хилда маънодор, таъсирчан қилиб айтилганини балки биринчи марта эшитаётгандиримиз.

Бола ўсади, улғаяди. Аста-секин ҳаётнинг аччиқ-чучигини tota бошлайди. Кимларнингдир ёлғон сўзлаганини англайди, кимларнингдир хиёнаткорлигини билиб қолади. Дунё тор кўриниб қолади боланинг кўзига. Бундай пайтларда она болага ёрдамга келади: «Қўявер, ўғлим, баъзан шунақаси ҳам бўлади», – дейди. Болани кенглиқка, чидамга ўргатади, ҳаётда бўлиши мумкин бўлган зиддиятларга тайёрлайди. Адиб бу маънодаги баъзи бир эпизодлар тасвирини беради. Бола бу хилдаги воқеалардан қаттиқ таъсирланади. Бундай пайтларда ҳам боланинг дардига шерик, биринчи юпатувчиси. Бола кўзи олдида она садоқат рамзи сифатида гавдаланади. Қиссанинг шу хилдаги жойларини ўқиб шундай хулосага келасиз: Она меҳри бўлмаса эди, ёмонлар сони тобора кўпайиб бораверарди, уларнинг кўпайишини она ўз меҳри билан тўсиб туради...

Ҳаёт шундайки, инсон куч ва қудрати гуё ўрин алмашиб ривожланадигандек. Бола улғайиб, мустақил ҳаётга қадам қўяди – қўлидан келиб биринчи ота-онасига ёрдам кўрсатади ёки бирор хизматга ишга киргач, биринчи маошини олиб келиб онасининг

қўлига тутқазади... Бундай пайтлардаги ҳолатни ҳам Ўткир Ҳошимов қаламга олади. Бундай пайтларда она кайфияти маълум: боласига суюнган тоғим дейди, айтмаса ҳам кўнглидан ўтади шу фикр. Аслида-ку, она боланинг «суюнган тоғи». Бироқ болани ўзига суюнчиқ ҳисоблаш билан у ўз «куч ва қудратини» болага ўтказаётгандек бўлади.

Ўткир яратган она алоҳида онадек кўринади. У қўни-қўшни хотинлардан ҳасрат эши тувчи, бирорларнинг дардини ўзига сингдириб тинчитувчи. У яратган она бирор қўшни хотинга «палон-чиҳон» демайди, ўзини уларга яқин олиб, «овсинжон» дейди. Узоқ-яқин хотин-халажлар – «овсинжон»лар онага келиб дардини айтадилар, ундан шифобахш сўзлар эши тувчи, ўзларини тинчитиб кетадилар. Бирорларни эри ташлаб кетади, Пошша хола уни: «Кутинг, жон болам, сабр қилинг, эрингиз ёмон боламас», «эрингиз сизни жонидан яхши кўради» қабилидаги ошириб, бироз ёлғон кўшиб бўлса ҳам жувонни ўз гапларига ишонтиради. Бирорларнинг ўришда юрган ўғлидан, турмуш ўртоғидан хат-хабар келавермайди. Пошша хола бу дардларга ҳам қандайдир ўзининг ижобий муносабати билан ёрдам кўрсатади. Ҳатто баъзан бирор айб иш билан фарзандлари қўлга тушиб қолган оналар ҳам ундан ўз дардига малҳам олади. «Кўнглим сезиб турибди, ўғлингиз эрта-индин қутилиб қолади» қабилида «каромат» қиласи...

Киссада шу хил мазмундаги эпизодлар анчагина. Хуллас, Ўткир яратган она дардҳазм, улуғ зот. Бу хилдаги эпизодларни ўқиганимизда шахсан мен одатда баланд миноралар тепасига илиб қўйилган яшин қайтаргичларни эсладим. Балки дунёда бор оналарнинг ҳаммаси ҳам Ўткир яратган Пошшохондек «яшин қайтаргич» ролини ўйнайвермас. Бироқ онанинг бунга тескари бўлишидан кўра шу тарзда бўлишига кўпроқ ишонамиз, оналарни биз шу хилда кўргимиз келади.

Она қариндош-уруг, ошна, ёр-дўстлар ришталарини бир-бirlарига боғлаб турувчи восита. Ҳакиқий оналаргина оила қўлами ва қудратини оширади, унинг аъзоларининг ҳар бирининг аниқ ўрнини белгилаб бера олади. Она бу жиҳатдан ҳам – улуғ. Ҳаётда бу фикрни тасдиқлайдиган ўнлаб-юзлаб фактларни топиш мумкин.

Куйидаги эпизодга разм солинг: Пошша хола ҳеч кимга ҳеч нима демасдан узоклашиб, қарийб ёт бўлиб кетган ўгай қизини излаб кетади. Не азоблар билан уни топади. Қайтиб келгач, қўш-

ниларни йиғиб, ошириб-тошириб, ўз таассуротларини гапиради: «Қизим берди. Қаранг. Пиёласининг чиройлилигини қаранг! Вой ўргилай сизлардан, шундоқ қизим бор эканлигини, мен аҳмоқ билмай юрганимга қаранг. У боғ-роғлар, у оқ уй олабаргаклар десангиз! Қўша-қўша гиламлар! Бир радиоси бор, сандикдек келади. Қизимнинг чаққонлигини кўрсангиз. Бир пасда бир гуруч, бир гўшт қилиб чигит босгандек ош дамлаб келди. Күёвимни айтмайсизми, проводнийларнинг бошлиғи экан. У ёғи Ашхобод, бу ёғи Ленинобод – етти иқлимда кўрмаган жойи қолмабди. Бирам одобли, бирам ақлли...»

Фақат Пошша хола типидаги, бошқаларнинг борини ошириб, йўғини яшириб кўрсатишдан мароқланадиган оналаргина ўзига яқин-йироқ кишилар ҳаётини шу тарзда таърифлаши мумкин! Аслида эса Ўткир янги топган оиласининг хонадони бошқача эди. Шу сабабли адид ойисининг таърифларидан бироз ажабланади ҳам: «Ойим опамнинг ҳовлисидағи тутган бошқа қайси боғни, эски шолчадан бошқа қайси гиламни, мошкичиридан бошқа қайси паловни айтаётганини билмасдиму лекин ҳамма гапига ишонгим келарди».

Ҳа, биз ҳам ишонгимиз келади. Чунки яхши ниятли Пошша хола истак ва орзуларига биз ҳам шерик бўлгимиз келади. Баъзи ўринларда яхши ният билан айтилган ёлғон, ёмон ният билан айтилган тўғридан афзалроқ эканига ишонч ҳосил қиласиз.

Ўгай болага ишончсизлик билан қараш керак, деган фикрни ўтказмокчи бўлган қўшни хотинга жавобан Пошша хола шундай дейди: «...Бу дунёдан ҳеч ким ҳеч нарса орқалаб кетмайди, ўргилай. Болаларим бу ёқда ота-онасининг бағрида яйраб юрсин-да қизим у ёқда тирик етим бўлиб юрсин... Шуям диёнатданми? Бунақа гапингизни бир айтдингиз, иккинчи қайтарманг, овсинжон».

Мана ҳақиқий она аталмиш улуғ инсоннинг ҳаёт фалсафаси! Оламни тутиб турган, унга тинчлик бағишлийдиган фалсафалардан бири эмасми бу?!

Ўткир яратган онани биз ҳар хил муҳитда, турли-туман вазиятда қўрамиз ва ҳар гал унинг инсонларнинг инсони эканига ишонч ҳосил қиласиз. Қиссада онани бошқа бир қирраси билан характерлайдиган бир эпизод бор. Бу йўқолган олтин балдоқقا тегишли воқеа. Одам қандай вазиятга тушмайди дейсиз. Вазиятга қараб у чалғиши ҳам мумкин, баъзан ўз табиятига тўғри келмайдиган

бирон ишни ҳам қилиб қўйиши эҳтимолдан ҳоли эмас. Шундай ҳолатлар Пошша хола ҳаётида ҳам рўй беради.

Кунлардан бир кун Пошша холанинг олтин балдоғининг бири йўқолиб қолади. Гумон қўшни хотин – сепкилли холага тушади. Йўқ ердан чанг чиқариб, доим жанжалга мойил юрадиган амма унинг гумонини кучайтиради. Қўшнисига чиқиб, олтин балдоқни талаб қилишади.

Чигал ва нохуш вазият.

Анча вақтдан кейин ойболдоқнинг уйдан топилиб қолиши Пошша холани номус ўтида куйдира бошлайди. Пошша хола бу оғир вазиятдан чиқиб кетиш йўлини излайди. Ва ниҳоят ойболдоқни юзқўрмас бўлиб кетган сепкилли хола тўй қилганда келиннинг қулоғига тақиб қўяди.

Кўраяпсизми, Пошша хола оғир вазиятдан улуғ оналарга хос матонат ва олижаноблик билан чиқиб кетади. Нотўғри босилган битта қадам туфайли кўз кўрмас, қулоқ эшитмас, тил сўзламас бўлиб кетадиган қўшнилар озмунча дейсизми?! Пошша хола у хилдаги қўшнилардан эмас эди. Қиссада «ойболдоқ» эпизодини эслатадиган яна бир воқеа бор. Бадфеъл солиқчи важ топиб, бир оиланинг ризқи-рўзи бўлиб турган эчкини судраб, олиб кетиб қолади. Табиийки, Пошша хола жиғибийрон, хуни вайрон. Қарғашдан ҳам ўзини тия олмайди. «Илоё у дунё, бу дунё тирноқقا зор бўлсин! Илоё хонадонинг чақалоқ йиғисига зор бўлсин!» деб Худога нидо қиласди. Шундай қилишга уни биз ҳақли деб ҳисоблаймиз. Маълум бир вақтлар ўтгандан кейин Пошша хола яна ўзининг маълум табиий ҳолатига қайтади. Мана, солиқчи Далавойнинг хотини бола кўрмаганинг сабаби Пошша холанинг қарғишидан деб унга даъвогар бўлиб келгандаги сўzlари: «Вой гапингиз қурмасин! Кўйинг-е, нима, мен пайғамбар бўпманми? Жаҳл устида айтган бўлсан, минг марта қайтиб олдим, ўргилай! Шуни уйлаб юрибсизми ҳали? Кўйинг, ўзингини босинг. Мени айтди дерсиз, оповси, ичингиз тўла бола! Ҳали шунаقا қўша-қўша ўғиллар кўрасизки, оғзига кучи етмаганлар уялиб қолади, айланай!»

Фақат қалби кенг, оналик бурчини яхши англаган улуғ инсонларгина шу хилда фавқулодда пайдо бўлган ҳолатидан қайтиб, ўз табиий кўринишида намоён бўлиши мумкин!

Ўткир она ва бола ораларидаги энг нозик ҳис ва туйғуларни ифодалаш йўлларини излайди, баъзан топади ҳам.

Албатта, бир эмас, бир неча бор сафарга чиқиб кўргансиз. Сафар олдида онанинг «Менга сенинг чивиндек жонинг керак. Сен учун менинг юрагим ёнганда бошқаларнинг этагининг бари ҳам куймайди...» қабилидаги илтижоларини эшигансиз. Фарзанд ўз бўсағасидан хатлаб сафарга жўнайди, бироқ шу билан у она юрагининг бир парчасини юлиб, ўзи билан олиб кетганини доим ҳам билавермайди. Ўткир қиссанинг «Ҳавас» номли бобида она билан бола ораларидан шу хилдаги ҳолатларни тилга олади. Бу боб билан танишган ҳар ким ҳам-кattами, кичикми-она меҳри олдида таъзим қилмасдан иложи йўқ.

Фарзанд сафарга отланади. Аввало, она учун фарзандларнинг умуман сафарга чиқмагани маъқул. Мабодо зарурат юзасидан чиқадиган бўлса, она доим ўзида йўқ безовта, жиғи-бийрон – фарзанд бўсағасидан чиқиб кетди дегунча қандайdir нохуш воқеалар, оғир фаокатлар рўй бериши муқаррардек...

Узок бўлмаган бир шаҳарга машинада жўнамоқчи бўлган ўғилга онанинг муомаласини қаранг: «Йўлда эҳтиёт бўлинглар!» Фарзанднинг ваъдасини олгач, «тоғдан эҳтиёт бўлиб ўтгин», дейди она. Йўлда тоғ йўқлигини тушунтиришдан кейин ҳам «тоғ кўп бўлганидан айтаяпман-да» дейди. Яна йўлда тоғ йўқлигини тушунтиришади. Йўқ тоғни четлаб, ўтишга кўндирамагунча она тинчимайди. Бу «масала» ҳал бўлгач, она болага машинани «тўхтаб-тўхтаб, дам олиб-дам олиб» ҳайдашни сўрайди. Шу алпозда чопиб бориб уйдан совуқ қотиб қолсанг, киясан деб пўстин олиб чиқади. Ҳавонинг жазирама иссиқлиги билан онанинг иши йўқ. Йўлга чиқиш учун ҳамма нарса тайёр бўлгач, «Илоё...»деб узундан-узоқ дуо қилади, фотиҳага кўл қўтаради, дуо фотиҳада ҳам бунга тегишли бисотида бор сўзларни ишга солади. Оқибат машина юриб кетганидан кейин ҳам тўхтатиб қаерлардандир пахта топиб келиб, қулоқларига тиқиб олишни сўрайди. Фарзанд пахтани олиб, чўнтакка солаётганида: «Йўқ, ҳозир тиқиб ол, кейин эсингдан чиқиб кетади», деб туриб олади. Адиг бу воқеани кўриб, дўстига ҳавас қилади.

Кўраяпсизми, бу ерда гап бошқа она ҳақида кетаяпти. Бу адибнинг дўсти ва унинг онаси ораларида бўлиб ўтган воқеа. Ўткир бу воқеанинг гувоҳи бўлган. Назаримизда, воқеа қай тарзда рўй берган бўлса, шу тарзда «кўчирилган». «Кўчирилганда» ҳам саънаткорона «кўчирилган». Бундай ҳолатдардан бошқа бир вазиятда

қандайдир чекинишлар бўлиши мумкин, бироқ бу онанинг болага ҳақиқий муносабати. Бундан бошқача бўлишини биз тасаввур ҳам қила олмаймиз.

Гап бу ерда фақат ҳавасда эмас. Гап авваламбор оналардаги муштаракликни, улуғворликни таъкидлашдан иборат. Аёллар борки, улар бир-бирларидан фарқ қилиши, у ё бу жиҳатдан бир-бирларидан кескин ажралиб туриши мумкин. Бироқ оналик бурчини адo этишда улар бир хил!

«Комсомолская правда» (4 март, 1982 йил)да «Ҳаммаси қонун асосида?» сарлавҳали мақола эълон қилинди. Ёш онанинг биринчи боласи икки қўлсиз туғилади. Докторлардан тортиб, қариндош-уруғларгача боладан туғруқхонадаёқ воз кечишни таклиф қилишади. Бироқ она ўз роҳат фароғатини ўйламайди, боладан воз кечмайди. Қўлсиз болани тарбиялашга киришади. Ҳатто тил чиқа бошлиши билан оғир ҳаётга тайёрлаш учун уни инглиз тилида гапиришга ўргата бошлайди. Онани олдинда не-не машаққатлар, не-не кулфатлар кутиб турибди. Бироқ она кўзига фақат бир нарса кўринади: қиз катта бўлади. Майли, қўллари бўлмайди. Инглиз тилини яхши билиб олади ва нимагадир яроқли бўлади.

Бундай ҳолларда бошқача қарорга келадиган оналар ҳам бордир. Бироқ ҳақиқий ва чин оналар фақат мана шу аёлнинг ишини қилиши мумкин! Биз она деганда шу хилдаги оналарни тушунамиз ва юз бор, минг бор бошни оёққа эгиб таъзим қилишга тайёр бўламиз.

Ўткир асарини она дилидан чиқиб, фарзанд дилига пайванд бўладиган эртаклардан бошлаган эди. Қисса асрлар оша миллион-миллион болаларга бағишиланади. Бунда ҳам катта маъно борга ўхшайди.

Эркин ВОХИДОВ,
Ўзбекистон Қаҳрамони, ҳалқ шоюри

ДЎСТИМ ТЎҒРИСИДА БИТИКЛАР

Халқимизнинг суюкли адиби, мухлислар қалбидан сўзи, жавонидан китоблари жой олган, ҳар бир юртдошим каби мен учун ҳам азиз ва қадрли бўлган ёзувчи, дилбар инсон, куюнчак муҳаррир, меҳрибон дўст бир сафдошим тўғрисида икки оғиз сўз айтгим бор.

Ўйласам, замондош ижодкорлар, устозларим, ёш қаламкаш дўстларим тўғрисида кўп ёзибману эллик йилдан буён ёнма-ён меҳнат қилган, фикрдош, маслакдошим бўлган, гоҳ сирлашиб, гоҳида масала талашиб, бир-биримизга устоз, бир-биримизга шогирд бўлган Ўткир Ҳошимов тўғрисида кўнгилда борини қоғозга туширмабман. Ёзарман, айтарман, биргамиз-ку, деб юраверибман, Ўткиржон эса етмишнинг довонига етиб қолибди.

Бугун энди машхур адибнинг бор бўй-басти, босиб ўтган ижодий йўлига, миллий адабиёт, миллий шууримизда тутган мавқеига холис назар солиб, бу чоғроққина вужудда улкан бир сиймони кўраман, нафасида давр садосини, аср дардларини, уруш йилларида очлик, юпунлик, етимлик азобларини бошидан кечирган бир авлоднинг нидосини эшитаман.

Бола бошидан, ўғлон ёшидан, деймиз. Ўткир Ҳошимов талабалик йилларидаёқ Ўткир қалами билан ёшлар диққатини тортди, тезда устоз Абдуллар Қаҳҳор назарига тушди, йилдан йилга, асардан асарга чархланиб жуда ёш элга танилди. 1967 йилда улуғ адибнинг олтмиш ёшини нишонлаш арафасида ёзувчи ва кинорежиссер Учқун Назаров ҳужжатли фильм суратга олган. Абдулла Қаҳҳорни қуршаб ўтирган шогирдлар қаторида ёшгина Ўткиржон ҳам бор. Ўша вақтдаёқ у шуҳрат пиллапояларидан кўтарила бошлаган эди.

Ўткир Ҳошимовнинг ярим аср ичида ёзганларини битта қолдирмай тўпласа, бир уй китоб бўлса ажабмас. Лекин адиб ўта талабчанлик билан саралаб, олти китобли танланган асарларини чоп эттиromoқда. Улар аллақачон адабиётимиз хазинасидан жой олган ва замонамизнинг зукко мунаққидлари – Озод Шарафиддинов, Иброҳим Ғафуров, Умарали Норматов, Абдуғафир Расуловлар томонидан юксак баҳолангандан чуқур таҳлил этилган. Улар тўғрисида фикр айтиш учун бизларга қилча ҳам жой қолдирмаганлар.

Энди мен адиб ҳаётидан бир қизиқ воқеани айтиб бера қолай. Фарғона йўлларида микроавтобус тўла шоир, ёзувчи, мунаққидлар қизгин баҳслашиб борар эдик. Суҳбатга қулоқ солиб индамай кетаётган ИброҳимFaфуров гапга қўшилиб, норози оҳангда деди:

– Эшитиб келяпман. Ҳар гапда бир русча сўз қўшасизлар. Адабиётчилар ўзимиз шундай қилсак, бошқалардан ўпкалаш на хожат?

– Тўғри, – деди Раҳматулла Иноғомов, – менда бир таклиф бор: кимда-ким гапига бир ўрисча сўз қўшса, уч сўм штраф тўлайди. Ўйнаймизми?

– Давай, ўйнаймиз, – деб юборди Ўткир Ҳошимов.

Раҳматилла хурсанд бўлиб:

– “Давай” учун уч сўм давай, – деди. Ўткир бўш келмади:

– Аввал ўзингиз тўлаб қўйинг, “штраф” дедингиз, “жарима” дейиш керак эди. Ҳазил-ҳазил билан манзилга етгунча бир зиёфатнинг маблағи йиғилди. “Давай” деган Ўткирнинг хитоби сафарларимиздаги асқияларнинг бош пайрови бўлди. Бу каби эсласа эслагудек воқеалар ҳаётимизда кўп бўлган. Уларнинг қўпи Ўткир Ҳошимов қаламига тушиб элга тарқалган.

Кейинги йилларда ёзувчининг “Дафтар ҳошиясидаги битиклар”и шухрат топди. Одамларга қисқа, ҳикматли сўзлар, ибратли ҳикоялар керак бугун. Буни Ўткир Ҳошимов ўз вақтида илғаб чиройли китоб ёзди ва у қайта-қайта нашр этилмоқда.

Замон эҳтиёжини англаш ҳам истеъдоддир. Бу туйғу севимли адибимизга йигирма ёшда ҳам ёр эди, етмишда ҳам тарқ этмаган.

Ўткир Ҳошимовнинг барча битиклари – дафтардаги ҳам, ҳошиядаги ҳам – халқимиз қалбидаги битиклардир. Тилагимиз бу битикларнинг давоми узоқ бўлсин, тоза илҳом чашмаси ташна кўнгилларни қондириб турсин.

**Умарали НОРМАТОВ,
Ўзбекистон Республикаси фан арбоби, профессор**

НАСРДАГИ ШОИР ёхуд РУХИЯТ МАНЗИЛЛАРИ

XX аср иккинчи ярми ўзбек адабиёти, аникроғи, насри ривожида Ўткир Ҳошимовнинг муносаб ўрни бор. Мустабид тузум шароитида у ўзининг ҳақ сўзи билан эл орасида эътибор қозонди. Ёзувчи ўз асарларида ҳамиша ҳақ гапни айтишга интилди. Эҳтимол, унинг ҳикоя, пьеса, романларида юзаки ўринлар бордир, аммо адаб ҳеч қачон ёлғон гап айтмаган, мустабид мафкура, сиёsat ноғрасига ўйнаб виждонини сотмаган, муросасозлик йўлига кирмаган. У ўткинчи майлларга берилмай, сўз санъатининг азалий муаммоси - шахс жумбоғи, ижтимоийadolat туйғуси ифодаси билан қизиқди. Адабиёт дунёсида "насрдаги тарона", "насрдаги шоир" атамалари бор. Янги ўзбек адабиётида Абдулла Қодирий билан Сайд Аҳмад ҳақли равишда прозанинг шоири деб ном олганлар. Замонавий ўзбек адабиётида Ўткир Ҳошимовни ҳам насрдаги шоир, етук асарларини эса насрдаги қўшиқ, тарона деб аташ мумкин. Илк қиссаси "Чўл ҳавоси"дан тортиб "Дафтар ҳошиясидаги битиклар" китобига қадар барча асарларига хос муштарак жиҳат шуки, улар бетакрор, беназир сирли мусиқий оҳанг билан йўғрилган. Муаллиф қўлидаги қалам гўёки ёзмайди, балким қалами учидан сўзлар мусиқа сингари қуилиб келади; унинг ҳикоя ва қиссалари шеърдек, достондек ўғилади, улар якка созда чалинган дилрабо куйдек янграйди, романлари кўповозли симфонияни эслатади, ҳатто унинг бадиалари, публицистик мақолаларини ўқиганда инсон кўнгил хазинасининг, туйғуларининг хилма-хил жилолари мужассам, оддий майший кечинмалардан тортиб улкан ижтимоий мушоҳадалар, кескин руҳий драмалар, фожиалар, қабоҳатлар ҳақида қалам тебратганда ҳам нафосат туйғусини асло тарқ этмайди, ғоят тифиз лавҳаларда ҳам ажиб самимият, ҳазин ва нурли бир куй акс-садо бериб туради. Ўткир Ҳошимов насрини китобхонга манзур қилган жозиба сирларидан бири шунда.

Ўткир Ҳошимов 1941 йил 5 августда Тошкент вилояти Зангиота тумани Дўмбировот мавзесида туғилди. Унинг бобокалонлари зиёли, ўз даврининг машҳур кишилари бўлган. Жумладан, XIX асрда яшаб ўтган улкан уламо араб, форс, рус тилларини

билган, рус чоризми босқини пайтида Тошкент мудофааси ташкилотчиларидан бири бўлган, «вабо қўзғалони»да маҳаллий халқни ҳимоя қилиб чиқкан, халқ омонлиги йўлида жонини фидо қилган улуғ зот – Абулқосимхон эшон Ўткирнинг бобокалони саналади, аниқроғи, Ўткир – бу табаррук зотнинг эварасидир. Ўша улуғ зот қурдирган, унинг номи билан аталгувчи мадраса бугун ҳам янги Тошкент жамолига кўрк бағишилаб турибди¹.

Ўткирнинг отаси – Ҳошимов Атаулла оддий ишчи бўлган. "Машақкатли сафар" сарлавҳали таржимаи ҳолида ёзувчи отаси ҳақида шуларни ёзади: "Отам эскича алифбодаги китобларни ҳам, замонавий газеталарни ҳам муттасил ўқиб борар, камгап, хийла тажанг, аммо ниҳоятда ҳақпарат одам эди". «Онам – Ҳошимова Ҳакима эса отамнинг аксича, ниҳоятда ювош, жуда меҳрибон эди, – дея давом этади у. – Қўшнининг мушуги туғса ҳам жони оғригандир, деб ачинар, кўчада бирор бола йиғлаб ўтирган бўлса, албатта тепасига бориб бошини силар, бирон сабаб билан биз болаларни қарғаса, ўзи ҳам қўшилиб йиғлаб юборар, ўша заҳоти кўнглимизни олишга ҳаракат қиласади. Онам икки гапнинг бирида мақол ишлатмаса туролмас, ўта содда, ўта ювош бўлгани билан эртаклару афсоналарнинг кони эди»².

Ўткир қонида, табиатида аждодларидан ўтган, хусусан, бобосига хос арбоблик, отадан ўтган бир оз қизиққонлик, ҳақпаратлиқ, онасидан теккан қўнгилчанлик, ўзгалар дардига ҳамдардлик хислатлари ўзига хос тарзда мужассамдир. Ўткирнинг болалиги оғир уруш даврида ўтди, у ўзини «уруш болалари» авлодига мансуб деб билади. У уруш даврининг муҳтоҷликлари ва машақкатларини кўриб, татиб ўсди, ҳам қишлоқ, ҳам шаҳар одами сифатида шакланди. Кейинчалик болалик таассуротлари унинг ижодида чуқур из қолдирди.

Ўткирнинг меҳнат фаолияти жуда эрта бошланди. Билимга чанқоқ бўлажак ёзувчи ўрта мактабни медаль билан битирган, олий ўқув юрти талабаси бўлишни кўнгилга туғиб қўйган бўлса ҳам, оиласа моддий ёрдам бериш мақсадида ишлашга мажбур бўлди, аввал «Темирийўлчи» газетасида хат ташувчи, сўнг таржимон, «Қизил Ўзбекистон»да мусахҳих ёрдамчиси, «Тошкент ҳақиқати»да

¹ Қаранг: Ўткир Ҳошимов. Дафтар ҳошиясидаги битиклар. Т.: Шарқ НМАК, 2001. Б.120-123.

² Ўткир Ҳошимов. Нотаниш орол. Т.: Ёш гвардия, 1990. Б. 6-7.

адабий ходим бўлиб ишлади. Айни пайтда Тошкент Давлат университети (ҳозирги Ўзбекистон Миллий университети) журналистика факультетида аввал сиртқи бўлим, сўнг кундузги бўлимда таҳсил олди. 1966–1982 йилларда «Тошкент оқшоми»да бўлим мудири, 1982–1985 йилларда Фафур Ғулом номидаги Адабиёт ва санъат нашриётида бош муҳаррир ўрнибосари, 1985–1995 йиллари «Шарқ юлдизи»нинг бош муҳаррири, 1995–2005 йиллари эса Ўзбекистон Республикаси Олий Мажлисининг Матбуот ва ахборот қўмитаси раиси бўлиб ишлади. Мана шу йилларда у жонкуяр жамоат аробоби сифатида ҳам танилди. «Шарқ юлдизи»да муҳаррирлик қилиб юрган кезлари унинг саъй-ҳаракати билан Қуръони карим таржимаси эълон этилди, Чўлпон асарлари халқقا қайта-рилди, «шубҳали» саналган «Авлодлар довони» дунё юзини кўрди. Олий мажлис Матбуот ва ахборот қўмитаси раиси сифатида бевосита унинг раҳбарлигида миллий матбуотимизга оид қатор қонунлар ишлаб чиқилди.

Ўткир Ҳошимов ижодини публицистикадан бошлади, 1962 йили «Пўлат чавандоз» номли очерклар тўплами босилиб чиқди. У бадиий ижодга жуда эрта майл билдирган, 5-синфда ўқиб юрган кезларидаёқ шеърлар, ҳикоялар машқ қила бошлаган бўлса-да, «Тўрт мактуб» номли ilk ҳикояси 1963 йили матбуотда босилиб чиқди. Шу ҳикоя асосида «Чўл ҳавоси» қиссаси ёзилди. «Шарқ юлдизи»да босилган бу қисса ҳақида ёш муаллиф Абдулла Қаҳҳордан мактуб олди. Улуғ адабнинг илиқ сўzlари ёш ёзувчига далда берди. Сўнг у бирин-кетин «Одамлар нима деркин», «Шамол эсаверади» қиссаларини яратди. Хусусан, «Баҳор қайтмайди», «Қалбингга қулоқ сол» қиссалари адабий танқидчиликда қизғин баҳс-мунозара қўзғатди. Бу қиссалари учун у 1976 йили Ёшлилар мукофотига сазовор бўлди.

Ўткир Ҳошимов қиссалари 60–70-йиллар миллий адабиётимиздаги илғор тамойиллар билан уйғунлиги, ўткир маънавий-ахлоқий муаммоларни дадил ўртага қўйилганлиги, энг муҳими, тасвирдаги самимият, ички жозибаси билан ажралиб туради.

Маълумки, Ўткир Ҳошимов ижодга қадам қўйган йилларга келиб мустабид тузум даври дағдағаю зуғумлари бир оз юмшаган, жамиятни демократлаштириш бошланган, эркин фикрларга қисман йўл берилган эди. Бироқ расмий доираларда, «мўътабар» минбарларда, илм-фан, радио, телевидение, матбуотда бор ҳақиқатни ай-

тиш имконияти ҳамон чекланган эди. Бундай пайтда жамиятнинг виждони, меҳнаткаш халқнинг овози бўлиш вазифаси адабиёт, сўз усталарининг зиммасига тушди; Абдулла Қаҳҳор, О.Ёқубов, П.Қодиров, улар изидан борган Э.Воҳидов, А.Орипов, Рауф Парфи, Ш.Холмирзаевлар чиндан ҳам ҳақиқат, адолат жарчиси, халқ дилининг таржимони сифатида майдонга чиқдилар. Улар яратган энг сара асарлар ижтимоий тафаккур соҳалари – тарих, фалсафа, социология, сиёsat, адабиётшунослик ва публицистика бажариши лозим бўлган талай вазифаларни ҳам адо этди. Шу тариқа адабиётда «гап айтиш», «масала кўтариш» тамойили кучайди, проблематик шеър, достон, проблематик драма, ҳикоя, қисса, роман турлари пайдо бўлди; айни пайтда дидли, куюнчак китобхон асардан албатта «муҳим гап» кутадиган бўлиб қолди, танқидчиликда асарларни уларда кўтарилиган долзарб муаммоларга қараб баҳолаш муайян удум тусини олди.

Ўткир Ҳошимов худди шу йўлдан бориб қатор публицистик мақола, ҳикоя, қиссалар яратди. «Тераклар япроқ ёзди», «Дехқоннинг бир куни», «Нур борки, соя бор», «Квазарлар» каби роман, қисса, ҳикоялари асарлардан «гап кутадиган» китобхонларни ғоят ҳаяжонга солди. Мактаб болаларининг умри пахтазорда ўтаётгани, дори сепилган ғўза баргидек эрта хазон бўлаётгани, янги тушган келинчакнинг ҳаётидаги энг ширин дақиқалари эрксиз оғир меҳнат гирдобида кечаетганини, қишлоқдаги, касалхонадаги, савдо соҳасидаги, олий ўқув юртларидағи, Ўткир асарларида ҳаяжон, изтироб билан қаламга олинган ҳаётий муаммолар талқини ўқувчиларни ўшандай ижтимоий иллатларга нисбатан фикрини шакллантиришда, қаҳрини қўзғатишда муҳим аҳамият касб этди.

Бу тур асарларда публицистик рух кучли, муаллиф ҳаёт жумбоқларига бўлган муносабатини ошкора, жўшқин ифода этади, дилдаги гапларини куюниб, ёниб баралла тўкиб солади; асарларида кўпинча-публицист газетачи сўзи билан ёзувчи тили бир-бирига қўшилиб кетади, зотан улардаги бош қаҳрамонларнинг аксарияти куюнчак зиёлилар, журналист адиблардир.

Шуни ҳам айтиш керакки, Ўткир Ҳошимовнинг роман, қисса ва ҳикояларида сўз санъатининг азалий бош муаммоси – инсон тақдирни ва қалбининг бадиий таҳлили мавжуд; муаллиф долзарб ижтимоий муаммолар талқини билан ёндош ҳолда қўп ўринларда персонаж руҳиятидаги ғоят нафис жараёнларни моҳирона ифода

этади. Ўткир ижоддаги илк қадамларидаёқ инсон маънавияти, руҳияти, қалб ҳақиқати тадқиқотчиси сифатида кўринган эди, «Чўл ҳавоси», «Мұхабbat», «Одамлар нима деркин», «Шамол эсаверади» номли ҳикоя ва қиссалари шундан далолат беради. Кейинчалик у долзарб ижтимоий муаммолар талқинига кўпроқ мойиллик билдириб, юқорида тилга олинган проблематик асарларни яратган кезларида ҳам инсон образи, инсон маънавияти, руҳияти таҳлилини асло эътибордан четда қолдирган эмас. Бу жиҳатдан «Қалбининг қулоқ сол», хусусан, «Баҳор қайтмайди», «Дунёning ишлари» қиссаларини эслаш кифоя.

60–70-йиллар адабиётида адашган одамнинг фожиасини акс эттирган ўнлаб асарлар пайдо бўлди, аммо улар орасида санъат даражасига кўтарилигандар оз, жуда оз. «Баҳор қайтмайди» қиссасида ёзувчи истеъдодли, бироқ истеъдоди қадрига етмаган, етолмаган, улуғ мақсадлардан маҳрум худбин йигитнинг таназзул тарихини, руҳий-маънавий инқирозини санъаткорона таҳлил этиб берди. Ана шу санъаткорона таҳлили – тасвирининг туйғуларга бойлиги ва самимияти билан қўпчилик қалбига йўл топди, кўпларни ҳаяжонга солди. Қисса матнида бошдан-оёқ муаллифнинг ўта нозик ва нафис кузатишлари, ёзувчи қалби тебранишлари, ранг-баранг кечинмалари, завқ-шавқи, армон-ўқинчлари, қисқаси, хилмажил туйғулар нафаси уфуриб ётибди. Мана қисса хотимасидан кичик бир парча, асар бош қаҳрамони Алимардон ҳалокатидан кейинги табиат манзараси тасвири: «Негадир шу оқшом офтоб жуда қийналиб ботди. Уфқ этагида узоқ осилиб турди-да, секин-аста ер ортига чўкиб кетди. Яна бир неча кундан кейин яйраб-яшнаб баҳор келди... Саҳий кўклам кўплар қатори Алимардоннинг ҳам қабрини буркади. Майсалар орасида очилган биттагина қизғалдоқ тонг шудрингига қадаҳ тутди. Эрта-индин тўкилиб кетиши, ўзидан на муаттар бўй, на мева қолишидан бехабар ял-ял ёнди...»

Бу сўнгги сатрлар ададсиз алам-ўқинчлар, кўз ёшлар билан қоғозга тушгани шундоққина сезилиб турибди. Қаҳрамоннинг дағнуннида, ўша мотамсаро оқшом пайти қуёшнинг қийналиб ботиши, уфқ этагида узоқ осилиб туриши, сўнг умидсиз алфозда секин-секин ер остига ботиб кетишида дилларни хун қиласиган, кўзларга ёш келтирадиган мунгли оҳанг бор. Ҳамма ёқни нурга, рангга безаган, қаҳрамон қабрини майсаларга буркаган саҳий кўклам, қаҳрамон қабри устида ял-ял ёнган қизғалдоқ, унинг омонат умри

хусусидаги нафосат тўла мунгли тасвир, бир дам яшнаб, эрта хазон бўлган инсон умри хақидаги хазин қўшиқнинг сўнгги нидолари, титроқлари каби эшитилади.

Ўткир Ҳошимовда нафосат туйғуси беҳад кучли. Ҳатто у алданган одамнинг маънавий инқирози, фожиаси, ҳалокати тасвирида ҳам шу туйғуни сақлаб қолади. Айниқса, у яхши, олижаноб, маънавий баркамол шахслар қалби, табиати тасвирида ўзини ниҳоятда эркин ҳис этади. Ёзувчининг ижобий қаҳрамонлари аксари гўдакдай беғубор, нафосат туйғусига бой, ҳиссиётчан, ўта таъсирчан одамлар. Эҳтимол, Ўткир асарлари қаҳрамонларининг ўзбек китобхонлари қўпчилигини асир қилган омиллардан бири шундадир. Ҳаётнинг шафқатсиз ҳақиқатини шафқатсиз, дағал бўёқларда ифода этадиган асарлар руҳида тарбияланган китобхонга Ўткир асарларидағи ўта нафис, ҳиссиётга бой ифодалар, соддадил, романтиқ, ўта ҳиссиётчан, таъсирчан қаҳрамонлар бир оз китобийроқ туюлиши мумкин, начора, ёзувчининг тафаккур ва ифода тарзи барчага бирдек маъқул бўлиши шарт эмас. Бироқ адибнинг услуб тарзини бошқа бир услубий йўналишга зид келгани учун камситиш, рад этиш, ерга уриш ўринсиз. Адабиётда бадиий тафаккур, ифода тарзи қанчалар ранг-баранг бўлса, шунча яхши. Ўткир асарларида персонаж талқинидаги нафосат туйғуси билан йўғрилган лиро-романтик йўналиш алоҳида жило билан намоён бўлган экан, бу ҳол миллий насримизнинг бойлигидир.

Ёзувчи ижодига хос лирик тарона унинг «Дунёнинг ишлари» қиссасида энг баланд пардаларда жаранглади. Бу асар Она ҳақидаги, Она қалбининг чексиз саҳовати ҳақидаги ўзига хос қасидадир. Қисса бир қарашда автобиографик асар, ёзувчининг ўз болалик йиллари, ёшлиқ, йигитлик даври хотиралари, онаси, қариндошуруғлари, таниш одамлар ҳаётидан баҳс этади. Унда хилма-хил воқеалар ҳикоя қилинади, бироқ асар марказида Она образи туради. Асадаги она фарзанди, фарзанди ороми, баҳти учун жонини, жаҳонини беришга тайёр минг-минглаб оналаримизнинг тимсолига айланди.

Қисса завқ-шавқ билан шоирона ёзилган. «Дунёнинг ишлари»-ни қисса эмас, достон деб аташни истардим, – дейди Сайд Аҳмад. – У қўшиқдай ўқилади. Уни ўқиб туриб ўз оналаримизни эслаб кетамиз. Шу мушфик, шу жафокаш оналаримиз олдидаги бир умр узиб бўлмас қарзларимизнинг ақалли биттасини уза олдиқми, деган бир

андиша, бир савол кўз олдимизда кўндаланг туриб олади. Қисса бизни инсофга, инсонни қадрлашга, ҳурмат қилишга чақиради». Ёзувчи ўз онасининг чексиз қалб саҳоватлари ҳақида сўз очар экан, айни вақтда уни етарлича қадрлай олмаганидан афсусланади.

Қисса бир-бири билан узвий боғланган мустақил воқеий (бўлиб ўтган) ҳикоялардан ташкил топади. «Дунёning ишлари» бошдан-оёқ ниҳоятда ёрқин, ажиб бир миллий бўёқлар билан жилоланган. Айни пайтда асар теран бир умуминсоний, байналминал туйғулар билан йўғрилган. Қиссада шундай мулоҳазалар бор: «Эҳтимол, дунёning бу четида туриб бир одам ўз севгилисига айтган дил розини дунёning нариги чеккасидаги бошқа бир одам тушунмас. Эҳтимол, дунёning бу четида туриб бир одам айтган қўшиқни дунёning нариги чеккасидаги бошқа бир одам тушунмас. Эҳтимол, дунёning бу чеккасида туриб бир одам айтган оқилона фикрни дунёning нариги чеккасидаги бошқа бир одам тушунмас. Бироқ дунёning бу чеккасида туриб Она айтган аллага дунёning нариги чеккасидаги гўдак bemalol ором олади».

Она алласининг сирли-сехрли кучини муаллиф аввало Аллоҳ сўзи – Қуръони карим оятлари тиловати садоси билан қиёс қиласи. Қабристондаги хужра томонидан тиловат садоси эшитилади, худди шу пайт ҳовли томондан она алласи янграйди: «Раббано-о-о, раббано-о-о...» «Аллаё, алла...» Ҳикоячи ажиб бир ҳолатга тушади «Бир томонда тиловат садоси, бир томонда алла... Ажаб, улар бир-бирига ҳалақит бермас, бир-бирини рад этмас». Орада қандайдир сирли муштараклик мавжуд.

Қисса муаллифи онасидан алла эшитган дақиқалардаги ҳолатини эслаб кетади; Она айтган сатрлар оддий қўшиқ эмас, унинг овозида қандайдир бошқа нарса, мунгми, илтижоми, тингловчи қалбини асир этадиган илоҳий сехр борлигини уқтиради; «Кейин катта бўлганимда ҳам қаерда алла эшитсан, юрагим ширин орзиқиши билан талпиниб кетар, нега бунақа бўлаётганини ўзим билмас эдим» деб ёзади.

Ёзувчи дунёning икки чеккасида ўзи гувоҳ бўлган икки ҳодисани – сафар чоғи қирғиз ўтовида қирғиз аёл айтган алла ва олис Кисловодскда сибирлик жувондан алла эшитган чоғдаги ғаройиб ҳолати – юракдаги ширин орзиқиши туйғуларини тўкиб солади. Қирғиз ва рус аёлларининг ўз она тилларида айтган дил розлари муаллиф қалбини онасидан эшитган алла каби туғёнга солади,

аллалайди. Шу тариқа ёзувчи воқеа-ҳодисларни шунчаки ҳикоя қилиб бермайди, ҳодиса билан боғлиқ туйғуларнинг ажаб сехрини, нафосатини китобхон қалбига олиб киришга муваффақ бўлади. Киссанинг деярли барча боблари айни шу руҳда битилган.

Ўткир Ҳошимов бадиий адабиётга журналистика чорраҳалари орқали кириб келди. Унинг 1977 йили ёзилган илк романи – «Нур борки, соя бор...» журналистик фаолиятининг, тажрибаларининг ўзига хос якуни, бадиий сарҳисобидир. Роман марказий қаҳрамони Шерзод муаллифга тенгдош, айни ўзи каби ёзувчи-журналистдир. Шерзод тимсолида ёзувчи китобхонни айни ўзи ҳаётда дуч келган муаммолар гирдобига олиб киради. Журналист қаҳрамон билан бирга китобхон гоҳ ер остига тушиб метро қурувчилари ҳузурида бўлади, инсон қони рангини эслатувчи тупроқ ҳидини тужди; гоҳ Фарғонанинг олис, мафтункор қишлоғидаги қаҳрамон туғилиб ўсган мўъжаз хонадонга, димоғдор раиснинг дабдабали кабинети-ю, серҳашам меҳмонхонасига кириб қолади, қишлоқ ҳаёти, мактаб ва меҳнат муаммолари устида ўй суради; гоҳ шаҳар касалхонасида одамнинг мавқеига қараб муомала қилувчи бўлим мудирига, савдо ходими Сайфи Соқиевичга тўқнаш келади. Хасталикнинг, бир хона ичида маънавий тубан кимса билан туришнинг изтиробларини юракдан ҳис этади. Сайфи Соқиевич билан танишув шу билан тугамайди, уни китобхон оиласида, серҳашам саройида, иш кабинетида такрор-такрор учратади; бу учрашув ва танишувларнинг ҳар бири мешчанларча ҳаёт кечиришга, мешчанлик психологиясиغا ўқилган айбнома каби туюлади. Ёзувчи Сайфи Соқиевичнинг ўғли Сирожиддин баҳонасида олий ўқув юрти, илм даргоҳидаги можароларни қаламга олади; Сирожиддининг оиласи турмуш тарзи тасвири асарнинг энг пухта сюжет тармоқларидан бирини ташкил этади. Қаҳрамоннинг ҳаёт саргузаштлари – унинг ширин ва ҳазин болалик хотиралари, барбод бўлган илк севги изтироблари, аломат қиз Зухра билан мулоқотлари, Зухра оиласи тарихи ўзича мустақил бир қиссани ташкил этади. Бунинг устига актриса Зухра муаллиф учун ҳаётнинг яна бир жабҳасига – театр, санъат оламига кириб бориш, санъат ва адабиёт муаммоларига муносабат билдириш имконини беради.

Роман структураси, унинг асосий сюжет йўналишлари, унда қамраб олинган ҳаётий муаммолар доираси, қисқача айтганда, ана шулардан иборат. Асар бош қаҳрамони эҳтирос кишиси, ёзувчи-

журналист бўлганидан арзимас нарсадан ҳам қалби туғёнга тушади, салгина қаллоблик, нопоклик аралашган жойда ўзини қўярга жой тополмайди, ҳодисалар устидан тез ҳукм чиқаради. Муаллиф қаҳрамон қалбida жўш урган эҳтирослар тўлқинидан салмоқли маъно ахтаради, унинг шахсий кечинмалари кўпинча ижтимоий аҳамият касб этади, уни қийнаган жумбоғлар аксари роман ёзилган 70-йиллар одамларининг ташвиши, «тили учиди турган гаплар» бўлиб чиқади. Шуниси муҳимки, қаҳрамонлар қалбидаги эҳтирослар туғёни сентименталликдан ҳоли, бу ердаги ҳислар туғёни ҳамиша китобхонни курашга чорлайди; бу ҳол қаҳрамонга қандайdir шижаат, романтик тус бахш этади. Ўткир Ҳошимовнинг тенгдош қаламкаш дўсти Шукур Холмирзаев: «Ўткир Ҳошимовнинг ижодида кучли, жиддий қаҳрамонлар пайдо бўляпти. Мен бу ёзувчи дўстимни кузатиб, ижодини ўзимча таҳлил этиб юрган қаламкаш сифатида шуни дадил айта оламанки, Ўткирдаги услубий изланишлар – унинг қаҳрамон танлашида акс этмоқда»¹, – деганида тўла ҳақ. Бунда у биринчи галда «Нур борки, соя бор»даги Шерзодни назарда тутган. Дарҳақиқат, Шерзод жўшқин фаолият кишиси, у инсон шаънини, эркини ҳамма нарсадан устун қўяди, ҳар қандай оғир, мураккаб шароитда ҳам эътиқодига содик қолади, шу билан баробар юксак эътиқодини, орзу-идеалларини барқарор этиш учун дадил кураш олиб боради, турмуш чигалликларига амалий чора ахтаради.

80-йилларга келиб Ўткир Ҳошимов ижодида миллий адабиётимиз истиқболи учун муҳим аҳамиятга молик янги тамойиллар рўй берди. Ёзувчи, бир томондан, радио ва телевидение орқали жиддий чиқишлиар қилди, у телевидениеда олиб борган «Баҳс» кўрсатуви бутун республикани «оёққа турғизди». Шунингдек, матбуотда бирин-кетин йўтирилган публицистик мақолалар эълон қилди. Хусусан, «Қалбнинг оппоқ дафтари», «Авлодларга нима деймиз», «Давлат сири», «Мантиқ қани?» каби мақолаларининг ҳар бири уларда ўртага ташланган маънавий, ижтимоий-сиёсий муаммоларнинг қўлами, салмоғи, таъсир кучи жиҳатидан етук бадиий асарларга тенг деб баҳоланди.

Айни пайтда адиб яратган энг яхши асарлар ошкора публицистик талқиндан ҳоли. Бу даврга келиб адиб ижодида публи-

¹ Қаранг: Услуб, бадиий шакл муаммолари (Ёзувчи Шукур Холмирзаев билан сухбат). У.Норматов. Етуклик. Т.: F.Гулом номидаги Адабиёт ва санъат нашриёти, 1982. Б.352.

цистик фаолият билан соф бадиият орасида муайян ажралиш рўй берди. Муаллифни энди кундалик долзарб масалалар эмас, кўпроқ азалий-боқий маънавий муаммолар, инсон тақдири, инсон қалбининг жумбоқлари кўпроқ қизиқтиради. Бу нарса «Икки эшик ораси» романида айниқса равshan кўринди. «Икки эшик ораси» – йирик ижтимоий, маънавий-ахлоқий роман. Асар узоқ даврлик воқеаларни, кўплаб кишилар тақдири, ҳаёт йўли, хилма-хил ижтимоий-ахлоқий муаммоларни ўз ичига қамраб олади. Роман воқеаларининг бир учи 30-йилларнинг бошларига, қишлоқдаги колхозлаштириш даври воқеаларига бориб туташса, иккинчи учи 70-йилларнинг охирига келиб тақалади. Шундай бўлса-да, романнинг марказида фашизмга қарши олиб борилган уруш даври, уруш йилларидаги ўзбек қишлоғи ҳаёти, уруш ва инсон, урушнинг кишилар тақдирига кўрсатган чуқур таъсири, улар қисматида, зурриётида, дилида қолдирган жароҳатлари муаммоси туради. Ёзувчи иккинчи жаҳон уруши кишиларимиз учун зўр синов бўлгани, бу синов пайтида ўзбек кишисига хос бўлган ноёб фазилатлар фавқулодда бир куч билан юзага чиққани, кишиларимиздаги оташин ватанпарварлик, чексиз мурувват, садоқат туйғуларини илҳом ва эҳтирос билан қаламга олади. Ўша синов кезларида фақат ўз жонини, манфаатини ўйлаб, мунофиқлик, хиёнат кўчасига кирган айрим кимсалар қилмишини қаҳр-ғазаб билан қоралайди, маънавий инқирозини, фожиасини очади. Қаҳрамонлар қисмати воситасида ёзувчи яшашнинг маъноси, инсоннинг инсонлик шаъни, бурчи, масъулияти, эътиқоди масалаларини кўтаради, китобхонни улар ҳақида ўйлашга, баҳсга чорлайди. Қандай яшаш ва яшамаслик керак, деган савол асарнинг етакчи фалсафаси даражасига кўтарилади. Бу ўгит-фалсафа персонажлардан бири – кўпни кўрган Ориф оқсоқол томонидан берилган икки эшик ораси тўғрисидаги халқона ҳикматда ўз якунини топган. У дейди: «Бир хил одамлар бор: у эшикдан кириб бу эшикдан чиқиб кетаётганида қўлидан келганча савоб иш қиласи. Ҳаёт деган иморатга ақалли битта ғишт қўйиб кетади. Яна бир хиллари бор: ўша иморатдан ақалли битта ғишт ўғирлаб кетгиси келади. Ўғирлаб-ку, ҳеч қаёққа боролмайди, нариги эшик олдига борганда барибир ташлаб кетади. Икки орада иморатни бузгани қолади...» Муаллиф шулар билангина чекланмайди, босқинчилик урушининг инсонийликка, инсониятга зид моҳияти, фашизм ҳарбий жиноятининг мудҳиши оқибатлари ҳақида

чексиз алам билан ёзади. Бинобарин, бу роман бошдан-оёқ урушнинг аччиқ сабоғлари орқали одамларни хушёрликка чақирувчи, умуман, урушга қарши қаратилган асардир. Романнинг муҳим ижтимоий, умуминсоний, замонавий қиммати ҳам ана шунда.

Ёзувчи узоқ даврлик воқеаларни, кўплаб инсоний тақдирларни бош қаҳрамоннинг бир неча соатлик кечинмалари ичига жо этади. Шуниси характерлики, муаллиф воқеаларга бевосита аралашмайди, мухтасаргина сўз бошидан кейин у бевосита кўринмайди, сўз, ихтиёр бутунасига қаҳрамонларнинг ўзларига берилади. Қаҳрамонлар эса ўз бошлидан ўтганларини ўзлари сўзлашга киришадилар. Шу пайтга қадар бизда асар воқеаларини қаҳрамон тилидан ҳикоя қилиш усули бор эди. Бунда воқеа кўпроқ бир, гоҳо икки персонаж тили, нигоҳи орқали берилар, баъзан бир неча персонаж бошидан ўтганларини ҳикоя қилиб берар эди. Бир эмас, бир неча персонажлар тилидан ҳикоя қилинган асарларда ҳар бир персонаж саргузашти кўпинча мустакил, тугал ҳикоя ёки қисса шаклини олар эди. «Икки эшик ораси»да эса ўзгача манзарага дуч келамиз. Бир-икки эпизодни мустасно қилганда унда алоҳида мустакил, тугал саргузашт йўқ; асарда бир неча саргузаштлар ёндош ҳолда бири-бири билан туташган, чирмашган ҳолда берилган. Ўнга яқин ҳар хил табиатли, ҳар хил ёшдаги персонаж, бунинг устига улар умр поғонасининг турли босқичларида туриб саргузаштларини ҳикоя қиласидилар. Кўп ўринда бир ҳодиса икки ёки бир неча персонаж нуқтаи назаридан ҳикоя қилинади, баҳоланади. Масалан, Раъононинг хиёнати ҳам унинг ўзи, ҳам уни шу йўлга бошлаган Умар закунчи, ҳам Робия тили, нуқтаи назаридан берилади; бир ҳодиса уч шахс нигоҳида уч хил талқин этилади... Бу ҳол асарга ўзига хос полифоник хусусият, сержило маъно баҳш этади, асар драматизмини кучайтиради, ўкувчида ҳодисага нисбатан қизиқишни оширади.

Асарда ўнлаб катта-кичик персонажлар мавжуд. Қимиrlаган жон борки, деярли барчаси давр дард-ташвиши билан нафас олади. Бир-икки эпизодда кўриниш берадиган райком котиби Абдураҳмонов, муаллим Самадов, Рашид абзи, Дядя Вася, Парча опа, Зухра келин каби персонажлардан тортиб, асарнинг марказий персонажи Музаффарга қадар – ҳаммаси мураккаб, чигал, мушкул тақдир эгалари. Ёзувчи етакчи қаҳрамонлар, хусусан, Музаффар, унинг туққан онаси Раъно, боққан онаси Робия, отаси Шомурод,

ўгай отаси Умар закунчи, севгилиси Мунаввар, «Қора амма», Ҳусан дума, Ориф оқсоқол, Башоратхон, Комил табиб образларини, уларнинг қалб дунёсини кенг ва ҳар томонлама очади.

Маълумки, Ўткир Ҳошимов илк романи «Нур борки, соя бор...»да ҳаётнинг долзарб муаммоларини кўрсатишга мойиллик кучли эди, шунга кўра уни шартли равишда «проблематик роман» деб аташ мумкин; «Икки эшик ораси»да эса одамлар тақдирни билан қизиқиш устун, уни «тақдирлар романни» деса бўлади. Романдаги тақдирлар ўз навбатида концептуал характерга эга. Ёзувчи қаҳрамонлар тақдирни талқинида ҳамиша романдаги бош концепциядан, яъни одамлар қисматидаги уруш билан алоқадор жиҳатлардан келиб чиқиб иш кўради. Умар закунчи образини ва бошқа айрим персонажларни мустасно этганда, қолган барча қаҳрамонлар қандайдир уруш жафосини чеккан уруш одамлари билан. Музаффар уруш даври чигалликлари туфайли тирик етимга айланади, кўп жабр-ситамларни бошдан кечиради ва пировардида унинг севги фожиаси ҳам уруш келтирган чигалликларга бориб тақалади. Севгилиси Мунаввар уруш қолдирган маънавий жароҳатлар қурбони бўлади. Туқсан онаси Раъно уруш тўзонлари ичра довдираб, йўлдан тойиб ҳаёт сўқмоқларига киради; боқсан онаси Робия кўнгил берган йигитидан жудо бўлиб тутинган тоғага хотин, Музаффарга эса ўгай она бўлиб қолади. «Қора амма» ўғлининг севгилисини ўз инисига унаштиришга, икки ўғлидан жудо бўлган Оқсоқол эса ўз келинини бошқа бироннинг никоҳига ўтказишга мажбур бўлади...

Роман муаллифи кўп ўринларда қаҳрамонларнинг ғоят кескин, мураккаб, чигал, мушкул дақиқалардаги руҳий ҳолатларини маҳорат билан ифода этади. Айниқса, Оқсоқолнинг оломон олдида келинини кўнгил қўйган ногирон йигитга никоҳлаб бериш лавҳаси, ўша мураккаб лаҳзалардаги Оқсоқолнинг ғоят тифиз, руҳий ҳолати; Комил табибининг Робияга жангда ҳалок бўлган ўғли кўнгил розини изҳор этишдаги драматик кечинмалари, жангда ярадор бўлиб қайтган Шомуроднинг севикли гўзал хотини хиёнатидан воқиф бўлган кезлардаги изтироблари, Раънодаги иккиланиш ҳолатлари, сўнг алданиб чеккан алам ва пушаймонлари, ададсиз қалб қийноқлари – бунга ўхшаш лавҳалар тасвири китобхонни ларзага солади.

Асар муаллифи қаҳрамонларнинг руҳий драмасини очиш билан баробар уларнинг қалб бойлиги ва саҳоватини ҳам кўрсатади. Бир талай персонажлар табиати ва хатти-ҳаракатидаги меҳнаткаш

халқимиз характерига хос фазилатлар, ўзбек халқи турмуш тарзи ёрқин ифодасини топган. Ҳусусан, Ҳусан дума, Оқсоқол, Комил табиб образлари, уларнинг оиласидаги тартиботлар ўзбек турмуш тарзининг кўп яхши анъаналарини кўз-кўз қилиб туради. Бу уч шахс гўё меҳнаткаш халқ ҳаёти, характерининг учта муҳим қиррасини ифодалайди: Ориф оқсоқол – раҳбар ходим, Ҳусан дума – тадбиркор, ишбилармон дехқон, Комил табиб халқ зиёлиси... Ориф оқсоқол меҳнаткаш халқ орасидан чиққан, бутун ҳаётини шу меҳнаткаш халқ манфаатлари йўлига тиккан, кечаю кундуз шу меҳнат аҳли ташвиши билан нафас олувчи, бир оз дағал, шанғи кўринса-да, нихоятда ёқимтой чол. Унда ажиг бир жозиба бор. Қишлоқ аҳли уни нихоятда ҳурмат қилади, ҳамма унга талпинади, унинг ҳар бир сўзи эл учун қонун; йўқ, буйруқ эмас қонун! Меҳнат аҳли Оқсоқолнинг сўзини, ишини ўз сўзи, ўз иши деб билади. Чунки Оқсоқол ҳеч қачон элни алдамаган, фақат унинг ғамини еган, манфаатини деган... Шуниси муҳимки, Оқсоқол вазият тақозоси билан мансабдан – раисликдан четлатилганда ҳам бир дақиқа бўлсин, эл-юртдан узоқлашмайди, мансабдан кетгани учун асло ўкинмайди, қишлоқ аҳли эса ҳамон уни ўзларининг маънавий раҳнамоси деб билади. Бу одам оиласидаги оғир кўргуликлар юз берганда бошга тушган мусибатлар туфайли дил-дилдан ўртангани ҳолда, барибир ўзгалар бахти, оромини ўйлаб иш қўради.

Ҳусан дума ҳам дўсти Оқсоқол каби қалби дарё одам. Дума оиласи адолатсизлик туфайли сарсон қолган Робияни асраб, ўз фарзандидек тарбиялаб вояга етказади. Дума ҳам уруш туфайли оғир жудоликлар аламини тортади. Шу оғир жудоликларни енгиб эл-юрт манфаати йўлида тинимсиз тер тўкади. Бу одам – асл меҳнаткаш, тадбиркор дехқон. Унинг тадбиркорлиги, меҳнатшижоатидан эл-юрт кўп наф кўрган. У оиласида, ҳовлисида ажойиб-ғаройиб тартиб ўрнатган, унинг хонадонида ҳамма нарса жойида, ўзаро меҳнат тақсимоти жорий этилган, барча ўз иши билан банд...

Комил табиб ҳам худди Оқсоқол ва Дума каби уруш жафосини чеккан шахс, у ҳам дилда алам-изтироблари билан ўзгалар дарди, жароҳатига чора қидиради, унинг шифобахш қўли кўпларнинг оғриfiga малҳам бўлади.

Урушда бедарак кетган ёлғиз фарзанди доғида ўртанса-да, ўз дардини ичига ютиб, нуқул ўзгалар ғами, ороми, бахтини ўйлай-

диган «Қора амма», ўша оғир йилларда трактор миниб, ёшларни ўз ёнига олиб, эл-юрт мушкулотини осон қилган, уруш қурбони бўлган эри саломатлиги, кўнгли деб ўз оромидан воз кечган Башоратхон, ипакдай майин-мулойим, ўзгаларга меҳрибон, қўли гул чевар, доно аёл қўқонлик Ойсара опа – бу хил фидойи онажонлар романга зеб бериб турибди.

Ёзувчининг маҳорати, санъати фақат жонли, ҳаётий миллий характерлар яратиш, қаҳрамонлар табиатига хос инсоний фазилатларни, дилидаги ташвиш, туғёнларни моҳирона ифода этишдагина эмас, характерлар руҳиятидаги ўта нозик, тушуниш, тушунтириш мушкул бўлган мураккаб кечинмалар силсиласи тасвирида ҳам намоён бўлади. Биргина мисол: Музаффар орадан ўн йил ўтса-да, ҳалок бўлган севгилиси Мунаввар ёди билан танҳо яшайди, ёши бир жойга бориб қолган бўлса-да, уйланмай, бошқа бировга кўнгил қўёлмай қарияларни хуноб қиласи. Онасининг ўлими хабарини эшитганда изтироб чекади, таъзиясига отланади, аммо онаси хонадонига яқинлашганда ўлим хабари туфайли дастлаб кўнглида уйғонган фарзандлик меҳри сўниб, ортга қайтишни ўйлаб қолади...

Хўш, нима учун? Музаффарнинг уйланмай бўйдок юриши таркидунёчилик эмасми? Онага бўлган совук муносабати тошбағирлик оқибатими? Асло! Гап шундаки, Музаффар ҳалол, вижонли, қаллобликни асло кўтаролмайдиган йигит, у фарзанд сифатида ҳар ҳолда онасини унутолмайди, бироқ она хиёнати, бу хиёнат туфайли отаси ҳамда ўзининг ҳаёти алғов-далғов бўлиб кетганлигини ҳам сира эсдан чиқаролмайди. Бунинг учун биз Музаффарни кўнглида кек сақлайдиган фарзанд дея олмаймиз.

Музаффар шахсий ҳаётда баҳтсиз, омадсиз. Аммо уни ожизнотавон дея олмаймиз. Чунки Музаффар ақлли, андишали фарзанд сифатида онага қарши боролмайди. Бунинг устига онанинг ҳоли маълум, у ўзи йўл қўйган гуноҳ жабрини торта-торта алам-изтироблар, армону пушаймонлар оловида куйиб адои тамом бўлган...

Маълумки, асар асосан уруш орқасидаги ўзбек қишлоғи ҳаётига бағищланган, унда ўша йиллардаги қишлоқ ҳаёти кенг кўламда ифода этилган. Айни пайтда бир неча ўринда аскар йигит Кимсан Ҳусанов ҳикояси орқали жанг лавҳалари ҳам гавдалантирилган. Уларда фашизм ҳарбий жиноятлари даҳшатлари, жангда иштирок этган ўзбек кишисининг жабрдийдаларга нисбатан чексиз меҳри, ёвузларга нисбатан қаҳри, матонати ҳам зўр маҳорат билан

кўрсатилган. Романнинг жанг лавҳалари акс этган «Мехр ва қаҳр» боби «Ёш ленинчи» газетасида эълон этилганда рус адиби К.Симонов «Халхин-Голдан Берлингача» китобида номи тилга олинган собиқ жангчи, наманганлик тарих ўқитувчиси Ҳасан Абдуллаев уни ўқиб, ўша куниёқ роман муаллифига ўз ҳаяжонларини изҳор этиб мактуб йўллади; ўша бобда қаламга олинган жанг лавҳасининг гоят жонли, ҳаётй ва таъсирчан чиққанини алоҳида таъкидлайди. «Укажон, башарти урушга бормаганмисиз?!» дея хитоб қиласи.

Замонавий адабиётшуносликда бадиий асар қиммати, даражаси биринчи галда унда ҳаёт ва шахснинг янгича концепцияси ҳамда бадиий талқини, ифодасига қараб белгиланади. Шу юксак умумбашарий адабий мезонлар асосида ёндашиладиган бўлса, Ўткир Ҳошимовнинг «Тушда кечган умрлар» романи 90-йиллар ўзбек адабиётида жиддий воқеа, муҳим янгиликдир. Романнинг китобхонлар томонидан илиқ кутиб олинганлиги, танқидчиликда юксак баҳолангандиги, хорижда ҳам қизиқиш уйғотгани, олий ўқув юртлари адабиёт дастури ва дарсликларига киритилгани тасодифий эмас.

Бир қарашда роман янги ўзбек адабиётида муайян анъанага айланиб қолган мавзу-муаммолар – мустабид тузум танқиди, афғон уруши, «ўзбеклар иши» қурбонлари ҳақида баҳс юритади. Бу мавзу-муаммолар ҳақида кўп ёзилди, Ўткир Ҳошимов «Тушда кечган умрлар» романи орқали бу хусусдаги ўзининг бетакрор, салмоқдор, янги сўзини айтди, айтганда ҳам ўқувчини ларзага соладиган, ўйга толдирадиган қилиб айта олди. Бадиий асарда, хусусан, романда ёзувчининг янги сўзи у яратган жонли ва қўламли шахслар тимсоли орқали гавдаланади. «Тушда кечган умрлар» романидаги талай персонажлар, хусусан, бош қаҳрамон – Рустам ва Комиссар образи ёзувчининг замонавий адабиётдаги бадиий кашфиёти бўлди.

Рустам – фожиавий шахс. Катта ҳаётга эндинга кириб келаётган, она юртнинг етук бир фарзанди, содик фуқароси бўлиши, эл-юрт учун кўп ишлар қилиши, севгилиси васлига эришиб баҳтли ҳаёт кечириши мумкин бўлган бу навқирон ўғлон умри ўн гулидан бир гули ҳам очилмай туриб хазонга айланади. Унинг ҳаётини мустабид тузум, тоталитар сиёsat юргизганлар, афғон урушини бошлаганлар, «ўзбеклар иши», «пахта иши» можаросини ўйлаб топган ғаламислар барбод этади. Рустам ҳалокати мана шу мудхиш сиёsatга зўр бир айбнома каби янграйди.

Рустам – уруш одами, уруш қурбони. Ёзувчи Рустам саргузаштлари орқали афғон уруши лавҳаларини бутун даҳшати билан бор ҳолича кўрсатади. Афғон уруши қатнашчиларининг гувоҳлик беришларича, жанг лавҳалари бамисоли жангчи кўзи билан қўриб, қалдан қоғозга туширилгандай чиқкан. Айни пайтда роман инсон шахси, қалби, руҳиятининг давлат, тузум, ижтимоий мафкура, хатто дин, сиёсатга бўйсунмайдиган ғаройиб жиҳатларини талқин этиш бобида ҳам жиддий янгилик бўлди. Асадаги уруш ифодаси, талқини бу жиҳатдан характерли. Уруш талқини романда тамомила ўзгача. Аввалги уруш хақидаги асарлардан фарқли ўлароқ, бу ерда қарама-қарши кучларни дўсту душманга, оқу қорага, «бизникилар» ва «ракиблар»га ажратиш йўқ; бу ерда ғолибу мағлублар, қаҳрамонлару ноқаҳрамонлар йўқ. Фақат уруш қурбонлари, тузум, мафкуравий айирма, рақобат жабрдийдалари бўлмиш бегуноҳ инсонлар бор, холос. Уруш ҳар икки томон учун ҳам ўлим, ҳалокат, вайронагарчилик, жудолик, мусибат, тандаги, қалблардаги жароҳат, даҳшат – фожиа! Ёзувчи фақат афғон уруши эмас, Иккинчи жаҳон уруши ҳодисаларига ҳам шу хилда янгича ёндашади. Романда шундай эпизод бор: олдинги маррага бир ҳафтача овқат келмаган. Олдинда картошка даласи бор. Украин йигит Бондаренко билан соддадил қозоқ жангчи картошка кавлаб келишга борадилар. Қуюқ туман ичида улар душманга – немис жангчисига дуч кела-дилар. У ҳам очликдан картошка кавлагани келган. Немис русчани биларкан. Улар гурунглашиб қоладилар. Гапдан гап чиқиб немис жангчиси уруш жонига текканини, уйини, учта боласини соғинганини айтади, қозоқ эса саккизта боласи борлигини, колхозда «молши» бўлиб ишлашини айтади. Бондаренко онасини соғиниб кетганини гапиради. Қисқаси, ашаддий «душманлар» рақибликни унутиб, бир-бирлари билан ҳасратлашиб, сўнг немис у ёқقا, қозоқ билан украин бу ёқقا – ўз йўлига кетаверади.

Шўро ҳокимияти йилларида адабиётда масалани бу тарзда қўйиш асло мумкин эмас эди. Бундай талқин буржуа пацифизми деб қораланган бўларди. Романдаги яна бир ҳолатни, аникрофи, Комиссарнинг умр йўлдоши Назира талқинини ҳам эслайлик. Комиссар билан Назира иккиси икки олам. Комиссар мустабид тузумнинг, ҳукмрон мафкуранинг чин одами, тузум етиштирган «сиёсий ҳушёрлик», «ёвузлик», шафқатсизлик тимсоли. Назира эса нафосат, поклик, беозорлик рамзи. У – оиласда яхши бека, эрининг

вафодор умр йўлдоши, болаларининг меҳрибон онаси. Бу муштипар аёл эрининг ишларига асло аралашмайди. Ёвуз, шафқатсиз одам билан шундай беозор, муnis аёлнинг бир ёстиққа бош қўйиб узоқ йиллар тинч-тотув яшаши ғаройиб ҳол! Назира ҳаётда ҳеч ким билан олишишни истамагани каби ўлимни пайти ҳам осоийшта – беозоргина жон таслим этади... Инсон табиати ва руҳиятининг ҳеч қанақа қолипларга сифмайдиган бу хилдаги шевалари ифодаси ўзбек миллий адабиётида XX асрнинг охирларига келиб урф бўла бошлади. Ҳолбуки, ҳаётнинг ўзида бунақа ғаройиб инсоний муносабатлар ҳамма даврларда бўлган. Шоир айтмоқчи, азалдан кўп ҳолларда поклик, нафосат билан дағаллик – хунуклик ёнма-ён яшашга мажбур!

Маълумки, ҳар қандай салмоқдор, эзгу ғоя санъаткорона ифодасини топган тақдирдагина қудратли куч касб этади, асар ғояси эса ўқувчи қалбини асир этадиган яхлит сирли-сехрли тасвири оҳанг орқали пафосга айланади. «Тушда кечган умрлар» романи «Куз ўлим тўшагида ётган bemорга ўхшайди» сўзлари билан бошланади. Илк жумладаги мана шу маъюс, мунгли оҳанг асар давомида товланиб, гоҳ сокин, гоҳ шиддатли тус олиб ўқувчининг вужуд-вужудини қамраб олади. Асар қаҳрамони қисмати бошдаги ўша мунгли сўзлар билан интиҳосига этади. «Куз ўлим тўшагида ётган bemорга ўхшайди» жумласи фақат қаҳрамон қисматигагина эмас, асарда акс этган давр, муҳит, жамиятга ҳам даҳлдор – дарҳақиқат ўша йиллари жамият бамисоли ўлим тўшагида ётган bemор каби талвасада. Ўзбек адабиётида бу қадар маъюс, мунгли роман яратилмаган эди. Роман бу жиҳатдан ҳазрат Навоийнинг энг ҳазин, мунгли достони «Лайли ва Мажнун»ни ёдга солади. Достонни ўқиётиб китобхон Лайли билан Мажнун бу фоний дунёдан баҳтини тополмаслигини, чексиз ғам-андухлардан фақат ўлиб қутилишлари мумкинлигини ҳис этиб туради. «Тушда кечган умрлар» романида ўзгача вазият, муаммо, можаролар. Бироқ бош қаҳрамон бошига тушган савдолардан қутилиш йўли ўша – Рустам типидаги ориятли, виждонли йигитни бу мудҳиш кўргиликлардан ўлимгина мосуво этади.

Романдаги Комиссар ҳам фожиавий образ. Бу одамнинг Соат Фаниевич деган бинойидек исми-шарифи бор. Бироқ исм-шариғидан кўра Комиссар деган лақаби унга ярашади. У шахс эмас, касб, мансаб-мартаба, мафкура одами; бу одам бутун умри даво-

мида мустабид тузум, тоталитар режим мафкураси, сиёсати қалқони ва қиличи сифатида иш кўрди, неча минглаб одамларнинг ҳаётини, дилини жароҳатлади, ёстиғини қурилди.

Шуниси ҳам борки, бу одам ҳаётининг кузи аллақачон бошлиланган, у ҳам ўлим тўшагида ётган bemорни эслатади. Бироқ у буни тан олгиси келмайди, аллақачон отдан тушган бўлса-да, эгардан тушмаган. Муштипар аёли оламдан ўтди, фарзандлари, келини ўзгача йўл танлаб ундан юз ўғирди, иккинчи умр йўлдоши унга хиёнат қилди; ҳаётда бирорта дўсти, таянчи қолмади; у суюнган жамият, эътиқод қўйган мафкура нуради, қулади... Ўзини билган, англаған одам учун булар нақадар катта фожиа! Бу кимсанинг фожиаси шундаки, у мана шундай фожиани ҳис қилишдан маҳрум, шу ҳолда ҳам бу инсон қиёфасидаги маҳлук ҳеч нарса кўрмагандек яшашда давом этади... Комиссар қисматида замоннинг муҳим бир инсонпарварлик моҳияти ифодасини топган. Узоқ йиллар одамларга зуғум ўтказиб келган бу кимсадан ҳеч ким, ҳатто у туфайли ҳаётда кўп жабру жафолар кўрган Қурбоной ҳам ўч олишни ҳаёлига келтирмайди. Бу ношукур банда эса бунаقا бағрикенгликни англашга, қадрига етишга ноқобил.

* * *

Латиф лирика билан серзавқ ҳаётбахш юмор, халқона ҳазил-мутойиба ораси бир қадам. Янги ўзбек адабиётида латиф лирик шоир, носир борки, деярли барчаси юмористик асарлар битган, қатор йирик жиддий асарлари бағридан ҳам ҳазил-мутойибалар, ҳажвий-юмористик лавҳалар муносиб ўрин олган. Қодирий, Чўлпон, Сайд Аҳмад насрый асарларидағи, Миртемир, Эркин Воҳидов, Абдулла Орипов шеъриятидағи сержило кулги уларга ажиб файз бахш этган. Йиллар ўтган сари Ўтқир Ҳошимовда ҳам юморга, ҳазил-мутойибага мойиллик кучайиб борди. Унинг қаламкаш дўстлари, устозлари ҳақидаги беғубор, қувноқ табассум билан йўғрилган «Шумликлар» туркуми, «Дафтар ҳошиясидаги битиклар»нинг талай сахифалари, «Тўйлар муборак» комедияси, «Икки карра икки-беш» қиссаси, ўнлаб юмористик ҳикоялари жамланган “Сўққабош бевагина” китоби адабнинг ҳажвий иқтидоридан далолат беради. Айниқса, 1976 йили ёзилиб, 1978 йили Кўқондаги Ҳамза номли драма театрида саҳналаштирилган «Тўйлар муборак» комедияси ўз даврида томошабинларга манзур бўл-

ди. Огаҳий номидаги Хоразм драма театрининг ўзида бу комедия минг мартадан ортиқ қўйилди. Асар «Ёш гвардия» (хозирги Аброр Ҳидоятов) театрида, сўнг Муқимий номли театрда (мусиқий варианти) кўп йиллар ўйналди, Қирғизистон, Туркманистон, Тожикистон театрларида сахналаштирилди.

«Инсон садоқати», «Қатағон» драмалари инсон қалби изтироблари ифодаси, эҳтиросларга бойлиги жиҳатидан адибнинг энг яхши қисса ва романларига оҳангдошdir. 90-йиллар тоталитар режим зўравонликлари, қатағон қурбон-лари ҳақида кўп ёзилди. Айни пайтда бундай зўравонликлар олдида бўйин эгмаган, киshan киймаган мардона шахслар образи ҳам озми-қўпми яратилди. Афсус, улар орасида эсда қоладиган, адабиётда воқеа бўлган, бадиий кашфиёт дейишга лойиғлари оз. «Қатағон» айни шу мардонавор руҳи билан эътиборни тортади. Асар премьераси муҳокамаси пайтида «Қатағон» ҳар бир ўзбек кишиси албатта томоша қилиши лозим бўлган спектакль; ўзбеклар нукул жафокаш, тобе, муте халқ эмас, улар орасида Жумановдек ҳақсизлик, зўравонликка қарши турган мардона сиймолар ҳам бор, бўлган!» деган мулоҳазалар айтилган эди.

* * *

Дикқат билан разм солинса, Ўткир Ҳошимовнинг ижодий фаолияти давомида яратган ҳар бир жиддий асари «Баҳор қайтмайди», «Дунёнинг ишлари», «Икки эшик ораси», «Тушда кечган умрлар», “Дафтар ҳошиядаги битиклар”, «Қатағон» кабилар XX аср миллат маънавияти, руҳиятининг муайян манзиллари каби таассурот қолдиради. Миллат маънавияти манзилларини забт этиш эса ижодий жасоратdir.

*Абдугафур РАСУЛОВ,
Ўзбекистон Республикаси фан арбоби, профессор*

ДИЛГА ЯҚИН ОДАМЛАР

Биз Ўзбекистон халқ ёзувчиси, элимизнинг ардоқли адаби Ўткир Ҳошимов билан қарийб яrim асрлик қадрдонмиз, маҳалла дош, қўшнимиз. Адабнинг кўп асарлари қандай туғилганига гувоҳ бўлганман. Қатор роман, қисса ва ҳикояларини қўлёзмада ўқиб, мулоҳазаларимни айтганман, баъзи манзаралар, деталларга ойдинлик киритишда маслаҳатлашган пайтларимиз кўп бўлган. Ёзувчи асарларида ҳаётда айнан бўлган ва айнан ўз исми билан аталган қатор персонажлар бор. “Дунёнинг ишлари”даги Она, Эрмон бува, фидойи дўхтири Ачинский, Ҳайдар шамол, Қора амма, “Икки эшик ораси”даги Илҳом чойхоначи, Ҳусан дума, Афанди домла, Ориф оқсоқол, Парча ва яна кўплаб инсонларни дўмбиравотликлар ҳамон эслайди. Айрим салбий образларнинг исми ўзгартирилиб, феъл-авори тағин ҳам чуқурлаштирилиб тасвирланган. Бу – муаллифнинг ҳуқуқи. Шунингдек, асарларда тасвир этилган Дўмбиравот, Қаъни, Кўтарма, Нўғойқўрғон, Қонқус, Дархон, Қатортол, Чилонзор каби жойлар ўша йиллари Дўмбиравотни шаҳар билан боғлаб турадиган, тупроғи тиззагача чиқадиган ягона кўча, Катта ва Кичик Чилонзор деган гузарлардан ўтилгач етиб бориладиган “семон-кўприк” (бу кўприк ҳалиям бор) тасвирлари ҳаётдан олинган. Адаб китобларида кўп қаҳрамонлар портрети ва феъл-авори ҳам ниҳоятда ҳаётий. “Дунёнинг ишлари”даги “Ҳавас” ҳикоясининг қаҳрамони Мехри хола менинг онам бўладилар...

Хуллас, Ўткир Ҳошимовнинг кўп йиллардан бери эл севиб ўқиётган асарларида ўзимизга таниш, дилимизга яқин инсонларни учратамиз. Шулардан ўзим кузатган баъзи дилга яқин одамлар ҳақида ҳикоя қилмоқчиман.

*АДАБИЙ ҲАЁТНИНГ БИР ФУҚАРОСИ
(“Икки эшик ораси” романидаги Ҳусан думага доир)¹*

Шундай бир тоифа борки, унинг дунёси китоб, насаби, сифати адабий қаҳрамон. Адабий қаҳрамонлар ҳақида кўп ёзилган. Улар ҳақидаги битиклар катта-катта китобларни вужудга келтирган.

¹ Мақола техника фанлари номзоди Раҳмонберди Кенжакеев билан ҳамкорликда ёзилган.

Пушкин, Абдулла Қодирий, Михаил Светлов, Чингиз Айтматов сингари санъаткорлар ўз қаҳрамонлари ҳақида ғаройиб гапларни айтганлар.

Китобхоннинг адабий қаҳрамонларга муносабати тўғрисида кўп ҳикоялар, воқеалар, ҳангомалар битилган. Халқ адабий қаҳрамонни севиб қолса, ундан ажралгиси келмайди. Ўзбеклар орасида Отабек, Кумуш, Анвар, Раъно, Дилбар, Гулнор, Элмурод, Попук, Шерзод, Дилфуз, ҳатто, Асадбек сингари исмларнинг кўплаб учраши бадиий асарга муҳаббатнинг бир кўриниши, албатта.

Адабий қаҳрамонлар, уларнинг ҳаётидаги асоси ҳақида ёзиш керак. Токи санъаткор – адиб эътиборини қозонган кишилар номи ўчиб кетмасин. Ёзувчи Ўткир Ҳошимов яратган адабий қаҳрамонлар жамланса, каттагина маҳалла жамоаси пайдо бўлади. Асар қаҳрамонларидан ташкил топган аҳли маҳалланинг ҳар бирига синчилаб назар солинса, тарихи ўрганилса, қизиқ ҳолат келиб чиқади. Аниқроғи, Тошкентнинг Дўмбиравот мавзесида яшаган кишиларнинг аксарияти Ўткир Ҳошимов китобларига хоҳ номи, хоҳ ҳол-аҳволи, хоҳ бирон белгиси, борингки, лақаби билан кириб қолган. Дўмбиравотнинг кексалари Ҳусан думани, унинг болачақасини яхши эслайдилар. “Икки эшик ораси” романини ўқиган китобхон борки, Ҳусан дума, унинг аёли, ўғли, тутинган қизи ҳақида тўлиб-тошиб гапиради. Хуллас, биз Ўткир Ҳошимовнинг жонли, эътиборли қаҳрамонлари тарихи билан қизиқдик. Жумладан, Ҳусан думанинг ҳаётдаги асли (асоси) ҳақида бир мунча нарсани билиб олдик.

Ардоқли адиб Ўткир Ҳошимов яшайдиган кўчадан, нари борса, 200-300 одим нарироқда Исмоил aka (Исмоил шопир) яшарди. Саккиз йил аввал қўпга қўшиган (вафот этган) бу табаррук инсон Ҳусан думанинг куёви бўлган. Ўткир Ҳошимов Исмоил акани кўргану танимаган. Исмоил aka бўлса, Ўткир Ҳошимов қайнотаси ҳақида китоб ёзганини билмаган. Ваҳоланки, Исмоил aka уйининг тўрида Ҳусан думанинг расми осиғлиқ турган. Фарзандлари Ҳусан думага оид хужжатларни пўлат сандиқларда ҳануз сақлашади. Ушбу сатрлар муаллифларидан биримиз Ҳусан думани яхши билганмиз, уларнинг қариндош-уруғларини таниганмиз. Ҳусан дума ҳақидаги гаплар қўзғалиб қолгач, биз Исмоил aka фарзандларидан Ҳусан дума расмларини сўрадик. Маълум бўлишича, қанд лавлаги этиштиришдаги ҳалол меҳнатлари учун “Куйбишев” жамоаси

хўжалиги аъзоси Ҳусан Мирисаев “Меҳнат Қизил байроқ” нишони билан тақдирланган (1948 йил 3 июнь) экан. Нишон гувоҳномасида Ҳусан думанинг хира тортиб кетган расми сақланган.

Ҳусан думани дўмбиравотликларнинг эллик ёшдан ошгани яхши эслайди. Отанинг хўжалигидаги юмушларини (романда бу ҳақда тиник ёзилган) аҳли дўмбиравот унуганий ўқ. Хуллас, Ҳусан Мирисо ўғли 1880 йилда Тошкентда туғилган. Ҳусан билан тўққиз ой она қорнида бирга бўлган Фотиманинг умри қисқа экан, эрта вафот этади. Ҳусаннинг Жавҳар, Ҳайдар исмли акалари бўлган. Уларнинг ҳар иккиси полвон бўлган. Тақдир шамоли ака-укаларни ҳар томонга учирив кетган. Ҳайдар полвон тақдир тақозоси билан Авлиё ота томонларга кетиб қолган. Ҳусан дума “юрга келган тўй”дан четда қолмаган – мардикорликка олинган. Мардикорликка бориб, у “дума” лақаб орттирган: рус тилини билмаган бу йигит ҳаммага ўзини “мен дўмбиравотли”, деб таништираверган. “Дўмбиравот” нима эканлигини билмаган мардикорлар Ҳусанни “Он дома” дейишаверган. Бора-бора Ҳусан “дома” (дума эмас) деса, ҳамма танийдиган бўлган. Романда Ҳусаннинг “дума” лақабини олиши бошқача изоҳланади. “Оқпошшо” замонида давлат думасига маҳаллий сартлардан ҳам вакил бўлиши баҳонасида уни ноиб қиласидар. Ҳусан думага ўхшаган саводсиз дехқон, ўзининг ибораси билан айтганда, умри ер кавлаш билан ўтган одам ўша замондаги дума учун шунчаки бир кимса бўлган, холос. Ёзувчининг нияти “дума-пума”сининг ўзи лўттибозликдан иборат бўлганига шама қилишдир. Шу тариқа адаб Ҳусан думанинг лақаб орттиришини бошқача тасвирлайди ва бунга тамомила ҳақлидир... Шундай қилиб, Ҳусан ўз юртига “дума” лақабидан ўзга ҳеч нарса олиб келмайди. Ҳусанбой бир томондан қашшоқлиги, иккинчи томондан, полвонкелбат, сал беўхшовроқ бўлганлиги боис анча ёшгача уйлана олмай юрган. Қайсиdir йили у акаси Ҳайдар полвонни йўқлаб, Авлиё отага борган. Довруқли бир тўйда қатнашган. Тўй эгаси кураш уюштирган бўлиб, бир ўрис полвон манаман деган полвонларни бир бошдан қийратаверган. Ориятли, қувватга тўлган Ҳусан полвон даврага отилиб чиқади. Ҳайдар полвон инисини даврадан олиб чиқиб кетмоқчи бўлади. Шунда тўйда қатнашаётган бойлардан бири:

– Полвоннинг шаштини қайтарма, Ҳайдар, – деган. Даврада нима қиларини билмай турган Ҳусанга қараб: – Ўғлим, шу ўрис

полвоннинг курагини ерга теккизсанг, сенга қизимни бераман, куёв қилиб оламан, – деган.

Тўй тўйдай ўтган. Ҳусанбой довюраклиги, ғуури боис бойга куёв бўлади. Ҳусан дума 1930 йилгача дам Авлиё отада, дам Тошкентда яшайди. Ўринбой деган ўғил, Манзура, Маъсума деган қизлар кўради. Умри қисқа экан, хотини вафот этади. Ҳусанбой 1930 йилда йигитча бўлиб қолган ўғли, икки қизи билан Тошкентга бутунлай кўчиб келади.

1931 йилда у Мехринисо деган бева аёлга уйланади. Махалла-кўйда “Қора амма” деб ном чиқарган бу аёл Ҳусан дума билан тинч-тотув турмуш кечиради. Ҳусан дума аёли ортидан келган Зухра, Хайрини ўз фарзандларидаи кўради. Зухра ҳам, Хайри ҳам “Ҳусанова” бўлиб турмушга чиқишиди. Ҳусан думанинг ўғли урушдан қайтмади, дом-дараксиз кетди. “Икки эшик раси”да Кимсанинг дараксиз кетганлиги учун отани нари олиб бориб, бери олиб келганликлари ғоят ишонарли тасвирланган. Кексайиб қолган ота зуғум-терговлардан қутулиш учун ўзини “шарбатчи”лик юмушига уради. Шундан кейингина отанинг қулоғи таънаю дашномларни эшитмайдиган бўлади. Ҳусан дума тўртала қизини турмушга берди: қуда-андали, куёвли, невара-чеварали бўлди. Унинг қизларидан учтаси вафот этган, фарзандлари Дўмбиравот, Қозиравот, бошқа маҳаллаларда истиқоммат қилишиди. Ҳусан отанинг кенжаси, аниқроғи, Қора амманинг қизи Қозиравот маҳалласидаги Терсариқ кўчасида, 8-хонадонда яшайди. Биз Хайри холани кекса, шарти кетиб парти қолган момо, деб ўйлаган эдик. Йўқ, Хайри опа, гарчи саксонга яқинлашиб қолган бўлса-да, тетик, зиёлинамо, қадр-қимматини баланд қўядиган аёл экан. Онахон отаси ҳақида оғзидан бол томиб гапирди:

– Мен уч ёшдалигимда дадамнинг тарбиясига кирганман. Опаларимни ойим, дадам оқ ювиб, оқ тарадилар. Ҳаммамизни уйли-жойли қилдилар. Дадам пир-бадавлат бўлиб, 88 ёшларда вафот этди. Ҳануз гўрларини ёлғизлатиб қўйганимиз йўқ.

Хайри опа турмуш ўртоғи – Раҳматилла ака билан аҳил яшабди. Етти фарзанд кўрибди. Опа турмуш ўртоғи вафот этганини бамайлихотир гапирди. Лекин бундан бир неча йил аввал, 34 ёшида вафот этган ўғли ҳақида сўзлаганида, кўз ёшларини тия олмади. Қарими, ёшми, бари-бир она-да! Хайри опа онасини маҳалладагилар “Қора амма” деб атаганларини, раҳматли волидасида

нафас қисиши касали бўлганини айтиб берди. Биз Ўткир Ҳошимовга думанинг аёллари “Қора амма” бўлганликларини айтганимизда, ёзувчи ҳайрон бўлди: “Ишонинг, мен “Қора амма”ни ўзим ўйлаб топганман. Тўғрироғи, бундай бўлган. Фарруҳ ўғлим, негадир акамнинг хотинлари, раҳматли кеннойимни “Қора амма” дерди. “Қора амма” деган атамада аллақандай саҳийлик, бағри кенглик туйгандек бўлганман. Ижодда илоҳиёт борлигига қаттиқ ишонаман. Ҳаётда Ҳусан думанинг аёлинини “Қора амма” дейишлари, бунинг устига бу аёл ҳам диққинафас хасталиги борлигидан мутлақо бехабар эдим. Демак, бадиий ҳақиқат беихтиёр ҳаёт ҳақиқати билан уйғунлашиб кетган. Мен “Қора амма” Ҳусан думанинг иккинчи турмуши эканлиги, икки қизи билан турмушга чиққанлигини энди эшитиб турибман. Ўйлаб кўрилса, Робия феъл-авторида “Қора амма”нинг битта қизи тасвирланган бўлиб чиқади”.

Ҳусан дума – “Икки эшик ораси” романидаги ўнлаб қаҳрамонларнинг бири. Романдаги аксарият қаҳрамонларнинг ҳаётидаги прототипини белгилаш, у ҳақда ёзиш мумкин.

КАЙВОНИ...

Маҳалла ҳаётининг нозик томонлари кўп. Кексалар яхши билишади: кайвони маҳалла оқсоқоли эмас, аммо обрў-эътиборда ундан кам эмас. Илми бор, эл билан тиллаша оладиганларни оқсоқол қилиб кўтаришган. Ҳозир ҳам шундай: оқсоқол оқ-қорани таниган, қонун-қоидани биладиган, юрт сиёсатини халқقا етказадиган шахс. Кайвони-чи? У маҳалланинг норасмий етакчиси: дангалчи, чапанироқ, урф-одатларни яхши биладиган, уларга амал қиласидиган, яхши-ёмонни фарқлаб, керагида мақтаб, керагида “никтаб” турадиган одам. Юртнинг тўй-азаси, иссиқ-совуғи кайвонисиз ўтмайди.

Тошкентнинг Дўмбиравот, Қозиравот, Мевазор, Хирмонтепа, Қаъни, Яккасарой маҳаллалари аҳли Абдумалик хожи акани яхши билишади. Бу одам дўмбиравотликларнинг ўз одами эди. У чўрткесар, кези келганда оғзидан аёвсиз сўзлар чиқадиган бўлсада, аслида одамохун, зиёли эди. Бешёғочнинг Янги маҳалласидагилар, Дўмбиравотликлар жадид муаллим Кўчкор Исҳоқовни яхши билишган. Ҳозир бу кишининг номи билан аталувчи кўча бор Дўмбиравотда. Абдумалик ака ўша Кўчкор афандининг иниси. Акаси изидан бориб, олий маълумотли бўлди, мактабда тил ва

адабиёт ўқитувчиси бўлиб ишлади. Абдумалик Исҳоқов нафақага чиққач, маҳалла ҳаётига шўнғиб кетди.

Қайси тўйда Абдумалик ака бош-қош бўлса, тўй эгасининг жони киради. Ҳамма юмушини кайвони ўрни-ўрнига қўйиб уdda-ларди. Тўғрироғи, Абдумалик ака тўйбоши бўлса, тўйда хизматга чоғланганлардан ҳеч ким бекор қолмасди.

1971 йилнинг ёзида ўғилларимни ҳатна қилдириб, ош бердим. Дастурхон жойида, таниқли ҳофизлар келган, муҳими, Абдумалик ака бошлиқ кайвонилар хизматда. Бирдан университет жамоаси, домлалар, ҳамкасбларим кўриниб қолишиди. Югуриб Абдумалик аканинг олдига бордим:

– Ака, устозлар, ҳамкасблар келишяпти. Уйга, ичкарига олсакмикан? ...

– Мулла Абдуғафур, қозон битта, дастурхон битта, ҳофизлар ашула қилишяпти...

Мен хато қилганимни сезиб қолдим-у, чайналиб нимадир дедим.

– Сиз келган-кетганларни кутиб, кузатиб тураверинг, буёғини бизга қўйиб беринг. Устозларингиз ўзбекнинг тўйига келёт-ганилигини яхши билишади. Биз учун ҳамма меҳмон – теппа-тенг: ўтқазган жойимизга ўтиришади, тортган ош-нонимизни танаввул қилишади. Тамолимиз шу, укажон.

Кизик, Абдумалик ака қаттиқ-қаттиқ, теккизиб-теккизиб гапирсаям, ҳеч ким у кишидан хафа бўлмасди. Абдумалик аканинг билимдон, уқувлилиги аза кунларида аниқ кўринарди. 1984 йилнинг саратонида ҳарбий хизматни олис юртда ўтаётган йигитчанинг ток уриб ўлганлиги ҳақида хабар келди. Марҳумнинг бобоси, отаси маҳалла устунларидан, эл назарига тушган одамлардан эди. Дарҳол тумонат одам йифилди. Икки кеча, икки кундуз, яъни жасад олиб келгунча маҳалла аҳли марҳум эшиги олдида бўлди. Ҳамма ишга Абдумалик ака бош-қош. Ниҳоят, марҳум жасади темир тобутда олиб келинди. Кайвони тобутнинг олдига тушиб ҳовлига кирди.

– Назира, ўғлинг келди, ўзингни қўлга ол, болангни бағрингга бос, куёвлик сарполарини устига ёп. Онагинам, Худо сенга сабртоқат берсин...

Абдумалик ака шошиб ташқарига чиқиб кетди. Ҳамма қўрди, билди – у йиғлади. Орадан бир-бир ярим соат ўтар-ўтмас Абдумалик аканинг тетик, буйруқнамо гапи эшитилди:

– Сиз, тақсир, маъруза қиласиз, хотин-халажни сал овутасиз, биз эса... – у ён-атрофдагиларга бирма-бир қаради, – марҳумни олиб чиқамиз. Кимдир эътиroz билдиримоқчи бўлганди, “Бўлди. гап тамом. Уйдагилар адойи тамом бўлди-ку”, – дея жеркиб ташлади.

Кайвони ҳамиша марҳумни тез дағн этишга, чин манзилга эртароқ етказишга ҳаракат қиласиди.

Дарвоқе, Абдумалик аканинг ростмана жаҳли чиққанини ҳам бир неча марта кўрганман.

– Ҳой, бойвачча, нега тамойилни буздинг. Сен бугун гўрковга бунча, ғассолга унча берсанг, эртага бир камбағалнинг шўри қурийди-ку... Ҳе сени бойваччалигингга...

Кайвони чақирилган ердан қолмас, айтилмаган жойга бормас эди. У тўй-ҳашамда, ошда йўл-йўлакай панд-насиҳат қилиб қоларди:

– Анавини қаранглар, бешта боласини эргаштириб ошга келаяпти-я. Лекин биронта боласини жанозага, тобут кўтаришга олиб бормайди.

Кейин бизга қараб дерди:

– Кўзларингни оч, ҳалқ зийрак, ҳамма нарсанинг ҳисоб-китобини қиласиди.

Абдумалик ака ҳазил-ҳузулга ўч, йифинлардан бир уй одамни оғзига қаратиб ўтира оларди. Бир гал серфарзанд, баобрў ўқитувчи набира кўрганлиги сабабли ёр-дўстларини шукронда дастурхонига таклиф қиласиди. Мехмонлар очилиб-сочилиб, хуш кайфиятда ўтиришибди. Абдумалик ака ҳар галгидай тўрда гурунг беряпти. Унинг қадрдон шогирдларидан бири олма-нокларни, банану анорларни тақсимчаларга кесиб-кесиб ташлаяпти, устига-устак, гапириб-гапириб қўяди:

– Ҳўл мевалар тез айнийди, дарҳол еб юбориш керак. Баъзилар сал уринган ҳўл мевани ташлаб юборади. Олинглар, енглар, ейишга қўйилган.

Кайвони бирдан бу ҳаракатга баҳо берди:

– Ҳой бола, бўлди, пичоқни қўй, қўлингин кесиб оласан, – деди.

Шогирд устозига “ярқ” этиб қаради, гап нимадалигини тушунди, дув қизариб кетди.

Абдумалик ака икки-уч йил оёқ учida юрди, хасталик анча қийнади. Баривир у ҳар куни бўлмаса-да, кунора секин-секин юриб чойхонага чиқар, ёр-дўстларини кўрар, пича сухбатлашар, сўнг яна бир-бир босиб уйига қайтарди. Абдумалик аканинг уйидан одам

аримай қолди. Ёлғиз ўғил Абдуғани худди отасининг ўзи: келганларнинг ҳурматини ўрнига қўяр, дадасининг тузалиб қолаётганини айтиб, ташрифчиларни хурсанд қиласди. Дарвоқе, Абдумалик ака бетоб бўлиб қолгач, Абдуғани отаси йўлини тутди: тўй-ҳашам, таъзияда сидқидилдан хизмат қила бошлади.

Абдумалик ака уч кам саксон ёшида вақот этди. У беш-олти йил муқаддам Хаж сафарини адо этиб келган эди. Ҳожи аканинг хайрли ишлари ҳамон юрт тили, дилида. Елиб-югуриб хизмат қилаётган Абдуғанини кўрган ота қадрдонлар:

– Худди Абдумалик аканинг ўзи-я, отасидай обрў-эътиборли, кайвони бўлсин, – дея дуо қилишади.

* * *

1980 йил баҳорида Ўткир Ҳошимовнинг онаси – Пошша она вафот этганларида Қозиравотдаги Лайлактепа қабристонига тумонат одам боргани, ўшанда Абдумалик ака барча тадбирларга бош-қош бўлгани кўз ўнгимда турибди...

Суҳбатларимиздан бирида Ўткиржон халқимиз удумлари ҳақида гапириб, бир нарсани таъкидлади. “Бизнинг халқимизда яхши кунда ҳам, ёмон кунда ҳам катта издихом бўлиши, кўп одамлар тўпланишининг сабабини айтами? Чет элларда, айниқса Ғарб мамлакатларида индивидуализм – шахс биринчи ўринда туради. Бизда жамоавийлик – коллективизм кучли. Ҳар ким бир-бирига елкадош бўлади. Бу – жуда катта фазилат. Аммо минг кишини бoshини қовуштириш ҳам осон эмас. Абдумалик акага ўхшаганларнинг beminnat хизмати учун ҳарчанд раҳмат деса арзиди!”

Ўткиржоннинг асаларида ҳозирчи Абдумалик аканинг тасвири йўқ. Бироқ адид бу нурли инсон қиёфасини бўлажак асаларидан бирига киритса ажаб эмас...

ОҚСОҚОЛ...

(Унинг сиймоси “Икки эшик ораси” романидаги акс этган)

Одам дегани омонат: бугун бор, эртага йўқ. Аммо одамдан қолган эзгу ишлар, ёрқин хотиралар унупилмас экан.

– Розик ота яшаган пайтдаги Дўмбиравот хотирамга муҳрланиб қолган. Ишкомлар меъмор қурган бинодай пишиқ, баланд, текис бўларди: орасидан қўқон арава бемалол юарди. Ўрикзор, шафтологизор, олмазор, нок, жийдазор, тутзорлар кўзни қамаштиради.

Ариқлардан пок-покиза сув шарқираб оқиб ётарди. Ҳеч ким водопровод деган сўзни билмасди, – дейди Ўткир Ҳошимов.

– Розик ота қирқ улфатга бошчи эди: унинг айтгани айтган, дегани деган эди. Отага каттаю кичик эгилиб салом берарди, одамлар йўл-йўриқ, маслаҳатни шу кайвони зотдан оларди, – дейди Мутал хожи Бегмат ўғли.

Мулла Розик Қосимжонов Тошкентнинг Янги маҳалласида 1875 йилда туғилган, уйининг ёнгинасидаги Абдулқосимхон мадрасасида таҳсил олган. Мадрасани тугатгач, ўзини дехқончиликка “урди”. Янги маҳаллаликларнинг аксарияти шаҳарда қишлилар, ёзни Дўмбиравотдаги боғ-ҳовлида ўтказарди. Ўтган асрнинг 30-йилларига келиб ишчилар шаҳарда, дехқонлар қишлоқда муқим яшайдиган бўлдилар.

Розик ота Дўмбиравотда ташкил этилган жамоа хўжалигига биринчилардан бўлиб аъзо бўлди. Қарийб 35 йил аҳил звенога етакчилик қилди. У ҳалол меҳнат қилиш, дину диёнатдан тоймасликни бош маслак деб билди. Меҳнат қилсан, эл-юрт оч қолмайди, жаннатдай боғ-роғларимиз, серҳосил экинзорларимиз поймол бўлмайди, зилол сувлармиз булғанмайди, ариқлар кўлмакка айланмайди, дея фикрларди Розик ота. Жамоа хўжалиги аъзолари ғайрати туфайли экинзорлар кенгайди, ерга пахса деворлар ётқизилди, ўғит ташланди. Меҳнат қилганинг тили узун бўлади, деганлари рост чиқиб қолди: нафақат Дўмбиравотликлар, балки хўжаликнинг етти бригадасидаги каттаю кичик, ҳатто баъзи туман раҳбарлари Розик ота насиҳатларига қулоқ тутадиган бўлишди.

Розик ота тиним билмади, туну кун меҳнат қилди. Лекин бирон кун беш вақт намозини, 30 кун рўзасини канда қилмади. Одамлар анойи эмас: оқсоқолни руҳий мададкор, илмли одам сифатида ҳурмат қиласди. Беш қўл баробар эмас, юртчиликда ҳар нарса бўларкан. Оқсоқол “қора хат” олганлар дардига дардкаш бўлди, оилавий можароларни ими-жимида ҳал қилди. Аммо амалини суистеъмол қилганлар, беш қўлини баробар оғзига тиққанлар билан тил топишиши амримаҳол экан. Бирор оиласи бўла туриб, балоғатга етган қиз билан гап-сўз бўлди. Баъзилар жамоа хўжалиги мулкини кўркўона талади. Ажаб, “давринг келди, сур, бегим” – деганларнинг қанчадан қанчаси хор-зор бўлди.

Розик ота ҳақиқатпараст, инсон қадрини юксак баҳолайдиган зот эди. У Ҳусан дума Исаев деган дўлвори қарияни ёқтириб қол-

ди. Чунки Ҳусан ота кексалигига қарамай, қийин, ҳеч ким қўнмайдиган юмушга қўл урди. У эртадан кечгача хонадонма-хонадон юриб, зарурхоналар ахлатини бочкаларга жойлар, уларни маҳсус қазилган “ҳовузлар”га келтириб тўкарди (“Икки эшик ораси” романида тасвирланган “тиллахона”га). Кўпчилик Ҳусан думадан нари юрар, бурнини жийирарди. Оқсоқол эса дўсти Ҳусанбойни алқар, ёлғиз ўғли армиядан соғ-омон келишини тилаб дуо қиласди.

Иккинчи жаҳон уруши бошланиши билан Розик ота уч ўғлидан иккисини – Абдураҳим ва Жўравойни армияга жўнатди. Ўн ёшли Ҳаким отасининг дастёри бўлиб қолди. Уруш йиллари жамоа хўжалигидаги ҳаёт ниҳоятда жиддийлашди: қанд лавлаги етишириш мажбурий юмушга айланди. Лавлаги етишириш ниҳоятда қийин: у асосан “шарбат”да, маҳаллий ўғитда етилар экан. Қанд лавлаги етиширишнинг фойдали томони ҳам топилиб қолди. Нон йўқ, қанд йўқ: одамлар аранг тирикчилик ўтказяптилар. Қанд лавлаги ёнғоқдай, кичкина сабзидай бўлдими, картошка, сабзи, гўшт вазифасини ўтай бошлади. Лавлаги етишгач, дехқон лавлагини қозонга нондай ёпиб истеъмол қила бошлади: қозон ҳам, оғиз ҳам, қўл ҳам шира. Шира қўп бўлса ҳам кўнгил озиб кетаркан.

Уруш тугади ҳамки, лавлагичилик барҳам топмади. Жангдан қайтган йигитлар жамоа хўжалигига ишлай бошладилар. Розик отанинг ўғиллари жамоа хўжалигига ишламоқчи эмасди. Бири қўлидан, бири оёғидан ярадор бўлганди. Амакилари Охун ака уларни шаҳарда дурусторқ ишга жойлаши мумкин эди. Розик ота икки ўғлини ёнига ўтқазди:

– Болаларим, мен қарибим, ёнимда бўлинглар, бирга-бирга ишлайлик, – деди. Жўравой отанинг сўзини ерда қолдирмади: жамоа хўжалиги тугагунича ўз қишлоғига ишлади.

Розик оқсоқол муросаи мадора қилиб яшади. Ҳалоллиқдан, бир баҳя бўлсин, четга чиқмади, иймон-инсофни сира унутмади. Отани ҳозирги ёшлар танимайдилар. Лекин Дўмбиравотлик қариялар ҳануз Розик отадаги муросасозликка, имон-эътиқодга, пок-ҳалолликка тан берадилар. Розик отанинг, унга ҳамнафас бўлганларнинг фидокорона меҳнатлари туфайли Дўмбиравот боғларини булбуллар тарқ этмади, экинзорлар мўл-кўл ҳосилини эл-юртдан “аямади”, ариқлардаги пок-покиза, зилол сувлар “шўх-шодон” оқишдан тўхтамади.

Иккинчи Жаҳон уруши, урушдан кейинги йилларда Марказининг маҳсус топшириғи билан социалистик мусобақалар уюш-

тирилди. Тошкент атрофидаги жамоа хўжаликларида Мехринисо Убайдуллаева, Замира Муталова, Розик Қосимжонов сингари донг таратган дехқонлар бор эди. Туман раҳбарлари “Шарқ тонги” жамоа хўжалигидаги Мехринисо Убайдуллаева билан Розик ота орасида тузилган мусобақага бош-қош бўлдилар. Қанд лавлаги топшириш режаси бажарилгач, мусобақадошлар орасидаги шартнома хулосалари эълон қилинди.

Мехринисо ва Розик ота кўрсаткичлари бир хил эди. Шунда мулла Розик ота донишмандлик қилди:

– Болаларим, замон ёшларники. Мехринисо қизим кунни кун, тунни тун демай меҳнат қилди. Мен унинг ғайратига, фидойилигига тан бердим. Биринчи ўринни Мехринисога берилишини сўрайман.

Убайдуллаева отанинг гапларидан мутаассир бўлди, отанинг оппоқ соқолли юзларидан ўпди. Ўша йили Мехринисо Убайдуллаевага Меҳнат қаҳрамони юксак унвони берилди. Иккинчи ўринни олган мулла Розик отага Ленин ордени берилди. М. Убайдуллаева қаерда, ким бўлиб ишламасин, Розик отани нурли сиймо сифатида хотирлаб ўтди.

Розик ота роса меҳнат қилди, лекин эски уйини янгиламади; келин туширди, куёв қилди, аммо исрофгарчиликка зинҳор йўл қўймади. У умр бўйи қарғишидан, ҳаромдан қўрқиб яшади. Розик отадаги фазилатлар унинг тенг-тўшлари, издошлари, ўғил-қизлари, невара-чевараларига қўчди. Катта Дўмбиравот маҳалласидаги 4-мактаб-интернат ёнгинасида файзлигина бир ҳовли бор. У ерда Розик буванинг кенжা ўғли Ҳаким ака, невара-чеваралари яшайди. Бу хонадон чироғи сира ўчмайди, чунки уни ҳалол, имонли Розик ота энг қийин замонларда ёққан.

* * *

Ўткир Ҳошимов “Икки эшик ораси” романидаги Ориф оқсоқол образини яратар экан, қадрдон Дўмбиравотликларни, Розик отанинг файзли қиёфасини кўз ўнгидан сира йироқлаштирумади. Розик ота ҳаёти Ориф оқсоқол тимсолида давом этяпти.

ЮРАГИДА ЎТИ БОР ПАРЧА

“Икки эшик ораси” – сержило, сертимсол роман. Унда Оқсоқол, Дума, Комил табиб, Қора амма, Раъно, Шомурод сингари характерлардан ташқари, Афанди домла, Кимсан, Самадов, Олимжон, Башорат, Фотима, Зухра, Рашид абзий, Парча сингари

ўнлаб катта-кичик тимсоллар бор. Парча дали-ғули, ўйлаганини шартта айтиб қўя қоладиган, ўйин-кулги, тўй-хашамни ёқтирадиган, одамлар орасида бўлишни истайдиган қари қиз бўлган. Қаердаки дўриллаган овоз эшитирса, қўполгина кулги янграса, билингки, ўша ерда Парча бор. Раъно фронтга кетган эрини унтиб, раис Умар закунчи билан юриб кетади. Ҳамма аёллар фуфайка, кўн этик кийиб қишин-ёзин меҳнат қиласидар. Раъно эса келинлардай ўзига оро бериб ўсма, сурма қўйиб, бежирим кийимлар кийиб юради. Гап нимадалигини ҳамма билади. Лекин фактат Парчагина: “Вуй Раънохоннинг очилиб кетганини қарайла. Эри урушда юрган хотингаям ўхшамайди” дейди. Унинг гап-сўзларидан пичинг, сохталик йўқ. Ўйлаганини айтиб қўя қолади. Ҳамма Умар закунчидан қўрқади, фактат Парча олифта раисни, “шарват” тўла ҳовузга итариб юборади. Парча ўзи сезмаган ҳолда тўғри сўзни айтади, ноҳақликка қарши ўзича исён қиласиди. Уни кекса дўмбиравотликлар ҳамон эслайдилар.

Розиқ ота, Ҳусан дума, Комил табибга тенгдош Зариф ота деган бўларди. У миқти, оқсариқдан келган, суюги меҳнатда қотган, кўнгли тоза одам эди. Унинг Холмат, Зуфар деган ўғиллари, Нозима (Назма), Хатима (Хатма) деган қизлари бўлган. Қизлар уруш бошланганида балоғатга етган, келин бўлишга тайёр эдилар. Уруш пайтида йигитлар фронтга кетдилар, яшириниб юрганлар ҳам бўлди. Никоҳ тўйлари камайиб кетди. Уруш тугагач, Назма ҳам, Хатма ҳам қари қиз бўлиб қолган эдилар. Назма оз муддат бўлса-да, турмуш қурди. Фарзанд кўрмади, оила эгаси бўлолмади. Хатма, опаси сингари, узоқ яшади, тўқсонларни қоралаб борди. Опа-сингилларни Холмат ака, Зуфар дўхтирларнинг келинлари, невара-чеваралари оқ ювиб, оқ тарашди. Бундан 5-6 йил бурун Парча номи билан Ў.Хошимов романига кирган онахон тўқсондан ошиб бандаликни бажо келтирдилар. Онахонни ўлимларидан 2-3 ой бурун сувратга туширган эдик. Онахон кексайгандаридан бир бурдагина бўлиб қолган, майнингина овозлари аранг эшитирарди. Мен энди бу онахон билан шўх дангалчи Парча орасидаги ўхшашликни топа олмас эдим...

Парча романдаги унутилмас образлардан бири бўлиб қолаверади.

*Ҳафиз АБДУСАМАТОВ,
Ўзбекистонда Республикаси фан арбоби, профессор*

АДИБ ДРАМАТУРГИЯСИ

Ўткир Ҳошимовнинг асарларини ўқиб қалбимнинг чукур қатламида адид ҳақида дил сўзларини айтиш нияти туғилди. Ўзбекистон Қаҳрамони, халқ ёзувчиси Саид Аҳмаднинг шогирдига бағишлиланган “Ижод ва жасорат” мақоласи билан танишиб чиққанимдан сўнг ўйланиб қолдим. Чунки устоз Саид Аҳмад шогирдининг ижодини шундай яхши таҳлил қилиб берганки, ундан кейин бирор нарса айтиш амри маҳолдай туюлди. Ўткир Ҳошимовнинг ҳар бир асарини Саид Аҳмад биринчилардан бўлиб ўқиган. Энг асосийси, устознинг шогирдига бўлган меҳри ўзининг ёрқин ифодасини топган. Саид Аҳмад Ўткир Ҳошимов ҳақида ёзибгина қолмасдан, айтган гаплари ҳаққоний эканлигини ҳаётда ҳам исбот қилган. У қаерга борса, қандай учрашувлар бўлса Ўткир Ҳошимовни тилга олмасдан ўтмас эди.

Кунларнинг бирида каминага қўнғироқ қилиб Ўткиржоннинг “Нур борки, соя бор” романи Москвадаги “Советский писатель” нашриёти режасига киритгани (мен у вақтда бошқарув аъзоси эдим), уни нашр этишга ёрдам беришимни илтимос қилиб, “Бу яхши роман, адига ёрдам берсангиз битта дўст ортирасиз” деган сўзлар ҳамон қулоғимда жаранглаб турибди. Ижобий жавоб олгандан кейин устознинг ёш боладай хурсанд бўлганлигини кўриб завқланган эдим. “Нур борки, соя бор” романи ўша йиллари “Советский писатель” нашриётида чоп этилди. Асар яхши баҳоланди. Бироқ роман юзасидан турли баҳслар ҳам бўлди. Эсимда қолган ғалати воқеа шуки, “Литературная газета”да ўзбек танқидчиси Норбой Худойбергановнинг мақоласи эълон қилиниб, унда мунаққид романни амалда йўққа чиқарган бўлса, худди ўша саҳифада таникли рус олими Владимир Бондаренко Н.Худойберганов асарга нохолис ёндошганини исботлаб, “Нур борки, соя бор” романи адабиётга қўшилган салмоқли ҳисса эканини исботлаган. Роман кўп бор нашр этилди, ажнабий тилларга таржима қилинди. Демак, Саид Аҳмад бу романнинг келажагини ҳис этган.

Ўткир Ҳошимов насли ҳақида кўп ёзилган, илмий ишлар қилинган бўлса-да, унинг драматик асарлари тўғрисида айrim

тақризлардан бошқа чуқурроқ таҳлилий ишлар, менимча, шу пайтгача ёзилмаган. Шуларни назарга олиб, Ўткир Ҳошимовнинг драматик асарлари ҳақида сўз айтиш лозим деб билдим. “Ҳазон бўлган баҳор” (“Баҳор қайтмайди”), “Инсон садоқати”, “Тўйлар муборак”, “Сиздан угина”, “Қатағон” каби асарлари сахналаштирилган. “Ҳазон бўлган баҳор” “Ёш гвардия” ва бошқа театрларда қўйилган ёшларни эстетик руҳда тарбиялашга ҳисса қўшган. “Инсон садоқати” (“Бироннинг ташвиши”) руҳий драмаси ўтган асрнинг олтмишинчи йилларида ёзилган. Аввал Оғаҳий номидаги Хоразм вилоят театрида, сўнг бошқа театрларда намойиш қилинган. “Сиздан угина” (“Виждон дориси”) сатирик комедияси етмишинчи йилларда Ёшлар театрида қўйилган. Гастрол билан бошқа республикаларга ҳам олиб борилган. “Тўйлар муборак” Кўқон театрида, Хоразм вилоят театрида, Тошкентдаги етакчи театрларда анча йил сахнада ўйналган. Бу асарларнинг жанри ҳар хил. Бироқ уларнинг ҳаммасида тирик инсонлар тасвири бор.

Ўткир Ҳошимов ўзининг драматургликка даъвоси йўқлигини бир неча марта айтган. “Мен драматург эмас, прозаикман, адибман”, деб таъкидлайди. Ёзувчининг “Дафтар ҳошиясидаги битиклар” китобида барча қаламкашларга намуна бўладиган фикр бор. “Худо кўнглига солмагунча ҳақиқий ёзувчи қўлига қалам олмайди”. Ўткир Ҳошимов бирон асарини “бозори чаққон мавзу бўлгани” ёки кимларгадир ёқиши учун ёзган эмас. Унинг қарийб яrim асрлик ижодини кузатган одам бир нарсани пайқайди. Барча асарларда, аввало, одамзотнинг буюклиги ва ожизлиги, муҳаббати ва нафрати, садоқати ва хиёнати – хуллас инсон диққат марказида туради. Ёзувчининг “Ёш гвардия” театрида сахналаштирилган “Ҳазон бўлган баҳор” (“Баҳор қайтмайди” қиссаси асосида) драмасида бир истеъдоднинг парвози ва инқирози, ёшлиқда қўйилган ножӯя қадам охир-оқибат қандай фожиаларга олиб келиши мумкинлиги эл севган хонанда Алимардон Тўраев қисматида ёрқин акс этган. Асар ғояси, драматик коллизиялар шиддати бугунги томошабинни ҳам лоқайд қолдирмайди.

“Инсон садоқати” руҳий драмасида бир қарашда кескин ташқи динамика, ҳаракатлар, елиб-югуришлар, бақириқ-чақириқлар йўқ. Воқеа бир жойда, касалхонанинг торгина палатасида бўлиб ўтади. Аммо бу – асарда драматизм йўқ, дегани эмас. Ундаги ички таранглик, икки қутбнинг муросасиз зиддияти томошабинни (енгил-

елпи эмас, если-хушли томошабинни) муттасил ҳаяжонда ушлаб туради. Асардаги поклик ва нопоклик, фидойилик ва худбинлик ўртасидаги кураш нихоятда жиддий ва кескин. Ёзувчи асарларига хос бўлган теран фалсафа, таъсирчан тил ушбу драмада ҳам кўринади. Асарнинг бош қаҳрамони, болалик чоғида ҳам отадан, ҳам онадан тирик етим бўлиб қолган, аммо худбинлик эмас, фидойилик йўлини танлаган ёш олим Элёрнинг онаси билан аламли сухбатдаги бир гапини эсланг. Гўдак болани ташлаб кетиб, “эркин муҳаббат” гаштини сурган ва ўғли элга таниқли олим бўлгач, “она” экани эсига тушиб қолган аёлга Элёр кўзида ёш билан мурожаат қиласди: “Онажон, айтинг-чи, мабодо мен туғилишимдан олдин Сиз тошга бошқоронғу бўлмаганмидингиз?.. Мен чиндан ҳам тош бўлдим. Отам олиб сизга отади. Сизга тегиб, сизга озор бераман, ўзим озор чекаман. Сиз олиб, отамга отасиз. Отамга тегиб, отамга озор бераман, ўзим озор чекаман!” Дилдан отилиб чиққан бу фарёдни эшитган томошабин ларзага тушмай қолмайди.

Муҳими шундаки, “Ҳазон бўлган баҳор”даги Алимардон драмаси ҳам, “Инсон садоқати”да Элёр қисмати ҳам ҳамон эскирган эмас. Ўзининг оталик ва оналик бурчини унутиб, таралла бедод қилиб юрадиганлар, маънавий қашшоқлиги, очикроқ айтсак бузуклиги туфайли “мехрибонлик уйларини” тўлдириб ташлаётган “оналару” “оталар” бугун ҳам хоҳлаганча топилади. Драманинг бош мақсади – Инсон деган унвонни авайлаш ғояси бугун ҳам, эртага ҳам эскирмайди.

Ўткир Ҳошимовнинг “Сиздан угина” (“Виждон дориси”) сатирик комедиясида жиддий мавзу ва яхши топилма мавжуд. Ёш олим фармацевтика соҳасида янгилик бўлган виждон дорисини кашф этади. Уни ичган одам ўзи билмаган ҳолда дилида борини тўкиб солади. Олим ўз дорисини синаб кўрганида “ғалати”, айтиш мумкинки, даҳшатли манзарага дуч келади. Ўзига яқин олган, ўзи ишонган одамлар орасида нақадар ғаразгўй, тили бошқа, дили бошқа кимсалар бор экан. Ва аксинча, ўзи унчалик ёқтирумаганлар орасида қанчадан қанча софдил, самимий одамлар бор экан!

Одатда, ёзувчи ва драматурглар ижод йўналишига қараб маълум “тоифа”га бўлиниши мумкин. Бирор нуқул жиддий асарлар ёзади, бошқа адаб ёки драматург ҳажвга мойил. Бир йўла ўқувчи ёки томошабинни “йиғлатиш”га ҳам, “кулдириш”га ҳам қодир қаламкашлар кўп эмас. Адабиёт тарихига назар ташласак шундай

кўпқиррали адиб ва шоирларни кўриш мумкин. Абдулла Қодирий,Faфур Фулом, Абдулла Қаҳҳор, Сайд Аҳмад, Эркин Воҳидов асарларида шундай фазилатни кўрамиз.

Ўткир Ҳошимов ҳам шу сирага кирадиган адиб. Унинг “Бахор қайтмайди”, “Қалбингга қулоқ сол”, “Нур борки, соя бор”, “Икки эшик ораси”, “Тушда кечган умрлар” каби роман ва қиссалари, ўнлаб ҳикояларида жиддий ва фожиали ҳолатлар тасвирини кўрасиз. Шу билан бирга адибнинг “Осмондан тушган пул”, “Шумлик”, “Сўққабош бевагина” каби китобларига кирган ичак узди ҳажвиялар, “Икки карра икки – беш” қиссаси ва томошабинлар орасида машҳур бўлиб кетган “Тўйлар муборак” комедияси бунинг исботидир.

“Тўйлар муборак” аввал Қўқон театрида, сўнг “Ёш гвардия” театрида (атоқли режиссёр Рустам Бобохонов томонидан), Оғаҳий номидан Ҳоразм вилоят театрида (яна бир атоқли режиссёр Ибодулла Ниёзматов) саҳналаштирилган. Шунингдек, комедия қўшни Тожикистон, Қирғизистон, Қозоғистон, Туркманистонда томошабинлар олқишини олган асар бўлди. Рустам Бобохонов эса кейинроқ асарнинг мусиқали вариантини Муқимий номидаги мусиқали театрда гўзал қилиб саҳнага олиб чиқди. Ҳозир янги таҳрирдаги “Уйланмасам – ўламан” комедияси Бердақ номидаги Қорақалпоғистон Республика театрида саҳналаштирилди.

Босар-тусарини билмай қолган айрим “замонавий” бойваччалар ҳақидаги комедия бошқа театрларда ҳам саҳналаштирилмоқда. Асарни кўрган томошабин яйраб кулади. Бироқ унда ҳар хил бачкана қиликлар, шармсиз имо-ишора ва “реплика”лар йўқ. Адиб бир сухбатда “фикр тугаган жойда қилиқ бошланади, қилиқ эса томошабинни тарбиялаш ўрнига бузади”, дегани бежиз эмас. “Уйланмасам – ўламан” ҳақиқий комедия. Бироқ унда томошабинни кулдирибгина қолмай, ўйлантирадиган тагмањолар ҳам кўп...

Ниҳоят, адибнинг яна бир асари “Қатағон” фожиаси ҳақида бир қадар батафсилроқ тўхталишга тўғри келади. Бу асар Ўзбек миллий академик театрида саҳналаштирилган. Мавзусининг муҳимлиги, драмаси кучлилиги, психологик таҳлил ва тилнинг образлилиги билан бу фожиа Ўткир Ҳошимов ёзган саҳна асарлари орасида алоҳида эътиборга лойик деб ўйлайман. Шўро адабиётида фожиа ёзиш мумкин эмас, деган тушунча, аникроғи “ички буйруқ” бор эди. Майли, хоҳлаган одам хоҳлаган фожиасини ёзаверсин, аммо бу

жанрдаги асар ўтган замон ёки бошқа мамлакатлар ҳақида бўлиши шарт. Шўролар ҳаёти ҳақида драма, мелодрама, комедия, сатирик комедия ҳам ёзишга рухсат, бироқ фожиа ёзиш мумкин эмас, чунки бизнинг ҳаётда фожиа йўқ деб ҳисобланган. Ҳолбуки, айнан ўша шўролар замонида кўпдан-кўп фожиаларни учратиш мумкин эди.

“Қатағон” фожиаси шўро замони ҳақидаги биринчи ўзбек фожиаси дейиш мумкин. Табиийки, Мустақиллик бўлмаса, бу асар саҳна юзини кўриши мумкин эмас эди. Борингки, бир амаллаб саҳнага чиқиб қолгудек бўлса, драматург ва режиссёрдан тортиб актёргача ўзлари қатағонга йўлиқиши ҳеч гап эмасди. Зеро, асарда бошдан-оёқ шўро тузумидаги фожеалар аёвсиз фош қилиб ташланган. Фожиа марказига ўтган асрнинг саксонинчи йилларида ўзбек халқи бошига тушган оғир кулфат – олисдаги марказ томонидан уюштирилган ва мингларча бегуноҳ инсонларнинг қисматини қора қилган “ўзбек иши”, “пахта иши” кампанияси, мустабид тузумнинг сўнгги жиноий ҳамласи асос қилиб олинган.

Ўткир Ҳошимов бу ҳунрезлик кимдан ва қаердан бошланганини яхши билади. “Шарқ юлдузи” журнали бош муҳаррири сифатида рўй бераётган фожиаларни ўз кўзи билан кўрган. 1990 йили Москвада бўлган КПСС XXVIII съездидан мамлакатимиз раҳбари Ислом Каримовнинг нутқ сўзлаб, марказ Ўзбекистонни полигонга айлантиргани, “ўзбек иши” дегани тухмат эканини катта минбарда туриб фош этганини кўрган. Бинобарин, “Қатағон” муаллиф томонидан “ўйлаб топилган” асар эмас.

Ўткир Ҳошимов асарларида тасвир аниқ, ишонарли. Китобхон ёки томошабин беихтиёр асар иштирокчисига айланиб қолгандек бўлади. Бунга кўп мисоллар келтириш мумкин. Бир вақтлар “Икки эшик ораси” романини ўқиган наманганлик уруш ногирони Ҳасан Абдуллаевнинг хати матбуотда эълон қилинган эди. У муаллифга хат ёзиб, “биласан, сиз ёшсиз, иккинчи жаҳон урушида қатнашган эмассиз. Ўша урушни мен кўрганман. Романини ўқиганимда ёзувчининг ўзи ҳам урушда бўлган, деб ишондим” деган эди. “Тушда кечган умрлар” романи ҳақида тақриз ёзган таниқли адаб ва шоир Қўчқор Норқобил эса Афғон урушида ўзи бошидан кечирган даҳшатлар романда нақадар аниқ кўрсатилганини ўқиб муаллифга миннатдорчилик билдирган.

Ёзувчи асарда тасвирланажак манзара ва воқеаларни синчиклаб ўрганади. Адабнинг “Она битта, Ватан ягона” деган бадиасида

ўтган асрнинг саксонинчи йиллар ўрталарида олисдан келган гдлянчи жаллодлар кўрсатган “хурмача қилиқлар” ҳақида бир-бираидан даҳшатли далиллар келтирилган. Марказлик қонун ҳимоячилари беш-олти йил мобайнида минглаб инсонларни қамоқقا тиққан. Шулардан тўрт ярим минг киши ҳеч қандай гуноҳсиз етти ойдан етти йилгача қамоқ ва лагерларда саргардон бўлган. Золим “хукуқшунослар” ҳатто тўқсон яшар кампирни ҳам қўрқитиб сўроқ қилганлар. Камолова деган ёш аёлни эса 1988 йил ёзида тўрт кечакундуз эмизикли боласини чирқиллатиб йифлатиб қўйиб, тергов қилганлар ва “фалончига қарши гувоҳлик бермасанг, болангни эмизмайсан” дейишган. Уларнинг энг “синалган” усули “фалон ҳужжатга қўл қўймасанг, қизингни зўрлаймиз”, “келинингни фалон қиласан” деган дағдағалар бўлган. Яхшиямки, Ислом Каримов мамлакат раҳбари бўлиши билан бундай хунрезликка қарши мардона кураш бошлаган. “Ўзбек иши” бўйича Гдлянчилар қилган золимликларни Ўзбекистон Олий суди қайтадан қўриб чиққан. Ёзувчи бу далилларни пухта ўргангани учун ҳам ўша кезлардаги шўронинг сўнгги ҳуружи “Тушда кечган умрлар” романи ва “Қатағон” фожиасида ниҳоятда ҳаётий тасвирлаган.

Ўз вақтида “Қатағон” фожиаси ҳақида матбуотда айrim мақолалар ёритилган. Бироқ уларда асар чуқур таҳлил этилган дейиш қийин. Спектаклда шундай тагмаъноли, “яширин” нуқталар борки, уларни англаш учун ўйлайдиган томошабин керак. Масалан, асар бошидан сахнага Лўли чиқиб келади ва ўз одатига биноан, “уйингда амал боо-о-р” деб, бош қаҳрамон Панжи Жумановнинг хотини Ханифага “фол оча бошлайди”. Бир қарашда жиддий фожиада атиги бир неча дақиқа кўринадиган Лўлининг нима кераги бор? Гап шундаки, драматург мана шу “кераксиз” образга ҳам катта “юмуш” юклаган. Лўлини терговчи Мясников эрмак қилиб “лўли бўлсанг, бир фол очиб кўр-чи”, деб кафтини тутади. Шунда Лўли унга қараб, “қўлингдан қон ҳиди келопти, сен ёмон одамсан!” дейди ва бу гапи билан томошабинни асарда рўй берадиган фожиалардан огоҳ қилгандек бўлади. Ханифага “буларни нега уйингга киритдинг, булар ёмон одам, уйингда амал бор” деб тағин бир бор таъкидлайди. У айтган “амал” нима эканлиги сўнгги пардаларда аён бўлади. Мясников у бу хонадоннинг хожатхонасига наркотик модда яшириб кетади ва шу баҳонада биринчидан Жумановнинг

тилини қисиқ қилмоқчи, иккинчидан, Ханифани ҳам ҳибсга олмоқчи бўлади. Фожиада яна бир саҳна бор. Мясников Ханифага эринг яширган пулни топасан, деб зуғум қиласвергач, аёл шўрлик дод-устига дод солиб, қўшниларни ёрдамга чақиради. Афсуски, бирон қўшни ҳолинг нима кечди, деб ёнига яқин келмайди. Бу билан ёзувчи олисдаги марказ қатағон учун бошқа халқни эмас, айнан ўзбекларни танлагани бежиз эмаслиги, бизнинг одамлар ҳарчанд меҳнаткаш, бағрикенг бўлмасин, вақтида қовушиш, бирбирини ҳимоя қилиш масаласида лоқайд эканига ишора қиласди. Шундай оғир паллада фақат бир киши Панжи Жумановнинг акаси Валентин Жумановгина келинини ҳимоя қиласди, Мясников билан унинг маҳаллий гумаштаси Бердиевни ҳайдаб чиқаради. Валентиннинг миллати рус. Уни Жумановлар оиласи гўдаклигига Ленинград қамалидан чиқиб келганида асраб олган. Валентин каллакесар терговчи Мясников билан дангал олишади. Мясников навбатдаги ҳийлани ишга солиб, Валентинни “миллатдош” сифатида ўзига ёрдам қилишга, яъни укаси Панжи устидан ёлғон гувоҳлик беришга унdagанида Валентин ғоят мантиқли жавоб қиласди. “Вой, ифлослар-ей! Энди менинг бошимни ахлат пақирга тиқмоқчи-мисан? Ленинград блокадасидан чиқиб келганимда сен онангни қорнида ҳам йўқ эдинг! Шу одамлар мени бағрига олди. Очликдан силлам қуриб ўлим тўшагида ётганимда шулар менинг жонимга оро кирди. Шулар менинг бошимни силади. Энди мен шу халққа нонқўрлик қилайми, номард!” Мясников Панжини “синдира олмагач”, “бутун халқинг қўй, эшак” деб ҳақорат қиласди. “Хотинингни учта рецидевистга баравар зўрлатаман” дейди. Охири Панжи унинг бошига терговчининг ўзи ичиб ўтирган арақ шишаси билан уриб, ўлдиради. Панжини эса отиб ташлайдилар.

Кизиғи шундаки, Валентин Жуманов виждонли инсон бўлса, шу юртнинг ўзидан чиқкан “маҳаллий хуқуқшунос” Бердиев Гдлянчиларнинг лайчаси. Ханифанинг унга қарататайтган сўзларида аччиқ ҳақиқат бор. “Булар-ку, қай гўрдан келган! Сен-чи? Сен шу қишлоқнинг сувини ичиб катта бўлгансан-ку! Ўз хешларингга тухмат қилгани уялмайсанми, юзсиз? Панжи аканг кимлигини билардиг-ку, виждонсиз! Булар қилғилиқни қилиб, юртига жўнаб кетади, сен қандоқ бош қўтариб юрасан, бу юртда, имонсиз!” Куруқ тухматга учраган аёлнинг фарёдида чексиз алам бор!

Терговчиларнинг бошлиғи Мясниковнинг гапини эшитайлик. “Минг кишини чақириб тўй қилишга пул керакми? ... Хотини каламушга ўхшаб ҳар йили болалайдими? ... Шунча болани боқишига пул керакми? Қаердан олади шунча пулни? ... Кўшиб ёзади, пора олади! Ўғрилик қиласди...” Унинг ўзбек халқига берган баҳоси шу. Асардаги Мясниковнинг жирканч фаолиятини кузатсақ, Х.Гдлян билан И.Ивановлар кўз олдимизга келади. Асарда шунчаки кези келганда айтилгандек, бир луқма бор. Терговчи Мясников Ҳанифанинг уйига бостириб кириб, уни сўроқ қиляпти. Аввало, бирорнинг уйига махсус рухсатнома – ордерсиз бостириб кириш мумкин эмас. Қолаверса, “тергов” терговчи хоҳлаган тилда эмас, сўроқ берувчи хоҳлаган тилда олиб борилиши шарт. Бу халқаро норма. Бироқ гдлянчиларга “чекланмаган ҳуқуқ” берилган. Мясников Ҳанифага “Одам тушунадиган тилда гапир!” деб дағдаға қиласди. Ҳанифа эса “Сенинг тилинг одам тили бўлганда менини ҳайвон тилими? Мен сенинг уйингга бостириб борганим йўқ, сен менинг уйимга бостириб келдинг. Керак бўлса, сен менинг тилимда гаплаш” дейди. Бир қарашда бу оддий тортишувдек кўриниши мумкин. Бироқ тагида катта маъно бор. Шўро замонида ўзбек тили кўп йиллар камситиб келинди. Ҳар қандай йиғилиш албатта рус тилида олиб борилиши шарт эди. Мажлис қатнашчиларнинг ҳаммаси маҳаллий халқ вакили бўлса ҳам! Ҳатто Тошкент театрларида саҳналаштириладиган ўзбек тилидаги спектакллар муҳокамаси ҳам рус тилида бўлиши шарт эди. Ўтган асрнинг етмишинчи йилларида Гуржистон ёзувчиларининг қурилтойига боришимга тўғри келди. Ӯшанда қурултой бошидан охиригача гуржи тилида олиб борилди ва ҳеч ким уларнинг мушугини пишт дегани йўқ. Бизда эса кимданdir ҳадиксираш, қўрқоқлик одати бор эди!

Ўткир Ҳошимов асарга Ҳанифа тилидан бу оғриқли хитобни бежиз киритган эмас. Ҳанифа оддий уй бекаси. Бироқ у тухмат ва ҳўрликлар кўравериб жонидан тўйиб кетган. Эри, фарзандларининг отаси мутлақо ноҳақ қамалганини билди. Олисдан келган зўравонлар тухмат қилаётгани етмагандек она тилини ҳам камситаётганига чидолмайди. Нима бўлганда ҳам бу луқма тагида катта маъно ётибди. Фожиани диққат билан кўрган томошабин драматург бирон жумла ёки детални бежиз ишлатмаганини англайди. Терговчиларнинг каттаси Мясников (фамилиянинг “зўрлиги”ни

қаранг, муаллиф уни “Қассоб” демоқчи) ўтакетган мараз кимса. У ўзбек ҳаётини мутлақо билмайди. Булар ҳаммаси текинхўр, боқиманда деб ўйлайди. Панжининг чала қолган, хом ғиштдан қурилган иморати унинг кўзига қаср бўлиб кўринади. Бу эса бир гал унинг ўзига панд беради. У Жумановга фалончидан олган фалон минг сўм порани полингни тагига яширгансан, деганда ғирт тухмат қилаётгани аниқ бўлади. “Пол дейсанми, – дейди Панжи қулиб, – менинг уйимда полнинг ўзи йўқ ва бўлган ҳам эмас”. Мясников, Бердиевга ўхшаш “ўзимиздан чиқсан балолар”ни югурдак қилиб, ҳалқнинг бошига минг хил кулфат ёғдиради. Аввал оила бошлигини ҳибсга олади. Сўнг Бердиевни ишга солиб, унинг уйига “элчи” қилиб юборади. “Фалон минг берсанг, эрингни (акангни ёки укангни) чиқариб юборамиз, дейди-да, мол-холини, ҳатто бувисидан мерос бўлиб қолган тилла билакузуккача тортиб олади. Валентин Жуманов “бўрига эргашиб юрган шоқол” деб таърифлаган Бердиевлар ҳам бир нималик бўлиб қолади. Аслида “адолат ҳимоячилари”нинг ўзи порахўр! Мясников тергов пайтида энг мараз усулларидан ҳам қайтмайди.

Панжининг қанд касали борлигини билиб уни атайлаб бир неча кунлаб сувсиз қолдиради. “Фалончига қарши ҳужжатга қўл қўйсанг қизингни касалхонага ётқизамиз” деб (Жумановнинг қизи пахтада ишлаб сариқ касалига йўлиқкан) алдайди. Панжи бу “қармоқقا” илинмагач, Мясниковнинг ҳақиқий башараси очилади. “Менга деса қизингни жигарлари эзилиб кетсин. Қизинг ўлган! Ўлар чоғи сени чақирган” деб “тантана” қиласи. Терговчининг бир гапида ҳам тагмањо бор. У Жумановга “хоҳласам, раҳбарларингни ҳам эмаклатаман!” деб ҳайқиради. Панжи Жуманов – тажрибали дехқон. Катта хўжаликка раҳбарлик қилган. Бироқ у оддий хизматчигина эмас, иқтисодчи олим. Бу жиҳатдан ҳам у рўй бераётган фожиаларнинг туб моҳиятини теран англайди. Ундан бирон “керакли” маълумот (яъни бошқаларга тухмат) ундиrolмаган Мясников ғазабга миниб, ўзбекларни “фош қиласи”. “Сен ҳаромхўрлар туфайли нималар бўлганини биласанми? Марказий туманларга тола ўрнига хашак борган Ха-шак! Кейин эса ўша хашак ҳам бормай қолган! Вагонларда ҳаво борган. Самолётларда эса дипломат тўла пул борган! Пора борган”. Жуманов бундай пўписаларга афсусланиб эмас, истеҳзоли қулиб жавоб беради. “Буёқдан тола ўрнига ва-

гонларда ҳаво, самолётда пул борган экан, у ёқдагилар нега индамабди? Нега бизга пул керакмас, толанинг ўзини беринглар, демабди?!”

Асар қаҳрамонининг бу гапида жиддий ҳақиқат бор. Жуманов порахўрликни сенларнинг ўзинг бошлагансан, “қўшиб ёзишга” сенларнинг ўзинг мажбур қилгансан,” демоқчи! Панжи билан Ҳанифанинг хаёлий учрашув манзараси жуда таъсирили. Ҳанифа гўдагининг бешигини қучоқлаб ўтирибди. Панжи пайдо бўлиб, унинг ёнига келиб ўтиради. Аҳволи ҳарчанд оғир бўлмасин, аёлига тасалли беради. Улар суурорли кунларни эслайдилар. Эр-хотин орасида шундай диалог бўлиб ўтади. “Ҳанифа: Одамларгаям хайронман. Бошимизга қора кун тушдию, ҳаммаси юз ўгириб кетди. Муллакамдан бошқа ҳеч ким қолмади! (Валентинни айтмоқчи) Ахир, сиз шунча одамга яхшилик қилдингиз. “Жуманов: Менам шунга хайронман. Юртимизни вабо босди. Қамоқхоналар бегуноҳларга тўлиб кетган. Одамлар нега мунча лоқайд?! Ҳанифа: Анавиларнинг нияти нима ўзи? Жуманов: Ниятими? Нияти – халқни пароканда қилиш. Қулга айлантириш!”

Фожиа охирида ҳам нозик ишора бор. Мясниковга олисдаги пойттахтдан қўнғироқ бўлади”. Мясников (ўрнидан туриб кетади): Эшитаман, ўртоқ Геворкян! Эркак овози: Эшитиб қўй, Мясников. Ўзбекистонда вазият ўзгариб бораяпти. Мясников: Ўртоқ Геворкян... Геворкян: Гапимни бўлма! Вазият ўзгарайяпти, ишни тезлат! Сенга уч кун муҳлат!”

Чиндан ҳам Ислом Каримов Республика раҳбари бўлган дастлабки кунларданоқ “ўзбек иши”, “пахта иши” деган тухматни тўхтатиш учун курашга киришди ва ўша пайтлардаги минглаб жиноий ишлар қайта кўриб чиқилганида қанчадан-қанча бегуноҳ одамлар ҳеч қандай асоссиз азият чеккани аён бўлди. Шўролар мамлакатининг олис ўрмон ва чўлларида азоб чекаётганларнинг ҳаммаси ўз Ватанига қайтарилди.

Ўткир Ҳошимов драматургияси ҳақида гап кетганда бу асарга кўпроқ тўхталганим бежиз эмас. Адибнинг талай роман ва қиссалари, саҳна асарлари қатори бу фожиада ҳам тирик инсонлар қисмати қаламга олинган. Ҳарчанд аччиқ бўлмасин, бор ҳақиқат ёзилган. Муҳими шундаки, онги мустақиллик йилларида шаклланган авлод Истиқлол биз учун осон келмаганини, бу йўлда қандай курашлар бўлгани, қанча қурбонлар берилганини яхши билмаслиги мумкин. Холбуки, адеб ёзганидек, кечани унутмаган бугунни

қадрлайди. Менга қолса, “Қатағон” фожиасини пойтахтда ҳам, ви-
лоятларда ҳам яна намойиш қилиш, иложи бўлса, бошқа респуб-
ликаларга ҳам бу спектаклни кўрсатиш керак.

Ёзувчининг фақат саҳнада эмас, “ойнаи жаҳон”да намойиш
этилган “Баҳор қайтмайди”, “Нур борки, соя бор”, “Қалбингга
кулоқ сол”, “Ўзбеклар” каби роман, қисса, ҳикоялари асосидаги те-
левизион фильмлар, ҳажвий ҳикоялари асосида яратилган ичакузди
кўрсатувлар миллионлаб томошабинларга маълум. Айниқса,
“Баҳор қайтмайди”, “Инсон садоқати”, “Дунёning ишлари” асар-
лари қарийб қирқ йилдан бери телевидение орқали деярли ҳар йили
намойиш этилиб, янгидан-янги авлодни ҳаяжонга солмоқда. Нега-
ки, уларда ўзбек халқининг гўзал қадриятлари, шу билан бирга му-
ҳаббат ва нафрат, садоқат ва хиёнат, меҳр ва қаҳр сингари умум-
башарий туйғулар яққол қўриниб туради. Бу телевизион асарларда
рол ўйнаган Замира Ҳидоятова, Рихси Иброҳимова, Манзура
Ҳамидова, Икрома Болтаева, Ёқуб Аҳмедов, Толиб Каримов,
Саидкомил Умаров, Лутфулла Саъдуллаев, Гулчехра Саъдуллаева,
Мухаббат Йўлдошева, Теша Мўминов, Обид Толипов, Гулираъно
Ҳакимова сингари ўнлаб санъаткорлар телетомошабинлар қалби-
дан чуқур жой олгани бежиз эмас. Бир сухбатда Ўзбекистон халқ
артисти Рихси Иброҳимовадан “ўзингиз учун энг қадрли рол
қайси” деб сўрашганида “Дунёning ишлари”даги Она образи деган
эди. Бу гапда теран ҳақиқат бор.

Сўзимизнинг бошидаги фикрга қайтадиган бўлсак, Ўткир
Хошимов гарчанд ўзини драматург ҳисобламаса-да, унинг ижодида
драматик асарлар салмоқли ўрин тутади.

ЁЗУВЧИ ВА КИТОБХОН

Ўткир Ҳошимов XX асрнинг олтмишинчи-тўқсонинчи йиллари орасида асарлари энг кўп ўқилган ва ҳатто энг кўп муҳокама қилинган ёзувчи. Ўқувчиси энг кўп ёзувчи ва шу маънода ҳақиқий халқ ёзувчиси. Унинг ўз ўқувчилари тоифалари тўла шаклланган: уларни ахолининг турли қатламлари орасидан топиш мумкин. Ўқувчи минг-минглаб хатлар орқали ёзувчи билан мулоқот олиб борган. Асарлар ўзига қандай таъсир кўрсатганлиги, ҳатто ҳаётини қандай яхши томонга ўзгартирганлиги, қийинчиликлардан олиб чиқиб, янгидан ҳаётга чорлаганлиги хусусларда ёзувчига ўз кўнгил эътирофларини йўллаган, уни янгидан-янги асарлар ёзишга ундаган, унданбина қолмай кўп ҳолларда илҳомлантирган.

Китобхон беҳад ранг-баранг қиёфалардан, қисматлар, қарашлар, нуқтаи назарлар, манфаатлардан жамланиб бир яхлит китобхон деган қиёфага киради. У ўзи севган, қизиқсан қаламкашнинг китоби, асари учун аввало қимматли вақтини – умрининг маълум бир улушларини, даромадининг баъзи улушкини – пулинни ва шулар билан бирга ақлини, юрагининг қўрини сарфлайди. Жамлама китобхон жуда ажойиб ва ғалати феъл-атворга эга бўлган шахс. Унинг муҳаббати, инжиқлиги, талабчанлиги, баҳс-мунозара га мояйлилиги билан доим сергак бир мавқеда туришга ундейди.

Ёзувчи билан китобхон муносабатларида ёзувчи ёзади, китобхон ўқийди. Лекин китобхон бирон бир нарсани ҳал қиласадими? Ёзувчи индивидларнинг индивиди. У ўз индивидуаллиги даражасидагина индивидуал ўзига хос асар яратади. У китобхонга тенглашишни эмас, балки китобхондан баландроқ туришга интилади. Шунинг учун ҳам китобхонни ҳайратга солади, ёзувчи китобхонга эмас, китобхон ёзувчига қараб ҳайрат бармоғини тишлайди ва ўзи илгари кўрмаган, билмаган нотаниш оламларга киради. Китобхон ўrnak излайди. Ёзувчи ўrnak беради. Китобхон ҳаётнинг ранг-баранг қирраларини махсус ўрганган. Китобхон эса кўпроқ, ўз ҳаёти ва нари борса ўз яқинлари, қўни-қўшниси, ҳамкаслари ҳаётини билади. Ёзувчи эса ҳаётнинг турли қатламларига, турли туман касб-кор эгаларининг ҳаёти ичига, ижтимоий, тарихий, ма-

даний, илмий, фанний соҳаларга шиддат билан ёриб киради. Унинг ижодкорлик манфаатлари шуларни тақозо қиласди.

Ўткир Ҳошимов ўз ўқувчиси билан муттасил изчил алоқада ишлайди. У кимга ёзаётганини билади. Ўқувчиси унинг учун мавхум шахс эмас, жуда жонли ва жуда фаол фикрловчи кимса.

Ўткир Ҳошимов нима учун ёзаётганини ҳам билади. Ўқувчинини ўзининг ижодий ишларига шерик деб тушунади. Маърифатли муносабатга маърифатли муносабат билан жавоб беради. Унинг барча жанрлардаги асарлари ички моҳиятига кўра ўта самимий ва ўта содда. Унинг ўқувчисида ҳам шу самимият ва соддалик мужассам. Замонлар ўзгаради, ўқувчилар ҳам ўзгаради. XX асрнинг қирқинчи-эллигинчи йилларидағи ўқувчи бошқача эди. Олтмишинчи-етмишинчи йилларидағи ўқувчи бошқача бўлди. Ёзувчи ўсганидек ўқувчи ҳам ўсади. Қодирий, Чўлпон, Ойбек,Fafur Ғулом, Ҳамид Олимжон, Уйғуннинг ўқувчиси шуларга, уларнинг асарларига бўй тортган ўқувчи эди. Мухташам сўз, мухташам тарих, мухташам воқелик уни ўзига ром қилган, ярқироқ тўрлари билан қамраганди. Ул ўқувчи ўзининг шу каби адиблари билан мухташам уфқлар ва мухташам идеалларни кўзларди, у маълум маънода ва ҳатто тўлалигича романтик эди. Шум бола, Йўлчи, Отабек, Кумуш, Зайнаб, Омон, Жонтемир ва Бахтигуллар унинг ҳақиқий қаҳрамонлари эди. Ўқувчи идеал суратдаги шундай қаҳрамонларга бўйлашарди ва улар орасидан қодирийлар, усмон носирлар, чўлпонлар юлиб олиб келиб кетилаётганлигини сезмай қоларди. Бошқа оҳанраболарга машғул бўларди. Кейин замонлар ўз қонуниятларига кўра ўзгариб, Чингиз Айтматов, Саид Аҳмад, Одил Ёкубов, Пиримкул Қодиров, Ўлмас Умарбеков, Ўткир Ҳошимов, Шукур Холмирзаев, Учқун Назаровларнинг фикрлашга, баҳсга чақирган, ҳаётга танқидий рух, танқидий муносабатда бўлган асарларни ўқувчи қучоғига гувиллаб ёғилди. Олтмишинчи йилларнинг нисбатан эркинликлари ва янги ёзувчиларнинг даъватлари ўқувчини ҳам ўзgartирди. Одил Ёкубов – Ўткир Ҳошимовларнинг ўқувчиси майдонга чиқди. Шу даврларда икки турли ўқувчи – китоб ва ёзувчини эрмак учун ўқийдиган ўқувчи ва китоб ҳамда ёзувчини маърифат учун ўқийдиган ўқувчи аён шаклланди. Эрмак учун ўқийдиган ўқувчига китоб қизиқ бўлса керак. Воқеалар қуюн-дек ривожланиб уни ўз омонсиз ўрамларига олиб кириб кетса бас. Китоб кўнглининг жуда ўткир ҳиссиётларига ташна истакларни

қондирса бас. У ўқиб роҳат қилади, ёзувчидан ўзини кучли долгалир ичига ташлаганидан миннатдор бўлиб юради. Лекин маърифатли ўқувчи ундаи эмас. У китобдан ҳаётнинг ўзи билмаган, ўзини бойитадиган, яшашдан сабоқ берадиган қирраларини қидиради. У ҳар бир ўқиган китобидан сўнг маънавий-инсоний жиҳатдан олдингига қараганда бир поғона баланд кўтарилишни истайди. Ёзувчи даражасида фикрлашга интилади. Ёзувчига хатлар ёзади, уни саволларга кўмиб ташлайди, баҳслашади, ёзувчига янги ҳақиқат қирраларини очади. Маърифатли ўқувчи асар ичига чуқур кириб боради, унинг санъатларига синчиклаб эътибор беради. Бундай маърифатли китобхон ва ёзувчи бир-бирларининг инсон ва ҳаёт тўғрисидаги билимларни бойитадилар, яшашнинг бошқача қурилиши ва бошқача уфқларини излаб топишга уринадилар. Бу юксак ҳурмат-эътиборга сазовор китобхон. Ўткир Ҳошимов шундай китобхонларни назарда тутиб қўйидагиларни ёзади: “Ўзим қаттиқ ишонган, ягона ҳақиқат деб билган нарсани ёзишга ҳаракат қилдим. Ўқувчи анойи эмас. Жиндай ёлғонни дарҳол сезади. Китобхон назаридан қолиш эса қаламқаш учун оғир фожиа...” (“Саккизинчи мўъжиза”, 21-бет). Бу ўз ўқувчисини яхши билган, ўрганган, у билан кўп йиллар ранг-баранг мулоқотлар қилган адабнинг сўзи. Улардан ёзувчиликнинг масъулияти аввал бошдан китобхонга бўлган юксак ҳурматдан туғилади деб хулоса чиқариш мумкин. Барча йирик адаблар ҳам шундай ёки шунга яқин фикрларни айтишлари мумкин. Айтилган ҳам. Лекин ҳар бир адаб ҳам китобхон назаридан қолишни фожиа деб билмайди. Бу Ўткир Ҳошимовнинг фикри. У жуда катта ҳаёт тажрибаларида, сонсиз-саноқсиз учрашувларда туғилган. Ўткир Ҳошимов ҳамиша тулпорни мана шу ўлчов-андозаларга қараб парвозга олиб чиқкан, тулпорини қичаганда ўқувчининг анойи эмаслигига қаттиқ ишонган ҳолда асарларини пешлаган.

Китобхон “узоқ йиллар эслаб юрадиган асарлар ёзиш” Ўткир Ҳошимовнинг ижоддан кузатган мақсади ва орзуси. У кўп йиллар ана шу орзусига эришгандай. Олтмишинчи-етмишинчи йилларда ёзилган қиссалари, романлари, ҳикоялари гарчи ўқувчи тубдан ўзгарган бўлса ҳам ҳамон ўқилади. Бу асарлар ўз самимияти билан янги замон ўқувчиларини ҳам ўз қўри, ўз алангаси атрофига чорлади. “Узоқ замонлар эслаб юриладиган асар...” қандай яхши сўз бу ва қандай олижаноб орзу бу. Мана энди фикримизнинг бошидаги

саволга яна қайтиш чоғи келди: китобхон бирон бир нарсани ҳал қиласадими? Ҳа. Ҳал қиласади. Ҳал қилгани шуки, эслаб юриш унинг ихтиёрида. Ҳеч ким бунга ўқувчининг ихтиёридан ташқари мұяссар бўлмайди. Ҳар қандай зўравонлик бу ерда кучсиз. Ҳар қандай бежама бу ерда увол. Ўткир Ҳошимов яна “асарнинг эгаси – ўқувчи” деганида нақадар ҳақ. Ўткирнинг асаллари олтмишинчи йилларда ҳам биз тенгдошларини ўзига ром қилган. Ўша замонлар биз бу асалларнинг самимийлиги ва соддалиги, ўзбеконалигига меҳр қўйганмиз. Замон-замонлар оша XXI асрнинг ўнинчи йилларига етиб келиб уларни яна қўлга олганда, “Дунёning ишлари” ҳам, “Икки карра икки – беш” ҳам, эҳтирос билан ёзилган романлар ҳам бизга энди жуда табиий асаллар бўлиб қўринмоқда ва табиийлиги билан яна меҳримизни, миннатдорчилигимизни янгиламоқда. Табиийлик деганда инсонга, ҳаётга, заминга, шу заминнинг об-ҳаволарига ўта янгиликни назарда тутамиз, албатта. Баъзи китоблар ҳалқ, миллат руҳини кўтаришга қодир. Уни янги ўзанларга буриш ва олиб киришга қодир. Сиз шу гап замирида бирдан қайси асалларни эсладингиз, кўз олдингизга келтирдингиз? Сиз ўз мисолларингизни гавдалантириб туриңг. Мен ҳам ҳозирги мавзумиз доирасида айтай. Ўткир Ҳошимовнинг “Дунёning ишлари”, “Икки карра икки – беш”, “Икки эшик ораси”, “Тушда кечган умрлар” каби асаллари бизни яшашга чорлади, руҳимизни кўтарди, ўзимизга бўлган ишончни орттириди.

Бу китоб учун шараф! Л.Н.Толстойнинг асаллари рус ҳалқининг энг сара қисмини маърифатли ҳалққа айлантириди. Ҳар бир ҳалқнинг тарихида шундай китоблар бор! Бу китоб учун шараф! Руҳни кўтарадиган, яшашга куч бағишлайдиган, мангу масканларда ҳам Навоийни ўқиши орзусини уйғотадиган китоб шараф! Китоб – шараф!

Тўлғоқ тутганда

Ёзувчи зотини тўлғоқ тутган пайларни кўрганман. Бундай тўлғоқнинг ширин азоби пайтида унинг кўзига ҳеч нарса қўринмас, еган-ичгани татимас экан.

Имконият туғилиб Покистонга сафарга борадиган бўлдик. Эркин Воҳидов, Ўткир Ҳошимов, Дадаҳон Нурий, Аҳмаджон Мелибоев ва камина. Бу сафарга Ўткирнинг ҳеч боргиси йўқ эди. Биз уни кўндиришга уринар, у эса нуқул “қолиб кетади”, “қолиб

кетади” дер ва қўлидаги пирилдоғини ўта асабий нохуш пириллатарди. Шу кезлар у бир асар устида ишлаётган, кейинги воқеалар, зиддиятларнинг ечимлари миясида пишиб етилган, энди уларни шитоб билан қизифида қоғозга тушириш пайида эди. У дўстларининг юзидан ўтолмай не азоб билан бўлса-да биз билан ҳамроҳ бўлди. Лекин уч кун сира-сира очилмади. Бошини булут босгандай тумтайиб юрди. Назаримда, касал бўлиб қолаётганга ўхшарди. Охирги куни “Ахир нега бунақасиз, Ўткир!” десам, ниҳоят ёрилди. “Ўша сизга айтганман, янги роман охиригача миямда пишди, тез тугатмасам, совийди. Қолиб кетади!” – деди яна аянчли ёзғириб.

“Темпни йўқотиб қўйиш ёмонда, а?” – дедим. У худди шуни кутиб тургандай, “жуда ёмон, жуда ёмон!” – деди аввалгидан баттар хуноб бўлиб. Хуллас, уч кун сафар унга ҳеч нарса татимади. Игнанинг учида келгандай бўлди. Ҳатто жануб денгизи, сарин шамоллар, қизиқарли учрашувлар унинг баҳри дилини очолмади. Мен уни дўстларим қатори бу сафарга қўндирганимга ўқиндим. Ижодкорга бу янги асарга ҳомиладор бўлганда, тўлғоқ тутганда сира тегиб бўлмаслигини англадим.

Аммо бир ойлардан сўнг у юзи ёришган, кўзи порлаган ҳолда келди. “Тугатдим! – деди. Ном топиш керак”. У бир қанча номларни айтди. Улар ичida жуда эътиборли, салмоқдорлари ҳам бор эди. Бироз ўтириб уларни “разбор” қилдик. Барибир уларнинг биронтасига тўхташ қийин бўлди. Андак вақт ўтгач, дўстларимиздан бири “бу воқеалар худди тушдай кечсин” деб айтибди. Ўткирнинг мияси ярқа очилиб, “Тушда кечган умрлар” деган ном юзага чиқди. Адабиётимизда янгилик бўлган романлардан бири шундай тўлғоқларда туғилди, албатта. Покистон сафари ҳам бехуда кетгани йўқ. Афғонга ўхаш шароитнинг руҳи ўз ўрнида акс садосини топди. Ўткир Ҳошимов асарларининг номлари ҳаётга янги бир ҳикматли коллизиялар олиб кирди. Баҳор қайтмайди... Қалбинингга қулоқ сол... Нур борки, соя бор... Икки карра икки – беш... Икки эшик ораси... Тушда кечган умрлар... ҳаётий фалсафий теран мазмунга эга. Улар шу асарларнинг олтин калити.

*Сайдулла МИРЗАЕВ,
Ўзбекистон Республикаси фан арбоби, профессор*

СЎЗ САНЪАТКОРИ

“Менимча, – деб ёзади Ўткир Ҳошимов, – одамларни ҳаяжонга соладиган, ҳар гал такрор ўқигандага кўнглига завқ бера оладиган асар яратиш учун энг аввало Худо берган истеъдод керак”. Истеъдод ва унинг аҳамияти ҳақидаги бу сўзларни адабнинг ўз ҳаёти ва ижодий фаолияти ҳам тўлиқ тасдиқлайди. Чунки Ўткир Ҳошимов Худо берган истеъдод соҳибидир. Аммо бадиий ижодий юксак натижаларга эришиш учун чуқур билим ва катта меҳнат ҳам керак. Ўткир Ҳошимовда эса ана шу икки зарурий омил ҳам бор. Адабнинг орзуси нима эди? Ўткир Ҳошимов “Шундай асар ёзсангки, китобхон уни ўқиётганда ҳамма нарсани унутса, асар қаҳрамонлари ҳаёти билан яшаса. Китобни ўқиб бўлган куни кечаси билан ухламай тўлғониб чиқса... Вақти келиб ўша китобни яна қўлга олганда қайтадан ҳаяжонга тушса...” деб ният қилган эди. “Дунёнинг ишлари” (қисса), “Икки эшик ораси”, “Тушда кечган умрлар” (романлар), “Қатағон” (фожиа) каби ажойиб асарлар ёзувчининг ўз орзусига етгани, ўқувчилар қалби тўридан жой олганидан далолат беради. Бу асарларда муайян ижтимоий тузум сарҳадларига сифмайдиган катта, муҳим ғоялар, ҳаёт воқеа-ҳодисаларини холисона таҳлил ва талқин этишга асосланган умумбашарий хулосалар, янги-янги фикрлар, бетакрор характерлар устуворлик қиласи. Шу боис ўқувчи бу асарларни қўлга олганида ҳар сафар ўзини худди янги китоб ўқиётгандек ҳис этади. Чунки ҳар сафар улардан янги маъно ва янги завқ-шавқ олади.

Ўткир Ҳошимовнинг “Дунёнинг ишлари” қиссаси гўзал ва жозибали қилиб ёзилган. Бу қиссани заҳматкаш ва меҳрибон ўзбек оналари шаънига битилган гўзал ва сержило достон дейиш мумкин. Қисса воқеаси новеллалар тарзида берилган. Унда 30 та новелла бор. Ҳар бир новелла ўзи тугал, мустақил. Шунингдек, бир-бири билан узвий боғлиқ, бир-бирини тўлдиради. Қиссада камтар ва ҳокисор оналаримизнинг ёрқин ва беғубор образи қад кўтартган. Адаб она образини яратишда кундалик турмушдан олинган аниқ материаллардан усталик билан фойдаланган. Асарда тасвирланишича, Она нифоқликни ёмон қўради, иноқликни улуғлайди.

Она кечалари ҳамма ухласа ўғли уйга келгунча бедор туради, кўз юммайди (“Туш”). Она бегона болаларни ҳам жон-дилидан севади. Она меҳнатдан ор қилишни ёмон кўради. Она фаррош сифатида кўча супуриб, бундан завқланади, ҳалолликни, покликни улуғлайди, ўз элини жуда севади (“Икки афсона”). Она соғлиғига катта зиён келтириб бўлса-да, боласи ҳаётини сақлаб қолади. Боласини табибга олиб боришда оёғини совуққа олдиради (“Гилам пайпок”). Она нонни оёқ-ости қилишни энг оғир жиноят, энг катта гуноҳ деб билади. Она ҳатто бегона боланинг ҳам йиғисига бефарқ қараб туролмайди (“Бола йиғиси”).

Юқоридагидай мисолларни яна ва яна келтириш мумкин. Қисқаси, адид кўз илғамас даражада нозик воқеа ва деталларни синчковлик билан топиб, усталик билан тасвирлайди, улардан катта ҳаётий хулосалар чиқаради. Бинобарин, қиссада инсон ва ҳаёт ҳақидаги ибратли ва ҳикматли умумлашмалар, чуқур мазмунли фалсафий фикрлар кўп.

Ўткир Ҳошимовнинг романнавислик фаолияти ҳам ибратли. У “Нур борки, соя бор” (1979), “Икки эшик ораси” (1986), “Тушда кечган умрлар” (1994) асарларини яратиб, романчилигимиз ривожига қимматли ҳисса қўшди.

“Икки эшик ораси” романида воқеа Тошкент атрофидаги қишлоқлардан бирида, асосан иккинчи жаҳон уруши йилларида бўлиб ўтади. Шу билан бирга, адид асарда ўрни-ўрнида қишлоқ қишиларининг урушдан олдинги ва урушдан кейинги ҳаётидан ҳам ҳаяжонли лавҳалар чизади. Адид асар сюжети ва композициясини ишлашда мумтоз адабиётда (масалан, Навоийнинг “Сабъаи сайёр” достонида) мавжуд бўлган қолиплаш санъатидан ижодий фойдаланиб, янгилик яратган. Роман воқеаси Робия, Қора амма, Кимсан Ҳусанов, Музаффар Шомуродов, Мунаввар Алиева, Раъно, Умар закончи, Олимжон Комилов сингари турли характер ва турли тоифадаги тўққизта образ тилидан ҳикоялар тизмаси шаклида берилган. Бу ҳикоялар мазмунан бир-бири билан маҳкам боғланган бўлиб, бир-бирини тўлдиради. Шу тариқа улар романнинг бир бутун тугал, оригинал ва жозибадор сюжетини хосил қиласи. “Икки эшик ораси” романидаги асосий образларгина эмас, балки, Рашиб Абзи, Башор опа, Ойсара, Самадов сингари эпизидок образлар ҳам китобхон ёдида узоқ вақт сақланиб қолади. Асарда сунъийлик йўқ. Аксинча, ишонтириш санъати кучли. Адид қалтис, мураккаб маса-

лаларни ҳам, фавқулодда топқирлик билан ишонарли қилиб тасвирлайди. Қора амманинг ўз ўғли Кимсаннинг севгилиси Робиянин иложсизликдан Шомуродга тўй қилиб узатиши Ориф оқсоқолнинг ёшлиқ қилиб йўлдан озган келинига мардлик билан адолат қилиши, қисаматлари чалкашиб кетган Музаффар ва Мунаввар севгиси тасвиrlанган сахифаларда бу ҳол, айниқса, очиқ кўринади.

Ўткир Ҳошимовнинг “Тушда кечган умрлар” романида 80-чи йилларнинг иккинчи ярмидаги ҳаёт усталик билан акс эттирилган. Романда “ўзбек иши”, “пахта иши” воқеалари маҳорат билан тасвиrlанган. Десантчилар зулмидан азоб чеккан соф виждонли, ҳалол ўзбек дехқонлари образи яратилган. Асардаги беайб “айбдор” Шомансур Шоматов уста пахтакор, бутун умри давомида ҳалол яшаб, ҳалол ишлаган, камтарин инсон. Десантчилар томонидан асоссиз ҳолда хибсга олиниб, хор-зор этилган раис бобо яхши оила бошлиғи, меҳрибон ота сифатида ҳам ўқувчида унтилmas таассурот қолдиради.

Ўткир Ҳошимовнинг драматургия соҳасидаги изланишлари ҳам самаралидир. “Хазон бўлган баҳор” (драма), “Инсон садоқати” (рухий драма), “Тўйлар муборак” (комедия), “Виждон дориси” (сатирик комедия), “Қатағон” (фожеа) каби хилма-хил саҳна асарлари Ўткир Ҳошимов қаламига мансуб. Бу асарлар мавзу, ғоявий мазмун жиҳатидангина эмас, балки жанр ранг-баранглиги жиҳатидан ҳам диққатга лойиқ. Унинг “Қатағон” асари 90-чи йиллар драматургиясида муҳим воқеа бўлди. “Қатағон” фожиасида бир ўзбек оиласи ҳаёти мисолида 80-йилларнинг иккинчи ярмида “пахта иши”, “ўзбек иши” баҳонасида Ўзбекистонда бўлиб ўтган даҳшатли қатағоннинг асл маъноси-моҳияти рўй-рост очиб ташлаган.

Адолат ўрнатиш ниқоби остида элимизга келган ёвуз десантчи-терговчиларнинг жирканч ишлари, шафқатсизликлари, ҳукуқбузарликлари, заҳматкаш ҳалқимиз номини ёмон отлиқقا чиқаришга уринишлари кескин фош этилган. Атоқли адабнинг яна кўп йиллар давомида кўп ўқувчилар қалбини ларзага солишга қодир тағин бир китоби – шубҳасиз “Дафтар ҳошиясидаги битиклар” дир. Жаҳон сўз санъатида, жумладан, ҳозирги замон ўзбек адабиётида шундай сермазмун, сержило, гўзал асарлар борки, уларни қайта-қайта ўқигингиз келади. Ҳар гал ўқиганда олам-жаҳон завқ оласиз, янги-янги маъно топасиз. Ўзбекистон ҳалқ ёзувчиси Ўткир Ҳошимовнинг “Дафтар ҳошиясидаги битиклар” асари ана шундай ажойиб санъат

намуналаридан биридир. Асар ҳақида муаллифнинг ўзи “Бу китобни ёза бошлаганимга эллик йил бўляяпти. Булар – менинг кузатувларим. йўларим. Бир қадар армонли, бир қадар истеҳзоли, бир қадар табассумли... Хulosаларим... Аслида уларнинг уларнинг ҳар бирини алоҳида асар қилса ҳам бўлардику, майли... Илтимос, Сиз ҳам китобни шошилмасдан, ўйлаб ўқисангиз...” деб таъкидлаган.

Қисқа вақт ичида бир неча марта қайта-қайта нашр этилган бу китобнинг мундарижаси қуйидагича: “Табиат. Жамият. Инсон”, “Фарзандларимга ўгитлар”, “Урушлар ҳақида”, “Болалик – пошшолик”, “Саккизинчи мўъжиза”, “Табассумга мойил гаплар”. “Битиклар” ғоявий мазмун жиҳатидангина эмас, бадиий маҳорат жиҳатидан ҳам юқори баҳога муносиб. Унда ҳаёт ҳақиқати, ҳалқимизга хос миллий хусусиятлар, урф-одат ва эзгу анъаналар ғоят қисқа, лўнда ва таъсири қилиб кўрсатилган. “Битиклар”дан бирида ҳалқ орасида кенг ёйилиб, қайта-қайта тасдиқланган “дунёда болам деб яшайди ўзбек” деган ҳикматнинг асл маъноси ихчам, ниҳоятда таъсири очиб берилган: “У оддий одам эди. Ҳаммолчилик қиласарди. Тўрт қиз, уч ўғилни оёққа турғазди. Ўғилларини уйлантирди. Қизларини чиқарди. Ҳаммасини уйли-жойли қилди. Кўз юмаётганида “ҳаммаларингдан мингдан-минг розиман”, – деди... Қарашса, кафанлиги йўқ экан...” “Битиклар”да жамият ва инсон ҳаётининг ўзига хос хусусиятлари ҳақида доно сўзлар ва ҳикматли хulosалар кўп. Масалан, “Антика китоб” номли битикда жамият ҳаёти теран, ҳаққоний ва ихчам акс этган. Инсоният тарихини ва ҳалқ қадриятларини бузуб, сохталашиб талқин этиш гуноҳи азим эканлиги таъкидлаган:

“Ўқиб кўрдилар.
Ёқмади.
Қайта ёздилар.
Асл ҳолига қайтди.
Ўчириб ташладилар.
Тагин аслига қайтди.
Оловга отдиilar.
Ёнмади...
Бу китоб – Тарих эди!”

Бозор иқтисоди деган тушунчани сустеъмол қилиб, “энди нима қилсан ўз хоҳишим, истасам олиб-сотарлик қиласман, истасам қинғир-қийшиқ йўллар билан бўлса-да, мўмай бойлик йигиб, даври

даврон сурман” деб, давлат ва халқ мулкига хиёнат қилаётган айрим нокас шахслар қаттиқ қораланган. “Давлат бозор иқтисоди шунақа бўлсин, дегани йўқ! Инсоф, андиша, илм, маърифат, маънавият пулга сотилсин, дегани йўқ!” деб хитоб қиласди адиб. “Битиклар”нинг “Фарзандларимга ўгитлар”, “Урушлар ҳақида”, “Болалик – пошшолик” қисмларида ҳам чуқур мазмунли умумлашмалар, ҳикматли фикр-мулоҳазалар кўп. Уларда болалар дунёсигининг рангба-ранг сийратлари, бола феъл-авторининг теран илдизлари тўғрисидаги доно фикрлар ва асосли хулосалар устуворлик қиласди. “Ўз ота-онасига меҳр бермаганларнинг ўз боласидан меҳр кўрганини эшитганим йўқ. “Қайтар дунё” деганлари шу”, “Дунёда ҳеч қандай чегарани тан олмайдиган иккита мўъжиза бор. Бири – Куёш нури, иккинчиси Она меҳри”, “Менга юз марта озор берсанг, кечиришим мумкин. Онангга бир марта озор берсанг, кечирмайман: Онанг сенга мендан кўра юз марта кўп меҳр берган!” каби жумлаларда ифодаланган фикрлар шундан далолат беради.

Ўткир Ҳошимов “Битиклар”нинг “Саккизинчи мўъжиза” қисми ҳам янги фикр ва янги хулосаларга бой. У муаллифнинг бадиий адабиёт ва унинг ўзига хос хусусиятларига доир шахсий кузатувларининг маҳсули бўлиб, унда бадиий адабиёт – жаҳондаги саккизинчи мўъжиза сифатида таърифланган. Адабиётнинг куч-кудрати, тарбиявий-эстетик аҳамияти, ҳақиқий гўзал асар қандай бўлиши лозимлиги ҳақида доно сўзлар битилган. Истеъдод ва истеъдоддизлик ўртасидаги асосий фарқ кўрсатилиб, “ижод бетакрор ва эхтимол, шунинг учун ҳам маълум маънода илоҳиётга яқин ҳунар”, “Иккита энг холис ва бешафқат ҳакам – Китобхон ва Вақт синовидан ўтган асар ҳақиқий асардир”, “Талантсиз ёзувчи товуқقا ўхшайди. Ёнфоқдек тухум туғади-да, қақиллаб оламни бузади！”, деб ёзилган. Шунингдек, ёзувчининг халқ ва жамият олдидаги бурчи ва масъулияти очик кўрсатилган. “Чинакам ижодкор бўлиш учун одамда истеъдод, билим, меҳнат, ҳаёт тажрибаси, изланиш ва албатта... Виждон бўлиши керак”, деб айтилган. “Битиклар”да бадиий маҳорат, жумладан, асар тили ҳақида қимматли фикрлар билдирилган. “Ёзувчининг ўқувчига айтиладиган дарди қанча кучли бўлса, асар тили шунча бийрон бўлади”, – деган хулоса баён этилган. “Битиклар”да бундай асосли хулосалар мўл.

“Битиклар”нинг сўнгги қисми “Табассумга мойил гаплар” деб аталади. Бу қисм юқоридагилардан фарқли равишда тўла-тўқис

бадиий тафаккур самаралари сифатида акс садо беради. Бу қисм ўқувчиларда хушчақчақ ҳис-туйғу уйғотадиган, кези келганды қашқа үриб кулишга мажбур әтадиган турли битиклардан ташкил топган. Бадиий түқима образлар қаторида Сайд Аҳмад, Озод Шарафиддинов, Эркин Воҳидов, Ҳабиб Саъдулла, Носир Фозилов, Баҳодир Гуломов сингари таниқли инсонлар билан боғлиқ ҳангомалар ҳам завқ билан ўқилади. Бу ҳол китобдаги “Памилдори” операцияси”, “Зиёфат” операцияси”, “Бемор пиёз”, “Гуруч операцияси”, “Ақлинг етмаган нарсага аралашма” кабиларда яққол намоён бўлган. Уларда беғараз ҳажвий мазмун, кулгили воқеалар қизиқарли акс әттирилган. Адиб “Битик”ларда тил имкониятларидан усталик билан фойдаланган. Бошқалар бир сахифада баён әтадиган фикрни Ўткир Ҳошимов аксарият холларда бир ё икки жумлода ифода қилиб қўя қолади. Умуман Ўткир Ҳошимов асар тилига катта эътибор беради. Халқ жонли тили бойликларини, ҳикматли сўз ва ибораларни ўз ўрнида ишлатади. Воқеалар моҳиятини ва образлар характерини очишга бевосита хизмат вилувчи мақол ва ибораларни синчковлик билан топиб, жой-жойида қўллайди. Шу билан бирга ўзи ҳам ҳикматли сўз, мақол ва афоризм даражасига кўтарилилган сермазмун, ихчам ва чиройли жумлалар яратади. “Битиклар” китобидаги “Ҳамма нарсани биламан, дейдиган одам ҳеч нимани билмайди”, “Донолик билан нодонлик шу қадар яқинки, одам доноликни қанча кўп даъво қилса, шунча нодон бўлади”, “Яхшигаям, ёмонгаям бирдек яхши кўринишга уринадиган одам энг хавфли одамдир”, “Адолат ҳақиқатни айтиш ва тинглашдан бошланади”. “Қорани оқлаш эмас, Оқни қораламаслик адолатдир”, “Дўстни хўрлаш – гуноҳ. Умр йўлдошини хўрлаш – юз ҳисса гуноҳ, ота-онани хўрлаш минг ҳисса гуноҳ. Гўдакни хўрлаш чексиз гуноҳ”, “Иш кўплигию, вақт йўқлигидан нолиманг. Вақт кўплигию, иш йўқлигидан қўрқинг. Одамни абгор қиласиган нарса – бекорчилик”, “Қанча кўп тилни билсангиз, шунча яхши. Бироқ одам она тилида тафаккур қиласиди, она тилида туш кўради, она тилида йиғлайди. Ўлимни олдида онасини она тилида йўқлайди”, “Адолат Кучга бўйсунган юрт – вайрон юрт, Куч Адолатга бўйсунган юрт – бўйстон юрт” сингари лўнда фикрлар бунга мисол бўлади. Қисқаси, Ўткир Ҳошимов китобидаги ўчмас Битиклар инсон маънавиятни бойитишга, ақл идрокини янада ўстиришга хизмат қиласиди.

ХАЛҚ МЕҲРИНИ ҚОЗОНГАН АДИБ

Ўткир Ҳошимов ижодини тўлиб-тўлғониб, шиддат ва қаромат билан оқаётган дарёга ўхшатгим келади. Бу тўлқинлигу тўлғониш, шиддату салобатда ёзувчи қалби билан халқ дарди кесишган нукталарда ҳосил бўлувчи илоҳий, инсоний ва бадиий қонуниятлар ётади. Бу дарёни вужудга келтирган ўз осмонлари, қор-ёмғирлари, ўз тоғлари, булоқлари, жилғалари, армонли ва қувончли ўз кўз ёшлари бор.

Бу дарё – ундан пайдо бўлувчи янги-янги сойлар, шўх-шаън ва дилбар ариқлар кўзни қувонтиради. Кўнгилни яйратади, ҳаёт ва одамлар ҳақида кечагига қараганда чуқурроқ мушоҳада юритишга ундаиди; кучга-куч қўшади, дала-тузларга, боғу боғчаларга оби раҳмат олиб киради.

Дарё ўз бағрини табиатдан олиб, яна табиатга қайтарганидек, Ўткир Ҳошимов ҳам ўз асарларининг юрак уришини ҳаётдан, жамиятдан, одамлардан олади, хужайраларга бадиий жон бағишилаб, яна ҳаётга, жамиятга, одамларга қайтаради.

Йўл осон эмас, тошдан-тошга урилишлар бор, лекин дарё ўзига маҳтал манзилларга етиб бормаса бўлмайди, унинг қисмати шундай. Адиг асарларининг бош мақсади ҳам китобхонлар маънавий чанқоқлигини қондиришга қаратилади. Йўлда тўлин дарё тўлқинлари гоҳ асов отдек кўкка сапчиб кетади, қўпиради, тошади, гоҳ меҳрибон қўл остида роҳатланган аёл зулфидек майин тортади, мавжларида меҳр нури эркаланади.

Ўткир Ҳошимов асарларини дарёга бежиз ўхшатаётганим йўқ. Ўқисангиз, уларнинг дилидаги дарёваш сифатларни аниқ кўрасиз, англайсиз ва ҳис этасиз. Адигнинг “Нур борки, соя бор”, “Икки эшик ораси”, “Тушда кечган умрлар” сингари романларидаги айрим руҳий талотумлар тасвири, базан бутун бир халқ қиёфасини намоён эта оловчи ижтимоий дард ва муаммоларнинг бадиий талқини; “Баҳор қайтмайди”, “Қалбингга қулоқ сол”, “Дунёнинг ишлари” сингари қиссалардаги қалб манзаралари ва табиат жилоларидан тарагиб турувчи ажиб мусиқийлик, тилсиз армонлар ифодасидаги қўрошин сокинлик; “Дафтар ҳошиясидаги битиклар” деб

аталувчи туркумга жо бўлган бадиий фалсафа ёғдулари; қатор публицистик мақолаларда бўй кўрсатувчи – бориб турган исёнкор рух ҳамда “Қатағон” каби драматик асардаги кўкрак қафасига сифмай, портлай деб турган фифон ва бошқалар – барчаси, бирлашиб, булар Ўткир Ҳошимов асарлари, жонли дарёнинг ўзгинаси эмасми, деяётгандек бўлаверади.

Ёзувчи маҳоратини белгилайдиган омиллар кўп. Ҳар бир ёзувчидаги ёки бу омил салмоқлироқ юзага чиқар. Ўткир Ҳошимов маҳоратини белгилаган асосий омил, эҳтимол, журъат ва жасоратdir. Машҳур ёзувчимиз Саид Аҳмад унинг ижодидаги бу хусусиятни кўп йиллар аввал алоҳида таъкидлагани бежиз эмас.

Ўткир Ҳошимовнинг XX аср 70–80-йилларида ёзилган “Ўзбеклар”, “Урушнинг сўнгги қурбони”, “Қалбингга қулоқ сол” каби ҳикоя, қиссаларини оламизми, ёхуд, кейинроқ ёзилиб, шу ва ундан бирмунча аввалги йиллар ҳаёти тасвирланган “Нур борки, соя бор”, “Икки эшик ораси” ва “Тушда кечган умрлар” каби романлари ҳамда “Инсон садоқати”, “Қатағон” каби драмаларига назар ташлаймизми, бошқа турли муҳим ижтимоий муаммолар қаторида, маънавиятнинг гўзал ёғдулари ҳамда унинг аста-секин ғорат этилаётган айрим қирраларини тасвирлашга алоҳида эътибор берилганини кўрамиз. Маънавиятнинг ғорат этилиши эса моҳият эътибори билан, миллатнинг таназзулга юз тута бошлиши демакдир. Адиб шўро тузумидаги зўравонликлар боис мустабид ва қатағон сиёsat туфайли шундай бўлмоқда, деб айюҳаннос солгани йўқ, бу муаммоларни у бадиий йўсинда, зимдан, ичдан кўрсатиб берди, тасвирлади, замондошларимизнинг хатти-ҳаракатлари орқали юзага олиб чиқди. Бу адибнинг ўзига хос, кўп-да сиёsat ва мағкурага алоқаси йўқдек, лекин аслида уларнинг кўзга кўринмас таз-йигидан зириллаб турувчи жасорати эди. Бу шўролар қулаши арафаларида шуҳрат топган Шукшин, Распутин, Анорларга хос мақсадни қалб қудуқларига тушириб яширин ифодалай билиш эди.

Эҳтимол, бу жараён ёзувчи идрокида биз ҳозирги босқичга келиб энди англаётганимиз даражада аниқ мақсадли кечмаган бўлиши мумкиндир, лекин бундан қатъи назар, эрк ва рух озодлиги, юрт ва ватан шарафи ёзувчи асарларида гоҳ онг оқими йўсимида, гоҳ очиқ ва ошкор тарзда намоён бўлгани шубҳасиз. Буни унинг асарлари аниқ кўрсатиб турибди.

Дадиллик билан, журъат билан халқ дардини ёритиш истеъдоди Ў.Хошимовда дафъатан ёхуд машҳур қисса, романларигагина келиб пайдо бўлгани йўқ, албатта. Бу фазилат унинг ижодида 60-йиллардаёқ кўзга ташланади. 1968 йилда бўлса керак, “Тошкент оқшоми” газетасида унинг “Ном ҳам ҳусн белгиси” номли бир мақоласи чиқди. Унда пойтахт қўчаларию турли манзиллардаги номларнинг аксари кундан-кунга миллий тилимиздан ўзга бир тилда бўлиб кетаётгани ҳақида қайғуриб ёзилган эди. Бу – ўзбек тилига давлат тили мақоми берилишидан деярли йигирма йил аввал айтилган фикр, амалий қадам, ўқтам жасорат эди. Бу фикрларни ўқиган ҳозирги ёш китобхон: шунга ҳам шунчами, арзимаган кичкинагина бир нарса учун-а, деб ажабланиши мумкин. Лекин ёш адибнинг бу ҳаракати арзимаган, кичкина иш эмас, ўз даври учун жиддий деб баҳолашга арзигулик иш эди. Бу ҳаракат мафкура корчалонлари эътиборидан четда қолмади, албатта. Бунинг учун ёш адибга хайфсан эълон қилинди. Ҳайтовур адиб дардини тушувчиликлар бўлган шекилли, жазони бундан кучайтиришмади.

Ўткир Ҳошимов келажаги ойдин ёзувчи эканини дастлаб айтиган – устоз адиб Абдулла Қаҳҳор экани бугун барчага маълум. Ёш Ўткир Ҳошимовнинг журъатли адиб бўлажагини илк бор айтиганлар эса, биз буржуа ғанимлар деб атаган хорижлик мутахассислар эди.

“Шарқ юлдози” журналининг 1971 йил охириги сонларидан бирида “Қалбингга қулоқ сол” қиссаси босилиб чиқади. Асарнинг қайси бир лавҳасида Чарос ва Ёдгор исмли талабалар ўзаро сухбатда ўрта асрларда Марказий Осиёдаги маданият Ғарбдагига нисбатан юқори даражада бўлган; Америка қитъаси мавжуд эканини Беруний Колумбдан анча бурун эътироф этган; ўзимизнинг мумтоз Шарқ мусаввирларимиз ғарб рассомларидан кўра ҳаётийроқ асарлар чизишган қабилидаги мавзуларда фикр юритадилар.

Ўйлаб қаралса, бу фикрларнинг ҳеч бирида ажабланарли жой йўқ. Чунки барчаси тўғри. Асар қаҳрамонлари бу фикрларни ўзга халқ ёки мамлакатларни камситиш, ерга уриш мақсадида ҳам айтиётгани йўқ. Ўзаро сухбатда, ёшларга хос шижаот билан ўз миллий ғуурларини ифодалаяпти, холос. Бироқ, ҳамма гап шундаки, бундай фикрларни қирқ йил аввал очиқ ва бемалол, ғуур билан айтиш салкам миллатчилик деб баҳолангувчи эди.

Кисса эълон қилингач, Америкадаги Колумбия университети мутахассисларидан бири – Роберт Ж.Баррет деган кишининг эътиборига тушади. Мақолаларидан бирида бу асарни таҳлил доирасига тортади. (Қаранг: Роберт Ж.Баррет. Нуқтаи назардаги умумийлик ва Ўрта Осиё миллий адабиёти / Шўролар Ўрта Осиёсида миллий масала. Нью-Йорк–Вашингтон–Лондон: “Прэгер”, 1973, инглиз тилида). Роберт Ж.Баррет мулоҳаза юрита туриб, Ўткир Ҳошимовнинг бу асари ва қаҳрамонлари янада синчилаб ўрганилишга муносиб, деган фикрни айтади. Гап Чарос ва Ёдгор каби қаҳрамонларнинг миллатпарварлигида, ўз тарихига муҳаббатида эди. Янада аниқроқ айтганда, американлик мутахассис фикрича, асар қаҳрамонларидағи, демакки, уларнинг қарашларини ифода этаётган адибдаги бу мулоҳазаларга Ўрта Осиёдаги етакчи миллатлардан биридаги миллий уйғониш муждалари сифатида қарамоқ лозим. Баррет мулоҳазаларини ҳам муайян даражада ўз давридаги мафкуравий мақсадлардан батамом ҳоли деб бўлмаса-да, уларда аслида, холис ҳақиқатни кўрмаслик мумкин эмас. Лекин салкам қирқ йил аввал танқидчилигимиз бу фикрларга қандай муносабат билдири? Фарбдаги буржуа шўрошунослиги ўзбек адиби асари ҳақида ижобий фикр айтдими, тамом, бир гап бор, буни беътибор қолдирмаслик даркор. Катта адибми, кичик адибми, бундан қатъий назар, хушёр бўлиши лозим, деб хулоса чиқарган ва матбуотда ўз фикрини мақолаларидан бирида баён қилган эди. Шу тариқа Ўткир Ҳошимов журъатли, мустақил фикрли қаҳрамонлар яратишни “Қалбингга қулоқ сол” сингари ўтган асрнинг 60-йиллари охирида яратилган дастлабки қиссалардаёқ бошлаган эди. Ана шу: қалбга қулоқ солиш – халқ қалбига, замондошлар қалбига қулоқ тутиш, уларнинг дардини кўтариб чиқиш, мана, деярли ярим асрдан буён ёзувчи сифатидаги, ўз халқининг фарзанди сифатидаги Ўткир Ҳошимов ижоди ва фаолиятининг лейтмотиви бўлиб келмоқда.

Ўткир Ҳошимов асарлари, айниқса, романларига хос муҳим бир фазилат бор. Унинг романларидағи халқ учун юрт учун бирдек муҳим ва долзарб ижтимоий маҳраждан ташқари, мустақил ҳаётга эндиғина қадам қўйиб келаётган ўн саккиз ёшлиқ талаба ҳам; ажабтовур ҳаётий тажриба орттирган, тақдир довонларининг пасту баландларини кўрган, дейлик эллик ёшлиқ амалдор ёки элнинг амалсиз, мартабасиз ўтаётган оддий бир вакили ҳам; ёхуд умр шомини бошдан кечираётган, эшигига тўртта машина хизматда тур-

ган отахону бир ойда қозони ақалли бир марта гўшт тушмайдиган муштипар онаизор ҳам ҳаёт ҳақидаги, одамлар ҳақидаги ўз орзу умидларини, армонларини, эсиз ўқинчлари-ю,adolatga мустаҳкам ишончларини топа олади. Бу хусусият ёзувчининг ўзини ҳам, асарларини ҳам халққа ниҳоятда яқин қиласи. Гап бу ерда, Ўткир Ҳошимов асарларининг фақат маъноси, мазмуни, ғояси ва, ҳатто кўтариб чиқилган муаммосидагина эмас. Энг асосийси, шуларнинг барчаси нечоғлик бадиий теран, гўзал, янги охорларда тасвирланишида; юқорида айтилган – барча ёшдаги китобхонлар бадиий дидини аниқ идрок эта билишда, аниқ худди ўқувчиларга маълум ва матлуб бадиий оҳанглар топилишида.

Ўткир Ҳошимов “Икки эшик ораси”, “Тушда кечган умрлар” номли романлари билан ўзбек романчилигининг бадиий имкониятларини кенгайтирди. XXI аср ўзбек танқидчилиги бу ҳар иккала романни улардаги бадиий яхлитлик жиҳатидан, айниқса, композицион бутунлик нуқтаи назаридан XX аср жаҳон адабиётининг нодир намуналари, масалан, Фолкнер асарлари билан қиёслаб ўрганмоқда. “Икки эшик ораси” ва “Тушда кечган умрлар” романини бадиият ва, хусусан, композицион қурилиш жиҳатидан ўрганиш (М.Шарафиддинова) ўзбек романчилигининг XX аср жаҳон адабиётидаги ўзига хос ўрнини ёритишда муҳим рол ўйнамоқда.

Ўткир Ҳошимов XX аср ўзбек адабиёти тарихи ҳамда XXI асрнинг ҳозиргача кечган ўн йилидаги ўзбек адиллари ичida асарлари халқ қалбига чуқур томир отган, энг кўп ўқувчиларга, ихлосмандларга эга бўлган ёзувчиларимиздан бири, эҳтимолки, биринчиси саналади. Мен шу жумлаларни ёзишга ёздиму ўйланиб қолдим. Қулоғим остида айrim биродарларимнинг: ҳай, ҳай, бироз ўзингизни босинг, Қодирийу Ойбек; Абдулла Қаҳҳор, О.Ёқубов, П.Қодиров; Эркин Воҳидов ва Абдулла Орипов-чи? Бу тарзда мушоҳада юритиб, бир адилни иккинчисига қарши қўйиш ярамайди, деган иштибоҳларини эшитгандек бўлдим. Бу – тўғри фикр. Ҳар бир ёзувчининг адабиётимиз тарихида, китобхонлар қалбида эгаллаган ўз мавқеи, шуҳрати, ўз ўрни бор, албатта. Бироқ мен юқоридаги мулоҳаза билан адилларимизнинг бирини иккинчисига зиддламоқчи эмасман, уларнинг бири юқори, иккинчисини қўйироқ демоқчи ҳам эмасман. Ўткир Ҳошимов асарлари халқ орасида нечоғлик кенг тарқалгани ҳақида баъзи фикрларни айтмоқчиман, холос. Мана, тахминан, қирқ йил доирасига тааллукли айrim маъ-

лумотлар: “Баҳор қайтмайди” қиссаси шу вақтгача ўн марта нашр этилибди. Қисса ёзилганидан сўнг беш-олти йил ўтгач, бу асар асосида яратилган телефильм Республика марказий телевидениеси орқали шу вақтгача қирқ марта такроран кўрсатилибди. “Нур борки, соя бор” романи ҳозиргача салкам ўн марта қайта-қайта нашрдан чиқибди. “Дунёнинг ишлари” ҳам, агар янгишмасам, ўндан ортиқ нашр юзини кўрди, Республика марказий телевидениеси орқали ўттиз йилда ўттиз марта қайта-қайта намойиш этилди. Тошкентга ташриф буюрган америкалик бир ўзбекшунос олима бу қиссани аслиятда ўқиб чиққач, чидай олмайдиган даражада она жонимни соғиндим, деб, бир неча кундан кейиноқ уйига қайтиб кетгани ҳақидаги ҳодиса жаҳон миқёсидаги бадиий адабиётга доир дарсликларни безай оладиган маълумот эмасми?..

Яна бир мисол. “Икки эшик ораси” романи яратилганига ҳали йигирма беш йил бўлгани йўқ. Бу асар ҳам ҳозиргача ўн марта қайта-қайта чоп этилди, ўзга тилларга ўгирилди. “Дафтар ҳошиясидағи битиклар” китоби ҳақида ҳам шу фикрни айтиш мумкин. Бу адибнинг халқ севган асарлари ўзбек тилида, бошқа тилларда ҳар икки-уч йилда янгидан нашр этилмоқда, деган гапдир. Асарлари асосида тайёрланган телефильмлар, телеспектакллар Республика телевидениесининг марказий дастурлари орқали ўнлаб йиллар давомида миллионлаб томошабинларга қайта-қайта мунтазам равишида кўрсатиб борилса, роман ва қиссалар, ҳикоялар бир эмас, икки эмас, ўн мартадан қайта нашр этилиб турса, уларнинг умумий тиражи икки ярим миллион нусхадан ошиб кетган бўлса, шу эмасми Ўткир Ҳошимов китобхонлари энг бисёр адиблардан бири эканига далил. Бу китобларга талаб каттаки, нашриётлар чоп этади (Яна бунинг устига, ҳозирги бозор иқтисодиётидек шароитларда денг). Бу асарларга телетомошабинларнинг чанқоқлиги тугамаяптики, телекранлар-дан тушмай келади (ижодий рақобат кучли ҳатто, янги-янги асарларга экранда вақт ажратиш осон бўлмаган ҳозирги муҳитда).

Маълумки, Чингиз Айтматовнинг деярли барча қисса ва романлари экранлаштирилган. Халқ ниҳоятда севган адиб ва асарларгина бундай баҳтга нойил бўлади. Шу маънода Ўткир Ҳошимов ҳам ана шундай ёзувчилар сирасига киради. Ёзувчининг ўн бешга яқин ҳикоя, қисса, романлари китоб саҳифаларидан ташқари зангори экран орқали ҳам муҳлислар қалбига етиб боргани, айrim

асарлари асосида бадиий фильм яратилгани нечоғлиқ кенг экани ҳақида тасаввур бера олади.

Ҳаётдаги бирор-бир ҳодиса қалбига дард бўлиб кўчмаса, кўнглига ўт бўлиб тушмаса, Ўткир Ҳошимов қўлига қалам олмайдиган ёзувчилар тоифасидан. Бунинг устига ўша дардини, шунчаки, ёритибгина қўя қолмайди, ўз юрагининг қўри билан алангага айлантиради. Токи, бу алана тафти унга муҳтоҷ дилларга куч-куват берсин, ҳаётдаги ножоизликни, нобопликни ёндирисин, куйдирисин. Қатор ўткир публицистик мақолаларининг газета-журнал сахифаларидағина қолиб кетмасдан, муайян ижтимоий кучга айланиши қалбларга ўткир резонанс беришининг сабаби шундан. Биргина “Қалбнинг оппок дафтари” (1981) номли публицистик мақолани эслайлик. Шўро даври сўнгги босқичдаги собиқ Иттифоқда, ёхуд, жумхуриятимизда маориф тизимиға доир, очиғини айтганда, ҳукумат қарорлари, фирмә кўрсатмалари оз бўлмаган. Бироқ, қарорларнинг аксарида саноқ, кўрсаткич, хўжакўрсинлик талаблари устивор бўлиб, ўзак масалалардан бири – ўқитувчи ҳақида қайғуриш, унинг мақомини кўтариш кўп ҳолларда эътибордан четда қолиб келди. Бу эса ўз навбатида ўқитувчи касбига беписандлик тамойилини келтириб чиқарди. Моҳият эътибори билан олиб қараганда, бу – умуман, жамиятнинг таназзулга юз тута бошлаганини англатувчи кўрсаткичлардан бири эди. Ана шундай шароитда Ўткир Ҳошимов “Қалбнинг оппок дафтари” номли публицистик мақоласини эълон қилди. Мақолада вужудга келган ўша 80-йиллар шароитида бу касб эгаларига чуқур қайғудошлиқ ҳиссининг ўзи етарли эмаслиги, бунинг учун аниқ янги тадбирлар амалга оширилиши лозимлиги айтилади, ўқитувчи меҳнати, яшashi учун тегишли шароитлар яратилмас экан, наинки маориф тизими, балки умуман жамиятимиз бир жойда депсиниб қоладигина эмас, орқага кетиши мумкинлиги ҳақида ниҳоятда жиддий фикрлар ўртага ташланади. Ёдимда, бу мақола ўз вақтида катта шов-шувга сабаб бўлди. Ўйлайманки, ушбу биргина публицистик асар ижтимоий салмоқ жиҳатидан, жамиятга таъсири жиҳатидан ўша вақтдаги бир неча расмий қарорлардан кўра кучлироқ эди. Бошқачароқ айтганда, ушбу мақола маориф тизими ҳақидаги расмий ҳужжатларда эътибордан четда қолиб келаётган муаллим қисмати ва тақдирига доир кўпдан-кўп иқтисодий, маънавий, ахлоқий, миллий, ҳуқуқий муаммоларни куюнчаклик билан кўтариб чиқсан эди. Ёзувчи мақоласида, бу

масалалар нуқтаи назаридан ҳукумат қарорларига тил текизилмаган, ҳужжатлар танқид қилинмаган, албатта. Бироқ, бу – моҳият эътибори билан, муаллимдек, тарбиячидек буюк касб эгаларига расмий доиралар, расмий сиёsat муносабатларининг ўзига хос тарзда усталик билан кескин ва аёвсиз фош этилиши эди. “Қалбнинг оппок дафтари” эътибордан четда қолмади ва четда қолиши мумкин ҳам эмасди. Аста-секинлик билан етилиб келаётган, уйфона бошлаган замонларнинг ҳур фикрлари ҳам ўзига яраша самара беради. Жумхурият маориф вазирлиги ҳайъати мақолани муҳокама қилишга мажбур бўлди ва ҳатто, маҳсус қарор қабул қилди. Юртимиздаги маориф тизимининг барча бўғинлари ва илмий ташкилотларида, педагог жамоаларида уни бажариш юзасидан тегишли тадбирлар ишлаб чиқиш топширилди. Яна қоғозбозликнинг ўзида, десангиз ноҳақ бўлмайсиз, албатта. Лекин ўқитувчилар дарди деган катта бир ижтимоий муаммога жамият эътиборининг тортилиши ҳам катта гап эди.

Республикамиз Мустақилликка эришгач, Президентимиз эълон қилган дастлабки Фармонлар ўқитувчиларнинг оғирини енгил қилиш, муаллим мақомини барча йўналишларда кўтариш масалаларига бағишланганининг ўзиёқ Истиқлол давридаги ички сиёsat-нинг дастлабки қадамлариёқ нечоғлик муҳим ва тўғри йўналишда бўлганини кўрсатади. Аввалги босқичларда ҳам ёрқин намоён бўлиб, алангадек ловиллаб турган публицистик шижаот сўнгги йиллар Ўткир Ҳошимов ижодида янада жонланди. Адид Истиқлол даврига келиб Президентимиз И.А.Каримовнинг улкан ғояларини ҳаётга, замондошларимиз қалбига янада чуқурроқ сингдиришга қаратилган, маънавият ва миллий қадриятларимиз муаммоларига бағишланган ўнлаб публицистик мақолалар эълон қилди. “Мардлик”, “Ўзликни англаш бахти”, “Мустақиллик – масъулият демак”, “Истиқлол бизни дунёга танитди”, “Оёғинг ердан узилмасин” сингари мақолаларда бир жиҳатдан амалга оширилаётган улкан бунёдкорлик ишларининг моҳият ва самаралари таҳлил ва талқин этилди, иккинчи бир жиҳатдан, ушбу бунёдкорлик ишларининг ғайрат билан амалга оширилишига бош-қош бўлаётган юртбоши сиймоси гавдалантирилди.

Ўткир Ҳошимов ранг-баранг жанрларда ижод этиб келаётган ёзувчидир. Унинг “Икки карра икки беш”, “Шумлик”, “Осмондан тушган пул”, “Сўққабош бевагина” сингари тўпламларига кирган

воқеий ва бадиий ҳажвиялар бугунги ҳажвий адабиётимизнинг гўзal ва сара намуналариdir. Масалан, адебнинг устоз Саид Аҳмад ҳақидаги “Ғаройиб саёҳат” номли ҳикояси ҳозирги жаҳон адабиётининг манаман деган юмористик новеллалари билан беллаша олади. Афсуски, айрим мулоҳазаларни ҳисобга олмагандан танқидчилигимиз ёзувчининг бу йўналишдаги ҳикоялари ҳақида чуқур ва атрофлича фикр юритишга ўтганича йўқ. Ҳолбуки, характерлар яратишдаги тиниқлик, тилдаги жозиба ва индивидуаллик, давр ва инсон табиатида намоён бўлувчи айрим хусусий қусурлар билан бир қаторда, баъзи бир жиддий ижтимоий иллатларнинг кескин ва ёрқин гавдалантирилиши; ҳамда ҳаётбахш, меҳрли кулги фазилатларга кўра Ўткир Ҳошимов ҳажвиялари ҳозирги адабиётимизда муҳим ўрин тутади ва адабиётимизнинг ранг-баранг тароватини очиб бериш жиҳатидан улар жиддий ўрганилишга арзигулиқдир.

Ўткир Ҳошимовнинг қатор драматик асарлари ҳақида ҳам шу фикрни айтиш ўринли. Унинг сахна асарлари драма турининг турли жанрларида битилганини таъкидлаш жоиз: “Инсон садоқати” – психологик драма; “Тўйлар муборак” – комедия. “Баланд дорга осилма” сатирик комедия. “Қатағон” эса – фожиа. Маълумки, бизнинг ўзбек адабиётимизда ҳам, умуман, собиқ шўро адабиётларида ҳам фожиа жанрида ёзилган асарлар кўп эмас. Бунинг сабаби аён, албатта. Шўро тузуми ўз жамиятида фожиа сифатида тасвиранувчи воқеа-ҳодиса ёки қаҳрамон тақдири бўлиши мумкин эмас деб тушунувчи ёки, ҳеч бўлмагандан, шундай деб тушунилишини истагувчи эди. Ҳолбуки, шўро тузумида ҳаётга ва айрим қаҳрамонлар тақдирига фожиа талаблари асосида ёндашишга арзигулик ҳодиса, тақдирлар йўқгина эмас, ҳатто оз бўлмаган. Ўткир Ҳошимов “Қатағон” фожиасида Ўзбекистондаги шўро тузумининг сўнгги босқичдаги даврни, “ўзбек иши”, “пахта иши” деб орсизларча қилинган сиёсий ўйинларни ва бу тухматлар туфайли ҳалқ бошига, унинг айрим фарзандлари бошига тушган фожиаларни, бу фожиаларнинг илдиз ва сабабларини кескин түғёнли тўлқинларда изчил реалистик лузум (принцип)ларда кўрсатиб берди. Афсуски, айрим мулоҳазаларни ҳисобга олмагандан, бу асар ҳам ҳанузгача атрофлича ва чуқур таҳлилини топмай келаётir.

Шу ўринда Ўткир Ҳошимовнинг А.Қодирий, А.Қаҳхор, Ойбек, Саид Аҳмад, О.Ёқубов каби адиблар; О.Шарафиддинов, У.Норматов, А.Расулов каби танқидчилар; ўзига тенгқур, даврадош

шоир-ёзувчилар ҳақида ёзган турли йўналиш, миқёсдаги мақолалари, шунингдек, ёзувчи ижоди, маҳорат сирларига доир чукур, теран мулоҳазалари сўнгги босқичдаги адабий жараёнда ўзига хос ўрин тутишини алоҳида таъкидлаш жоиз. Ҳаёт, адабиёт, маҳорат ҳақидаги бу адабий ўйлар ижодий кечинмаларни ёритиш, ёзувчининг ўз адабий-эстетик дунёси сир-синоатларини ўрганиш билан бир қаторда, айниқса, ёшларга ўзбек адабиёти дунёсини ўзлаштиришда муҳим манба бўла олади. Агар эътибор берсангиз, Ўткир Ҳошимовнинг адабий ўйлари, хусусан, “Дафтар хошиясидаги битиклар”да ўз ифодасини топган мулоҳазалари, ҳеч муболағасз, бамисоли бадиий асарлардек қизиқиб, берилиб, севилиб ўқилади. Бунинг сабаби, адибнинг бу йўналишдаги мақолалари, мушоҳадалари ҳам бадиийлик билан тўйинганлиги туфайлидир. Демакки, унинг адабий ўйлари, бадиий асарлари бир-бирини янада тўлдидиради, мунтазам бир яхлитликни ташкил этади.

Ўткир Ҳошимов қаҳрамонларини ҳаётбахш, кўтаринки, романтик йўсинда кўрсатиш билан бир қаторда, ҳаётнинг аччиқ ҳақиқатларини бўямай-нетмай, бу жараённинг ички фалсафасидаги мутаносибликни бузмай изчил реалистик йўсинда тасвирловчи ёзувчидир. “Икки эшик ораси”даги Ориф оқсоқол фақат доно бўлгани учунгина эмас, айниқса, ҳақгўй бўлгани учун ҳаётнинг аччиқ ҳақиқатлари олдида эсанкирамагани, журъат ва жасорат билан ҳақ йўлдан тоймагани учун китобхонларнинг севимли қаҳрамонларидан бири бўлиб қолди.

Адиб, уруш давридаги баъзи ҳамюртларимизнинг қиёфасини танқид қилишда бироз ошириб юбормадимикан, деган таъналардан кўрқмай, Умар закончи феъл-аворидаги ярамас, ифлос хусусиятларни ҳеч иккиланмай аёвсиз фош этди. Қаҳрамонни бундай талқин этиш роман салмоғига салмоқ қўшди. Чунки адиб ҳаёт ҳақиқатидан чекинмади. Қаҳрамонни журъат ва жасорат билан тасвирлашда ёзувчи “Тушда кечган умрлар” романида янги бир қадам қўйди. Асар қаҳрамони – афғон урушидек даҳшатлардан омон қайтган Рустам бемақсад уруш туфайли фарзанд кўриш баҳтидан мосуво бўлгани, шўролар сиёсатининг Ўзбекистонга қилаётган зуғумларига чидолмай ўз жонига қасд қиласи. Бунинг сабаби қалбидаги баъзи бир идеалларнинг нурай бошлиши, “ўзбек иши” деб ном олган ноҳақликлар ҳамда ўзимизнинг ичимиздан чиққан ваҳший комиссарга ўхшаганларнинг ҳамон от устида экани эди.

Ўткир Ҳошимовнинг журъат ва жасорати бадий қаҳрамонлари орқалигина эмас, Ватан ва миллат фарзанди сифатидаги фуқаролик фаолиятида ҳам намоён бўлади. Шўро замонининг сўнгги босқичларида Москвадаги съездлар саройи минбаридан туриб юртбоши ғояларига ҳамоҳанг равишда ўз халқи ва юртининг манфаатларини қўрқмай, дадил ҳимоя қилиши, ўша вақтдаги иттифоқ раҳбарларининг мунофиқларча тухмат билан йўғрилган сиёсатларини кескин фош этиши, улар билан юзма-юз туриб тортишуви адиб табиатидаги бундай хусусиятларни, хеч шубҳасиз, жасорат деб аташга асос беради. Асар қаҳрамонларида бу каби хусусиятлар адибнинг ўзига ўтгани, адибнинг ўз табиатидаги бундай фазилатлар асар қаҳрамонларида намоён бўлгани учун ҳам ёзувчи мана деярли ярим асрдан буён китобхонлар ардоғига сазовор бўлиб келмоқда.

Миллионлаб китобхонлар Ўткир Ҳошимов асарларидағи халқпарвар, миллатпарвар қаҳрамонларни ардоклаб, севганлариdek, ёзувчининг ўзини ҳам қалбларининг қаҳрамони деб биладилар ва шундай бўлишини орзу қиласилар.

ИСТЕЬДОД СЕҲРИ

Ўткир Ҳошимов XX аср ўзбек адабиётининг бетакор сиймларидан бири. У ўзбек насрига қалб эҳтиросини, самимиятни олиб кирган севимли адибдир.

Ўткир Ҳошимов ҳикоялари, қиссалари 70–80-йиллар ёшлари қалбига алоҳида бир фараҳ берганлиги, ажиб туйгулар ила муҳрланганлиги билан қимматлидир. Зеро, бизлар мансуб бўлган авлод машҳур ва суюкли адибимизнинг ҳар бир асарини интиқлик билан кутардик. Айниқса, “Баҳор қайтмайди” қиссасини ютоқиб ўқиган дамларимиз ёдимда. Бу асар қалбимизда маъсум ва маҳзун қўшиқдек акс садо берганди. Чунки бу қиссада ўша даврнинг энг ўткир маънавий жараёнлари қаламга олиниб, муаллиф томонидан моҳирлик ва таъсирчанлик билан талқин этилганди. Қисса қаҳрамони Алимардоннинг ҳаётдаги проротипи ҳақида дўстлар билан ўзаро фикрлашганларимиз, баҳслашганларимиз эсимда.

Ўткир Ҳошимов адабиётга эрта кириб келди ва қиска вақтда шухрат қозонди, машҳур бўлиб кетди. Адабиёт тарихига назар солсак, бундай мартабага камдан-кам ижодкорлар мушарраф бўлганларини кўрамиз.

Ўткир аканинг дастлабки йирик асари устоз Абдулла Қаҳҳорнинг эътиборига тушган “Чўл ҳавоси” қиссаси эди. Ундан кейин адиб “Одамлар нима деркин”, “Қалбингга қулоқ сол” қиссаларини яратди. Ўша пайтда минглаб муҳлислар юрагига жо бўлган мазкур қиссалар бугун ҳам севиб ўқилади.

“Баҳор қайтмайди” ҳозир тилга олган қиссаларимиздан кейин эълон қилинганди. Ва ўз навбатида “Дунёнинг ишлари”, “Нур борки, соя бор”, “Икки эшик ораси”, “Тушда кечган умрлар” номли йирик асарлар, романлар яратилди. Севимли адиб истеъдоди қиссаларга берган жозибасини йирик асрларга ҳам йўғира олди. Ушбу асарларнинг ҳар бири адабий жараёнда воқеа бўлди.

Ўткир aka ҳикоячилиқда ҳам ўз номига муносиб қалам тебратган адибдир. Унинг “Квазарлар” ҳикояси томудом талабалик йилларимдаги пахтага чиққан даврларимизни ёдимга солиб, юрагимни титратади. “Деҳқоннинг бир куни”, “Урушнинг сўнгги қур-

бони”-чи? Жаҳон ҳикоячилиги деганда ана шундай мезондаги, ана шундай юксак савиядаги ҳикояларни назарда тутмаймизми?

Чинакам адиб қайси жанрга қўл урмасин, мўъжиза яратади. Халқда бу борада “устасига – барибир”, деган ибора бор. Ўткир ака публицистика соҳасида ҳам ҳамиша байроқни қўлдан бермай келди. У халқ қалбида туғён уриб, унинг тилига чиқмай турган долзарб муоммоларни ўз вақтида истеъдоди шуури билан илғар ва мамлакат бўйлаб бонг урадиган ўткир мақолаларига қўчира оларди.

Ўткир ака оддий меҳнаткаш одамлар қалбига адабиёт сехрини ато этган адиб. Ўз даврида ёшлар қалбини забт этган ёзувчи. 70–80-йиллардаги унинг шуҳратини ҳозирги қундаги энг машҳур хонанда ёки энг донгдор футболчи шуҳратига тенглаштириш мумкин.

Ўша даврларда мен эндиғина таҳририятда иш бошлаган кезларим эди. Ёш талаба қизлардан бири менга мурожаат қилиб, ўзини Ўткир аканинг мухлиси эканлигини, агар имкони бўлса, у ишлаётган таҳририятга олиб боришими, янги чоп этилган китобига дастхат олмоқчи эканлигини мендан ўтиниб сўраганди. Агар бунинг иложи бўлмаса, ўша адибни узокдан бўлса ҳам бир марта кўрсам бас, деганди. Бу унинг мухлислар орасида топган шуҳратига бир мисол.

Хизр назар қилмаган бўлса, бундай обрў-эътиборга ҳамма қаламкаш ҳам эришиши мумкинми?

Ўткир Ҳошимов ижоди ҳақида бугунги кунда ҳар ким ҳар хил фикр билдириши мумкин: собиқ анъана андозаси билан фикрловчилар – ўзича, “фарб мақоми”га маҳлиёлар – ўзича. Ҳатто адибимиз ижодига, истеъдодига айрича бир баҳо бериб, уни жаҳоннинг турли пучмоқларда ижод қилган ва ижод қилаётган, адибимизнинг тушига ҳам кирмаган ёзувчилар билан муқояса қилувчилар, бундан индивидуал қашфиёт яратадиганлар ҳам йўқ эмас. Бу адабий жараён, бунга ҳеч ким монелик қилолмайди. Лекин мен Ўткир акани фақат ўзигагина ўхшаган ижодкор деб биламан. Зоро, у ҳалқ дардини ўз қалбидан ўтказиб идрок этган ёзувчидир.

Адабиётимизда Ўткир Ҳошимовдек адиб борлиги ҳамиша бағримизни бутун қилиб туради.

*Хуриид Дўстмуҳаммад,
филология фанлари доктори*

МАШҲУРЛИКНИНГ БИР СИРИ

*Китобхони йўқ асар
эгаси ташлаб кетган ҳовлига ўхшайди
(Ўткир Ҳошимов)*

Йигирманчи асрнинг 60-йилларида замонавий ўзбек насли хиёбонига баҳорий айёмлар кириб келди. Унга қадар ҳам катта адабилик мактаби қад ростлаб турган эди, бу мактабнинг яловбардорлари залворли повесть ва романларини пешма-пеш чоп этишаётган, “китобхўр” шинавандалар олтмиш минглаб “тираж”ларни кўрдим демасди. Жуда кўплаб одамларнинг хаёлию кўнглида “Адабиёт – шу!” деган тушунча ақидага айланиб кетганди. Бирдан повесть қабилида ёзилгану, лекин жанри “қисса” деб кўрсатилган асарлар пайдо бўлди. Бу икки атамани қиёсан таҳлил қилганлар, униси бошқа-буниси бошқа ёки иккови эгизак деган тезисларни илгари суріб докторлик диссертациялар ҳам ёзилди. Илмий баҳс-мунозаралар ўз йўлига, лекин, назаримда, 60-йиллар қиссалари адабиётимизга бамисоли баҳорнинг майин, ёқимли ҳавосини олиб келди. Бутун бир миллий адабиётда янги йўналишни бошлаб бериш ҳаммага ҳам насиб этавермайди. Муайян ижодкордаги фавқулодда янгича тафаккур пиравордида бутун халқ бадиий тафаккурида ўзгариш ясади, бадиий дидини янгилайди, бунинг натижасида китобхонларнинг нафақат адабиётга, шу билан бирга ҳаётга, одамларга бўлган қарашларида фавқулодда ўзгаришлар юз беради. Ўлмас Умарбеков, Учқун Назаров, Шукур Холмирзаев, Ўткир Ҳошимовнинг номлари ўша давр ўзбек наслини янгиловчилари сифатида тарихдан ўрин олди.

Номлари келтирилган ва улар сафида қалам тебратган устозлар ижодига эҳтиром билдирган ҳолда ўз тенгқур авлод вакиллари орасида улоқ Ўткир Ҳошимовда кетгани эътироф этилса адолатдан бўлади деб ўйлайман. Ўткир аканинг қиссалари, ҳикоялари, ҳатто публицистик чиқишлари машҳурликда бугунги кунимиздаги мега-юлдуз хонандаларнинг “хит”ларидан кам бўлмаган!

Адабиётдаги мана шу ҳодисани, яъни ижодкорнинг машҳурлик феноменини ўрганишга кўпда эътибор қаратилмайди назаримда.

Ўзбекистон халқ ёзувчisi Ўткир Ҳошимовнинг матбуотда эълон қилинган кўплаб мақолалари, айниқса телевизор орқали мунтазам намойиш этилган сұхбатлари ўз даврида қанчалар оммалашиб кетганини ҳозирда жадал ривожланиб бораётган оммавий коммуникация фани назарияси мезонларидан келиб чиқиб таҳлил қилинса Ўткир аканинг нафақат публицист, балки адаб сифатидаги феноменини очиб берувчи сирлар сари йўл топиш мумкин бўлади. Дарҳақиқат, бир қатор газета мақолалари ҳамда телесұхбатлари билан миллионлаб кишиларнинг қалбига йўл топиш, бугина эмас, балки уларнинг жуда кўпчилик қисмидан акс садо олиш шунчаки жўн ёки тасодиф ҳодиса эмас.

Оммавий коммуникация масалалари билан шуғулланадиган мутахассислар оммавий ахборот воситаларини қуидаги уч гуруҳга бўлиб тадқиқ этишмоқда: омма тафаккурини бошқарувчи, омма билан тенг мавқеда мулоқот ўрнатувчи ва оммага нисбатан пассив мавқени эгалловчи оммавий ахборот воситалари. Бундан чиқадиган хулоса шундан иборатки, эркин фуқаролик жамиятида иккинчи хил иш юритиш, яъни омма билан тенгма-тенг мавқеда мулоқот ўрнатиш кўпроқ қадрланади, эътироф этилади.

Таниқли адабиётшунос М.Бахтин жамиятнинг тўлақонли жамиятга айланишида мулоқотнинг аҳамиятини алоҳида таъкидлайди. Мулоқот тўхтаган жойда ҳамма нарса тугайди дейди у. Унинг фикрича, мулоқот чоғида икки томонлама жараён кечади, яъни тингловчи гапиравчига нисбатан фаол позицияга кўтарилади ва тингловчи гапиравчига айланади.

Ҳар иккала мисолнинг моҳияти битта – ўзбекона жайдари тил билан айтганда, одамларнинг қалбига йўл топиш, улар билан тенгма-тенг тиллашиш, уларнинг гап-сўзига қулоқ солиш. Ўткир Ҳошимов табиатан қалбларга йўл топа оладиган, одамларни гапиртира биладиган, бошқалар айтган, айтмоқчи бўлаётган дард-хасратига қулоқ соладиган одам. У кишининг адаб ва публицист, катта зиёли, маърифатли инсон сифатидаги ўзига хослиги, таъбир жоиз бўлса, устунлиги ҳам мана шунда!

Санаб ўтилган ўзига хосликлар бошқа ижодкорларда ҳам йўқ эмас-ку, деган даъво билдирилиши табиий. Тўғри, буни рад этиб бўлмайди, лекин Ўткир Ҳошимовнинг ўзига хосликларига қўшим-

ча яна бир ўзига хослиги бор: у табиатидаги барча ўзига хосликларидан барча асарларида, хусусан бадий асарларини яратишда ниҳоятда моҳирона фойдалана олади. Йўқ, атайин эмас, жуда табиий равишда фойдаланади. Энг оддий кишилар билан сұхбатда ҳам Ўткир ака ўзининг машхур адаблигини, юқори мартабали арбоб эканлигини унутади, атайин эмас, йўқ, оддий ва тенгма-тенг сұхбат-мулоқот Устоз учун муқаддас лаҳзаларга айланади.

Ўткир ака билан республикада бормаган вилоятимиз қолмаган, шаҳар ва қишлоқларда, корхона ва муассасаларда бўлиб ўтган учрашувларда иштирок этганман. Ҳар сафар Ўткир акадаги самимиятнинг жозибадор қуввати яна ва яна мухлислари сафини кўпайтирганига гувоҳ бўлганман.

Ўткир Ҳошимовнинг бирон марта ўзига мурожаат этган одамга нисбатан эътиборсиз бўлганини кўрмадим. Зеро, ҳар бир мурожаат ортида тирик инсон, тирик инсон тақдири, қисмати, орзу-ҳаваси, ташвишлари бўлади. Адабиётшунослик фани атамалари билан ёндашадиган бўлсак, Ўткир Ҳошимовнинг инсон концепцияси мөҳиятини ана шу ғоятда халқона, соф ўзбекона қадриятлар ташкил этади. Бежизга адабимиз “Илҳом нима?” деган саволга жавоб берәётиб, “Бўлажак асар қаҳрамонлари тирик одамга айланиб, “қисматимни тезроқ қоғозга тушир” деб талаб қилаётганга ўхшайди” дея ўз ижодий лабораториясига олиб киради. “Ёзувчилик ҳунарининг энг қийин жойи нима?” деган саволга берилган жавоб юқорида мен уқдиришга уринаётган адабнинг ўзига хослигини янада яққолроқ намоён этади.

– Асар қаҳрамонларига “жон ато этиш”, яъни уларни тирик инсонларга айлантириш. Шундагина китобдаги одамлар (“персонажлар” эмас, айнан одамлар. – Таъкид бизники. – Х.Д.) ўкувчининг яқин кишисига айланади. Китобхон унга қўшилиб ўйлади, изтироб чекади, севади ёки нафратланади.

Инсонга бу қадар юксак меҳр-муҳаббатли муносабатни адаб қаламига мансуб барча асарларида кўриш мумкин. Синчковлик билан таҳлил қилинса, асарларнинг ифода оҳангি, сўз-ибора-жумла танлаш санъати, зиддиятли ҳолатдаги руҳий изтироблар тасвири, яхшини беҳад севищ, ёмонга аёвсиз нафрат туйғуси – шуларнинг барчасида Ўткир Ҳошимов инсон концепциясининг турли қирралари яққол кўзга ташланади.

Сермаҳсул ижодкорларга қўярда-қўймай қайси асарингиз ўзингизга кўпроқ ёқади, қабилидаги саволлар беришади. Шунга ўхшаш савол билан Ўткир акага ҳам мурожаат қилишган, янглишмасам, у киши ҳамиша барча асарларини фарзандлари мисоли бирдек кўришини айтган. Бизнинг авлод вакиллари эса катта адабиёт оламига кириб келишида Ўткир Ҳошимов ижодининг дастлабки палладарида яратилган асарлар кўпроқ “хизмат” қилганини, йўл кўрсатганини гапиришади. “Чўл ҳавоси”, “Одамлар нима деркин?”, “Бахор қайтмайди”, “Қалбингга қулоқ сол”... устоз адибни қалам тутишга унданған сехрли куч ҳам одамларнинг қалбига қулоқ тутиш, одамларнинг ўзларини ўз қалбларига қулоқ тутишга даъват этиш, ундаш туйғуси бўлган десак янглишмасак керак. Ўтган асрнинг 60-йиллари учун бундай самимилик, руҳий эркинлик адабиётимиз учун фавқулодда воқеа эди! Такрор айтаман – миллий бадиий тафаккурдаги бурилиш эди! Шу нуқтаи назардан ўша давр ўзбек шеъриятида Эркин Воҳидов, Абдулла Орипов, Рауф Парфи номлари билан боғлиқ юз берган янгиланишга қиёсан олинса, насторимиздаги янгиланиш жараёнлари юқорида эсланган адилларимиз номлари билан боғлиқдир. Муҳими, ўша ўттиз-қирқ йил бурунги тарихий эврилишлар муаллифлари адабиётимизнинг кўркига кўрк бўлиб қўшилган кўплаб асарлар яратдилар. “Икки эшик ораси”, “Тушда кечган умрлар”, “Дунёнинг ишлари”, “Нур борки, соя бор” асарлари Ўткир Ҳошимовнинг эпик кўламдаги салоҳияти намуналарига айланди. “Дунёнинг ишлари”да ўзбекнинг муштипар, мушфик ва жафокаш ОНАсиға тириқ ҳайкал қўйилди. Унинг бирон новелласи – саҳнасини бефарқ ўқиб бўлмайди. Китобхон қавми борки, ушбу асар мутолаасига кириши дегунча ўз болалиги, гўдаклик хотирасига муҳрланган волидасини эслайди. Бу эслаш ҳар қандай бағри тош одамнинг ҳам кўнглини ҳалимлаштиради, уни эзгу туйғулар гирдобига тортади.

Асарнинг иккинчи эътиборли жиҳати шундаки, ёзувчи одамларни ОНАга бўлган муносабатидан келиб чиқиб кимлигини, қандай инсонлигини кўрсатади. Қиссанинг учинчи йўналишини асар қаҳрамони “мен”идаги эволюция ташкил этади. Бу “мен” дунёни асосан она тимсоли орқали идрок этиб улғаяди, неки воқеа-ҳодиса бўлса она контексида қабул қиласи ва шу контексдан келиб чиқиб уларнинг баҳосини беради. Дўст хиёнатига учраган қаҳрамоннинг изтиробга тушганини эслайлик. Вазият шу қадар оғирки, азбаройи

осмондаги ой ҳам хоиндеқ, унинг нурлари ҳаромдек, юлдузлар хоинларча кўз қисаётгандек, шамол хоинона қиқирлаётгандек туюлади. Бир сўз билан айтганда, қаҳрамон учун дунё зимиston, унинг назарида бу ёруғ оламда яхшилик ё ёқимли нарсанинг ўзи қолмаган. Мана шундай депрессив ҳолатдан уни фақат она, фақат онадаги бағрикенглик, кечиримлилик халос этиши мумкин.

Онадаги кечиримлилик, бағрикенглик ўғилнинг мушкулини осонлаштиради...

“Дунёнинг ишлари”да кашф қилинган Она образи Ўткир Ҳошимовнинг кейинги асарларида ҳам бошқа замон ва бошқа маконларда ўқувчининг кўз ўнгидаги гавдаланади. Чунончи, “Тушда кечган умрлар”даги Курбоной хола қўп жиҳатдан қиссадаги Оий образини мантақан давом эттиради. “Урушнинг сўнгги қурбони” ҳикоясидаги Умри онанинг мушфиқлиги, хокисорлиги ҳам бу икки асардаги онадаги фазилатлардан деярли фарқ қилмайди. Турли асарлардаги турли образларга бундай ёндашув тўғри ё нотўғрилиги буткул бошқа масала, лекин, бу ўринда гап бошқа ёқда: “Дунёнинг ишлари”да Онанинг қўйма образини яратишга муваффақ бўлган муаллиф энди бошқача онани тасаввурига сиғдиролмаслиги аниқ эди, бинобарин, башарти у онани бошқачароқ тасвирласа гўё ўша ОНАга хиёнат қилаётгандек, она тимсолига путур етказиб қўяётгандек ахволга тушарди. У – адаб Ўткир Ҳошимовнинг онаси, ўзбекнинг онаси эди!..

“Тушда кечган умрлар” романидаги Фаниев ҳам қўйма образлар сирасига киради. Инсон қиёфасидаги бу махлук (!) тасвирланган саҳифалар ёзувчи маҳоратининг зарварақларига айланган десак муболаға бўлмайди. Адаб гўё шу қадар манфур кимсани рўпарасига ўтқазиб қўйиб мусаввир сингари унинг портретини яратган. Яратганда ҳам тош ва муздан яралган бутун ички дунёсини барча товланишлари билан мукаммал ва бадастир “кўчирган”. Унинг одамларга қилаётган ғайриинсоний муносабати ўқувчини ҳайратга солади, ҳайратга сола туриб дунёга хушёрроқ назар билан қарашга ундейди. Полковник Фаниев “Дунёнинг ишлари”даги Далавой налугчининг давоми. Улар бир тоифадаги одамнусхалар. Уларнинг қиёфасини тўлароқ кўрсатиш учун бошқа бўёқларнинг ҳожати йўқ, фақат ёзувчининг айтмай туриб айтиш услубини уқишига ҳаракат қилсак, ҳар қандай даврнинг ўз Далавойлари, Фаниевлари бўлиши аёnlашади. Курбоной холанинг “Ўзингиз

тузукмисиз?” деган саволига Ғаниевнинг қайтарган заҳарханда жавоби ҳар қандай китобхон қалбини ларзага солади:

“Менми? – Комиссар кулди... – Хэх-хэх-хэх! Қачон ўласиз, демоқчимисан? Овора бўласан! Мен ўлмайман! Хэх!”

... Ўткир ака Ҳошимов билан кўплаб марта ҳамсафар, ҳамсухбат бўлганимни ёздим. Ҳар доим у кишининг катта адиб ва беғубор инсон сифатидаги ўзига хосликларини ихтиёр-беихтиёр кузатаман. Ва яна у кишининг ўзига хосликлари орасидан яна бошқа бир ўзига хосликни топгандай бўламан: Ўткир Ҳошимов ҳаётда қандай бўлса, асарларида ҳам шундай, асарларида муаллиф “мен”и қандай бўлса, ҳаётдаги инсон сифатида ҳам шундай экан. Яна бир ўзига хослик – Ўткир ака ўзгаларнинг қувончини ўзининг қувончилик қабул қиласи, ўзгаларнинг дардидан ўзининг дардидек изтиробга тушади.

Ўткир Ҳошимовнинг шахсини, у киши яратган асарларни халқ қалбига яқинлаштирган, чинакам маънодаги халқчиллигини – ўзига хос гуманизмини таъминлаган жозиба ҳам мана шунда деб ўйлайман.

2010

*Муҳаббат ШАРАФУТИНОВА,
филология фанлари доктори*

ТАСВИРДАГИ ЎЗИГА ХОСЛИК

Илк ижодида Абдулла Қодирийдан таъсирланган Ўткир Ҳошимов ўзбек реалистик адабиётида роман жанрида янги тажрибаларни муваффақиятли қўллаган адиблардан биридир. Асқад Мухтор, Одил Ёкубовнинг романларида ҳам шундай изланишлар бор. Бироқ Ў.Ҳошимовнинг бу соҳадаги изланишлари, айниқса, муваффақиятли чиқсан ва у ҳар жиҳатдан ўрганишга лойиқdir.

Адибнинг “Баҳор қайтмайди” (1971), “Қалбингга қулоқ сол” (1974), “Нур борки, соя бор” (1977), “Дунёнинг ишлари” (1981) каби талай асарлари анъанавий услубда ёзилган. Воқеалар оқими бир ўзанда боради ва тасвирда анъавийлик кўриниб туради. Уларда бошқа ёзувчилардаги каби муаллифнинг ўзи ҳикоя қилади, китобхон унинг позициясини қийналмай англайди ва қабул қилади. Аммо 1980-йилларнинг ўрталарига келиб, Ў.Ҳошимов роман шакли ва услубини жиддий янгилаш заруратини ҳис этади. “Икки эшик ораси” (1986) романининг композицияси бошқа ёзувчиларнинг асарларидан кескин фарқ қилади. Роман тўққиз нафар персонаж ҳикоясидан таркиб топган. Ундаги полифонизм (кўпоҳанглилик) янги замон адабиётининг муҳим тамойилларини ўзида жамлаган дейишимиз мумкин.

Ўзбек адабиёти ўзига хос тараққиёт йўлини босиб ўтди. Дейлик, француз, инглиз, америка ва рус адабиётлари классицизм, символизм, романтизм каби қатор “классик” босқичларни ўтаган бўлса, ўзбек адабиёти, асосан, бундай босқичлардан “сакраб ўтиб”, бир йўла реализмга яқинлашганини кўрамиз. Шу тариқа биринчи ўзбек реалистик романи “Ўткан кунлар” 1922 йилда ёзилди . Абдулла Қодирий биринчи романидаёқ замон ва макон тушунчасини ҳамда ўтмишни англаш бугунги кунни чукур тушуниш имконини беришини теран ҳис этиб, XX аср бошларидаёқ ўз замонасидан анча илгарилаб кетган эди.

Орадан бир мунча фурсат ўтиб, бошқа бир ўзбек адаби А.Чўлпоннинг “Кеча ва кундуз” романи босилди. Адаб, драматург, шоир А.Чўлпон ижоди ҳам худди Қодирий каби XX аср бошида

И.Гаспринский, М.Беҳбудий, А.Фитрат, А.Авлонийлар ижодига муштарак ҳолда ўзаро таъсир натижасида шаклланди.

Ўзбек танқидчилиги А.Чўлпон шеърияти бобида чинакам инқилоб ясагани ҳақида ёзгани бежиз эмас эди. Бу жараён кейин ҳам давом этди. Озод Шарафиддинов таъкидлаганидек, “20–30-йиллар адабиётида модернча изланишлар кўзга ташланади. Буни Миртемир, Ойбек, Чўлпон ижодига кўриш мумкин”¹. Шундай қилиб, XX аср бошида жаҳон адабиётида рўй берётган тасвир ва услубдаги ўзгаришлар ўзбек адабиётига ҳам таъсир қилмай қолмади. Афсуски, маълум сабабларга кўра бу жараён 30-йилларнинг охирига келиб тўхтади. Бироқ XX асрнинг 60-йилларидан собиқ Шўро мамлакати маданий тараққиётида рўй берган жиддий ўзгаришлар аниқ кўрина бошлади.

“Олтмишинчи йиллар адабиёти” деб аталмиш адабиётнинг истеъдодли вакиллари Ч.Айтматов, Н.Думбадзе, З.Скуинь, В.Распутин, Г.Матевосян, М.Ибрагимбеков қатори ўзбек адабиётида ҳам А.Орипов, Э.Воҳидов, Т.Пўлатов, У.Назаров, Ш.Холмирзаев, О.Мухтор, Ў.Хошимов каби талай истеъдодли ижодкорлар адабиётга янгича “ҳаво”, янгича тасвир услуби олиб киришга ҳаракат қилдилар. Айнан шу адиб ва шоирлар ижоди орқали ўзбек адабиётидаги мумтоз реализм услуби янги структура ва мазмун билан бойиди. Бу авлод инсон оламини очишда ўзига хос йўл излади ва реализм муаммоларига янгича ёндошли. Бу борада Ў.Хошимов ижоди ёрқин мисол бўла олади. “Икки эшик ораси” романида муаллиф одатдаги баён услубидан воз кечиб, ҳар бир қаҳрамонга ўз тарихини ўзи сўзлаш имконини беради. Бироқ асар қаҳрамонлари фақат ўз қисмати ҳақида эмас, тарих ҳақида, бутун бошли мамлакат тақдири ҳақида ҳам ҳикоя қиладилар. Буларнинг барчаси сунъий кўтаринки оҳангларда эмас, ўта табиий тарзда тасвирланади.

“Икки эшик ораси” романини қўздан кечирар эканмиз, бу роман услуби, композицияси ва стилистикаси билан америка адиби У.Фолкнернинг “Ўлар чоғимда” (1930) романи орасида ҳамоҳанглик борлигини кўрамиз. Лекин икки адебнинг замон ва макони, икки асарнинг мавзуси, тасвир обьекти бир-биридан ниҳоятда узок. Асар қаҳрамонларининг миллий қадрият ва удумлари ҳам бир-биридан кескин фарқ қиласи. Шундай экан, бу романлар ора-

¹ Шарафиддинов О. Ижодни англаш бахти. – Т.: Шарқ НМАК, 2004. – Б.243.

сида муштараклик бўлса, у қандай юз берган, деган табиий савол пайдо бўлади. Романлар орасидаги муштараклик ҳақида гап бораркан, бу икки адибнинг бир-бирига бевосита таъсири ҳақидаги масаладан кўра ушбу асарлар композицияси ва услубидаги яқинлик қайтарзда пайдо бўлганини тадқиқ этиш биз учун муҳимроқдир. Бундан ташқари, иккала роман ўз миллий адабиётида қандай из қолдиргани, миллий адабиёти тараққиётига қандай ҳисса қўшганлиги биз учун муҳимдир.

Маълумки, У.Фолкнер адабиётга биринчи жаҳон уруши тугаганидан кейин кириб келган “адашган авлод вакиллари”дан ҳисобланади. Э.Хемингуэй, Д.Дос Пассос, С.Фицжеральд ҳам шу авлод вакиллари эдилар. У.Фолкнер ижодида америка адабиётида реалистик анъаналарни юксакликка олиб чиқсан Шервуд Андерсоннинг таъсири сезилиб туради. Шу билан бирга XX асрнинг 20-йилларидан бошлаб Фолкнер ижодида Ш.Андерсон “анъаналари”дан узоқлашиш тамойили ҳам яққол кўзга ташланади. Масалан, адибнинг “Аскар мукофоти”, “Шовқин ва ғазаб”, “Ўлар чоғимда” каби асарларида ёзувчи ўзи ҳақида ҳикоя қилишни қаҳрамонларнинг ўз ихтиёрига қўйиб беради.

“Икки эшик ораси” ва “Ўлар чоғимда” асарларидаги муштараклик ҳақида гап бораркан, ҳар иккала роман композицион қурилмаси жиҳатдан ўзига хос асар эканига шоҳид бўламиз. Бундай ҳолат ҳар икки адиб ижодида ўз “устози” услубидан узоқлашиш жараёни рўй бераётганини кўрсатади. Ўз вақтида У.Фолкнер Ш.Андерсон реализмидан қандай “узоқлашган” бўлса, Ў.Хошимов ҳам А.Қодирий реализмидан шундай “узоқлашган”. Ҳар иккала адиб модернизм формалари таъсирида янгича бадиий тасвир услубини излаган ва буни топишга ҳаракат қилган.

Муштараклик ҳақида фикр юратар эканмиз, У.Фолкнер ҳам, Ў.Хошимов ҳам ўзига хос адиблар эканини алоҳида таъкидлаш керак. Масалан, У.Фолкнер тасвиридаги “онг оқими” Ў.Хошимов романидаги “онг оқими”дан кўра ёрқинроқ кўринади ва биринчи ўринга чиқади. Бевосита асарларнинг ўзига мурожаат қиласигача. Ў.Хошимовнинг “Икки эшик ораси” романи етти қисмдан иборат. Ҳар қисмда еттитадан боб бор. Роман 1930-йиллардаги очарчиликдан тортиб, 1966 йил Тошкент зилзиласигача бўлган катта даврни қамраб олади. Асар қаҳрамонлари Дўмбиравот, Нўғайқўрғон ва бошқа жойларда яшовчи оддий ўзбеклар бўлиб,

улар уруш арафаси, уруш ва ундан кейинги оғир йилларни бошдан кечирган кишилардир. Асар қаҳрамони Музaffer Қўқонга, онаси ning дафн маросимиға кетиш жараёнида ўзининг бутун умрини эсга олади. Роман бошида муаллиф шундай деб ёзади: “Бу китобдаги кўп одамларни ўзим қўрганман. Кўплари билан гаплашгандар. Баъзиларининг ўзи билан, баъзиларининг... рухи билан... Баъзилари нимани гапирган бўлса, шуни қоғозга туширдим. Баъзилари нима гапирганини эмас, нима ўйлаганини ёзишга мажбур бўлдим (Начора, ҳамма рост гапиравермайди. Аммо ёлғон гапираётган одам ҳам ичида, барибир ростини ўйлайди)”².

У.Фолкнернинг “Ўлар ҷоғимда” романи эса новеллалардан ташкил топган бўлиб, асарда Американинг Йокнапатофа деган бурчагида истиқомат қилувчи оддий америкаликлар қисмати қаламга олинади. Романдаги макон, персонажлар исми адиб ҳаёлотининг маҳсули. Бироқ унда тасвирангдан одамлар ўйлаб топилган эмас. Ёзувчи ўзи яхши билган, яхши таниган одамлар ҳакида ҳикоя қиласиди. Асар сюжетининг асоси Адди Бендрен исмли аёлнинг дафн маросими тасвиридан иборат. Унинг жасадини 40 миль масофага – Джифферсонга майитнинг қариндошларига элтиб, ўша ерда дафн этиш керак. Аммо адибни дафннинг ўзи ҳам, аёл вафотининг сабабалари ҳам қизиқтирумайди. Адибнинг нияти асар қаҳрамонларининг маънавий дунёси нақадар қашшоқлашиб, ҳамма нарсага бепарво, беписанд қарашга кўникиб кетганини тасвирлаш. Америка жанубига хос турмуш тарзи уларни шу қадар bemexр, ўзгалар дардига беписанд бўлишга кўникириб қўйган. Гарчанд Аддининг эри, болалари бўлса ҳам аёл шўрлик амалда сўққабош, ғариб бир кимсага айланиб бўлган. Яқинларидан бирон жонзот ажал билан олишиб ётган аёлга қилча ҳамдардлик билдирумайди. Ҳар ким ўзи билан ўзи овора. Бу аёл қисмати асарда биринчи бор Кора исмли қўшни хотин тили орқали ҳикоя қилинади. “Кўрпа тагида одам эмас, бир парча пайраҳа ётгандек. Тепасида турган қизалоқ елпифтич билан елпинганда bemor шўрликнинг сочи ҳам қилт этмади...”³

У.Фолкнер инсон ўлими мавзусини диққат марказига чиқаради. Маълумки, бу жуда мураккаб ҳолат. Бундай паллада инсон ажал

² Ҳошимов Ў. Икки эшик ораси. – Т.: Шарқ, 2007. – Б. З. Кейинчалик ушбу нашрга мурожаат қиласиз.

³ Фолкнер У. Когда я умирала // Иностранная литература. – 1990. – № 8. – Б. 6. Кейинчалик ушбу нашрга мурожаат қиласиз.

билан юзма-юз келади, қачондир аҳамиятли бўлиб кўринган ту-шунчалар қимматини йўқотиб, инсон тафаккури бошқа томонга бу-рилади, қадр-қиммат, меҳр-оқибат деган қадриятлар ярқ этиб кўри-нади. Аммо Аддининг ўлимни атрофдаги яқинларининг биронтасига таъсир қилмайди, уларнинг дунёқарашида умуман ўзгариш рўй бермайди. Масалан, беморнинг эриAns хотинининг ажали етга-ни, майитни олис масофага олиб боришга тўғри келишини кўра-била туриб, хўжалигидаги битта-ю битта аравани бошқа юмушлар учун бир неча кунга жўнатиб юборади. Асар қаҳрамонлари арава қайтишини уч кун кутадилар. Ёки аёлнинг ўғли Кеш ҳали ўлмаган онасининг кўз ўнгидаги тобут ясашга киришади. Онаси эса бу ман-зарани деразадан кузатиб ётади. Аддининг битта-ю битта қизи Дюи Дэлл эса, онасининг тезроқ ўлишини кутади. Сабаби, дафн баҳо-насида шаҳарга бориб, ўйнашидан илаштирган ҳомиласини бир ёқли қилиш. Ans хотинининг жасадини Джефферсонга олиб кети-ши ҳам бежиз эмас. Мақсад майитни қариндошларининг ўзи юма-лоқ-ёстиқ қилиб кўмса-ю, эр ортиқча ҳаражатдан қутулиб, ўзига ясама тиш солдирса. Ўлик ортилган арава ўтиш мушқул бўлган йўл-лару тошқиндан қутуриб оқаётган дарёдан бир амаллаб ўтиб, тўққиз кун дегандага манзилга етиб боради. Адди дафн қилинади, охир-оқибат Ans ясама тиш қўйдиради, тошқинда Кешнинг оёғи синади; Дэлл яна бир марта алданади. Аддига содик қолган ягона инсон унинг ўғли Джул, Джефферсонга етгунча ярим телба бўлиб қолади.

Ҳар икки муаллиф ижодига хос хусусият шуки, асар воқеалари спиралсимон тарзда ривожланиб боради. Қаҳрамонлар воқеаларни баён этиш давомида, ҳеч қачон бир-бирини такрорламайди, улар ҳар бири муайян воқеа ҳақида ўз нуқтаи назаридан келиб чиқиб ҳи-коя қилишади. Масалан, романда Музаффар инида ем ташмалаёт-ган чумчуқларни кузата туриб, “бири дадаси, бири аммаси бўлса керак” деб ўйлашининг ўзида нақадар теран маъно бор: унинг онаси йўқ. Раъно уни ташлаб кетган, бола фақат отаси ва аммасини билади ёки Қора амманинг Кимсан ҳақидаги гаплари. Робиянинг Кимсанни эслаш ҳолатларини кўз ўнгингизга келтиринг. Уларнинг ҳикояси бир-бирини тўлдириб боради ва айни пайтда ҳар бири у ёки бу воқеага ўз нуқтаи назаридан баҳо беради. Бир қарашда бу бир-бирига алоқасиз парча-пурча лахтаклардек кўриниши мумкин. Аммо романнинг бош мавзуси ўша тарқоқ воқеаларни мантиқан шу қадар боғлаб ташлайдики, у китобхоннинг диққатини асло чал-

ғитмайди. Турли ёшдаги, турли феъл-атворли, турли қисматли одамларнинг ҳикоялари ягона мантиқ ипига боғланиб, бир-бирини чуқурлаштиради. Қизиғи шундаки, Музaffer ва Қора амма, Шомурод ва Раъно, Робия ва Закунчи – ҳаммаси воқеликка ташқаридан туриб назар солади ва баҳолайди. У.Фолкнер романида ҳам қаҳрамонлар воқеага шу тарзда четдан туриб қарайдилар ва ўз дунёқарашидан келиб чиқиб баҳо берадилар.

Ў.Хошимов ва У.Фолкнер романлари учун муҳим яна бир хусусият бор. Асарнинг бош қаҳрамони ким ўзи, деган саволга жавоб топиш қийин. У.Фолкнер романида бош қаҳрамон Адди бўлиши мумкин. Чунки воқеалар Адди атрофида айланиб туради. Бироқ, Кеш, Джул, Вардаман, Дюи Дэлл ва бошқалар ҳам иккинчи даражали персонажлар эмас. Ў.Хошимов романида эса бош қаҳрамон Музaffer бўлиши мумкин. Бироқ бошқа персонажлар ҳам бемалол бош қаҳрамон бўлишга ҳақли. Чунки уларнинг ҳар бири ўз ҳикояси билан китобхон кўз ўнгидаги тирик одамга айланади ҳамда замон ва маконда рўй бераётган воқеаларнинг ҳам иштирокчиси, ҳам баҳо берувчиси сифатда қўринади.

Қора амманинг номаълум аскар ҳайкалини қучоклаб фарёд солгандаги ҳолатини эсланг. Айни пайтда Кимсан (тўғрироғи ҳайкал) ҳам воқеалар иштирокчисига айланади ҳамда Робияни “кўриб” ҳайрон қолади. “Қизиқ. Робия қариб кетибдими? Ахир мен қариганим йўқ-ку? Ўн тўққиздаман. Бундан чиқди Робия энди ўн саккизга киряпти. Нимага унақа! Нимага сочига оқ тушади! Анови ким? Шомурод тоғамга ўхшайди-ку! Худди ўзи! Фақат мўйлов қўйиб юрибди. Нега оқсоқланади? Э, бўлди! Демак, ярадор бўлган. Тоғам урушга кетганини Робия ёзган эди. Кўксида нишонлар. Бундан чиқди яхши жанг қилган... Фақат анави йигитни танимадим. Ясаниб олган новча йигит ким? “Амма” деб ойимга ёпишдими? Бундан чиқди Шомурод тоғамнинг ўғли. Менинг жияним!.. Унақа бўлса нега Робияни ойи деб гапирди. Робия нега тоғам билан келди? Балки... Начора! Бўлса бордир! Мен энди мархумман-ку” («Икки эшик ораси», 480 -бет). Бу монолог, аниқроғи, дил фарёди тасвирда замон ва маконнинг ифодалаш мушкул бўлган армонли манзараси топилгандек. “Ўлар чоғимда” романида ҳам шундай армонли манзара бор. Ўлим тўшагида ётган Адига ягона садоқатли инсон Джул шундай ҳикоя қиласи: “У (гап беморнинг ўғли Кеш хақида кетяпти) шундок дераза рўйпарасида туриб, анави сабил

қолгур тобутни ясаш билан овора. Онасининг кўз ўнгида туриб мих қоқади, тахта рандалайди. Бемор шўрлик ҳар нафас олганда ранданинг ғиртиллаши, болғанинг тақиллаши жонини суғуриб олаётгандир! Ўғил эса “кўряпсанми, она сенга қанақа ажабтовур тобут ясаяпман!” – деб писанда қилаётгандек. Ҳой, ноинсоф, онангни тириклайнин тиқмоқчимисан тобутингга!” (“Ўлар чоғимда”, 8-бет).

Ҳикоя қилувчилар ўзгаргани сайин ҳикоя оҳанги ҳам ўзгариб боради. Кўп ҳолларда улар бир-бирига тамоман тескари гаплар айтадилар, баҳслашадилар. Бундай пайтда асар йўналиши диалогга айланиб кетгандек бўлади. Аммо У.Фолкнер ҳам, Ў.Хошимов ҳам бу билан асарнинг яхлитлигига зарра путур етказмайдилар, аксинча, бундай “бир-бирини инкор этувчи” ҳикоялар асарнинг мантиқий яхлитлигини кучайтиради. Муаллифлар асардаги асосий ва баъзи иккинчи даражали воқеаларни ҳам “жамоа бўлиб ҳикоя қилувчилар” ихтиёрига ташлаб қўядилар. Табиий савол туғилади. Китобхон бир марта ўқиган ҳодисага бир қанча қаҳрамон тилидан бир неча бор қайтиш шартми? Ҳар икки адиб асарини ўқиган китобхон бир қарашда аҳамиятсиздек туюлган оддий детал, оддий имоишора ёки бир оғиз сўз тагида талай яширин маънолар ётганини кейинчалик тушунади. Хусусан, Ў.Хошимов романидаги бирон сатр, бирон хатбоши, бирон жумлани “ташлаб кетиш” мумкин эмас. Негаки уларнинг ҳар бири воқеалар ривожига хизмат қиласди.

Жаҳон адабиётида оламни бола кўзи билан кўриш кенг тарқалган услуб. Масалан, В.Гюго, Л.Андреев, Х.Ли, Ч.Айтматов асарларида шундай ёндашувни учратиш мумкин. Ўзбек адиби асаридаги кичик Музаффар, қизалоқ Робия, У.Фолкнер асарида эса Вардаман тилидан қилинган ҳикоялар оламни бола кўзи билан тасвирлаш қанчалик жиддий аҳамият касб этиши мумкинлигини исботлайди. Музаффар ҳикоясидаги отасидан “анқиб турадиган тамаки ҳиди”, “қоп-қора, думалоқ” коптокка ўхшайдиган Қора амма, “иягида холи бор хотин” каби деталлар роман давомида ўзига хос жиддий маънолар ташийди.

У.Фолкнер асарида ақли ноқисроқ Вардаман кўзи билан катталар оламининг тасвирланиши тагида ҳам теран маъно ётади. Ақли заиф Вардаман атрофида қандай воқеалар содир бўлаётганини тушунмайди, аммо кўрганини яққол гапиради. Масалан, у майитни олиб кетаётган арава устида чарх уриб учайдиган ўлаксахўр тасқара

қушларга эътибор беради. Нима учундир улар кун сайин кўпайиб бораётганини пайқайди. Катталар эса бунга аҳамият ҳам бермайдилар.

Оlamни бола кўзи билан қўриш “Икки эшик ораси”да, айниқса, ёрқинроқ очилган. “Қора амма” сочидаги сўлкавойлар асардаги вазиятга қараб нозик, gox хавотирли жиринглайди. Бола тили билан айтилган бу ҳолат китобхон учун муҳим тагмаъно ташийди. Ҳар икки адаб асарида ҳам ҳидлар, овозлар қаҳрамонлар ҳолатини чуқур очишга хизмат қиласи. Кичик Музаффар учун Қора аммадан келиб турадиган қатиқ иси, отасидан анқийдиган тамаки ҳиди, но-таниш хотиндан анқиб турадиган гунафша бўйи муҳим аҳамиятга эга. Улар асар қаҳрамони катта бўлганидан кейин унутилмайди ва муаллиф биргина гунафша ҳиди билан “нотаниш хотин” айнан Раъно эканига ишора қиласи. Романдаги олма гули ҳиди поклик ва садоқат рамзи каби таассурот қолдиради. Биринчи май байрами куни Кимсан билан театрга тушган Робия айнан шу ҳидни эслаб қолган. Музаффар билан Мунаввар учун ҳам олма гуллаган фасл алоҳида маъно ташийди. Қизифи шундаки, воқеалар ривожига қараб ҳидлар ҳам ўзгаради. Робия Комил табиб совчиларини рад этган куни “ҳаводан қор ҳиди келади”. Қор эса олма гулларини мавҳ этувчи куч. Музаффар болалигига ҳар гал Раънодан гунафша ҳиди келиб турганини эслаб келган бўлса, охирги қўриши – Кўқонга борганида эса ундан валерианка ҳиди келаётганини пайқайди. Қор ҳиди олма гулини қанчалик рад этса, валерианка ҳиди ҳам гунафша исини шунчалик инкор қиласи. Демак, Раъно қисматида қандайдир фожеалар яқинлашяпти. Романда фақат ҳидлар эмас, товушлар ҳам катта маъно ташийди.

У.Фолкнер романида ҳам шундай манзаралар бор. Вардаман ҳам товуш ва ҳидга эътибор беради. “Ўрмон товушини эшитиб турибман. Аммо бу тирик эмас, ўлик товуш. Сукунат...” (Ўлар чоғимда, 19-бет). Адаб тасвиrlаган арава ортидаги карвондан келаётган ҳид марҳума Адди қисматини эслатиб турганга ўхшайди.

Табиийки, бола психологияси билан катта одам психологияси ўртасида катта фарқ бор. Кичик Музаффар билан Робия ўртасида рўй берган боб тасвирида ниҳоятда кескин ва узок вақт эсда қоладиган вазият бор. Робия кўп йиллар кутган севиклиси Кимсан урушдан қайтмагач, Қора амма илтижоси билан Шомуродга тегишга мажбур бўлади. Шу туфайли ўзини кечиролмайди. Тўйдан

кейин Музаффарни хурсанд қилиш учун сандиқдан болага аталган кийим-кечакларни олаётіб, бир вақтлар ўз қўли билан Кимсанга атаб тиккан қийиқчаларни топиб олади. Бу драматик ҳолат ёш бола тасаввури орқали тасвирлангани учун ҳам китобхонни ларзага солади:

– Ночорман! – деди ўқраб. Шўрим қурсин! – Қаддини ростлаб, қийиқчани бағрига босганча, яна мук тушди.

– Кечиринг мени! – деди қийинқчани юзига босиб. У қийиқчани лабига босганча бўғиқ овозда аянчли қичқирди:

– Бошимни қаёққа олиб кетай? – икки қўлини қийиқча аралаш баланд қўтариб сочини чангллади. Қўрқиб кетдим. Дадамнинг: “Яхши бола бўлмасанг, Роби опанг кетиб қолади”, дегани эсимга тушди.

– Йифламанг, дедим қучоқлаб. – Роби опа йифламанг, ойи... майли дадам билан ётмайман, сизминан ётаман...” (“Икки эшик ораси”, 118-бет).

Робиянинг изтироблари, фарёд солиши, бутун вужуди билан тўлғаниши қалбida бўлаётган тўфонни англатади. Қизиги шундаки, кичик Музаффар ҳеч нарсага тушунмайди ва Роби опасини хафа қилиб қўйгани учун ўзини айбдор санайди. Тушунтириш қийин бўлган ҳолат! Робиянинг Кимсанга қилган илтижолари китобхонни ларзага солади. Китобхон ўзи билмаган ҳолда Кимсанга ҳам, Робияга ҳам, кичкинтай Музаффар фожеасига ҳам шерик бўлади.

Катталар ҳаётини бола қўзи билан англаш асарнинг таъсир кучини оширишини романдаги “Фалати хотин” боби мисолида қўриш мумкин. Музаффар тили билан баён қилинган бу боб романнинг энг кучли сахифаларидан бири. Раъно эмизикли чақалоғини қолдириб, Закунчи билан Қўқонга қочиб кетган. Унга боланг ўлган дейишган. Раъно тасодифан ўғли тириклигини эшитиб, Тошкентга келади ва ўғлининг мактабига боради. Абдували билан ёнғоқ қоқаётган Музаффар “гунафша ҳиди анқиб турган бегона аёл”ни қоравулни келини деб ўйлаб қўрқиб кетади. Унинг фикри-зикри тезроқ қочиб қутулишди.

– Сен Музаффарсан-а? – деди товуши титраб. – Ўртоқларинг айтишди. Дарсга кирмабсан?

– Ҳа! – дедим Абдувалидан кўз узмай. – Нимайди?

– Ўғлим! – хотин инграб юборди, қўлидаги сумкаси тушиб кетди.

– Музаффар! Кетма-а... Тирик экансан-ку! (“Икки эшик ораси”, 360-бет).

Муаллиф ўртадаги диалогда икки олам – Раъно ва Музafferнинг бир ҳодисага икки хил муносабатини кўрсатади. Раъно болага мен онангман деган гапни уқтироқчи. Музaffer эса ёнғоғи билан овора. Шу ўринда ғалати ҳолат рўй беради. Музaffer қорнига ниманидир қаттиқ ботаётганини ҳис этади. Бу – дўппи тўла ёнғоқ. Бир қарашда адид асосий воқеликдан четлашгандек, драматизм сусайгандек. Аммо аслида бу ҳолат вазиятни янада чуқурлаштиради. Раъно ҳам боласини қанчалик қаттиқроқ бағрига босса, унга шунчалик озор бераётганини сезиб қолади. Бу эса Раъонинг вазияти нақадар иложсиз эканини, унинг нақадар ночор ва баҳтсиз эканидан дарак. Раъно Музaffer учун йўқ. У туқсан онаси – бегона хотинни танимайди, буни хоҳламайди ҳам.

Воқеликни икки хил планда баён этиш Ў.Хошимов поэтикаси учун хос хусусият. Бундай баёнда тагмањно ёки метафорик маънога алоҳида ўрин берилади. Тагмањно пайдо бўлишида ҳар ҳил бадији воситаларнинг аҳамияти бекиёс. Бунинг учун сўзлар ва мотивларни қайтариш, образ-символлар яратиш, ранглар, ҳидлар, деталлардан фойдаланилади. Бундай бадији образ яратиш усулини ўз вақтида Э.Хемингуэй *айсберг принципи*, деб таъкидлаган. Бунда муаллифнинг асосий, муҳим ва энг нозик фикрлари матнда жуда чукур яшириб қўйилади. Шундай пайтларда китобхон аксарият ҳолларда ўзининг тассавурига мурожаат қиласи, акс ҳолда, муаллифнинг фикрлари унгача етиб бормайди. Бундай усул жаҳон адабиётидаги қатор ёзувчиларга ҳам хос бўлган. Масалан, америкалик ёзувчилар У.Фолкнер, Э.Хемингуэй, рус ёзувчиси В.Набоков тасвирни нозик ўйин тарзида олиб борадилар. Ушбу услуб Ў.Хошимов ижодида ҳам намоён бўлади. Масалан, ёзувчи айрим фикрларини шундай яшириб қўядики, китобхон муаллифнинг атрофдаги бўлаётган воқеаларга муносабатини илғаб олиши анча мушкул бўлади. Тагмањони англатиш учун Ў.Хошимов сўзлар, деталлар, аввал тасвирлаган воқеаларни қайта-қайта баён этиш орқали, яъни бадији такрордан унумли фойдаланади. Ў.Хошимов ижодининг янгилиги ҳам шундаки, ушбу бадији такрорлар фикрни тўлиқ ифодаламасдан, фақат ишора қилиш, сукут сақлаш каби усувлар билан чамбарчас боғлиқ ҳолда матнда жумбоқлик, сирлиликни юзага келтиради. Романга бевосита мурожат қилиш орқали бунга ишонч ҳосил қилиш мумкин. Асарнинг биринчи бобларида Музafferнинг ёшлиги билан боғлиқ хотиралари баён этилади. У катталарни кузатади, ўйин-

лар ўйнайди, кўнгилсиз воқеа бўлиб ўтган, қўлини синдирган кунларини эслайди. Бир қараганда, бу оддий ҳолат. Лекин бирданига, матнга қаҳрамон ва китобхон учун тушуниб бўлмайдиган бир неча марта қайтарилган Шомуроднинг “Ўлдираман!” деган сўзлари кириб келади. Бироз кейинроқ айнан “Шомурод ... ўлдираман”, – деб алаҳсирайди” – деган сўзлар Қора амма ҳикоясида ҳам учрайди”. Ушбу такрорларнинг вазифаси шундан иборатки, биринчи навбатда, улар китобхонни ўйлантириб қўяди ва воқеани эслаб қолишга ундейди. “Ўлдираман!” сўзининг такрорланиши Шомурод ҳисларининг қанчалик драматик теранглигини англатади. Ундан ташқари лексик такрор композицион вазифани ҳам бажаради: асар бошида белгиланган бир кичкина мавзу, такрорларнинг қўлланилиши сабабли асар давомида жуда катта воқеа ва муаммога айланиб кетади. Асада воқелар бир неча марта ҳар хил қаҳрамонлар томонидан такрорланиб баён этилар экан, муаллиф бўлаётган воқеани китобхон бошидан яна бир бор кечиришига ундейди. Асадаги анчагина воқеалар содир бўлганидан кейин китобхон учун Шомурод изтиробларининг сабаблари аён бўлади, Раъононинг бошидан ўтган воқеалар маълум бўлади. Бу эса Ў.Ҳошимов тасвирининг ўзига хослигидан далолат беради. Асада бир-икки жумла билан қилинган имо-ишоралар, китобхон учун топишмоққа айланади. Роман бошланишида шундай жумла бор: “Тор кўча. Қор босган каталакдек ҳовли. Чақмоқ телпакли киши. Совуқ вокзал. Лагандаги ош. Қон йиғлаб қолган онам...”, “Авваллари ҳам шунга ўхшаш аҳволга тушганман. Ҳов, ўшанда Кимсан акамни кузатганимиздан кейин... Очил акадан совчилар келганда... Йиғлаб-йиғлаб Кимсан акамга хат ёзганимда... Бобом ўлганида...” Бундай саволлар китобхон ҳаёлинин муттасил жалб қилиб туради ва у асарни янада қизиқиб ўқишида давом этади. Бир ҳодисага ҳар ким ўз нуқтаи назаридан қарashi ҳам полифоник қудратни кучайтиради. Масалан, Робия ўз тўйидан норози. Унинг ўз изтироблари бор. Кичик Музаффар учун эса отанинг уйланаётгани ҳам, кимга уйланаётгани ҳам барибир. Унинг нияти келин бошидан сочилган шириналардан кўпроқ олиб қолиш. Бу ўринда китобхон ҳам рўй бераётган воқеа-ҳодисаларни янада теранроқ ҳис қилишга мажбур бўлади.

Романдаги ҳар бир детал алоҳида маъно ташийди. Умар Закунчи портретидаги “Чақмоқ телпак” ва “Ингичка мўйлов” детали асар давомида бир неча марта учраса ҳам бир маънони так-

рорламайди. Закунчининг мўлови гоҳ чиройли бўлса, гоҳ истехзоли қийшаяди. “Бозордаги ўғри” бобида эса мўйлов қўрқувдан титраб кетгандек бўлади. Чақмоқ телпак эса олифта мунофиқ Закунчи оламининг бир бўлаги. Кўп ҳолларда муаллиф асар қаҳрамонларининг исмини айтиб ҳам ўтирумай, уларнинг бирон белгисини айтиш ёки ишора билан кифояланади. Бўрижар, Алвасти кўпприк деталлари ҳам ҳар хил ҳолатда турли маъно касб этади. Эсингиздами, ҳар сафар “Алвасти кўпприк”ка яқин келиши билан оёғи қалтирайдиган Робия Шомурод тоғасининг уйига тасодифан кириб, Раънонинг хиёнатини кўргач, “Раъно янгамнида кўрганларим олдида “Алвасти кўпприк” нима бўпти деган хulosага келади. Бу кўпприк инсонларнинг сарасини саракка – пучагини пучакка ажратадиган воситадек таассурот қолдиради.

У.Фолкнер романида ҳам дарё тасвири бор. Бу романга ҳам дарё детали бежиз киритилган эмас. Дарё тошиб кўпприкни олиб кетади. Хачирлар сувга чўкиб, майит ортилган арава сувга ағдарилади. Бу билан У.Фолкнер бу дунёда маънавият қолмади, сувга оқиб кетди, дегандек бўлади.

Ў.Хошимов ижодининг яна бир ўзига хос хусусиятларидан бири бу “алданган кутиши” усулидан унумли фойдаланишидир. Бундай усул В.Набоков ижодида ҳам учрашини эслатиб ўтиш ўринли. Масалан, ёзувчининг “Машенька” ва “Қатлга таклиф” номли романлари бошидан охиригача ана шу усулга қурилган. Асадаги ҳар бир воқеа ана шу кутишлар орқали ўз аксини топади. Китобхон ва асар қаҳрамонлари воқеалар содир бўлиши давомида Машеньканинг Россиядан Германияга келишини астойдил кутишади. Аммо Машкенъканинг келишини ёзувчи тасвирламай асарни тугатиб қўя қолади. Китобхон иккиланиб қолаверади: Машкенъка етиб келадими ёки йўқми? Иккинчи романда бош қаҳрамон Цинциннатни қатл қилишлари керак. Ёзувчи қатлнинг сабабларини ҳеч қаерда айтиб ўтмайди. Аммо Цинциннат шу қадар бечора ва шу қадар беозорлиги китобхонда қатлни бўлмаслик истагини ва шунга умидни уйғотади. Аммо асар охирида Цинциннат барибир қатл қилинади.

Кўриниб турганидек, ушбу асарларда ёзувчи китобхонни куттириш орқали у билан билан жуда нозик “ўйин” олиб боради. Ушбу усул Ў.Хошимовнинг мазкур асарида ҳам қўлланилишининг гувоҳи бўламиз. Масалан, асар бошида «Қора амма ҳикоясида» амманинг дарди ҳақида гап кетади. Лекин муаллиф Қора аммани

нималар безовта қилаётганини тасвирлашга шошилмайди. Анча воқеалар содир бўлгандан кейин китобхонга аён бўладики, бу дард – Музаффарнинг онаси йўқлиги, Робияни Шомуродга узатиши. Ёки романдаги воқеалар Музаффар онасининг вафотини маълум қилиниши билан бошланади. Аммо бир мунча вақт ўтгандан кейин маълум бўладики, Музаффарнинг онаси – Робия тирик. Аммо асар воқеаларининг ярми содир бўлганидан кейин Музаффарнинг ҳақиқий онаси Раъно эканлиги китобхонга аён бўлади. Ана шундан кейингина асар қаҳрамонлари гапларининг мазмуни, айрим воқеалар, ишоралар ўқувчига аён бўла бошлайди. Шунга ўхшаган мисоллар асарда талайгина учрайди.

Ҳар икки адидижодида замон ва макон ҳиси аниқ кўриниб турса-да, рўй бераётган ҳодисалар орасидаги замон масофаси узоқ бўлиши ҳам мумкин. Масалан, “Икки эшик ораси”да қарийиб қирқ йиллик воқеалар қамраб олинган. Бир бобидаги воқеа ўтган асрнинг 50-йилларида рўй берса, кейинги боб 30-йилларга қайтиб қолади. Ёки тағин бир ҳолат. Адилларнинг асарларини синчиклаб ўқиган одам, ҳар бир ёзувчи асарида бир-бирига яқин ва таниш персонажларни учрашини пайқаш мумкин. Бу жаҳон адабиётида учраб турадиган ҳолат (масалан, О.Бальзак, Э.Золя, В.Набоков ижодларида). Ҳар бир янги яратган асарида, уларнинг умумий характеристери сақланиб қолса-да, янги қирралари очилади. У.Фолкнернинг “Шовқин ва ғазаб”, “Авессалом”, “Енгилмаганлар” романларида адилнинг ўз бобосини эслатувчи образ учрайди (Дж.Сарторис). Ў.Хошимов ҳикоя, қисса ва романларида эса Она образини кўп учратиш мумкин. “Баҳор қайтмайди”, “Урушнинг сўнгти қурбони”, “Икки эшик ораси”, “Тушда кечган умрлар” асарларидаги оналар қайси бир жиҳатдан бу мавзудаги энг ёрқин асарлардан бири – “Дунёнинг ишлари”даги Она образини эслатади ва тўлдиради. Ёки “Дунёнинг ишлари”даги Далавой налугчи билан “Тушда кечган умрлар”даги Комиссар, Умар Закунчи образлари бир-бирини тўлдиради.

Ўткир Хошимов реализмнинг бош йўналишини инкор этмаган ҳолда унинг “рамка”сидан чиқиб кетган ва бу билан О.Мухтор, Х.Дўстмуҳаммад, У.Ҳамдам, А.Дилмурод каби адилларга ҳам маълум маънода “йўл очган”.

Ў.Хошимов ва У.Фолкнер роман шакли устида ишлаш давомида инсоннинг руҳий оламига чуқур кириб боришга ҳаракат қилдилар ва бу йўлда тасвир усулини кенгайтиришга эришдилар.

СЕВИМЛИ ЁЗУВЧИМ

Ўшанда еттинчи синфда ўқирдик. Яхши китобнинг “таъмини” ола бошлаган кезларимиз. Ёзги таътилдан бошлаб қолган таътил ва дам олишлар асосан пахта даласида ўтарди. Китоб ўқиш учун энг қулай пайт тушлик вақти эди. Бундай пайтда на бригадир, на ҳисобчи гапиролмасди. Тушлик вақтини қандай ўтказиш ҳар кимнинг ўзига боғлиқ. Бизнинг бригадада тушлик вақтидан унумли фойдаланиб, бадиий китоб ўқиш анча яхши йўлга қўйилган.

Яхши китобни ўқиш учун навбатда турадик. Масалан, ўша йиллари асарлари қўлма-қўл бўлиб ўқилган машҳур ёзувчилар – Одил Ёқубов, Шухрат, Пиримқул Қодиров, Сайд Аҳмад, Мирмуҳсиннинг изидан Ўлмас Умарбеков, Учқун Назаров, Шукур Холмирзаев, Ўткир Ҳошимов, Неъмат Аминов адабиёт оламига шиддатли тўлқиндан кириб келишди. Ўзининг дастлабки асарлари билан китобхонларни забт эта бошлаган истеъододли ёзувчилардан бири шубҳасиз, Ўткир Ҳошимов эди.

Дастлаб қўлимга ёзувчининг “Баҳор қайтмайди” қисса ва ҳикоялардан иборат китоби тушди. Мендан олдинги навбатда тўрт киши бор эди. Баҳтимга мендан олдин рўйхатда турган Саломат опа касал бўлиб қолди. Навбат сурилди. Хурсанд бўлиб китобни икки кун тушлик пайтида ўқиб тугатдим. Ва узоқ вақт китоб таъсирида юрдим. Шу-шу Ўткир Ҳошимов менинг севимли ёзувчимга айланди. Унинг асарларини излаб ўқийдиган бўлдим.

Тошкентга ўқишига келгач, 1973 йилда Ўткир Ҳошимовнинг “Қалбингга қулоқ сол” қисса ва ҳикоялар китобини олдим. Бу китобни ҳам қайта-қайта ўқиб чиқдим.

Ёзувчининг асарлари китоб дўйконлари пештахталарида кўп турмасди. Айрим китобларга ўхшаб чанг босиб ётмасди. Босилиб чиқиши билан тез орада сотилиб кетарди. Айниқса, адабнинг “Нур борки, соя бор” романи жиддий баҳс-мунозараларга ва китобхонлар ўртасида ҳақиқий шов-шувларга сабаб бўлган эди. Янглиш масам, олтмиш минг нусхада чоп этилган роман бир ойнинг нариберисида сотилиб кетганди. Бу ажойиб роман туфайли севимли ёзувчим билан юзма-юз танишим, у кишидан дастхат олиш баҳтига мұяссар бўлганман. Ўшанда Ўткир aka “Тошкент оқшоми” газетасида ишларди.

Нима сабабдан Ўткир Ҳошимовнинг китоблари севиб ўқилади, деган саволга адид асарларини қайта-қайта ўқиши жараёнида ўзимча жавоб топгандек бўлдим.

Биринчидан, Ўткир Ҳошимов асарлари ниҳоятда халқчил ва халқона, ҳар бир сатрида, тасвирида ўзбекнинг ҳиди келиб турди. Адид яратган характерлар киприк қоқишигача ўзбек. Иккинчидан, Ўткир Ҳошимов асарларида юракни жизиллатадиган, баъзан қаттиқ ҳаяжонга соладиган дард бор. айниқса, “Дунёнинг ишлари” қиссаси ва “Икки эшик ораси” романининг ҳар бир ҳикояси ва ҳар бир боби чуқур изтироб ва дард билан ўқилади. Баъзи саҳифаларда юзингизда табассум пайдо бўлса, баъзи саҳифаларни ўқиб юрагингиз йиғлайди. Ёзувчининг энг катта бахти ҳам шунда. “Шундай асар ёзсангки, китобхон уни ўқиётганида ҳамма нарсани унутса, асар қаҳрамонлари ҳаёти билан яшаса. Китобни ўқиб бўлган куни кечаси билан ухломай, тўлғониб чиқса... Вакти келиб ўша китобни яна қўлига олганида ҳаяжонга тушса... Орзум шу...”, деб ёзади Ўткир Ҳошимов. Назаримда, ёзувчи ўзи орзу қилган асарларини китобхонларга тақдим эта олди.

Ўткир Ҳошимовнинг саҳна асарларини томошибинлар севиб томоша қиласидилар. Ёзувчининг қаламидан тўкилган ҳажвий ҳикоялар, ҳангомалар китобхонларга ҳамиша қаҳқаҳа улашади. Айниқса, “Дафтар ҳошиясидаги битиклар” китобининг қайта-қайта нашр этилаётганлиги ҳам Ўткир Ҳошимов асарларининг китобхонлар ўртасида қўлма-қўл бўлиб, завқ билан ўқилаётганида ёрқин мисолдир. Ёзувчи шундай дейди: “Китобхон меҳрини ялиниб ҳам, “зўравонлик” қилиб ҳам, сотиб олиб ҳам бўлмайди!

Худо китобхон меҳридан бегона қилмасин!”

Ўткир ака инсон сифатида самимий ва бағрикенг. Устозлари, дўстлари ва шогирдларига яхшилик қилишдан чарчамайди. Севимли ёзувчимнинг ҳимматидан, яхшиликларидан бир ука сифатида камина ҳам баҳраманд бўлиб келаётирман.

Машхур адид ва самимий инсон, давлат ва жамоат арбоби, Ўзбекистон ҳалқ ёзувчиси Ўткир Ҳошимовни қутлуғ ёши билан чин дилдан қутлаб, у кишига мустаҳкам соғлик, узоқ умр ва улкан ижодий зафарлар тилаймиз. Ҳали кўплаб авлодларнинг севимли ёзувчиси бўлиб юришларини Аллоҳдан сўраймиз.

*Сайди УМИРОВ,
филология фанлари номзоди, доцент*

ЎТКИР ПУБЛИЦИСТ

Ўткир Ҳошимов таниқли ҳикоянавис, қиссанавис, романнавис бўлиши баробарида сермаҳсул, ўткир публицист ҳамдир. "Оқ камалак", "Нотаниш орол", "Хазина", "Бадбаҳт дала тутқуни", "Саккизинчи мўъжиза", "Инсоф" каби публицистик китоблари, ғаройиб саёҳатномалари, газеталарда бот-бот чиқиб турадиган мақола, сухбатлари, эфир, экрандан янграб турадиган ўйчан, мароқли сухбатлари, анжуман, учрашувлардаги эҳтиросли нутқлари бунинг ёрқин далилидир. Бундан ташқари, аксарият ҳикоялари, "Бахор қайтмайди", "Дунёнинг ишлари", "Қалбинга қулоқ сол" қиссалари, "Нур борки, соя бор", "Икки эшик ораси", "Тушда кечган умрлар" романлари, "Қатағон" драмасида публицистик рух билан йўғрилган ўринлар қўп. Умуман, адид асарларида бадиийлик билан публицистика бамисоли эт билан тирноқ, ўзаро вобаста туради.

Бадиий асарнинг публицистлиги, публицистик руҳини ҳамма ҳам бирдек маъқулламаслиги, хушламаслиги мумкин: ялтироқ, сохта, ҳайбаракаллачи, асар томирига сингиб кетмаган, юзада ёғ сингари сузиб юрадиган, тасвир таъсир кучини сусайтирадиган, саёз сувдек кўпикланиб, ваҳима қилиб оқадиган "публицистика" ҳақида гап кетса – бу тўғри. Далилли, мулоҳазали публицистика тे-ран дарё янглиғ сокин "оқади", лекин қаъридаги пўртаналар гирдоби ўқувчига, томошабинга ўтади, жунбушга келтиради, фикрни, тасаввурни чарх урдиради. Ўқувчи "Икки эшик ораси" қаҳрамонлари, персонажлари кечинмалари, орзу-армонлари, дард-изтиробларига шерик бўлади. "Тушда кечган умрлар", "Қатағон"нинг кўп ўринларида персонажлар нутқи, муаллиф нутқи босими, ҳарорати баланд. Инсон қон босимининг баландлиги – шикастлик аломати бўлса, бадиий, публицистик асарда вақти-вақти билан баланд қон босимининг кузатилиши асло носоғломлик эмас, тетиклик, бардамлик белгисидир.

Кўплаб қисса, роман драмалар муаллифи, ўзбек адабиётининг яқин дўстларидан, тарғиботчиларидан бўлган таниқли рус адиди Константин Симонов ўз китобларидан бирини "Журналист бўлиб қоламан" ("Остаюсь журналистом") деб атаган, севимли соҳасида

мунтазам, танаффус билмай ижод қилганини эслайлик. Бу эътироф бир қанча ўзбек адиблари, жумладан, Ўткир Ҳошимов ижодига ҳам хосдир. ТошДУ (ҳозирги ЎзМУ) филология факультети журналистика бўлимида ўқиб юрган кезларидаёқ Ўткир газеталарда хабар, мақолалари билан қатнашиб туради. Ўқишни битиргач, узоқ йиллар "Тошкент оқшоми", "Тошкент ҳақиқати" газеталарида ишлади, "Шарқ ўлдузи"га бир неча йил мұхаррирлик қилди, эфирда, экранда адабиёт, маънавиятнинг долзарб масалалари бўйича сұхбатлар олиб борди. Олий мажлис депутати, қўмита раиси бўлган йилларда матбуот ва оммавий ахборот воситалари муаммолари билан фаол шуғулланди. Кейинги йилларда "Театр" журналини бошқармоқда.

Журналистика бор, публицистика бор. Уларнинг муштарак жиҳатлари кўп, айни чоғда фарқли томонлари ҳам мавжуд. Ҳар қандай публицистик асар, шубҳасиз, журналистик асар, лекин ҳар қандай журналистик асар публицистикага дахлдор бўлмаслиги, унинг даражаси, савиясига кўтарила олмаслиги мумкин. Журналистика, асосан, кўлам, сифим, сон, горизонтал ўлчов билан, публицистика сифат, жасорат, маҳорат, вертикал ўлчов билан ўлчанади, баҳоланади. Публицистика чўққисига журналистика пилла поялари, тепаликлари орқали, билим, тажриба, малака тўплаб чиқиб борилади. Олим, арбоб, ёзувчи, танқидчи, ўқувчи публицистикасининг ҳам ўзига хос хусусиятлари бор. Ёзувчи публицистикаси мантиқий муҳокама ва образли тафаккур, жасорат ва маҳорат вобасталигига юзага келади.

Муаммоли, таҳлилий публицистикага жамиятда эҳтиёж, зарурат, айниқса, кучли. Ўткир Ҳошимов замона зайдини тез илғаб фикр юритадиган, қалам сурадиган ҳозиржавоб ижодкорлардан. Унинг долзарб, оғриқли мавзулардаги, жиддий, муаммоли, таҳлилий публицистикаси бунинг далолати. Публицистиканинг ижтимоий педагогика деб аталиши бежиз эмас. Публицист Ўткир Ҳошимовни ижтимоий, маънавий муаммолар кўпроқ банд этади. Бу муаммолар йиллар оша тобора мұхим аҳамият, долзарблиқ касб этмоқда. Инсоннинг мураккаб ички олами, маънавий-ахлоқий камолоти, жамият, юрт, жамоа, оила олдидаги бурчи, масъулияти, моддий бойлик билан маънавий қашшоқлик орасидаги узилиш, истеъмолчилик пойгаси, тўқлиқка шўхлик, ҳаромхўрлик, мешчанлик, лоқайдлик, оқибатсизлик, тошбағирлик, имон-эътиқоднинг сустлиги, миллатлар орасига нифақ солишга уриниш каби иллатлар адиб-

публицистни анчадан бериб ўйлантириб, ташвишлантириб, қаламга олишга, фикрларини ўқувчи билан баҳам кўришга ундан келади.

Маънавий-ахлоқий муаммолар доирасини публицист кенг миқёсда, турли аспектларда, ранг-баранг қирраларда кўришга, таҳлил этишга интилади. Масалан, "Нон – имон" деган туркумни ташкил этган "Ишониш қийин бўлган воқеа", "Дадам айтиб берган даҳшатли ҳодиса", "Нон иси", "Арzon, аммо бебаҳо", "Тўқликка шўхлик", "Нон... ароқ шишиасидан арzonми?" мақолалари фикримиз далили бўла олади. Бир неча йиллар муқаддам ёзилган ушбу туркум мақолалар муаммобандлиги, характерли мисолларга мўллиги, далил-аргументларининг ишонарлилиги, ҳикоя, баённинг изчиллиги, таъсирчанлиги, полемик руҳи, услубининг равонлиги билан ажралиб туради ва бугунги кунда ҳам долзарблигини йўқотмаган. Публицистиканинг энг муҳим, асосий вазифаларидан бири жамоатчилик фикрини шакллантириш ва омма онига таъсир этишdir. Шу маънода адибнинг "Қалбнинг оппоқ дафтари", "Муқаддас қасамни бузганлар" мақолалари алоҳида таъкидланишга лойиқ. Педагогика, медицина мавзуларида ёзилган ушбу мақолалар ўз вақтида анча-мунча шов-шув бўлган, хос вазирликлар коллегияларида муҳокама қилинган эди.

"Қалбнинг оппоқ дафтари"да публицист етмишинчи, саксонинчи йилларда кўпчилик мактабларда юз фоиз ўзлаштириш учун ҳаракат кучайгани фактини келтириб, бу нохуш тенденцияга кескин норозилик билдиради. Фойизлар кетидан қувиш, "илфорлик"ка, сиртқи ялтироқликка интилиш, чала билимларни тўла деб қўшиб-чатиб ёзиш ва ҳ.к.лар ана шу шубҳали пойганинг "соврин"лари, асоратлари эди.

"Муқаддас қасамни бузганлар" мақоласининг китоб вариантида ярим бетлик изоҳ бор. Мақола "Тошкент оқшоми"да босилгач, газета таҳририяти, муаллиф номига кўплаб хатлар келади, муаллифлар мақолада ғоят муҳим муаммо кўтарилганини яқдил маъқуллашиб, шифокорлик касбини улуғлаётган кишилар, шунингдек, бу номни ерга ураётган айrim кимсалар ҳақида ёзиб юборишади. "Тўғри гап тукқанингга ёқмас" дегандек очиқ, аччиқ фикрлар республика соғлиқни сақлаш вазирлигидаги айrim масъул ходимларга ёқмайди, улар публицистни тухматчиликда, иғвогарликда айблашга, раддия юборишгacha борадилар. Юқори доираларда газета чиқиши қўллаб-қувватланади.

Ўткир Ҳошимов кўп йиллардан бери "Дафтар ҳошиясидаги битиклар" номи остида ҳикматли сўзлар, қайроқи гаплар, фикр сачратқилари, митти ҳикоялар эълон қилиб келади. Барини тўплаб бадиий-фалсафий китоб қилиб чиқарди. Кейин тўлдириб, янги нашрини тақдим этди. Ҳозиргача саккиз марта нашр этилди. Костюм, пальтонинг чўнтакларига сифадиган чоққина китоб машҳур бўлиб кетди: уни метро, автобус, трамвайларда, навбат кутиб турганлар ўқишаётганини кўп кузатганмиз. Муаллифнинг ўзи ҳам ижодий учрашувларда "Битиклар"дан парчалар ўқиши хуш кўради: ҳам қисқа, ҳам теран, ҳам мароқли, майин юмор, тагдор ҳажвга бой ижоднинг ушбу шакли кейинги йилларда бизнинг ёзувчиларимизда ҳам урф бўлаётиби: Асқад Мухтор "Тундаликлар"и, Иброҳим Ғафуров "Мансуралар"и, Ғайбуллоҳ ас-Салом...

"Қисқалик – истеъдоднинг ҳамшираси" ақидасига амал қилган адиб лўндалиkkа, оз сўз орқали кўп маъно англатиш, фикр қаймоғини беришга интилади. Кутилмаган иборалар, мақол, мatal, ривоятларга унумли ва ўринли мурожаат, савол-жавоб (диалог), дил изҳори (монолог), қарши қўйиш (антитета), ёнма-ён қўйиш (параллелизм), маҳобат ва кичрайтириш, қайроқи гаплар, сўз ўйинлари, калит-сарлавҳалар, митти қатра-фиқралар – ёзилажак асарларнинг хамиртурушлари – бу ва бошқа фазилатлар, муаллифнинг эътирофича, кузатувлари, ўйлари, бир қадар табассумли хulosалари – бари "Битиклар"да мужассам. "Телбаларга таъзим қилинг! Юзта донишманд айтолмаган ҳақиқатни битта телба айтади!" "Девонаи ҳақгўй" битигидаги бор гап шу. Жумбоқ номи, илк сатрга муаллиф изоҳи, хulosасига тан берасиз. "Яхшигаям, ёмонгаям бирдек яхши кўринишга уринадиган одам энг хавфли одамдир", – дейилади бир битикда. Бир битикда Худодан умр, баҳт, фарзанд, давлат, омад сўраб мурожаат қилишганини кўп кўрган ҳолда "мен нодонга бир чимдим ақл бер" деб сўраган бандасини кўрмаганига афсусланади.

"Начора, нур бор экан, соя ҳам бўлаверади. Бирор нурни танлайди, бирор сояни..." Балки бу битик" муаллиф хаёлида қачонлардир туғилиб, дафтарига тушгандир, "Нур борки, соя бор" романига хамиртуруш бўлгандир. Умуман, анча-мунча битикларни ўқиганимизда, булар ёзилган ва ёзилажак асарларнинг хамиртуруши эмасмикан, деган фикр хаёлимиздан кечади.

Ўтган асрнинг саксонинчи йиллари иккинчи ярмидан кейин Ўткир Ҳошимов публицистика билан айниқса фаол шуғуллана

бошлади. Ошкоралик, ҳур фикрлик эпкинлари, ўзликни англаш, қадриятларни қадрлаш, Орол тақдири, она тилимиз истиқболи тўғрисида қайгуриш, саъй-ҳаракатлар, юртимизда юз берган мураккаб вазият, собиқ марказ ёпиширган "пахта иши", "ўзбеклар иши" каби ёрлиқлар, Москва, Ленинград, бошқа шаҳар, вилоятлардан юборилган "десант раҳбар"ларнинг қилмиш-қидирмишлари, хурмача қилиқлари, қўпгина беайб одамлар, заҳматкаш дехқонларнинг қамалиши ва бошқа нохуш ҳолатлар, буюк тарихий воқеа – Республикаизнинг Мустақилликни қўлга киритиши, истиқболга кенг йўллар очилиши миллатпарвар ижодкорларни лоқайд бўлмасликка, қўлга қалам олишга, ҳозиржавоб жанрга кўп мурожаат этишга даъват этди.

Ў.Хошимов вақти-вақти билан халқаро мавзуларда ҳам қалам тебратиб туради. Адиб ҳаётни, матбуотни синчков кузатади, бошқалар анчайин эътибор бермайдиган далил, воқеаларга алоҳида диққатни қаратади, хulosалар чиқаради. "Дўстлик хурматдан бошланади" мақоласида "Клуб служебного собаководства" тўпламида "Итларга қандай лақаб қўйиш керак?" – деган мақола билан чиқкан И.Духновскийнинг "тавсия"ларига кескин эътиroz билдиради. Итшунос таклиф этган лақаблар рўйхатида, асосан, мусулмон халқларига хос номлар кўп учрашини ва буни "мутахассис" марказ ёрлиқлар ёпиширган, ёмонотлик қилган халқ томорқасига тош отиб қўйиш ниятида қилганини таъкидлаб ёзади: "Афсус, китобда И.Духновскийнинг исми-шарифи тўлиқ айтилмаган. Билмадик, балки Игордир, балки Иван, балки Илья...". Нима бўлганда ҳам итга бу қадар бекиёс меҳр қўйган муаллиф ўз тавсиясида бирорта (ҳатто энг зотдор итга ҳам) Игорь, Иван, Илья деб лақаб қўйишни лозим топмайди. Тўғри-да, айтайлик, итшуноснинг ён қўшниси тўрт оёқли биродарига Игорь (Иван ёки Илья) деб исм қўйса-да, унинг кўз ўнгига "Игор, мана еб ол" деб суюк ташласа, итсевар "олим" бу манзарадан унчалик ҳам қувонмаса керак. Шундай экан, нега у ўзига раво кўрмаган нарсани ўзгаларга раво кўради?"

Москва журналларидан бирида босилган "Маиший ислом" мақоласи ҳам ҳудудимиз халқлари турмуш тарзи, урф-одатлари, тарихий қадриятлари ҳақида юзаки тасаввур беришини, баъзан аноним хатлар асосида ёзилганини Ў.Хошимов далиллар асосида исботлаб беради. Оташин, ёлқинли нутқ ҳам публицистиканинг ёрқин намунаси бўлиши мумкин. Ўткир Хошимовнинг Ўзбекистон компартия-

сининг XXII съездидаги (1990 йил, 4 июнь), иттифоқ коммунистларининг XXVIII съездидаги (1990 йил, 5 июль) сўзлаган нутқлари жасоратли дадил публицистиканинг сара намуналари дандир.

Ўткир Ҳошимов қисса, романлари публицистик рух билан йўғрилганини алоҳида таъкидлаш керак. Бу хусусият ушбу "Нур борки, соя бор", "Икки эшик ораси", "Тушда кечган умрлар" романларидағи қаҳрамон, персонажларининг монолог, диалогларида, онг оқимида, муаллиф нутқида, хат, хужжатларда бўртиб намоён бўлади.

АСАР ТИЛИ – ЁЗУВЧИНИНГ ҚАЛБИ

*«Ёзувчининг ўқувчига айтадиган дарди қанча
кучли бўлса, асар тили шунча бийрон бўлади»
«Дафтар ҳошиясидаги битиклар»дан*

Ўткир Ҳошимов айтмоқчи “бадиий ижод” худди “нотаниш орол”га қилинган саёҳатга ўхшайди. Бу “орол”нинг сир-синоатларини кашф этиш эса ҳар кимга ҳам насиб қилавермайди. Менимча, чинакам ижод ҳар қандай назариялару, қонун-қоидалардан устун туради. Ота-боболари бешикчи ўтган хунарманднинг оддий ёғочдан яратган мўъжизаларини, маҳоратини эсланг! «Готика», «акустика», «конструктивизм», «барокко» сингари архитектура атамаларини хаёлига ҳам келтирмаган ҳалқ усталари бунёд этган қадими меморий обидаларни, осори-атиқаларни кўз олдингизга келтиринг!

Бадиий ижод ҳам шунаقا нарса. Бадиий асар аввало ёзилади, бошқа гаплар кейин унинг атрофида пайдо бўлади. Шу маънода, бадиий ижод ҳам том маънода сирли ҳодиса. Ўткир Ҳошимов топиб айтганидек, «саккизинчи мўъжиза».

«Тасаввур қилинг, – деб ёзади у. – Сиз тасвирий санъат музеийига кирдингиз. Полотнолардаги рангларни, одамларнинг қиёфасини кўзингиз билан кўриб, ҳаяжонга тушасиз. Тасаввур қилинг, сиз магнитофонда мусиқа тинглаяпсиз. Чолғу оҳанглари, хонанданинг овозини қулоғингиз билан эшлитиб, ҳаяжонга тушасиз... Энди тасаввур қилинг: сиз китоб ўқияпсиз. Оқ қофозда қора чизиклар – ҳарфлардан бўлак ҳеч қанақа ранг йўқ. Ҳеч ким куй ҳам чалмайди. Аммо асарни ўқишига киришишингиз билан кўз ўнгингизда рангин манзаралар пайдо бўлади. Қулоғингиз остида ажиб оҳанглар жаранглай бошлайди. Ўзингиз билмаган ҳолда қаттиқ ҳаяжонга тушасиз...

Ҳеч шубҳасиз, бадиий адабиёт – дунёдаги саккизинчи мўъжиза».

* * *

«Фақат ўзинг билган, ишонган нарсанигина ёз» деб таълим беришади устозлар. Шу маънода, Ўткир Ҳошимов ижодига назар ташлаган киши, аввало, ўзига таниш ва қадрдон манзараларга гувоҳ бўлади. Яъни ёзувчи айтаётган ва айтмоқчи бўлаётган фикрлар унга ҳам begona эмас, уни ҳам ҳаяжонга солади, ўйлатади, куйдиради, кулдиради.

Ким билсин, «асардаги ҳаётийлик» деганлари балки шудир? Ўткир Ҳошимов ижоди, асосан, кечаги, бугунги ва эртанги ўзбеклар ҳаётига бағишланган дейилса, муболаға бўлмаса керак. Уларда олис ва яқин уруш садоларини ҳам, собиқ шўро тузуми истибоддарию бугунги Мустақиллик қувончларини ҳам кўрасиз, ҳис қилиб турасиз. Адиб Паустовский ҳақ бўлиб чиқяпти: «Бисотида одамларга айтадиган янги, аҳамиятли ва қизиқарли нарсалари бўлган, оламда бошқалар сезмаётган нарсаларни кўп кўра оладиган инсонгина ёзувчи бўла олади», деганди у. Кейин шундай давом этади: «Ҳар бир дақиқа, бехосдан айтилган ҳар бир сўз ва ташланган нигоҳ, ҳар бир теран ва юзаки фикр, инсон юрагининг ҳар бир сезилмас ҳаракати, теракнинг учиб юрган момифи ёки кечаси кўлмакда жимиirlаган юлдуз шуъласи, ҳамма-ҳаммаси олтин чангининг зарралариdir. Биз қаламкашлар, ўн йилларча мана шу кичик зарраларни йигамиз, йигаётганимизни ўзимиз ҳам пайқамаймиз, бир бўлак тиллага айлантирамиз ва кейин ундан ўзимизнинг «олтин гул»имизни – повест, роман ёки поэмамизни ясаймиз...»

Бадий ижод психологиясининг ниҳоятда оригинал ва тўғри талқини бу. Лекин ўша зарраларнинг «олтин гул»га айланиш жараёни-чи? Буниси энди осон иш эмас. Бунинг учун қўлига қалам олган киши адабий асарнинг қўплаб компонентларидан хабардор бўлмоқлиги талаб қилинади. Мен бу фикрга тўла қўшилмасам-да, академик Иззат Султоннинг шу хусусидаги сўзларини эслайман: «Бадий асар сюжет, композиция, характер ва бошқа компонентлариз майдонга келмайди, – деганди у. – Характерлар тасвири бадий асарда ҳаётни инъикос эттиришнинг бош воситаси ва шаклиdir. Аммо бадий асарнинг ҳамма компонентлари фақат тил орқали ифода этилади. Шунинг учун ҳам тилнинг бадий асардаги ўрни жуда каттадир».

Ўткир Ҳошимов ижодига мурожаат қиласиган бўлсак, унда тил ва тасвирнинг рангин товланишларига гувоҳ бўламиз. Хусусан, «Тушда кечган умрлар» романида шундай тасвирлар бор: «...Тепақўргон катта қишлоқ эди. Чор-атроф боғ-роғлар, узумзорлар... Соат баҳор палласи хирмонтепага чиқиб варрак учирар, бутун қишлоқ кафтда тургандек кўринар, ер-кўк ўриклару шафтолилар гулига кўмилиб кетганга ўхшар эди. Ҳар йили сомоншувоқ қилинавериб қалин тортиб кетган томлар устида қип-қизил лолақизғалдоқлар, муnis чучмомалар очилар, қишлоқ этагида ёйилиб

оқаётган Қонқус олисдан жигарранг илондек тўлғанаётгани кўзга ташланарди»

«...Қурбонойнинг эсидан чиқмайди. Дадаси қамалган йили қиши каттиқ келди. Кетма-кет қор ёғиб, совуқ забтига олди. Ҳовлидаги тут шохлари қор залвори остида эгилиб турар, мусичалар айвонда пилдираб нон-ушоқ излар, она-бала илимилик танчага тиқилиб, кечалари алламаҳалгача ухломай ётишарди» Сезаяпсизми? Қанчалар ўзбекона тасвиirlар, деталлар, миллий манзаралар. Ушбу саҳифаларни бирон хорижий тилга, айтайлик, инглиз, француз, немис ё испан тилига ағдараётган таржимонга қанчалар қийин бўлишини тасаввур қилиб турибман. Бунинг учун мутаржим бояқиши «хирмонтепа», «варрак», «сомоншувоқ қилинавериб қалин тортиб кетган томлар», «пилдираб нон ушоқ излаб юрган мусичалар»у, «илимилик танча» нима эканлигини билиши, кўз олдига келтириши, лоақал тасаввур қила олиши керак. Балки «бадиий асардаги миллий колорит» деганлари шудир?

Харқалай, адабиётшунос олимлар ва мунаққидлар Ўткир Ҳошимов ижоди ҳақида тўхталишаркан, кўпинча, «Тили ширин, тасвири тиник, услуби дилбар ёзувчи» дейишади. Мен ҳам шу ҳақда кўп ўйлайман. «Тилининг ширинлиги», «тасвирининг тиниқлиги», «услубининг дилбарлиги»ни сири нимада экан? Бир қараганда, адабнинг тили бошқа ёзувчиларнинг тилидан қаришиб фарқ қилмайди. Ҳаммаси она тилимиз – ўзбек тилида ёзилган, ўша маълум ва машҳур, 35 та ҳарфдан иборат «калифбо»нинг ўзига хос «рақси», «намойиши» ҳам дейиш мумкин. Устоз Иброҳим Faфуров ҳақли равища таъкидлаганидек, «Ўткир Ҳошимов сўзга қут ва ранг бағишлий оладиган ёзувчи». Янглишмасам, Ўткир Ҳошимовда айнан шундай. У ҳеч бир сўзни бехуда ишлатмайди, ҳеч бир бадиий тасвир воситасини бехуда қўлламайди. Уларнинг ҳар бири ўша асарнинг мазмун ва моҳиятига хизмат қиласи. Зеро, Ўткир Ҳошимов ижод психологиясини чуқур биладиган адиб. Тўғри, у ҳаётда, адабий учрашувларда ёки ўзаро сухбатларда бу ҳақда умуман гапирмайди. Ўз «устахонаси»нинг энг нозик сирларини яшириб юрадигандек туюлади менга. Балки бу «адабиётни муқаддас даргоҳ», ижод жараёнини «илоҳий бир неъмат» деб эътиқод қилгани учундир? Билмадим... Фақат биринчи асари эълон қилинганидан кейин орадан қирқ беш йил ўтгач, нашр этилган «Саккизинчи мўъжиза» деб номланган^{*} китобидагина адиб Сўз қудрати ҳақида фикрларини эълон қилди.

* Ҳошимов Ў. Саккизинчи мўъжиза. Адабий ўйлар. Т.: MUMTOZ SO‘Z, 2009.

Кези келганда айтиб қўяй: бу китоб тадқиқотчилар, филологлар, адабиёт ўқитувчилари, талабалар, бўлажак ижодкорлар учун кўп нарса беради. Ёзувчи Сўз деган муқаддас тушунча қаламкаш учун шунчаки фикрни ифодалаш воситаси эмаслигини сўз фақат маъно, портрет ёки манзара эмас, ранг, оҳанг, таъм, руҳият, ҳолат, кайфият, ҳаракат тушунчаларини ташийдиган қудратли қурол эканини ғалати мисолларда исботлайди.

Ҳийла каттароқ бўлса ҳам ушбу китобдан бир парчани келтириш лозим деб ўйлайман. Бир манзарапинг ўзи қаҳрамон руҳиятидан келиб чиқиб, икки хил маъно ташиши мумкин. «Осмонда юлдузлар ёрқин-ёрқин порлар, уч қунлик ҳилол тиллақошдек ярақлаб тураг эди». Бу – бир ҳолат. «Кирланган докадек хира булут ортида шом еган ой маъюс мунғайиб турибди». Буниси – бошқа ҳолат.

«Қор учқунлади» деган ибора билан «Гупиллатиб қор ёғди» деган иборада бир хил табиат ҳодисаси – қор ёғиши тасвираняпти. Аммо динамика, ҳаракат икки хил. Ёки «Шабада эсди, дераза ортидаги бир туп терак япроқлари эркаланиб рақсга тушди» деган жумла билан «Тўсатдан қаттиқ шамол турди, дераза ортидаги бир туп терак япроқлари жонсарак қалтираб қолди» деган жумлада икки хил ҳолат бор. «Ойдин кечалари гуллаган ўрик тагида ётсангиз, осмоннинг аллақайси бурчида учиб бораётган турналарнинг шодон қийқириғи эшитилади» деган гап билан «Ойдин кечалари япроқи сарғайган ўрик тагида ётсангиз, булут қоплаган осмоннинг аллақайси бурчида учиб бораётган турналарнинг хорғин ноласи қулоқقا чалинади» деган жумла орасида катта фарқ бор, икки хил фасл, икки кайфият, икки хил туйғу бор... «Булут босган осмонда чақмоқ чақди. Зум ўтмай момақалдироқ гумбирлади» деган жумлада тасвир бор. «Қўрғошиндек оғир ва қоп-қора булут босган осмонда чақмоқ илдиз отди. Зум ўтмай момақалдироқ наъра тортиди» дегандан эса булут ҳам, чақмоқ ва момақалдироқ ҳам образли тасвирга айланади. Адид «Жала қуиди, ҳавода тут ҳиди гуркираб кетди» деб ёзса, кеч баҳор ёмғирини, «Ёмғир шивалаб ўтди, димоққа қизиган тупроқ ҳиди урилди» деса, эрта куз ёмғирини тасвирлаган бўлади...»

Мен адиднинг ана шу «сирли олами»га киргим, билгим, англаб етгим, баҳоли-қудрат таҳлил қилгим келади, қидираман, изланаман ва ниҳоят топгандек бўламан. Биласиз, адиднинг «Узун кечалар» деган гўзал бир психологик ҳикояси бор. Ўз вақтида оғизга тушган ва ҳозир ҳам мароқ билан ўғиладиган асалардан бири. Унда Марат

Азизов деган ёш ёзувчи ҳаётидан айрим лавҳалар тасвирланиш баробарида юқорида эслатганим – бадий ижод психологияси, ёзувчининг шахсияти ҳақида ҳам озми-кўпми сўз юритиладики, мен худди «сирли сандик»ка «олтин калитча» топиб олгандек бўламан. Асар қаҳрамони ҳамиша фикрлашда. Бутун фикри-зикри ижодда. У ҳаётда ҳеч ким ва ҳеч нимага бефарқ қараёлмайдиган йигит. Лекин унинг учун, яна бир бор такрорлайман – биринчи навбатда ижод муҳимроқ,

Мисолларга ўтаман...

«– Шу сизнинг китобингизми? Қанақа қилиб ёзасиз?» – сўрайди қиз.

«– Стол ёнига ўтириб ёзаверади-да. Бу ҳам бир касб-да», – дейди қаҳрамон.

Бошқа бир ўринда Хилола «Мен ҳамма ёзувчилар ўзининг бошидан ўтганини ёзади, деб ўйлайман» дейди.

« – Йўқ, – Марат кескин бош чайқади. – Унақа бўлса кундалик ёзиб қўя қолган маъқул эмасми?»

« – Ҳаммасини ичингиздан тўқиб чиқарасизми? Бўлмаса, ёзганларингиз ёлғон экан-да?»

« – Ўша китобдаги гапларга ишондингизми ахир?»

« – Мен Ферузани худди ўзимга ўхшатдим»

« – Демак, ёлғон эмас экан-да»

« – Сиз ёзувчиларга мазза! Илҳом келганда китоб ёзасизлар.

Ҳамма сизларни мақтайди...»

« – Илҳомнинг ўзи нима?»

« – Билмасам, ... «Илҳом париси», «Илҳом гулшани», яна алланималар дейишади-ку!»

« – Ҳаммаси мавхум гап! Илҳом ҳаммада ҳам бўлади. Илҳом тез, осон, мазза қилиб ишлаш дегани. Гоҳо ойлаб-йиллаб қийналиб, битиролмай юрган ишингизни бир кунда бажариб қўясиз. Шунақа ишлайсизки, ўзингиз ҳам роҳат қиласиз...»

Яна бир жойда, Марат синик оҳангда дейди:

« – Ҳали сиз ёзувчиларга мазза, китобини ёзиб юраверади, дедингиз... Баъзан шунақа бўладики... Мана, сиз... Бировни ёмон кўрсангиз, гаплашмай қўяқоласиз. Унинг яхши томонларини қидириб ҳам ўтирмайсиз. Туғилганида ҳаммаям пок бўлади-ку! Ёзувчи душманидан ҳам дўст ахтаради. Ўшани тушунишга ҳаракат қиласиди...»

« – Ёзувчи холис бўлиши керак, – дейди яна бир жойда. – Мен ҳеч қачон бировни қоралаб, бировни оқламайман. Турмушда фақат оқ, фақат қора бўёқ бўлади деган гап ёлғон».

Энди мана бу лавҳага диққат қилинг: «... бирдан уйғониб кетасиз... Шунда сиз юрагингиз кўксингизга сиғмай типирлаб кетганини ҳис қиласиз. Алланечук олис, эртак каби гўзал бир олам кўз ўнгингизга келади.

Марат кўпдан буён ана ўша олам тасаввури билан яшар эди. Шу кеча уйғониб кетдию, бирданига ўзи кўпдан буён аниқ тасаввур қилолмай юрган оламни кўзгудек равшан кўрди... Бир яrim йилдирки, ўша сирли олам хаёлида тунлари уйқусиз кезиб чиқар, аммо унга киролмай азоб чекар эди. Бу – ижод олами эди... Бир яrim йилдирки, бўлажак китобининг қаҳрамонлари унинг атрофида айланиб юрадиyo, аммо тутқич бермасди. Мана, бугун улар бирданига ўз оёғи билан Маратнинг қалбига кириб келди. Уларнинг чехрасидаги ҳар бир ифодагача, кўнглидаги ҳар бир ниятигача аниқ кўра бошлади. Мавҳум бир оламда қочиб юрган қаҳрамонлар энди уни ўз кетидан эргаштириб кетди.

Марат шаршарадек оқиб тушаётган фикр-туйғуларини тўкиб сола бошлади. Кўллари титраб, эгри-буғри ҳарфлар билан ёза кетди...»

Тан олиш керак, бошқа ҳеч бир ўзбек ёзувчиси ижод оламини, илҳом дақиқаларини, ана шу сирли ва сеҳрли жараённи бунчалар нозик ҳис қилмаган, бунчалар аниқ ёзмаган.

Ҳикоя қаҳрамони Марат Азизов шу тариқа ўзининг ёзувчиувлари билан ўралашиб, кейинги пайтларда «энг яқин одами бўлиб қолган, қалбининг нурли бир парчасига айланган қиз»нинг ёнига кечикиб боради. Турган гап, қиз ранжийди, шубҳаланади.

Шунда Марат «Мен бир нарса ёзаётгандим» дейишга, ростини айтишга мажбур бўлди.

Ва ҳикоя шундай давом этади:

- « – Нарса ёзаман деб ҳаммадан кеча қолинг, – дейди қиз.
- Бошқа иложим йўқ эди...
- Иложи йўқ денг?
- Йўқ!
- Бўлмаса, мендан кеча қолинг!
- Мен айтгандим, менга дўст керак, ҳамроҳ керак дегандим...
- Йўқ, айтсангиз-чи, ижодингиз учун мендан кеча қолинг!

– Мен бошқача яшай олмайман. Балки иккаламиз ҳам адашгандирмиз. Сиз тўғри айтаяпсиз. Бир умрлик ташвишимга сизни шерик қилишимнинг нима кераги бор?»

Мана шу ерда бир деталга дикқат қилишингизни истардим:

«Марат кескин бурилди-да, чироқ нурида ялтираб ётган халқоб устидан сакраб ўтди», – деб ёзади муаллиф.

Эътибор беринг: «халқоб» деяпти адиб. Аксинча, «шарқираф оқиб ётган ариқча устидан хатлаб ўтди» дейиши мумкин эди-ку? Лекин у бундай демайди. Айнан «халқоб» деб ёзади. Ва давом этади: «Нарироққа бориб қайрилиб қаради. Хилола халқоб олдида бошини қуи солиб турарди...» Сезган бўлсангиз, «чироқ нурида ялтираб ётган халқоб». Оқар сув эмас, шунчаки кўлмак. Яъни ўқувчи юқорида гувоҳ бўлган йигит-қиз ўртасидаги муносабат чинакам муҳаббат эмас, шунчаки ўткинчи бир ҳис, бир ҳавас холос. У офтобнинг бир парчаси янглиғ кўзни олгудек ярақламайди. Хира. Оний бир муҳаббатнинг ожиз бир шарпаси...

Асар қаҳрамони шу ерда адашганини сезади. Сезадиу, сездирмайди. Чунки у, аввало, олийжаноб инсон – ёзувчи! Ҳатто ўз душманига ҳам ёмонлик раво кўрмайди.

Ва муаллиф ёзади:

«У ёмғирпўшини осилтирганича, кўлмак кечиб борар, боя таҳририятга йиғлаб келган баҳтиқаро қизнинг аччиқ қисматини ўйлар, ўзи эса қаёққа кетаётганини билмас эди...»

Ана шу ерда китобхон бир қалқиб тушади. Асар қаҳрамонининг бу ҳолатидан ҳайратланади. Балки ўша тобда хаёлидан «Мана, ёзувчиликни қисмат деб билган одамнинг ҳаёти» деган ўй ҳам лип этиб ўтиши мумкин.

Нимаям дейсиз, ёзувчининг такдири ўзи шунаقا бўлади. «Эртак каби гўзал бир олам» – ижод оламининг ҳамма ҳам англаб ета олмайдиган сиру синоати шунда!

Назаримда, Ўткир Ҳошимов айнан шу асарида ўзининг «ижодий лабораторияси»га оид айрим «сирлар»дан китобхонни огоҳ этиб қўйган. Ким билсин, балки атайнин шундай қилгандир?! Кейинчалик мен адибнинг «Нотаниш орол», «Дафтар ҳошиясидаги битиклар» деган китобларини ўқиб чиққандан кейингина, у маълум тажрибага эришгач, халқ тан олган, атоқли ва ардоқли ёзувчи бўлганидан кейингина, булар ҳақида атрофлича тўхталишни лозим топганини ҳис қилгандек бўлдим.

КОВУРДОҚ

Ёзувчи Эркин Усмоновнинг "Эртак каби гўзал бир олам..." деган китобчаси* қўлимга тушди. Китоб Ўзбекистон халқ ёзувчиси, эл ардоғидаги адаб Ўткир Ҳошимов ижодиёти ҳақида эди. Китобни қандай бошлаб, қандай тугатганимни билмай қолибман. Ўқиб бўлгандан кейин бир муддат кўзларимни юмиб гўзал таас-суротларга ғарқ бўлиб ўтиредим. Ўткир аканинг ҳикоя, қисса ва романларини ўқиганман, адаб ҳақидаги мақолаю адабий порт-ретнинг ҳам анча-мунчаси таниш. Лекин Эркиннинг эссесидан ке-йин адабни яна бошқатдан кашф этаётгандек, Ўткир аканинг эртак каби гўзал олами – ижод оламидаги инжа манзараларни томоша қилаётгандек эдим: "Жала қуиди, ҳавода тут ҳиди гуркираб кетди", "Ёмғир шивалаб ўтди, димоққа қизиган тупроқ ҳиди урилди", "Анҳор ёқасида жимгина мудраб ётган гўристонда яна бир қабр мунгли дўппайди", "Осмон чинни тавоғи тўнтарилган уфқларга ти-киламан", "Қора баҳмалга қадалган дурдек ялт-ялт этиб кўз қи-саётган юлдузлар мудраб-мудраб охири сўнди", "Машина ўйдим-чуқур йўлда ҳаккалаб юра кетди", "Чирмандадай қизғиш ой тир-маша-тирмаша бақатеракнинг устига чиқиб олди", "Қонталаш ос-мон хиралашиб, адирлар орқасидан этагини судраб оқшом кела-бошлади", "Ховлидаги бир туп ўрик шохларида қинидан чиққан довучча мўралади..." Бири-биридан тиник бу манзаралар оғуши кимни сеҳрламайди, яйратмайди, ўйлатмайди, дейсиз! Эркинжонга раҳмат. Ёзувчининг кимлигини кўрсатиш учун том-том ҳамду санолар айтиш шарт эмас, мана шундай оддий мисоллар кифоя.

Бундан кўп йиллар илгари, талабалик даврида мен ҳам худди шундай ҳолатга тушганман. Пединститутнинг (ҳозир университет) учинчи курсида ўқирдик. Ҳам суюкли домламиз, ҳам ёш ижод-корларнинг "Чашмалар" тўгараги раҳбари Пирмат Шермуҳамедов ёзувчининг маҳорати ҳақида гапираётиб, Ўткир Ҳошимовнинг "Муҳаббат" ҳикоясидаги: "Арслонбоб тоғининг чўққиси ёниб кетди" деган тасвирни завқ-шавқ билан, узок таҳлил қилди. Мен адабнинг бу ҳикоясини ўқиган эдим. Домламизнинг сўzlаридан кейин ҳикояни бошқатдан ўқидим. Нафақат "Муҳаббат"ни, "Бир

* Усмонов Э. Эртак каби гўзалбир олам... Т.: MUMTOZ SO‘Z, 2009.

томчи шудринг" китобидаги барча ҳикоялару "Шамол эсаверади" қиссасини ҳам хижжалаб, Пирмат Шермуҳамедов айтгандек, "ижодкор кўзи билан" ўқидим. Ва... худди ҳозиргидек, ажиб мўъжиза содир бўлди: китоб саҳифаларига жон кирди; ранг-баранг қиёфали, мураккаб тақдирли кишилар қуршовида қолдим; гўзал ташбиҳлар, манзаралар, тасвирлар, фикрлар дарёсида сузуб юргандек эдим гўё. Ўткир Ҳошимов ижодий оламининг нафис ранглари, гўзал шакли, мазмун ва моҳияти энди бутунлай бошқача бўлиб қолгандек эди. Мен ҳам китобдаги ёрқин тасвирлару ибораларни бир дафтар қилиб кўчириб олганман...

Ўзинг билган, таниган, ҳатто бир пайтлар "Шарқ юлдузи" журналида бирга ишлаган ва ҳурмат қилган одаминг тўғрисида илиқ ва ҳалол фикрларни эшитганда шундай ёқимли кайфият пайдо бўлар экан инсонда.

Ўткир Ҳошимов 1985 йилдан 1995 йилгacha "Шарқ юлдузи" журналини бошқарди. Ростини айтганда, бу йиллар республика-миздаги етакчи адабий журналнинг юлдузли онлари бўлди. Тиражи 150 мингдан ошиб кетди. Саксонинчи йилларнинг ўрталари юртимиз учун мураккаб давр бўлди. Бир томондан, "ошкоралик", "қайта қуриш" деган шиор удум бўлса, иккинчи томондан, "ўзбек иши", "пахта иши" деган қатағон бошланган эди. Айнан шу кезлари бир замонлар "қораланган асарлар – "Темур тузуклари", Чўлпон, Фитрат каби собиқ "халқ душманлари"нинг роман, шеър ва драмалари минг хил чиғириқдан ўтказилса-да, дунё юзини кўра бошлади. Шу тариқа журнал бўлажак мустақиллик йўлида имкон борича хизмат қилди. Шу боисдан бўлса керак "Шарқ юлдузи" эл орасида машҳур бўлиб кетган эди.

Адибнинг ўзи ҳам "Бахор қайтмайди", "Нур борки, соя бор", "Қалбингга қулоқ сол", "Дунёнинг ишлари", "Икки эшик ораси" сингари китоблари, телевидениеда намойиш қилинадиган "Бахс" кўрсатуви билан эл эҳтиромини қозонади. Шуларни эслаб туриб, Самарқандга қилган бир сафаримиз лоп этиб кўз олдимда пайдо бўлди. Ўша сафарни ён дафтаримга қайд қилиб борганим ҳам ёдимда. Дафтар қаердадир турган бўлиши керак.

"Архив"ни титкилаб-титкилаб, ахийри топдим. Муқовасига "1986 йил 4-5 апрель. Самарқандда "Шарқ юлдузи" кунлари" деб ёзиб ҳам қўйган эканман.

1986 йил... Ё қудратингдан! Ана-мана дегунча орадан шунча йил ўтиб кетибди.

Тошкентдан Самарқандга бораётганимизда баҳорнинг фараҳбахш кунлари бошланган эди.

– Баҳор ҳавоси жа-а бошқача-да. Тоза, ўпка тўлиб нафас олганда танинг яйрайди, – деди олдинда – шофёрнинг ёнбошида атрофни суқланиб кузатиб бораётган Озод Шарағидинов.

Тор, биқиқ шаҳардан чиққанингдан кейин ўзгариш дарров билинади, – деб домланинг фикрини қувватлади Сайд Аҳмад ака.

– Баҳор гўзал, афсуски тез ўтади, – деди Ўткир ака.

– Ўткир, – деб илжайди Сайд Аҳмад ака. – Бундай тиниқ ҳаво сенга ўхшаш чала паканалар учун жуда фойдали, бир тўйсанг, бир қоп дори еган теракдай бўйинг ўсиб кетади.

– Одамнинг бўйи дори билан ўсганида сизнинг бошингиз аллақачонлар булатуга тегиб юрган бўларди, устоз, – бўш келмади Ўткир ака ҳам. – Ўзбекистонда сиздан кўп дори ичадиган ёзувчи бўлмаса керак.

– Толиб Йўлдош уйига меҳмон келса уларни олдида телефон қилиб, мени сўкиб, меҳмонларга мақтанади, – деди Сайд Аҳмад ака менга қия қараб. – Редакторинг ҳам Озод домласининг олдида ўзини кўрсатмоқчи. – Сўнгра бошини чўзиб Ўткир акадан сўради:

– Маҳмаданагарчилик қилгунча, менга айт, қовурдоқ нима бўлди? Ҳойнаҳой, эсингдан чиққандир?

– Устоз, сизнинг сўз – биз учун амривожиб. Устознинг қўнгли қовурдоқ тусабди, деб келинингиз икковимиз сўфи аzon айтмай, пиширган бир қозон қовурдоқни кастрюлкага босиб олганман. Ана, машина багажида турибди. Бирон жойда тўхтаб, тамадди қилиб олайликми?

Озод ака савол бердию, мавзу ўзгарди.

– Учрашув қаяғда бўлади, Ўткир?

– Биринчиси университетда. Ундан кейин Ургутда, Каттақўрғонда.

– Ургутга борсак зўракан, жаннат жой. Бир келганда Чорчинорни зиёрат қилувдик. Неччи минг йиллик чинорлар, учи кўринмайди. Булоқларининг муздайлиги... Айтгандай, сиз Ургутдан, шундайми? – деди Озод ака елкаси оша менга бурилиб. – Ургут деган сўзнинг маъносини биласизми? – Аммо жавоб кутмай ўзи давом этди. – Ургутнинг асл номи Уркент, яъни – тепаликдаги шаҳар. Мирзо Бобур шундай ёзган. Замонлар ўтиши билан Уркент Ургутга айланиб кетган.

– Кутбиддин домла Ғафур Ғуломга Ургут тўғрисида кўп гапирав эдилар, – деб эслади Сайд Аҳмад ака. – Ҳумулий Ургутий, Ғавсул Аъзам каби авлиёлар ҳақида айтганлари эсимда.

– Кутбитдин домла чин аллома эди, – деди Озод ака хўрсиниб.

– Сайд Аҳмад ака, кузатганмисиз, Нуриддин Шукровда шу одамни эслатадиган доноликми, файласуфликми, ишқилиб, бир фаришталик бор.

– Воҳид Абдуллада денг, Воҳид Абдулла кўпроқ ўхшар эди...

Суҳбат мавзуи шу тариқа самарқандлик олиму фузалоларга кўчди. Озод ака Навоий, Улуғбек, умуман, темурийлар замонида Самарқанд дунё маданияти бешиги бўлганидан, Сайд Аҳмад ака Ғафур Ғуломнинг Садриддин Айний хонадонидаги саргузашларидан сўзлади.

Гап билан манзилга етганимиз сезилмади.

"Шарқ юлдузи" кунлари университетдан бошланди. Катта, ҳашаматли залда биттаям бўш жой йўқ эди. Шаҳардаги бошқа олий ўқув юртларида, мактаб-маориф соҳаларида ўқиб-ишлайдиган адабиёт ихлосмандлари ҳам ташриф буюришган. Адабий машваратга йўлда номи тилга олинган профессор Нуриддин Шукров бошчилик қилди. Навбат Сайд Аҳмад ака билан Ўткир акага етганда эса давра қизигандан-қизиди. Сайд Аҳмад ва Ўткир Ҳошимов билан аввалроқ икки марта ҳамсафар бўлганим учун улар орасидаги муносабат устоз-шогирдликдан-да баланд, худди ота-бола, йўқ, туғилгандан бирга ўсан тенг-тўш ўртоқлар ўртасидаги каби содда, самимий ва очик-оидин эканига гувоҳ бўлган эдим. Сайд Аҳмад домланинг ичакузди ҳангомалари, ҳозиржавоб ва топқирлиги, Ўткир акани суюмли фарзанди каби эркалашлари, латифагўйлик бобида Ўткир ака ҳам устоз билан елкама-елка туриб "жанг" қилишлари таниш эди менга.

Улкан адаб Сайд Аҳмаднинг ўша кунги чиқиши ҳам ҳазил билан бошланди.

– Самарқандга катта умидлар, ёруғ режалар билан келувдим, – деди минбарга чиққанидан кейин бир муддат залга тикилиб тургач.

– Чиройли боши очик бева чиқса, самарқандга куёв бўламан деб ўйловдим. Афсус, бевақт суюнган эканман. Ҳаммангиздан хафаман. Шу зайлда ўтирганлар билан илиқ муносабат ўрнатишга эришган Сайд Аҳмад домла “яна нима деркин”, деган қизиқиш ичра ўзига маҳлиё бокиб турганларга, журнал ва унинг мазмун-

мундарижаси тўғрисидаги фикр-мулоҳазаларини айтди. Машваратнинг "Савол-жавоблар" қисмида Сайд Аҳмад ака янаям очилиб кетди. Ҳар саволга ҳазиломуз, аммо чуқур мантиқли иштибоҳлар топиб, даврани яшнатиб юборди.

Мана, ўша савол-жавоблар ва уларнинг дафтаримда қолган айрим шакллари.

Самад Тоғаев, 4-курс талабаси:

– Ҳозир Ўткир Ҳошимовнинг асарлари тили, маҳорати ҳақида гапирдингиз. Ҳаммамиз яхши кўрадиган ёзувчининг яна қайси фазилатлари сиз учун қадрли?

Сайд Аҳмад:

– Билиб турибман, бу саволни сенга Ўткирнинг ўзи айтиб туриб ёздирган. Бўлмаса, "Шарқ юлдузи"га бағишлиланган йиғилишда бундай савол бермасдинг. Ўткир менинг шогирдим. Психологиясини икки карра иккiday ёдлаб олганман. Ҳозир ҳам устозим халойиқ олдида мақтасин, деб сени тезлаган. Аммо-лекин мақтаса-мақтагулик ҳамма фазилат бор Ўткирда. Қуёшдан энергия олиб ишлайдими, нима бало, ҳар кун икки-учта ҳикоя ёзиб, қиссага ўтиради, қисса тугаши билан роман ёзишга киришади, романга нуқта қўяр-қўймас пъеса бошлаб юборади. Ё қўли тўртта, ё хотини ёзишади, ёки маҳаллада ёзувчилик артели бор буни. Шунча ишни дўндириган одам, камида бир йил дўппини ёнига қўйиб, соя-салқинда ошхўрлик қилиб ётиши керак. Бу бўлса телевизордан тушмайди. Кейинги пайтларда токка дазмол тиқсанг ҳам Ўткир Ҳошимов кўринадиган бўлиб қолди (қийқириқ, кулги).

Ирода Мўминова, биринчи курс талабаси:

– Менинг саволим иккита. Биринчиси, "Наврўз" байрами нима учун таъқибга учради. Иккинчиси, "Куёв" асарингизнинг ёзилишига нима туртки бўлган?

Сайд Аҳмад:

– Мен ҳукумат эмасман, бир бечора ёзувчиман. Бундай саволларга анави редактор жавоб берсин. Саволингнинг иккинчисига келсак, "Куёв"ни кўрганидан сўнг кўп чоллар заксадан ўтиб, баҳтли турмуш қуришаётгани факт.

Муножат Омонова, талаба:

– Ўткир ака, сизни муҳаббат куйчиси дейишади. Бугун бир қиз билан юриб, эртага бошқа қиз билан кетадиган бевафо йигитларга муносабатингиз қандай?

Сайд Аҳмад:

– Ўткир ўйлаб олгунича мен фикримни айтай. Йигит бўлиб қолсам, ўлай агар, мен ҳам худди шундай қилган бўлар эдим.

Ўткир Ҳошимов:

– Ёшлик инсонга бир марта берилади. Севги эса Яратган томонидан ёшликка инъом этилган бебаҳо неъмат. Уни қадрла-маганлар, армон билан ўтади.

Осоқ Очилов, талаба:

– Ўткир ака, илҳом дегани нима?

Ўткир Ҳошимов:

– Маза қилиб ишлаш.

Шукур Солиев, ўқитувчи:

– Сайд Аҳмад домланинг режаларини билдик. Сизники қандай?

Ўткир Ҳошимов:

– Қаламкаш факат ёзаётганида эмас, ёзмаётганда ҳам ижод билан машғул бўлади. Унинг тафаккури ва изланиши бир лаҳза ҳам тўхтамайди. Бироқ мен зўр ёзувчи бўлдим, деган куни ўзини ўзи ҳалокатга йўлиқтирган бўлади. Аксинча, ўзидан қониқмаслик ҳисси ижодкорни тарбиялайди. Ҳозир каттароқ асар ҳақида ўйлаб юрибман. Бироқ битмаган нарса ҳақида гапиришни истамайман.

* * *

Учрашувдан кейин Ургутга, бизни қишлоқقا жўнадик.

Сайд Аҳмад ака дарвозахонадан супага ўтиб, кенг ҳовлига назар солди. Ҳовли адодидаги баҳайбат уч туп ўрик, якка бўлса-да, уларданам басавлатроқ бўлиб турган ёнғоқ ва катта-кичик олмагилосларни мароқ билан қўздан кечирди. Супа, супа бурчида олхўри, олхўри остида семон ҳовузча, водопровод жўмрагидан жилдираб оқаётган сув ҳовузчани лимо-лим тўлдирган, ҳовуз деворидан тошиб чиқаётган сув майса қоплаган ариқча орқали дарахлар ости томон оқиб ётибди.

– Бойбово, кечқурун ҳув анови ерга битта симкарават қўйиб, Озод домлага жой қилиб берасиз, – деди Сайд Аҳмад ака ҳовли тўридаги ёнғоқ тарафни менинг отамга кўрсатиб. – Томингизнинг шипири жуда юпқа экан, домланинг хуррагига чидолмайди, эрталаб шипир кидириб юрмайлик деяпман-да.

Мехмонхонамиз бирпасда улкан ёзувчилар келганидан бохабар ҳамқишлоқлар билан тўлди. Сайд Аҳмад ака улар қуршовида

дилкаш сухбатга тушиб кетган пайтда Ўткир ака кўзи билан "кўчага чиқайлик" дегандай имо қилди. Ҳамманинг эътибори Сайд Аҳмад акада эмасми, сирғалиб чиқиб кетганимизни ҳеч ким пайқамади.

– Бир қишлоқ айланмаймизми? – деди кўчага чиққанимиздан кейин Ўткир ака. – Анча бўлди, тўсатдан вовуллаб оёғингга ташланувчи кучукларга тош отмаганимга.

– Хавотир олманг, – дедим, – Бизнинг кучуклар ақлли, меҳмонга ташланмайди, салом беради.

Икковимиз қоп-қоронғи, тош кўчадан секин юриб кетдик. Ҳали ётар пайти эмас, қишлоқнинг турли томонида итлар акиллаши, эшак ҳанграши, аёлларнинг шанғиллаган овозлари, болаларнинг йиғиси эшитилиб турибди.

Бизнинг уй қишлоқ четида Ургут – Самарқанд асфальт йўлидан ўнгга бурилган ердаги биринчи кўча бошида жойлашган. Катта йўл ёқасида Зарафшон дарёсидан чиқиб келиб, беадоқ боғ-роғларга оби ҳаёт етказиш чун Самарқанд туманига шошаётган Янги ариқ канали бор. Ёзда ҳамма ўша томонга кўчиб чиқади: катта-кичик, бола-чақа, мол-ҳол, арава-трактор, бақир-чақир, қий-чув, хуллас, қишлоқнинг жами экин-текини, дехқончилиги – тирикчилиги ана шудала-даштда. Каналга етгунча Ўткир акага шуларни айтиб бердим.

– Бизни Дўмбиравотдаям Конқус деган анҳор бор, – деди Ўткир ака хира ойдинда оқ-қора илондек ялтираб кўринаётган каналдан кўз олмай. Баъзи кунлари қош қорайганда раҳматлик онам қўлимдан етаклаб уйга олиб кетмагунича ётаверардик тупроқда думалаб.

Ўткир ака узоқда, ўнг томонимизни ердан осмонга довур девордай тўсиб ётган ҳайбатли Ҳисор тизма тоғларига бир пастикилиб қолди.

– Боя келганимизда онангизни кўриб, ғалати бўлиб кетдим, – деди ўйчан. – Онамнинг худди ўзи экан. Жуда ювош, жуда меҳрибон. Кўринишиям содда, ҳокисор. "Онажон!" деб юборишимга сал қолди. Ҳаммага яхшилик қилишни истайдиган, оқкўнгил, гинакудуратни билмайдиган беғубар аёл эдилар онам.

"Дунёнинг ишлари"ни ўқиганда онангизни қанчалар яхши кўришингизни сезганман. Азиз Қаюмов домла бир жойда бу китобни ўзбек аёлига қўйилган ҳайкал, ўзбек онасини ҳаммага кўз-кўз қиласидиган асар, деб ёзибди.

– Домлага раҳмат, албатта. Аммо китобда онамдаги фазилатларнинг ўндан бирини ҳам айтолганим йўқ. Менимча, оналар қалбини, меҳр-муҳаббатини ҳеч ким, ҳеч қачон охиригача таърифлаб беролмаса керак.

Канал бўйида юриб яна узоқ сухбатлашдик. Ўткир ака тамакичилик соҳасига оид кўп такрорланадиган, аммо энг жиддий саволни сўради.

– Ургут бошқаларга нисбатан анча “бадавлат” туманлардан дейишади. Аммо меҳнати ҳам шунга яраша бўлса керак? Албатта, ҳар ким меҳнатига яраша яхши кун кўргиси келади. Лекин пул деб саломатликни эсдан чиқариш ҳам яхши эмас.

Сездимки, Ўткир ака тамакичилик муаммоларидан анча-мунча хабардор. У кишига умумий тушунча эмас, моҳиятни кўрсатувчи деталлар керак.

– Ҳозир икковимиз сув бўйида юрибмиз. Устимизда кастюмшим, оёғимизда иссиқ пайпок, туфли. Шунга қарамай салқиндан этимиз жунжикяпти. Тўғрими? – Ўткир ака ёнбошимда жимгина тинглаб боряпти. – Ҳозир бирор келсаю, оёқни ечиб, шимни тизздан баланд шимаринг, тамаки экасиз, деса, одам қандай ахволга тушади? Тамаки деган бу “арзанда – заҳар” шу қадар безбетки, уни етиштириш билан боғлиқ юмушларнинг тўқсон тўққиз фоизи қўлда бажарилади. Даставвал уруғи қопчаларда намланиб, ўн бешйигирма кун сандалга ёпилган кўрпа остида нишлатилади. Уруғ иссиқ кўрпа тагида соч каби нозик, оппоқ илдизчалар чиқаргач, майин гўнг ва тупроқ аралаштирилиб парникка сепилади. Парникдаги уруғ ўсиб, икки-учтадан қулоқ чиқаргунча, қарийб бир ой, кунига икки-уч маҳал сув, ўғит ва ҳар хил зарур дори-дармонлар билан парваришланади. Шу оради ер ҳайдалади, жўяк олинади. Экишдан бир-икки кун аввал жўяклар захлатиб суғорилади ва милдиратиб оқизиб қўйилади.

– Сув-лойга ботиб экиларкан-да.

– Жўяк захламаса, ерга қадаётгандан илдизи синиб кетади. Жўяқдаги милдираган сувда қўл чайилиб турмаса, бармоқларга лой ёпишиб қолади, оқибатда экиш янайм қийинлашади. Асосан аёллар, мактаб ўқувчилари бажаради бу ишларни. Бир гектар майдонга 13-15 минг туп ниҳол қадалиши керак. Бу – бир гектарга тамаки экиш учун шунча минг марта эгилиб турилади дегани. Оёқ-қўлинг музлаб, белинг тарашадай қотиб, бошинг айланиб кетади.

– Шунинг учун аҳолининг ярми касал денг? Бундай оғир меҳнатга миллион берса оз... – Ўткир ака бир зум жимиб қолди-да, қандайдир ички изтироб билан қўшиб қўди. – Адолатсизликлар бижғиб ётиби...

Адиб нимани назарда тутганини тушундим. Худди ўша йиллари “пахта иши” деган тухмат билан минглаб одамлар қамоқقا тиқилаётган эди... Мустақилликнинг биринчи йилларидаёқ Ўткир Ҳошимовнинг “Тушда кечган умрлар” романи эълон қилинди. Бу асарни яна неча йилдан кейин ҳам ҳаяжонсиз ўқиш мумкин эмас. Ёзувчи мустабит шўро тузумининг авра-астарини ағдариб ташлаган.

Қишлоқ айланиб уйга қайтиб келганимизда Саид Аҳмад аканинг ҳангомалари баланд пардаларда давом этар, ҳовли этагидаги ўрик томондан барадла эшитилиб турган Озод аканинг хурраги гуриллаган кулгиларга жўр бўлмоқда эди.

* * *

Эртасига Ургут гилам фабрикасида, Каттақўрғон ёғ-мой заводида учрашувлар бўлди. Оқшом Тошкентга қайтдик.

– Биринчи бўлиб Ўткирни уйига қўямиз, – деди шаҳарга кирганимизда Саид Аҳмад ака. – Ахир, у раҳбаримиз.

Ўткир ака ҳарчанд қаршилик қиласин устод адиб фикрида туриб олди.

– Келинни чақир, – деди Ўткир аканикига етиб келганимиздан кейин амирона оҳангда.

Зум ўтмай оstonада Ўлмасхон опа пайдо бўлди.

Саид Аҳмад ака машина багажидан қовурдоқ солинган кострюлкани олиб, Ўлмасхон опага тутқазди:

– Шунақа эр билан яшаётганинг учун раҳмат. Қара, қовурдоқни едирмай қайтариб олиб келди.

Устоз, хотинимга мени мақтаса керак, деган илинжда турган Ўткир ака хаҳолаб кулиб юборди.

Ҳаммамиз қўшилдик.

Қовурдоқ машина юхонасида эсимиздан чиқиб қолиб кетган экан.

***Носир МУҲАММАД,
Ўзбекистонда хизмат қўрсатган маданият ходими***

УСТОЗ ҲАҚИДА СЎЗ

1968 йилнинг ёзида Тошкент давлат университетининг филология факультетини имтиёзли диплом билан битирдим. Тақсимот бўйича Қашқадарё вилоятидаги мактабларда ўқитувчилик қилишим керак. Аммо муаллимликка иштиёқим йўқ, матбуотда илк шеърларим эълон қилинган, ижодга ҳавасим баланд. Газета ва журналлардан иш қидира бошладим. Дўстларимдан бири “Тошкент оқшоми” газетасининг бўлим мудири Ўткир Ҳошимовни танишини, агар истасам унинг ҳузурига олиб боришини айтиб қолди. Бу айни муддао эди. Чунки “Чўл ҳавоси” қиссаси ва қатор ҳикоялари билан танилиб қолган истеъдодли ёзувчи эканлигини билар эдим. Ёзувчилар уюшмасидаги учрашувларда кўрган бўлсам-да, яқиндан танимасдим. “Тошкент оқшоми” эса энг ўқиладиган газета эди. Унда адабиёт ва санъатга кенг ўрин бериларди.

Хуллас, дўстим билан етаклашиб “Тошкент оқшоми” таҳририятига келдик. У пайтда таҳририят “Билимлар уйи” (ҳозирги рус драма театри) ёнидаги эски меҳмонхона биносида жойлашганди. Ўткир ака бизни яхши кутиб олди. Ўзаро савол-жавоблар ва танишувдан кейин газета бош муҳаррири – атоқли адиб ва журналист Саъдулла Кароматов билан гаплашиб кўришини айтди. Орадан бир ҳафталар ўтгач, Ўткир акадан масала ижобий ҳал этилганлигини, аммо адабиёт ва санъат бўлимида ўрин йўқлиги учун вақтинча ахборот бўлимида ишлаб туришим кераклигини билдим. Бу катта ютуқ эди. Ўшанда адабиётга меҳримни сезган, тақдиримга бефарқ қарамаган ва Тошкентдек шаҳри азимда ишлаб қолишимга сабабчи бўлган устоз – Ўткир акадан бир умрга миннатдорман.

Шу тариқа илк меҳнат фаолиятим “Тошкент оқшоми”дан бошланди. Олти ойча Ахборот бўлимида ишлаб, сўнгра Ўткир ака раҳбарлигидаги Адабиёт ва санъат бўлимига ўтдим. Жами устоз билан ёнма-ён 10 йилдан ортиқроқ ишладим. Ўша йиллари газета таҳририятида Саъдулла Кароматов, Максим Каримов, Тўлқин Расулов, Ўткир Ҳошимов, Усмон Юсупов, Алиназар Эгамназаров, Солих Ёқубов, Абдулла Пўлатов, Маҳмуд Комилжонов, Абдуғани Абдуллаев, Раҳматулла Файзуллаев сингари бир гурӯҳ қобилиятли

ёзувчи ва журналистлар меҳнат қилишарди. Улар билан ҳамкорлик мен учун чинакам хаёт мактаби бўлди. Мухаммад Юсуф, Сирожиддин Саид, Ғаффор Хотамов, Отаёр сингари таникли шоир ва адиблар ҳам турли йилларда бу даргоҳда ишлаганларини эслаш кифоя. Улар ҳам ижод оламига йўлланмани шу ерда олишган. Бу ердаги ҳазил-мутойибага бой ижодий давралар ҳамиша гавжум бўларди. Газета адабиёт ва санъатга катта ўрин бергани учун машхур ижодкорлар ҳам тез-тез келиб туришарди.

“Тошкент оқшоми”да ишлаган даври Ўткир Ҳошимов учун энг сермаҳсул ижод йиллари бўлди. “Баҳор қайтмайди”, “Қалбингга қулоқ сол”, “Дунёнинг ишлари” қиссалари, ”Нур борки, соя бор” романи, “Инсон садоқати” телесериали, ўнлаб ҳикоялари ўша йиллари ёзилди. У ҳикоялар, ҳажвиялар, публицистик ва одоб-аҳлоқ мавзудаги мақолаларни ишхонада ўтириб ҳам ёзар, баъзан тўғридан-тўғри машинкачига айтиб туриб ёздиради. Мен устознинг қобилиятига, ишчанлигига ва дадиллигига қойил қолардим. Ўша йиллари эълон қилинган долзарб мавзудаги ҳикоялари ва кўплаб публицистик чиқишилари муҳлислар тилига тушган эди.

Бир воқеа эсимда қолган. “Тошкент ҳақиқати” газетасида Ўткир аканинг “Иқрорнома” деган ҳикояси босилди. Воқеа Туркияда бўлиб ўтади. Унинг қаҳрамони – пахтакор дехқон. Аммо дефолация пайти кичик самолёт заҳарли дорини далада одамлар устига ҳам, сувлар, моллар устига ҳам сепиб кетаверади. Дехқоннинг моллари нобуд бўлади. Фарзанди сариқ касалидан кўз юмади. Ғазабдан ўзини йўқотган дехқон ов милтифи билан самолётни уриб туширади. Ҳикояни ўқиган ҳар бир ўқувчи гап Ўзбекистон ҳақида кетаётганлигини сезиб турар, заҳарли дорилар халқ генофондига катта зарар етказаётганлиги, унинг сабр косаси тўлиб бораётганлиги унда ўз бадиий инъикосини топган эди. Бу Шўролар тузуми учун жиддий айбнома эди. Ҳақиқатни айтиш учун ҳеч нарсадан тап тортмаган Ўткир аканинг жасорати мени лол қолдирганди.

Орадан кўп ўтмай Ёзувчилар уюшмасида бўлган бир мажлисда “сиёсий хушёр” оқсоқол адиблардан бири шу асарга “ташланиб қолди”. “Бу ёзувчи воқеани Туркияга кўчиргани билан аслида Ўзбекистонни назарда тутяпти, у пахта мустақиллигининг душмани”, деди (Исмини айтмай қўяқолай, ўша оқсоқол раҳматли бўлиб кетган). Шунда Озод Шарафиддинов сўзга чиқиб, Ўткир Ҳошимовни ҳимоя қилгани эсимда. “Ҳар қандай нарсадан ишкал

қидираверадиган бўлсак асар ёзмаслик керак, ёшларга бунаقا айбнома қўйиш яхши эмас”, деганидан кейин бояги хушёр “устоз”нинг дами ичига тушди...

Ўткир Ҳошимовнинг барча асарларида даврнинг муҳим ахлоқий-маънавий муаммолари қаламга олинган. “Баҳор қайтмайди”, “Дунёнинг ишлари” қиссалари, “Нур борки, соя бор, “Икки эшик ораси” романлари худди шу жиҳатлари билан эл эътиборини қозонди. “Баҳор қайтмайди” қиссаси асосида Мирабbos Мирзааҳмедов саҳналаштирган телеспектакль эса ҳамон намойиш этиб келинмоқда.

“Тошкент оқшоми”да иш анча тифиз эди. Ҳар душанба куни ё “Адабиёт ва санъат” ёки “XX аср овози” саҳифаси чиқиши керак. Бунинг учун эса кўплаб шеър ва ҳикояларни, таржималарни ўқиб, яхшисини танлаб олиш зарур. Ҳар куни ўнлаб муаллифлар қабул қилинади. Бўлимда эса Ўткир ака билан мендан бошқа ҳеч ким йўқ. Бундай пайтда ижод ҳақида ўйлаш ҳам қийин. Аммо Ўткир ака энг иш тифиз вақтда ҳам ижодга вақт топар эди. Баъзида шамоллаб ишга чиқмай қолганида дўстлари ҳазиллашиб “Ўткиржон янги асарини биткизиб келади-ёв” деб қўйишарди. Мен устоздан сўз билан ишлаш санъатини, ҳозиржавобликни, меҳнат-севарликни ўрганганман.

***Мираббос МИРЗААҲМЕДОВ,
Ўзбекистонда хизмат қўрсатган маданият ходими***

**ТЕЛЕВИЗИОН СЕРИАЛЛАР
ШУНДАЙ ЯРАТИЛГАН ЭДИ**

Телетомошибинлар учун, айниқса, аёллар учун энг севимли машғулот нима? Тўғри айтасиз! Телесериал кўриш! У ёғи Лотин Америкаси, бу ёғи Япония, Туркия, Корея... Шунаقا пайтда палакат босиб, телевизорни ўчириб қўйсангиз, балога қоласиз!

Хонандалару “эстрада юлдузлари” учун энг қимматбаҳо нарса нима? Микрофон билан фонограмма! Палакат босиб чироқ ўчиб қолса борми, овоз ҳам, куй ҳам, қўшиқ ҳам тақа-тақ тўхтайди!

Албатта, булар – янги замон белгилари. Санъаткор учун кенг имкониятлар берадиган шароит неъматлари. Бундан қирқ йиллар аввал аҳвол бошқача эди. Шунга қарамай Ўзбекистон телевидениесида миллий сериалларни суратга олиш ўтган асрнинг 60 – 70 - йилларидан бошланган. Буни биласиз. Аммо Ўзбекистонда фонограммани биринчи бўлиб ким қўллаганини билмайсиз! Бизнинг “ойинаи жаҳон”даги биринчи фонограммани қойилмақом қилиб ижро этган – Ўзбекистон халқ артисти Лутфулла Саъдуллаев билан таниқли хонанда ва истеъдодли олим Ҳожиакбар Ҳамидов бўлади! Аникроғи, қўшиқни экран ортида Ҳожиакбар Ҳамидов айтган, “лаблаштириш”ни эса Лутфулла Саъдуллаев қойил қилган. Ўшандан кейин анча йиллар давомида Лутфулла бирон тўйга бориб қолса, ундан Алимардоннинг қўшиғини айтиб беришни сўрайдиганлар кўп бўлган.

Хуллас, бу воқеа Ўткир Ҳошимовнинг “Баҳор қайтмайди” китоби ўқувчилар орасида қўлма-қўл бўлиб кетганда бошланган. Асарни телевизорга олиб чиқиш нияти туғилди. Ўша йиллари “Тошкент оқшоми” газетасида ишлаётган ёзувчи, унинг қадрдан дўсти Тўлқин Расулов (Худо раҳмат қилсин) ва мен учовлашиб сухбатлашаётганда шу таклиф ўртага ташланди.

Ёзувчининг рухсати билан сценарийни қоғозга туширдим. Ўткир Ҳошимов уни кўриб, бир қанча жойларни қайта ёзди, қўшимча ва тузатишлар киритди. Роллар тақсимланди. Бош ролларни – истеъдодли актёр Лутфулла Саъдуллаев билан унинг умр йўлдоши Гулчехра Саъдуллаева ўйнайдиган бўлди. Фақат бир

муаммо бор эди. Лутфулла умрида қўлига соз олиб, қўшиқ айтмаган. Аммо асардаги Алимардоннинг қўшиғини айтиши керак. Шунда Ўткир Ҳошимов ўз маҳалладоши, олий ўқув юртининг тарих куллиётида ўқиётган истеъдодли хонанда Ҳожиакбар Ҳамидовнинг овози ширали экани, бу йигит машҳур ҳофиз Фахриддин Умаровнинг шогирдлигини айтди. Шу билан қўшиқни Ҳожиакбар айтиб, уни Лутфулла фонограммага “жойлади”.

У пайтларда телевидениеда оқ-қора тасвирдан бошқа ранг ҳам, ҳозиргидек ихчам камералар ҳам йўқ, ҳамма тасвир студиянинг ўзида олиниши шарт эди. Студияда ҳақиқий фидойи инсонлар ишларди. Тасвирчи Илёс Шоиноятов асарнинг ярмисига етиб, у ёғига етмай қолган плёнкани ўз пулига сотиб олиб суратга туширгани эсимда. “Баҳор қайтмайди”нинг умумий эфир вақти 2 соату 40 дақиқа бўлди. Студиялар кундузи банд бўлгани учун ижодий ходимлар асосан кечаси ишлашига тўғри келар, ҳар ким яrim кечадан ошганда уйига кетар эди. Ўша йиллари бизнинг жонимизга оро кирган “такси” – сувсепар машиналар эди. Улар тонготаргача қўчаларга сув сепиб чиқар, қўлига бир сўм берсангиз, “Ҳирот”га бўлса ҳам обориб қўяр, баҳонада қўчангизга ҳам сув сепилиб қоларди.

Ҳожиакбар Ҳамидов Ўткир Ҳошимовнинг кўп серияли телевизион фильм қилинган бошқа асарлари – “Дунёнинг ишлари”, “Нур борки, соя бор” (афсуски, айрим “хайриҳоҳлар” бу фильм кассетаси устига бошқа нарса ёзиб, асарни йўқотиб юборганлар) ва бошқаларда ҳам қўшиқ айтган.

Асарнинг энг драматик нуқтаси – Алимардоннинг машинаси билан тоғдан ағдарилиб кетиш манзарасини суратга олиш қизиқ бўлган. Ҳали айтганимдек қўчма камералар йўқ. Кўчада суратга олишнинг иложи ҳам йўқ. Аммо машина юриб бораётган, рулда ўтирган Алимардон ҳолатини аниқ кўрсатиш керак. Бир “Волга” машинаси топиб, студияга олиб кирадиган бўлдик. Студияга машина кириши таъқиқланган экан: ўт тушиб кетиши мумкин. Бензобакдаги ҳамма ёнилғини идишга қуйиб олдик. Беш-ўн киши “хай-хайлашиб”, зилдек машинани студияга итариб киргиздик. Ўзиям 800 метргача кучаниб бориб терга ботиб кетдик. Кадрни суратга олиш охирлаб қолганида бир ходимимиз Тошкент фестивалига олиб келинган фильмлардан бирида машинанинг тоғдан ағдарилиб кетиш манзараси борлигини айтиб қолди. Начора,

студиянинг ўртасига тоғ ясаб, машина ағдара олмаймиз-ку! Хуллас, ўша фильмни кўрдик. Ундаги воқеа кундузи бўлади. Алимардон эса тоғдан кечаси ағдарилиб кетади. Шуни айтсам, тасвирчи инженеримиз “бунинг иложи бор, диафрагмани ёпсак, кундузи кечасига айланади” деди. Шундай қилдик!

Хуллас, анча фурсатдан сўнг асар тайёр бўлди. Энди уни бадиий кенгашга топшириш вақти келди. Бу – жуда қалтис имтихон эди. Баъзан шунча меҳнат, шунча маблағ билан тайёrlанган асардан иллат ахтаришар, “сиёсий қалтис” жойларни кавлаштиришлар бўлиб турад эди. Телеспектакл кўрсатиб бўлингач узоқ жимлик чўкди. “Оббо, ёқмади шекилли, ҳозир савалаш бошланади”, деб турсак, гулдурос қарсаклар янгради. “Бу телевизион спектакл эмас, ҳақиқий видеофильм бўлибди, кўрасизлар, бу асар узоқ йиллар яшайди”, деди кенгаш раиси Элбек Мусаев. Элбек аканинг башшорати тўғри чиқди. Мана, орадан 36 йил ўтди. Шундан бери телевизион фильм ойнаи жаҳонда қирқ мартадан ортиқ намойиш қилинди ва ҳар гал томошабинларни ҳаяжонга солади. Ҳозирги кўрсатилаётган телефильм – “Баҳор қайтмайди”нинг учинчи варианти. Кўп манзаралар рангли тасвирга туширилган. Бироқ актёrlар ўша-ўша. Менимча, “Баҳор қайтмайди”нинг бу қадар машхур бўлиб кетишига сабаб – асар пухта ёзилган. Алимардон мураккаб шахс. Унда ёрқин истеъодод ҳам, ички мардлик ҳам, айни пайтда худбинлик ва хиёнаткорлик ҳам бор. Аникроғи, қиссада тирик одамлар ҳаракат қиласи.

Суратга олиш пайтида баъзан ғалати воқеалар бўлади. Ёдингизда бўлса, Алимардон билан Анварнинг тўқнашуви саҳнаси бор. Алимардон энг яқин дўстига хиёнат қиласи. Муқаддамга чанг солади. Бу ҳам етмагандек Анварга “Муқаддам меники, мен уни ўзимники қилиб қўйганман”, дейди. Бундай паллада ҳар қандай одам ҳам портлаб кетиши аниқ. Анвар Алимардоннинг юзига тарсаки туширади. Бироқ Анвар (Рустам Афзалов)нинг тарсакиси шу қадар “юмшок” эдики, ғашим келди. “Қанақа одамсан, кучинг борича урмайсанми?” десам, Рустам “Мираббос, Лутфулла менинг қадрдон дўстим, уролмайман!” деб туриб олди.

Телевизион фильм 1974 йил 17-23 март кунлари ойнаи жаҳонда намойиш қилинди. Томошабинлар томонидан қизғин кутиб олинди. Студияга ҳам, муаллифга ҳам жуда кўп хатлар келди. Улар асардан қаттиқ таъсирланганларини айтган эдилар. Аммо бошқа-

чароқ гаплар ҳам бўлди. Бир куни халқнинг суюкли актрисаси Клара Жалиловага дуч келиб қолдим. “Менга қаранг, – деди опа аччиқланиб, – нима бало, сизларга Кларадан бошқа от қуриб қолганми, қачон қарасанг, ёмон хотинларнинг оти Клара бўлади!” Нима дейишимни билмай қолдим. Яна бир сафар телевидение раҳбари “Мираффос, машҳур хонанда Фахриддин Умаров сендан хафа, телевизорда кимни қоралаяпсизлар” деяпти, деди. Ўткир Ҳошимовдан ҳам бир неча марта “Баҳор қайтмайди”даги Алимардон фалончи эмасми?” деб сўрашган. Охири ёзувчи бу ҳақда радио ва матбуотда жавоб қилган эди. “Бир хонандага бағишилаб бутун бошли асар ёзиш – бачканалик бўлади. Мен аниқ бир шахс эмас, истеъоддининг парвози ва инқирози ҳақида ёзганман. Қолаверса, ёшлиқда қўйилган битта ножӯя қадам инсоннинг ўзигагина эмас, атрофдагиларга ҳам фожия келтириши мумкин деган мақсадни ўйлаганман. Бу – умуминсоний мавзу. Мен атоқли ҳофиз Фахриддин акани хурмат қиласман. У киши ўзи айтиётган ҳар бир қўшиққа жиддий масъулият билан ёндашади, ҳар бир сўзнинг мағзини чақиб, ижро этади, айниқса, Бобур ижодини теран билади” деб ёзган. Гап шундаки, “Баҳор қайтмайди”даги Алимардоннинг қўшиғини Ҳожиакбар Ҳамидов маромига етказиб ижро этган. Фақат овози устозиникига ўхшагани учун томошабинлар юқоридаги фикрга борган бўлиши мумкин.

“Баҳор қайтмайди”да роллар ижро этган Обид Толипов, Манзура Ҳамидова, Рустам Абзалов, Воҳид Қодиров, Мўътабар Комилова, Шуҳрат Зиёмуҳамедов, Тамара Сочакова сингари санъаткорлар ҳозир орамизда йўқ (охирати обод бўлсин). Аммо уларнинг номи, шунингдек, экранда ўзи кўринмай исми шарифи бир кўриниб ўтадиган режиссёр, оператор, режиссёр ёрдамчиси, сахна устаси, чироқ устаси, муҳаррир каби заҳматкашларнинг хизматини ҳам алоҳида таъкидласак ёмон бўлмайди. Асарни экранга олиб чиқсан барча заҳматкашларга миннатдорчилик билдириш бизнинг инсоний бурчимиз, деб ўйлайман.

“Инсон садоқати”, “Дунёнинг ишлари”, “Нур борки, соя бор” кўп серияли телефильмларнинг ҳам ўзига хос тарихи бор. “Нур борки, соя бор” экранлаштирилганида телевидение раҳбарлари анча пайтгача “юрак ховучлаб” юришгани эсимда. Чунки асарда ўша кезлари авж олган порахўрлик, савдо-сотиқдаги қаллобликлар, хуллас, ҳаром-ҳариш соялар кескин фош қилинган эди. Асарда бош

ролни ижро этган машхур атрист Теша Мўминовдан ҳам тез-тез “тинчликми ишқилиб” деб сўраб туришганини актёр ҳамон эслайди.

“Дунёнинг ишлари” эса миллионлаб томошибинлар олқишига сазовор телевизион фильм бўлди. Мен қиссани “Шарқ юлдузи” журналида ўқиб, ларзага тушган эдим. Бош ролларни ўйнайдиган актёрларни ўзимча белгилаб ҳам қўйдим. Бош ролни Сайдкомил Умаров, Она ролини (ёшлигини) Рихси Иброҳимова, кексалигини Манзура Ҳамидовалардан ўтказиб ўйнайдиган санъаткорларни тасаввур ҳам қиломасдим. Бироқ қиссани экранга олиб чиқиш жуда қийин эди. Сабаби, асарда ривожланиб борадиган сюжет линияси йўқ. Ҳаммаси катта-кичик ҳикоялардан иборат. Факат уларни Она сиймоси боғлаб туради. Асарни экранлаштириш ҳақида таклиф қилганимда ёзувчининг ўзи ҳам шу андишани айтди. “Телефильм шунчаки парчалардан иборат бўлиб қолса нима бўлади, ички таранглик йўқолиб кетади-ку”, деди. Бироқ икковлашиб сценарийни қоғозга туширдик. Бу 1982 йил эди. Сценарий устида анча узоқ ишлашди. Студияга ўша паллада янги техник воситалар келган, бироқ уларни эплаб ишлатадиган мутахассислар йўқ ҳисоб эди. Ростини айтсам, менинг энг кўп кучимни, вақтимни, асабимни олган фильм ҳам шу бўлди. Суратга олиш 1983 йил 3 апрель куни Қозирабод қабристонидан бошлаб, 15 сентябрь куни студия павильонида ўша қабристон манзарасини қайтадан тасвирга тушириш билан якунланди. Дастребки кунлари суратга олинган плёнкаларни монтаж қиласиз, десак, деярли ҳаммаси “куйиб кетибди”. Негаки, техник ходимлар янгича ускуналар билан ишлашни эплай олмаган.

Фильмда павильонда эмас, ташқарида олиниши керак бўлган ҳолатлар кўп. Болаларнинг анҳор бўйида ўйнаши, Далавойнинг от миниб келиши, “ўрис бола” – Валининг юк машинаси миниб онасини кабинада олиб келиши... Суратга олинаётган от учун ҳам, машина учун ҳам, эчки учун ҳам ҳақ тўлаш керак. Телевидениеда бунга ажратилган маблағ йўқ. Шундай пайтда ўз ёнимдан ҳақ тўлашга мажбур бўлганман. Ёмони шундаки, не ҳасратда суратга олинган кадрлар баъзан хира чиқади ёки умуман, ҳеч нима кўринмайди... Бош қаҳрамон (Сайдкомил Умаров)нинг қабристондаги изтиробли саҳнасини суратга олганда қувонган эдик. Афсуски, монтаж пайтида маълум бўлдики, унинг армон билан айтган сўзлари ниҳоятда паст товушда ёзилган, ташқаридан келаётган ёт товушлар эса унинг овозини “кўмиб ташлаган”. Шу сабабли бу

манзарани студияда қайтадан тасвирга туширдик. Асар охирида “Дунёнинг ишлари” китобининг сотилиш манзараси бор. Буни қарангки, Тошкентдаги биронта китоб магазинида “Дунёнинг ишлари” қолмаган эди. Охири адибнинг оиласи – Ўлмасхондан сўнгги бир неча дона китобни олиб, дўкон пештахтасига қўйдик.

Асар руҳига мос оналар ҳақида қўшиқ бўлса яхши бўларди, деган таклиф ўртага тушгач, шундай қўшиқ матни ва мусиқасини топиб, тағин Ҳожиакбар ижросида фильмга киритдик. Асар воқеалари турли ҳикоялардан иборат бўлгани учун, “стоп-кадр”лардан фойдаланиш, психологияк нозик, фалсафий чуқур матнларни қахрамон монологи сифатида бериш ҳам биз кутганидан яхшироқ натижа берди. Телефильм 1983 йил 3 октябрь куни биринчи марта эфирга узатилди. Одамлар бир зум ҳам хаёли бўлинмай фильмни охиригача ҳаяжон билан томоша қилишига ишонч ҳосил қилдик. Асар ўзбек халқига хос бўлган болажонлик, бағрикенглик, бир-бира га меҳр-оқибат кўрсатиш сингари фазилатларга бой бўлгани учун ҳам минглаб хатлар кела бошлади. Телефильмда иштирок этган Замира Ҳидоятова, Холида Ҳўжаева, Икрома Болтаева, Толиб Каримов, Тоҳир Миралиев, Гулираъно Ҳакимова, Рустам Афзалов, Мукамбар Раҳимова, Шуҳрат Ҳакимовалар номи халқ орасида машҳур бўлиб кетди. Айниқса, Рихси Иброҳимова, Манзура Ҳамирова ижросидаги Она сиймоси томошабинлар қалбини ром этди.

Рихси опанинг чакка ўтиб турган хонада болага алла айтиши, Манзура опанинг суратга тушишни илтимос қилиши, Тоҳир Миралиевнинг от гижинглатиб одамларга дағдаға қилиши, Икрома Болтаеванинг совчиликка бориши, Сайдкомил Умаровнинг вазминлик ва донолиги – ҳаммаси томошабинлар қалбидан жой олди. Асар якунидаги алла саҳнаси, бош қаҳрамоннинг она меҳри ҳақидаги теран ўйларини эслаб кўринг.

“Дунёнинг ишлари” телефильми бир томондан соф миллий, иккинчи жиҳатдан эса умумбашарий туйғулар билан йўғрилгани учун ҳам томошабинларга манзур бўлди. Мана, салкам ўттиз йилки, бу асар ҳам ҳар йили “зангори экран”да намойиш қилинаётгани ва янгидан-янги авлодларга миллий қадриятларимизни эслатиб, уларнинг маънавий оламини бойитишга ҳисса қўшаётгани шундан бўлса ажаб эмас...

ЁЗУВЧИ НЕГА ЙИҒЛАЙДИ?

Улуғ ёзувчи Абдулла Қодирий ҳаётига оид бир воқеа ҳақида кўп ёзилган. Адиб одатда, ўз асарларини қиши палласида ёзар экан. Кунлардан бир кун ёзувчининг умр йўлдоши уйга кирса, Қодирий домла йиғлаб ўтирганмиш. Аёли: “Сизга нима бўлди?” – деса, Қодирий: “Кумуш ўлиб қолди!” – деган экан.

Адабиётдан узоқ одам учун бу – афсона бўлиб туюлиши мумкин. Лекин ижод жараёнидан озми-кўпми хабардор одам бу – айни ҳақиқат эканига шубҳа қилмайди...

Ўткир Ҳошимов билан турмуш қурганимизга қирқ йил бўлди. Худога шукур, ўғил-қизли, қўша-қўша набирали ҳам бўлдик... Турмушимиз байрамдан иборат бўлди, десам, рост гапирган бўлмайман. Ҳаёт қувончларини ҳам кўрдик, ташвишларини ҳам... Мана қирқ йилдирки, ижодий меҳнат нақадар машаққатли ва масъулиятли жараён эканига гувоҳ бўлиб келаяпман...

Олтмишинчи йилларда адабиётга кириб келган Ўлмас Умарбеков, Эркин Воҳидов, Абдулла Орипов, Худойберди Тўхтабоев, Шукур Холмирзаев, Учқун Назаров, Неъмат Аминов каби истеъдодли шоир ва ёзувчилар ижод оламига янги ҳаво олиб киргандек бўлдилар, нуқул сиёсатни эмас, Инсонни тасвирлайдиган асарлар дунёга кела бошлади. Энди билсак, бунинг сабаби, бир томондан Хрушчёв замонида пайдо бўлган ҳийла эркин фикрлаш бўлса, иккинчи томондан бу ижодкорларнинг кўпчилиги Тошкент Давлат университетида таҳсил кўрган, улар чуқур билимли, ҳақгўй, талабчан устозларнинг сабоини олган эканлар. Шундай шогирдлар қаторида Ўткир Ҳошимов ҳам бор эди... Биринчи китоби учинчи курса ўқиётганида чоп этилган, биринчи йирик бадиий асари устоз адиблар таҳсинига сазовор бўлган талабалар унчалик кўп бўлмайди. Ўткир Ҳошимов эса шундай талаба эди. Унинг “Чўл ҳавоси” деган биринчи қиссаси талабалар орасида машҳур бўлиб кетди.

Ёзувчининг кейинги қирқ йил давомида яратган асарлари қандай туғилганига гувоҳман.

Янги асар ёзиш пайтида адиб хаёлчан, бир қадар тажанг бўлиб қолади. Кечами-кундузми ҳамма нарсани унутиб, ёзади. Лекин асар битмагунча ҳеч кимга кўрсатмайди. Биз ҳам ёзувчи ишлаётган пайтда безовта қилмаймиз, нима ёзилаётганини ҳам сўрамаймиз (оилада шундай тартиб бор). Адиб ёзганидан ўзининг кўнгли тўлса, чехраси очилиб, бизга беради. Шу тариқа оила аъзолари – фарзандлар ҳам қўлёzmани биринчи бўлиб ўқиймиз. Асар ҳақида айтилган фикрларни муаллиф оғринмай қабул қиласи. Сўнг деярли барча асарлар Саид Аҳмад, Озод Шарафиддинов, Умарали Норматов, Иброҳим Ғофуров, Абдугофур Расулов, Носир Фозилов, Тўлқин Расулов (худо у кишини раҳмат қилсин) каби устоз ва дўстлари назаридан ўтказилган.

Башарти асар муаллифнинг ўзига ёқмаса-чи? Бундай ҳоллар бир неча марта бўлган. Адиб қўлёzmани йиртиб, ёқиб ташлаган (баъзан ҳатто матбуотда янги асардан парчалар босилгандан кейин ҳам).

Бадиий асар катта ҳаяжон билан, шавқ билан ёзилиши керак. Бу ҳақда ёзувчи бундай дейди: “Китоб ёзаётган қаламкаш ҳаяжони китоб ёқиётган ўқувчи ҳаяжонидан ўн карра кучлироқ бўлади. Китоб ўқиётганингизда жиндай табассум қилсангиз, билингки, ўша саҳифаларни қаламкаш росмана кулиб ёзган. Китоб ўқиётганингизда кўзингизга бир қатра ёш келса, билингки, қаламкаш ўша саҳифаларни росмана йиғлаб ёзган”.

1982 йили Пицундага бордик. Ёзувчилар ижодий уйидан хона беришди. Мен болаларни денгизга олиб бoramан. Адаси деярли хонадон чиқмай ишлайдилар... Орадан ўн кунлар ўтди. Бир гал хонага қайтсак, ёзган нарсаларини йиртиб ташляптилар. “Хай-ҳайлаб” бир қисмини олиб қолдим. Қўлёzма сарлавҳасини шунда кўрдим. “Эртага – куз”. Юз бетлар ёзилган экан, деярли ҳаммаси йиртилиб бўпти...

– Нега ундей қилдингиз? – десам, қўл силтадилар.

– Бўлмайди! Сиғмаяпти! Хом!

Кўлёzmанинг омон қолган саҳифаларини ўқиб кўрсам, бино-йидек... Нима “бўлмагани”, нима “хом”лигини орадан икки йил ўтгач, “Икки эшик ораси” романи қоғозга тушганидан сўнг англа-дим. “Икки эшик ораси”дек салмоқли, фалсафий, психологик роман аввалги услугуга ҳам, қолип (композиция)га ҳам сиғиши мум-кин эмас экан...

“Икки эшик ораси” романни минглаб ўзбек хонадонлариға кириб борди. Деярли уч юз минг нусхада ўн марта нашр этилди. Бошқа тилларга таржима қилинди.

Дарсликлар ва ўқув дастурларига киритилди...

“Тушда кечган умрлар” романининг дунёга келиш тарихи ҳам ўзига хос. 1991 йили Ў.Хошимов таваллудининг 50 ёши нишонланди. Ўша оқшом Президентимиз адибга табрик йўллаганлари биз учун унутилмас воқеа бўлди. Шу арафада адибнинг устозларидан бири – Умарали Норматов шогирдга жўяли маслаҳат бердилар:

– Одатда, ижодкорлар ўз тўйига янги асар билан келади. Сиз ҳам янги асар ёзинг!

Адиб Умарали аканинг шу таклифини айтганларида севиниб кетдим.

– Домла тўғри айтибидилар, – дедим. – Ҳамма ижодкорлар шундай қиласди. Сиз бўлсангиз анчадан буён каттароқ асар ёзганингиз йўқ.

Гапим негадир ёзувчига ёқмади.

– Бошқалар нима қилса ўзининг иши. Мен кучаниб ёзмайман! Асар туғилгиси келса ўзи туғилади.

Орадан кўп ўтмай, адиб бетоб бўлиб қолди. Шифохонага ётдик. Дўхтирлар операцияни қиласми, деб тиқилинч қиласди, адаси кўнмайдилар... Кеч куз эди. Бир оқшом адаси балконга чиқиб, узоқ ҳаяллаб қолдилар. Изиллаб шамол эсиб турибди. Жоним ҳалак бўлиб, ичкари киринг, дегим келадию, ийманаман...

Бир маҳал ўзлари палатага кириб, “қоғоз борми?! деб сўрадилар. Касалхонада қоғоз нима қилсин? Шу кеча шифохона палатасида тонг отгунга қадар чироқ ёниб чиқди. Эрталаб тутунга тўлиб кетган хонага кирган дўхтир койиди:

– Ўзингиз бу аҳволда бўлсангиз, устига-устак босиб чекаверсангиз, нима, жонингизда қасдингиз борми?

Дўхтир чиқиб кетиши билан адиб ўз қарорини айтди.

– Уйга кетамиз.

Уйга қайтишга қайтиш, лекин асар ёзиш тағин орқага сурилди. Орада сафар чиқиб қолди. ИброҳимFaфуров, Дадаҳон Нурий, Аҳмаджон Мелибоевни чет элга хизмат сафарига юборадиган бўлишибди. Ў.Хошимов сафарга боришни асло хоҳламас эди.

– Шу, сафарга мендан бошқа одам борса бўлмасмикан?!

Йўлдан қолишининг иложи бўлмади. Орадан анча ўтиб, “Тушда кечган умрлар” романни эълон қилингач, китобхонлар билан учрашувларнинг бирида Иброҳим ака чет эл сафари ёзувчига асло татимаганини айтиб бердилар: “Ўткиржон, сафарда юрдию, чамаси ҳеч нимани кўргани йўқ. Фикри-зикри бошқа ерда эди. Кейин билсам, роман ёзаётган экан...”

Сафардан қайтиши билан адаб деярли кеча-кундуз тўхтовсиз ишлаб, романнинг ilk вариантини бир ойнинг нари-берисида ёзи. Асарда қандайдир мунгли руҳ сезилиб турар, унинг биринчи жумласи эса бундай бошланар эди: “Куз – ўлим тўшагида ётган bemорга ўхшайди. Оёқ остида касалманд хазонлар инграйди”. Бу – ўша кеч куз оқшоми ёзувчи касалхона балконига чиқиб кузатган манзара бўлса ажаб эмас...

Бу романнинг қисмати ҳам ёруғ бўлди. Кўп марта нашр этилди, бошқа тилларга таржима қилинди... Агар Мустақиллик бўлмаса, бу асар дунё юзини кўрмаслиги аниқ эди. Негаки, унда мустабид тузум фош қилиб ташланган. Худо асрасин, собиқ шўро тузуми бўлса, бу роман учун ёзувчи мислсиз балоларга қолиши мумкин эди.

* * *

1980 йили ойимлар (қайнонам) тўсатдан вафот этдилар (Худо раҳмат қилгур хоксор, меҳрибон ва доно аёл эдилар). “Дунёning ишлари” китобида Она қиёфаси айнан тасвиrlанган. Адаб бу жудоликдан жуда қаттиқ изтиробга тушди. Шусиз ҳам ўта таъсирчан одам янада маъюс, ҳаёлchan бўлиб қолди. Охири Абдуғафур Расулов, Баҳодир Ғуломов (домланинг жойлари жаннатда бўлсин) билан маслаҳатлашиб, Сижжакка – Опоқ хўжа ака деган эски қадр-донлариникига чиқиб кетишиди. “Дунёning ишлари” китобининг дастлабки боблари ўша ерда ёзилган. Адабнинг ўзи таъкидлашича, бунга Абдуғафур ака даъват қилганлар. “Бошқаларда йўқ имконият сизда бор-ку, ўзингиз ҳис этаётган шу изтиробларни қофозга туширсангиз, бир томондан, дардингиз енгиллашади, иккинчидан, холамларнинг руҳини шод қилган бўласиз”.

“Дунёning ишлари” бошқа асарларга ўхшаб тез ва шиддат билан ёзилгани йўқ. Ҳар бир ҳикоя мустақил асар сифатида туғилган. Аммо уларнинг ҳаммасида Она образи бор. Бу китобнинг дунёга келишида атоқли шоира Зулфия опанинг катта ҳиссаси бор. Адаб бўлажак китобнинг биринчи бобларини “Саодат” журналига

олиб борганида Зулфия опа бу жуда яхши асар бўлишини таъкидлаб, уни давом эттириш кераклигини, журнал эса китобни сонма-сон босиб боришини айтган эканлар. Бу ҳақда муаллиф ўз мақоласида ёзган... Шундай қилиб китоб бир йилдан ортиқ муддатда дунёга келди. Унинг энг охирги саҳифаси қандай туғилгани ҳамон кўз ўнгимда турибди. Баҳор эди. Кечаси гумбирлаган товушдан уйғониб кетдим. Момақалдироқ бўлаётган экан. Қарасам, хонада адаси йўқлар. Айвонга чиқдим. Соат тўртдан ўтибди. Нариги хона эшигидан чироқ нури тушиб турибди. Киришга тортиндим. Чой қўйдим. Анча иккиланиб туриб, эшик олдига келдим. Секин ичкарига кириб яқин бордим. Қарасам, адиб унсиз йиғлаляпти... Қўрқиб кетдим. “Нима бўлди?” – десам, индамай чиқиб кетдилар... Кўз ёши томган саҳифаларни беихтиёр ўқидим. Ўқиб, йиғлаб юбордим. Бу – “Илтижо” деган боб эди. Мана ўша боб:

“Ойи мен келдим... Эшитяпсизми, ойи, мен яна келдим...

Қаранг, ойи, тағин кўклам кирди. Эсингиздами, ҳар йили баҳор кириши билан Сизни далага олиб чиқардим. Сиз чараклаган офтобни, тиниқ осмонни, кўм-кўк майсаларни қўриб қувонардингиз. Эсингиздами, невараларингиз териб келган бойчечакларни қўзингизга суртиб, “омонлик-сомонлик” қилардингиз...

Бугун... ўзингизнинг устингиздан бойчечак ўсиб чиқибди... Йўқ, йўқ, ойижон... йиғлаётганим йўқ. Биламан, мен йиғласам, сиз безовта бўласиз... Ҳозир... ҳозир ўтиб кетади. Мана бўлди...

Эрталаб-чи, ойи, ёмғир ёғди. Қаттиқ ёмғир ёғди. Сиз баҳор ёмғирини яхши кўрадингиз... Кейин офтоб чиқиб кетди. Қаранг, офтоб чараклаб ётибди... Эсингиздами, сиз менга офтоб ҳақида чўпчак айтиб берар эдингиз. Ўша офтоб чараклаб ётибди... Кўраяпсизми...

Эсингиздами, ойи, сиз укамга алла айтардингиз. Мен алланинг оҳангига маст бўлиб ухлаб қолардим. Ўша бешикда мен ҳам ётганман. Аллангиздан мен ҳам ором олганман. Нима қилай, ойи, мен алла айтишни билмайман. Қабрингизни силаб қўйсам ором оласизми... Мана, ойижон, мана... Йўқ, йўқ, йиғлаётганим йўқ. Ҳозир, ҳозир ўтиб кетади...”

Балки бу парчани алоҳида ўқиган китобхон унчалик ҳаяжонга тушмас. Бироқ, “Дунёнинг ишлари”ини бир бошдан ўқиб, Онани қаттиқ севиб қолган китобхон бу сатрларни ўқиганда ларзага тушмай қолмайди. “Илтижо” бобини қўзда ёш билан ёдан ўқиб

берган кўплаб талаба ва ўқувчиларни кўрдим. Дарвоқе, “Икки эшик ораси” романининг “Зилзила”, “Тушда кечган умрлар” романинг “Оппоқ-оппоқ қорлар ёғди” бобини ларзага тушиб, ёдаки ўқиган китобхонлар ҳам оз эмас. Балки муаллифнинг ўзи уларни росмана йиғлаб ёзгани учун ҳам шундайдир. Нима бўлганда ҳам адиблар йиғиси ўқувчининг қалбига нур олиб киради. Ёзувчилик қисмати шундай бўлса керак эҳтимол.

*Йўлдошили СОЛИЖНОВ,
Фарғона Давлат университети профессори*

АДАБИЁТИМИЗНИНГ ПЎЛАТ ЧАВАНДОЗИ

Ўткиржон! Сиз ўтган асрнинг 60-йиллари ўрталарида янгила-наётган ўзбек насрига лирик йўналишни олиб кирган, унинг оҳангининг ўқувчиларга маъқул бўлишига муносаб ҳисса қўшган адибсиз. Илк китобингиз “Пўлат чавандоз” талабалик пайтингизда чиққан эди. Мен бу ерда насрни алоҳида ажратиб кўрсатганимдан ҳайрон бўлманг. Иккинчи жаҳон урушидан сўнг ўзбек шеъриятида ҳам, насида ҳам қандайдир дағаллик, баландпарвозлик, қуруқ шовдироқлик оҳангни устунлик қилаётган эди. Эркин Воҳидов, Абдулла Орипов, Рауф Парфи, Жамол Камол кабилар шеъриятда, Сиз, Шукур Холмирзаев, Учқун Назаровлар эса ҳикоя ва қиссаларингизда лирик оҳангни кучайтириб, асарларнинг ўқишилигини оширдингизлар. Бу борада, айниқса, Сизнинг хизматингизни алоҳида таъкидлаш ўринлидир. Сиз талабалик йилларингиздаёқ “Чўл ҳавоси” деб аталган илк қиссангиз билан йирик сўз санъаткори Абдулла Қаҳҳорнинг юксак баҳосини олишга эришгансиз.

Лирик оҳанг бора-бора ижодингизнинг бош фазилатига айланди. Қисса ва романларингиз, ҳатто “Дафтар ҳошиясидаги битиклар” гача ана шундай оҳанг билан сугорилган.

Қарийб ҳамма қисса ва романларингиз бадиий тасвирининг ажralmas қисми ҳисобланган пейзаж манзараси, асосий қаҳрамонлар ҳолати, кайфияти, тасаввурларини ифодалаш билан бошланади. Сиз бу услубни устоз адибимиз Ойбекдан ўргангансиз, деб ҳисоблайман. Биласизки, улуғ санъаткорнинг “Қутлуғ қон” романи саратор тасвири ва Йўлчининг ҳолати, “Навоий” тарихий романи Ҳиротдаги “Гавҳаршодбегим” мадрасасининг умумий кўриниши ва ундаги толиби илмлар турмуши, “Улуғ йўл” романи эса куз фасли тасвири, Оташ дукчининг оғир меҳнати, қалbidаги туганмас ташвишларини чизиш билан бошланади. Мана шу тасвиirlарнинг ўзидаёқ ёзувчи бутун асарнинг руҳини белгиловчи бош оҳангни аниклаб олади. Худди шундай хусусиятни Сизнинг ижодингизда ҳам кузатиш мумкин. Масалан, “Шамол эсаверади” қиссангиз Ҳирмонтепа қишлоғи, эрта баҳор тасвири, “Баҳор қайтмайди” асарингиз Бўстон қишлоғи ва куз фаслининг умумий манзараси, “Нур

борки, соя бор” романингиз эса, Шерзод даволанаётган шифохона палатасининг кўринишию қишининг охирги кунларини ифодалаш, “Тушда кечган умрлар” романинг Рустамнинг охирги кундалигидан олинган ғоят таъсирчан ва маъюс куз кўринишларини тасвирлаш билан бошланади.

Асар бошида келтирганингиз бу лавҳалар кўпинча асар охирида ҳам такрорланади. Масалан, “Баҳор қайтмайди” қиссангиз бошида Алимардонинг даҳшатли туши, унинг паст-баланд қоялар орасидан жарликка тушиб кетгани қисса охирида ўнгига рўй беради. Бу билан Сиз ўқувчига Алимардоннинг тушини бежиз киритмаганингизни ва бу психологик детал асар сюжетида изсиз қолмаганини англатмоқчи бўласиз.

Ўткиржон! Сиз “Икки эшик ораси” ва “Тушда кечган умрлар” романларингиздаги айрим образлар билан ўзбек адабиётининг сўнги эллик йилда туғилган қаҳрамонлар галареясини мутлақо янги, ўлмас характерлар билан бойитдингиз. Бошқаларини қўя турайлигу фақат Ориф оқсоқол билан комиссар Соат Фаниевнигина олиб кўрайлик. Ориф оқсоқол том маънодаги ўзбекнинг отаси, бағри кенг, ҳар қандай вазиятда ҳам ўйлаб иш тутадиган, ўзини эмас, ўзгаларни ўйладиган донишманд одам. У менинг отамга ҳам, амакимга ҳам ўхшайверади. Нимасидир улардан олингандек. Ишонасизми, бир талабамизга Ориф оқсоқол образи талқини бўйича диплом иши бергандим, у оқсоқолнинг портретини чизиб келибди. Худди дадамга ўхшайди денг. Келсангиз кўрасиз, кафедра деворига илиб қўйганман. Кирганлар “Бу ким?” деб сўраб қолишиша, хеч ўйланиб ўтирмай “отам” деб қўя қоламан. Бир ўринда “Шундай асар ёзсангки, уни ўқиган китобхон ҳамма нарсани унутса, асар қаҳрамонлари ҳаёти билан яшаса...” деб орзу қилишингизни ёзган эдингиз. Дадил айтишим мумкинки, “Икки эшик ораси” романни ана шундай китоб бўлиб қолди. Менимча, кейинги ўн беш-йигирма йил ичида халқимиз томонидан энг кўп ўқилган, энг кўп хат олган асар мана шу романдир. Бу жараён ҳануз давом этаётир. Бунинг сабаблари кўп. Энг муҳими, романнинг қизиқарли услубда ёзилгани ва шубҳасиз, катта тарбиявий аҳамиятга эга эканлигидир. Асарнинг номланишиёқ ўқувчини мушоҳада қилишга ундайди. “Хўш, ҳаёт деб аталмиш икки эшик орасида кечган қисқа умримда мен бу эшикдан кириб, у эшикдан чиққунча нима қилдим? Бу ҳаёт иморатига битта ғишт қўйдимми ёки битта ғиштни кўчириб олиб,

шикаст етказдимми? Мен ўзи кимман?” Бундай мулоҳаза китобни ўқиган энг ёмон одамнинг ҳам хаёлидан кечишига ишонаман. Чунки романдаги ҳар битта эпизод, ҳар бир персонаж ёзувчининг бош мақсадини ифодалашга хизмат қилади. Ҳатто ахлоқсизнинг қилимишидан ҳам ўқувчи сабоқ олади, беодобдан одоб ўрганади...

Романинг архитектоникаси ниҳоятда оригинал, пишиқ-пухта, мукаммал ва ғоятда соғлом асардир. Бадиий асар ҳам жонли организм каби соғлом бўлсагина, узоқ яшайди ва ўқувчининг кўнгил мулкидан муносиб ўрин топа олади... Буларнинг барчаси ушбу асарнинг умрини узайтиради. Ишонаманки, “Икки эшик ораси” романи ўзбек адабиётида шу пайтгача яратилган энг сара асарлар қаторида халқимизнинг суюкли ва доимий ҳамроҳи бўлиб қолади.

“Тушда кечган умрлар” романидаги Комиссар образини ҳам миллий адабиётимиздаги янги қиёфа, янги тип деб аташ мумкин. “Етмиш беш ёшда. Миллати йўқ. Сўққабош” бу киши бир қарашда инсонийлик фазилатларидан маҳрум, одам зотининг ашаддий душмани, ўзининг ваҳшиёна қилмишлари билан фахрланадиган аглаҳ қиёфасида намоён бўлади. Унинг нутқи ҳам ўзига хос. Комиссар ўз нутқида инсонни менсимаган, ҳукуқини камситган, номусини оёқости қилган ва бундан лаззатланган бутун бир жамиятнинг иллатларини мужассам ҳам этади. Комиссар нутқида ишлатилган биргина “хех” элементи вазиятига қараб турлича маъноларни англатади. “Хех” бу бу сўз эмас, товушдир. Сиз персонажнинг характеристини шакллантиришда тилнинг фонетик элементларидан ҳам унумли фойдалангансиз. Унинг “хех” дейиши Қурбоной холага одамни майна қилгандек ғалати кулиш бўлиб туйилса, Рустамга калтакесакнинг совуқ чиқиллашига ўхшаб эшитилади.

Умуман, Комиссар бутун роман давомида 30 мартача “хех” элементини қўллайди. Шундан иккитаси кулги шаклида уч мартадан такрорланиб келади. Қолганлари бир мартадан кескин оҳангда айтилади ва ҳар сафар контекстга қараб янгича маъно касб этади. Шу биргина товуш элементининг ўзи бир неча сўздан иборат гап маъносини англатади, ўрнига қараб вазиятни кескинластиради. Ҳар сафар Комиссар характеристининг янги қиррасини очади.

Ўткиржон! Сизга ҳат ёзиб ўтирибман-у, хаёлимда бундан 30-йиллар аввалги бўз йигитлик пайтимиз гавдаланади. Эсингиздами, сирдарёлик дўстимиз Акромжон Каттабеков (Аллоҳ раҳматига олган бўлсин!) номзодлик диссертациясини ҳимоя қилганда туни

билин ухламай, шаҳарни кезиб чиққанларимиз? Сиз ва мендан ташқари Абдуллажон Орипов, Рауф Парфи, Бегали Қосимов, Умрзоқ Ўлжабоев, Азимжон Раҳимов сингари ўнга яқин шоири олимлар пой-пиёда чақчақлашиб, қўшиқ айтишиб, аввал Қорақамишга – Бегалинига бордик. Ярим кечада унинг оиласини безовта қилишдан хижолат ҳам чекмабмиз. Бунинг устига ўша куни бир ярим-икки яшар қизчасининг қулоғи оғриб, азоб чекаётган экан, денг (буни кейин эшитдик-да!) Лекин ҳеч нарса бўлмагандек, дўстимизнинг рафиқаси Матлубаҳон дастурхон ёзди, овқат тайёрлади. Биз шоввозлар эса шеър ўқиш ва қўшиқ айтиш билан банд эди. Мана, ўша билимдон, дўст учун ҳеч нарсасини аямайдиган Бегали биродаримиз бугун орамизда йўқ. Аммо ундан хийла катта мерос қолди. Бу илмий мероснинг асосини миллий истиқлол ғояси ташкил этади. Зеро, Бегали Қосимов умрининг учдан икки қисмини мустақиллигимиз учун кураш олиб борган жадид боболаримиз фаолиятини тадқиқ этишга бағишилади. Ўзи ҳам ўша жадидлар сингари мўътабар зотга айланиб қолди. Аллоҳ раҳматига олган бўлсин!

Бегалинидан чиқиб талабалар шаҳарчасига йўл олдик. Йўл-йўлакай фақат битта қўшиқни айтардик:

*Оқ илон, оппоқ илон, ойдинда ётганинг қани?
Мен ёмондан айрилиб, яшини топганинг қани?*

Бу қўшиқ Сизнинг буюртмангиз бўйича айтиларди. Нега бу ашулага ёпишиб олганингизни кейинроқ билдим. Назаримда, ўша пайтда Сиз “Баҳор қайтмайди” қиссангизнинг “тўлғоғида” юрган экансиз, шекилли. Қиссани ўқиб билдимки, бу нола Анварнинг қалбидан Муқаддамга, Муқаддамнинг юрагидан Алимардонга қаратса отилиб чиқкан экан. Кейин бу қўшиқ “Икки эшик ораси” романингиздаги Робия ҳикояларига ҳам киритилди ва ҳақиқий муҳаббатнинг гимнига айланиб қолди. Асарларингизнинг руҳига сингиди, асосий оҳангини белгилади.

Ўткиржон! Биз Сиз билан фаҳрланамиз. Сизнинг Фарғонага келишингиз чинакам байрам бўлиб кетади. 2003 йилнинг сентябр ойи мен учун анча хайрли келди. Худо ёрлақаб, Сиз рафиқангиз Ўлмасхон билан Чимёнга дам олгани келган экансиз. Буни менга Ёзувчилар уюшмаси вилоят бўлимининг масъул котиби Энахон

Сиддиқова айтиб қолди. Дарҳол Йўлдош Сулаймонов бошлигига талантли ижодкорлар Алишер Ибодинов, Зухра Алиева, Энахонлар билан биргаликда етиб бордик. Сой бўйидаги сўлим чойхонада ўз қўлим билан палов дамладим. Биласиз, Йўлдош ака бор жойда давра қаҳқаҳага бой бўларди. У киши ўша кунлари анча бетоб эдилар, лекин Сизнинг келганингизни эшитиб, жон-жон деб бордилар. Ўзиям яйраб кетди-да, Йўлдош ака! Кетишда индамай кетган одам қайтишимизда шунақанги қувнаб, ҳазиллашиб келдиларки, асти қўяверасиз. Бу Сиз билан бўлган завқли сухбатнинг натижаси эди.

Ўша кунги келишувимизга биноан 19 сентябр куни университетда талабалар билан учрашувингизни ташкил этдик. Учрашувни ўша пайтдаги ректоримиз профессор Ўриновнинг ўзи олиб боради. Анжуман бирам файзли, бирам қизиқарли ва мазмунли ўтдики! Сиз, айниқса, талабаларимизнинг чиқишлиаридан, берган саволларидан жуда хурсанд бўлдингиз. “Асарни яхши тушуниб, таҳлил қилишар экан” деб, биз эса Сизнинг шу гапингиздан суюн-дик, негаки ўша талабаларни биз ўқитяпмиз-да!

Хуллас, ўша куни Сизни университетимиздаги мен мудирлик қилаётган ўзбек адабиётшунослиги кафедрасининг фахрий профессорлигига қабул қилдик. Университет илмий Кенгашнинг октябр ойидаги йиғилиш қарори билан бу таклиф расмийлаштириб ҳам қўйилди. Қарордан кўчирма обориб берганман-а? Энди, оғайни, Сиз мен мудирлик қилаётган кафедранинг аъзоси бўлдингиз, чақирган пайтимда келиб турасиз-да! Яна шуниси фахрлики, Сиз устозимиз Сайд Аҳмад акадан кейин иккинчи фахрий профессорликка қабул қилинган ёзувчимиз ҳисобланасиз. Кўрдингизми, фақат зўр ёзувчиларни “ишга” оламан, холос.

Ўткиржон! Борди-келдимиз, учрашувларимиз камайиб кетмасин, иложи борича, тез-тез учрашиб, сухбатлашиб туришдан умидвор дўстингиз Йўлдошли.

ТЎҒРИ ЧИҚҚАН БАШОРАТ

1959 йилнинг бошлари эди. Тошкент темир йўли бошқармасида (хозир “Ўзбекистон темир йўллари” давлат акциядорлик компанияси) ўзбек тилида “Темирийўлчи” номи билан чиқадиган газета ташкил этилди.

Дўмбиравот маҳалламиизда яшовчи ўша йили ўрта мактабни битирган Ўринбой исмли йигит босмахонага материалларини олиб борувчи (курьер) эди. Газета Тошкент тепловоз вагон таъмирлаш заводи босмахонасида чиқар эди. Ўринбой бироз вақт ишлаб “мен дўхтири бўлишни орзу қиласман, ТошМИда ўқимоқчиман”, деб ишдан бўшашга ариза берди. (Хозир у тажрибали дўхтири). Хайрлашиб кетаётганда, “мен билан бир синфда ўқиган Ўткир шу соҳага жуда қизиқади, ўрнимга келса майлими” деди.

– Айт, келсин, – дедим унга. – Ўткир бизнинг маҳаллада бўлгани учун мен уни яхши биламан. 10-синфни медаль билан битирган.

Эртасига таҳририятимизга Ўткир келди. Мен уни муҳаррир хонасига бошлаб бордим. Ўринбосари Асом ака Исҳоқов ҳам унинг ҳузурида экан. Йичарига кирдик.

– Бу йигит қизиқиб ишлаб кетса керак, – деди газета муҳаррири Раҳимов. Ўткирнинг ўша жойда ўзини тутишини зимдан кузатиб ўтирган Асом ака гапга аралашди:

– Вақти келганда, мени айтди дерсизлар, бу камтарин, тийрак йигитча таниқли ёзувчи бўлади. Ҳаким Назир ҳам болалар газетасига келганида шунаقا ёш йигитча эди, – деди самимийлик билан.

Ўткирга адабий ходимлар ва муҳбирлар хонасига стол қўйиб бердик. У босмахонага бериладиган материалларни тартиб билан тахлаб, ўз столи тортмасига қўярди.

Кунлардан бирида шу хонада ўтирадиган, доим “Беламор”ни бурсиқтиб чекадиган, кекса ходимлардан бири “ука, мана бу кулдон тўлиб кетибди, уни йўлакдаги урнага ағдариб кел” деб буюрди. Ўткир ғаши келиброқ кулдонни олди. Хонадагилар эшитадиган қилиб “менга бунаقا иш буюргандан кўра ёзган нарсаларимни ўқиб кўр, деса бўлмайдими?” деб чиқиб кетди. Шу баҳона у таҳририятга келган хатларни, газета учун тайёрланган материалларни

синчиклаб ўқийдиган, лозим бўлса таҳрир қиласидиган бўлди. Бу билан у шунчаки хат ташувчи дастёр эмас, ижодий фикрлайдиган ходим эканини кўрсатди, мақолалари тез-тез босиладиган бўлди.

Ўша пайтда Сирдарё туманида ўқитувчи бўлиб, газеталарга хабарлар ёзиб юрган Жўра Холқосимов адабий ходим бўлиб келди. Унинг қадди-қомати келишган, баланд бўйли эди. Лекин русчадан нўнокроқ эди. Ўткир руслар билан худди ўзидек тиллашарди. Улар иккаласи биргалашиб заводларга, деполарга боришар, Жўрабой саломлашиб, ўзларини таништирадиyo у ёғини Ўткир дўндирап, натижада икковининг номидан мақола тайёр бўларди.

Ўша кезлари рўй берган бир воқеа эсимдан чиқмайди. “Қизил тўқимачи” станциясида Анатолий Вареник деган бошлиқ бор эди. У билан тез-тез гаплашиб турадик. Анатолий қўнғироқ қилиб, сўраб қолди. “Хошимов деган йигит сизларда ишлар экан. Мен билан станциямиз фаолияти ҳақида анча сухбатлашдик. Рус тилини бунчалик тоза гапирадиган ўзбеклар кам бўлади. Қаердан ўрганганд, тилни?

Қизиғи шундаки, Вареникнинг ўзи ўзбек тилини “сувдек” билар, биз билан ўзбекча гаплашардик. Мен кулдим. – Сизнинг ўзингиз ўзбекчани қаёқдан ўргангансиз? – десам, “мен қишлоқда, ўзбек болалар орасида ўсганман, шунинг учун тилни яхши биламан”, деди.

– Ўткир эса ўрис болалар орасида ўсган. Уларнинг ҳовлиси тўқимачилар комбинатига қарашли пионерлар лагерининг ўртасида. Ота-онаси ҳам ўша ерда ишлайди. Шунинг учун у рус тилини яхши билади, дедим. Хуллас, адабнинг рус тилини яхши билиши таҳририят учун ҳам фойдадан холи бўлмади. Кейинчалик ёзувчи баъзи асарларини рус тилига ўз таржимасида нашр эттирагини кўрдим...

Ўткир ўша пайтда ҳам синчков эди. Қаерга борса, у ердан бир таассурот олиб қайтарди.

– Қойил! – деб қўйди бир куни у.

– Ҳа, яна нима гаплар? – дедим. Айтиб беришича, Тошкент тепловоз депоси касаба уюшмаси қўмитасининг раиси билан телефонда алоқа боғлаб, эртасига соат 11 да учрашадиган бўлишибди. Касаба уюшмаси қўмитасининг раиси белгиланган мавзуга тегишли олти кишини ўз хонасига тўплаб туришни ваъда қилибди. Ўткир айтилган вақтда борса касаба уюшмаси бошлиғининг бир ўзи эмиш.

– Қани ваъда қилган одамларингиз? – деса у киши соатига қараб, ҳали бир ярим минут бор, келишади, дебди. Орадан бир ярим дақиқа ўтгач, олти киши кириб келибди.

– Яхшиям ишни шу ерда бошладим, – деди у. – Чиндан ҳам бу соҳада “темир интизом” бор экан.

Ўткир Ҳошимов “Машаққатли сафар” деган автобиографик мақоласида ўзининг биринчий бадиий асари – “Тўрт мактуб” деган ҳикояси 1963 йил 17 апрел куни “Тошкент ҳақиқати” газетасида босилганини ёзган. Аслида ундаи эмас. Унинг биринчий ҳикояси 1961 йили “Темирйўлчи” газетасида эълон қилинган. Бу стрелкачи тўғрисидаги ҳикоя эди. Шуниси эсимдаки, ҳикоянинг ҳажми каттароқ эди. Ўқиб, бир қисмини ихчамлаштиридим. Уни босмахонага топшира туриб, Ўткирнинг ўзига кўрсатган эдим, “билинтирмасдан қисқартирибсиз, ўша жойи ўзимга ҳам эришроқ туялаётган эди”, деди. Ҳикояни Асом aka ҳам ўқиди.

– Бу йигитдан яхши ёзувчи чиқади, демаганмидим, – деди у киши сидқидилдан севиниб. – Қаранг ҳаммасини билиб, лўнда қилиб ёзган. Темир йўл соҳасини ҳам чуқур ўрганган.

Ўткир Ҳошимовнинг биринчий ҳикояси кўпчиликка маъқул бўлди. Эртасига темир йўл бошқармасининг бўлим бошлиғи Қаноат Хўжаев қўнғироқ қилди.

– Кеча газетамида бир ҳикоя ўқидим. Ўткир Ҳошимов ким? Темир йўлчилар ҳаётининг ўзига хос жиҳатларини жуда яхши ёритибди. Абдулла Қаҳҳор сингари ихчам ва мазмундор сўзларни топиб ишлатибди, – деди.

– Ўзимизнинг ходим, ёш йигит, бу унинг биринчий ҳикояси, дастлабки ижодий маҳсули, – дедим унга.

– Эй, анави ихчамгина йигитчами? Биринчий ҳикояси шунаقا бўлса, ҳали у катта ёзувчи бўлиб кетади, – деб қўшиб қўйди Қаноат ака. Эҳтимол адабнинг бу ҳикоядан кўнгли тўлмаган ва шу сабабдан уни унутиб юборган бўлиши мумкин...

Орадан йиллар ўтиб Ўткир Ҳошимов, “Тошкент ҳақиқати”, “Тошкент оқшоми” газеталарида, “Шарқ юлдузи” журналида ишлади. Олий Мажлисда хизмат қилди. У элимизнинг ардоқли адиби, Ўзбекистон ҳалқ ёзувчиси... Бундан эллик йил аввал бўлажак ёзувчининг иш фаолияти мен билан бир жойда бошланганидан қувонаман ва фахрланаман.

“СҮҚҚАБОШ БЕВАГИНА” ВАСФИДА...

Ўша куни бозор ораламаганимизда, “Сўққабош бевагина”ни учратмаган бўлармидим. Парранда растаси томон бурилай деб турганимда, аллақандай “антиқа янгилик”дан дарак бергандай, юрак қурғур дангалига дукиллаб кетди. Ўгирилиб қарадим. Туйғуларим тоймаган, сезгиларим сийпанмаган, ҳисларим ҳисобдан адашмаган экан. Не қўз билан кўрайки, биқин томонимда – бозор бўсағасида бежиримгина “Билимлар дунёси” супермаркети қад ростлаб туради. Сўнгги кезларда айрим манзилгоҳларда таъмирталаб клуб, кутубхона, китоб дўконлари бузиб ташланиб, улар ўрнида кундузи “Кафе”, тунда бебош болалар бодрайдиган – “Бар”, шарм-ҳаёсиз фильмларни тарғиб этувчи видеосалонлар кўпайиб кетаётганлигидан кўнгиллар хираю хижил тортаётганди.

Мана “захар” ўрнига ҳақиқий Зиё улашадиган маскан – маърифатхона қурадиган валломатлар ҳам топиларканку! Бундайларнинг отасига олқишу ўргатган устозига офарин... Шундай хайрли юмушни амалга оширган тадбиркор зиёкорга чин дилдан ташаккур ва таъзим қилганча, дарҳол “Билимлар дунёси” томон ошиқдим. Толени кўрингки, худди шу жойда, яна ҳам, аникроғи, “Дунё”нинг “Ҳажв ва юмор” бўлимида... “Сўққабош бевагина”га дуч келсам бўладими? Дилтортар, дулхуш ва дилкаш “Бевагина” “кулги ифори”ни баралла таратганча, менга қараб, ширингина жилмайиб туради. Шу сабабми, кўзим қамашди, қулоқларим тагида сифатли, экологик тоза кулги янграйдиган бўлди, димоғимга тахи бузилмаган табассум ифори урилди. Лабларим иржайиб, иршайишга тутинди, қўлларим эса беихтиёр унсизгина, умидли нигоҳ билан ўзига имлаётган “...Бевагина” томонга чўзилди. Аммо “...Бевагина”га сук кўзини “сузаётганлар” талайгина экан! Гўзалликка ўч миямда чақмоқ чақилди: илдамроқ ҳаракатимни қилмасам, ўзгалар “ўлжа”ни илиб кетишлари турган гап. Шу сабабдан савдони дарҳол пишитдим-да, “Сўққабош бевагина”ни бағримга босганча, тизгиним танобини тўғри уй томон торта қолдим.

Хеч кимдан яширадиган сирим йўқ. Ҳозир ошкорлариқ маҳали. Шу боис bemalol айта оламан. Ўша куни хилватгина хонада, тунги

чироқ ёруғида “Сўққабош бевагина” билан гоҳ ёнбошлишиб, гоҳ чўзилишиб, алламаҳалгача “сухбати анжуман” қурдик. Аммо-лекин, бироқ кўнгилдан кетиб фироқ деганларидай, шу кеча “Бевагина” билан менчалик мириқиб, маза қилган одам бу дунёда бўлмаса керак! Кўнгилдаги “ёр”ни энди топгандай эдим... Вой, бу “Сўққабош”нинг илмоқли ибораларга чечанлиги, ҳазил-мазахга устамонлиги! Вой, бу “Бевагина”нинг жилмайиб туриб жон олишларию қитиқламасдан кулдиришлари! Яна бу “Қақажон” қурмағурнинг ўзбекча, ўрисча, инглизча ва яна алламбало тилдаги “қичик” ва “қочиримлари”нинг ўзига ярашганлиги-чи?! Гап-сўзи оҳангидан ҳангомаю ҳажв, юмшоққина, беозоргина кулги салқиб турсада, аммо ақл тарозисида тортиб кўрсангиз, тоши босиб, ҳар қандай паллани лапанглатиб юборади-я! “Бевагина”нинг хўп “юриб”, кўпни “кўриб” қўйганлар тоифасидан эканлиги яққол сезилиб турарди. Танимаган кишиси йўғ-а! Яна кимлар, денг? Казо-казо ёзувчишоирлар, машхур санъаткорлар, таниқли олиму фузалолар! Бир қарасанг, Сайд Аҳмад домланинг бу ёғи Амриқою у ёғи Андижонга қилган “Ғаройиб саёҳатлари”ни тиник табассум билан ҳикоя қиласди. Бир қарасанг, домлаю адиб Озод Шарофиддиновнинг ўзига хос “шумликлар”идан шўх-шодон сўзлайди.

Айниқса, “Елвизак”ни жиловлаган ҳажвчи Неъмат Аминов, “Қишда бодом гуллатган” ёзувчи Шукур Холмирзаев, “Кўп қаватли” қаҳқаҳаси билан “чумчукларни чўчитган” шоир Йўлдош Сулаймон ва бошқа ижод ҳамда илм аҳлларига қувноқ ва ҳазин хотиралари билан ҳаётий ҳайкал қўйганда, хурматинг минг чандон ошиб, “Бевагина”нинг манглайига муччи билан “муҳр” қўйгинг келади. Аммо шу аснода “сухбатдошим”нинг “шпана”лик сир-асрорлари ҳам очилиб қолса бўладими?! Ўзининг икрорига кўра, “Бевагина”си тушмагур кимсан қаҳрамон шоирлар Эркин Воҳидов, Абдулла Орипов, номдор ёзувчилар Носир Фозилов, Эркин Аъзамов, Мурод Муҳаммад Дўст, таниқли танқидчилар Умарали Норматов, Абдуғафур Расулов, Иброҳим Ғафуровларга сайру саёҳатларда “илакишиб”, уларнинг “қусурлар”ини кулгили тарзда фош қиласди.

Пойтахтликлар ўз йўлига. Бу “Сўққабош”нинг олис қашқадарёлик қурувчи Жуманазар Салаев билан “жўравоз”лик қилиб юрганига нима дейсиз? Булари ҳали ҳолва. “Бўлган ёки бўлмаган воқеалар”ни “Зил-ҳазил” тарзида “Хитойча усул” қўллаб, “Бўй-

доқقا маслаҳат” қабилида “Омадли жентельменлар”га “Жинни бўлиш осон”лигидан “Жазо” лозим топилганда эса “Маълумотнома” беришига ҳам тараф йўқ.

“Сўққабош”гинанинг суҳбатидан кўнгиллар сув ичганда “Туғма истеъдод” эканлигига тан бермай иложсиз қоласиз. Хусусан, кулиш-кулдириш бобида тараф йўқ. Боиси, “Намунали эр” сифатида “Мўминтой” деган “Бутун йигит”га “Телпак” кийдириб, “Ош” едириб, сўнг “Соқов лайча” қиёфасида “Ўзбекнинг соддаси” саналмиш “Шаҳарлик куёв”ни қай тариқа “Кўк йўтал”га дучор қилганлиги, устига-устак “Уста кўрмаган шогирд” мақомида ичкиликни макруҳ атаб, аммо ичидаги “сув”ини бисёр нўш айлайдиган “Бутилка ҳожи” устидан “Муштум” журналига раддия берганлиги борасидаги ҳажвий ҳангомаларидан хохолайвериб, ҳолдан тойиб қолишингиз табиий ҳол...

Бас, шундай экан... “Бевагина”нинг асл “башараси”ни фош этиш ва мақсадини баён айлаш фурсати етди! Бунинг учун узок изланиш шарт эмас. Ана, манглайига босилган “тамға”дан аёнки, бу “Сўққабош бевагина”нинг соҳиби – машҳури жаҳон ёзувчи (ёзгувчи эмас) Ўткир Ҳошимов экан. “Бошпурти”даги бошқа “данний”ларга қараганда бу “Бевагина” ана шу ёзувчи акамизнинг қалами ва қалб амри “буюртмаси” билан Шарқ НМАК “туғруқхонаси”да ўн минг нусхада “кўз очиб”, сўнг маҳсус топширик, яъни “кулгитерапия” хизматини ўташ учун барча музофотларга жўнатиб юборилган экан.

“Сўққабош бевагина” хусусидаги тавсифимиз худди ана шу жойга етганда кўнгилда андак “андишасизлик” ва арзимасгина “арз” ўрмалаб қолди: “Хасислик” ҳам эви билан-да, ёзувчи ака!

Иддаони йўғон ичакдай чўзмай, муддаога ўтсак, кўнгли яrim қилгувчиларга ҳам болиш, ҳам овунчоқ бўлувчи “Сўққабош бевагина”ларни дунёга келтириш” қўлингиздан келаркан, нима қиласардингиз бунақа тарзда “қурумсоқлик қозони”га ўт қалаб?!

Ахир, ўзингиз бундай қаламни қайраб, ҳисоб-китоб қилиб кўринг, миллионлаб табассум ошуфталирию ханда ошиқларига бор-йўғи ўн мингта “Бевагина” урвоқ бўлармиди? Айниқса, “Сўққабош...”ларга суқланиб қаровчиларнинг чап ичагига ҳам юк бўлмайди-ку! Шундай экан, арз-иддаомизни ҳамда “Бевагина”нгизга бўлган муҳаббатимизни тўғри қабул қиласиз.

*Карим НОРМАТОВ,
профессор*

АЛАНГА БИЛАН БОШЛАНГАН ИЖОД

Ўтган асрнинг 60-йиллар ўртасида, аниқроғи, Тошкент зилзиласидан (1966 йил, 26 апрель тонготарини эсланг) кейин қўп ўтмай, 1 июлдан “Тошкент оқшоми” ва “Вечерний Ташкент” газеталари нашр қилина бошланди. Эркин Воҳидовнинг “Палаткада ёзилган достон” асарини биринчи бўлиб “Тошкент оқшоми” чоп қилган. Яна ўнлаб ватанпарварлик, бунёдкорлик тўғрисидаги шеърлар, ҳикоялар газеталар саҳифасидан тушмас эди. Ўша йиллари газетанинг адабиёт ва санъат бўлими мудири бўлиб ишлаган Ўткир Ҳошимов бундай охори тўкилмаган асарларни тез топар, муаллифларга буюртмалар берар, бир сўз билан айтганда, “Оқшом”нинг ўқишили бўлишини таъминлар эди.

Мен бу газетага “Ёш ленинчи” (ҳозирги “Туркистон”) дан бўлим мудири лавозимига ўтгандим. Дастреб Ўткиржоннинг тиним билмай ишлашини кўриб, ҳайрон қолар эдим. Ҳали мақола ёзади, ҳали муаллиф билан сұхбат қуради, матн қўчирувчи хонасидан яrim кунлаб чиқмайди: қарийб бутун бошли газетанинг материалларини русчадан ўгиради.

Ҳамон эсимда, бир куни иқтидорли публицист ва ёзувчи, газета бош муҳаррири, раҳматли Саъдулла Кароматов шундай деб қолдилар:

– Сиз, Ўткиржон, фақат журналист эмас, истеъдодли ёзувчисиз. Нега машбюордан чиқмай қолдингиз. Сиздан бошқа таржимон йўқми? Ҳикоялар ёзинг. Газетамида яхши асарларингиз чиқиб турсин.

Биз бош муҳаррирнинг гапларига қўшилдик. Саъдулла ака гапида яна давом этдилар:

– Таржима билан Солиҳжон, Алиназар, Усмон Юсупов, Каримжон шуғуллансин...

Газета бош муҳаррирининг ўша пайтдаги ўринбосари, раҳматли Максим Каримов гапга аралашди:

– Саъдулла ака, жуда тўғри айтдингиз. Жадвал билан ишласак, Ўткиржон учун асарлар ёзишга имконият яратилади.

...Бир воқеа эсимдан чиқмайди. Ўткиржон баъзан ишга кечикиб қоларди. Бир гал таҳририят мажлисида интизом масаласи кўрилди. Шунда ходимлардан бири талаб ҳамма учун бир хил бўлиши керак, баъзиларнинг ишга қачон келиб қачон кетгани назорат қилинмайди, деди. Саъдулла ака кимни назарда тутаяпсиз, деб сўраганда ўша ходим Ўткиржонни айтди.

– Бўпти, – деди Саъдулла Кароматов, – бу масалага алоҳида қайтамиз. Ҳозир эса сиз билан Ҳошимовга топшириқ. Сиз фалон мавзуда, Ўткир фалон мавзуда бир саҳифадан материал тайёрлайсизлар. Кейинги сонда босилиши керак.

Кечқурун соат бешда одатдаги “планировка” бўлди.

– Саҳифа қани? – деб сўради Саъдулла ака бояги ходимдан.

– Улгуролмадим, эртага топшираман, – деди ходим.

Саъдулла ака столи устида турган бир тахлам материалларга имо қилди.

– Ўткир Ҳошимов эса саҳифани икки соатда столга қўйди. Орангиздаги фарқни энди тушундингизми?.. Менга кун бўйи хонасига кириб олиб қоғоз қиртиллатадиган ходим эмас, иш берадиган одам керак!

Талабчан бош муҳаррирнинг бу гапида ҳақиқат ва бағрикенглик бор эди. Адибнинг кўп яхши асарлари “Тошкент оқшоми”да ишлаётган йиллари яратилди. “Баҳор қайтмайди”, “Қалбингга қулоқ сол”, “Нур борки, соя бор”, “Инсон садоқати”, “Тўйлар муборак” кабилар ўша йиллари ёзилган. Ўткиржон ўзига жуда талабчан ёзувчи. Адашмасам, ўша йиллари “Тошкент оқшоми”да унинг ўнлаб ҳажвий ҳикоялари босилган эди (турли тахаллуслар билан). Бироқ адид улардан жуда оз қисмини тўпламларига киритди. Ҳолбуки, уларнинг кўпчилиги ҳозир ҳам китобхонга маъкул келишига шубҳа қилмайман. Ўткиржоннинг онаси (ҳаммамиз у кишини ойи деб атардик) барчамизни бирдек яхши кўрар, худди “Дунёнинг ишлари”да тасвирлангандек, ўта камтар, ўта меҳрибон эдилар. Ўткиржонларнинг шифтига гулқоғоз ёпиширилган торгина уйига ўнлаб дўстлар bemalol сифиб кетаверар, ойимиз ҳар биримиз билан айланиб-ўргилиб кўришар эдилар. “Тўлқин ўғлим нега келмади?” (Тўлқин Расулов ҳақида), “Қора болам нега кўринмайди?” (Низом Комилов тўғрисида) сингари саволлар берардилар...

Бир куни адид уйида ҳашар бўлди. Иш устида мен, Насриддин Мухаммадиев, Отаёр (Худо раҳмат қилган бўлсин) “Баҳор қайт-

майди”даги Алимардон асар охирида ҳалок бўлиши шартмиди, деган масалада гаплашдик.

– Буни мен истамаганман, – деди муаллиф. – Лекин баъзан қаҳрамон мантиқи ёзувчи мантиқига бўйсунмай қоларкан. Уни мен эмас, ўзи ўлдирди. Алимардон енгилиб яшашдан кўра ўзини нобуд қилишни афзал кўрди. Эҳтимол, бу унинг мардлигидир...

“Нур борки, соя бор” романида лола сайли манзараси ниҳоятда тиник тасвирланган. Бу бежиз эмас. Деярли ҳар йили баҳорда Тўлқин Расулов, мен Ўткиржоннинг ҳаворанг “Жигули”сида Қозоғистон қирларига чиқиб денгиздек чайқалиб ётган лолазорни томоша қиласардик. Баъзан баҳор жаласида қолиб кетган пайтларимиз ҳам бўлган (дарвоқе, романда Шерзод билан Зухра ҳам шундай жалада қолади)...

Бир йили Абдуғафур Расулов, Баҳодир Ғуломов, Ўткиржон Кўқонга бордик. Кўқон театрида “Тўйлар муборак” комедиясининг премьераси бўлди. Томошабинлар комедияни қизғин кутиб олишди. Зални тўлдириб ўтирган беш юзга яқин одам қотиб-қотиб кулар, лекин муаллиф негадир жиддий эди. Эртасига саҳналаштирувчи режиссёр ва асарда роль ўйнаган актёrlар билан сухбатда муаллиф эътиroz билдириди.

– Комедия дегани масхарабозлик эмас. Илтимос, артистлар саҳнада қилиқ қилмасин!

Ўйлаб кўрсам, муаллиф тўғри айтган экан. Ўша йиллари Ўткир Ҳошимов асарларини синчиклаб ўқиб, ютуқ ва камчиликларини кўрсатган адилар орасида Ўлмас Умарбеков, Учқун Назаров, Носир Фозилов, Ҳасан Тўрабеков, Тўлқин Расулов, Низом Комилов, айниқса, ажралиб турарди. Ўткир Ҳошимовнинг китобхонга маъқул келмаган, уни лоқайд қолдирадиган асари йўқ. Олис қишлоқлардаги мактабларда, овлоқ кутубхоналарда ёзувчининг муқоваси йиртилиб, саҳифалари титилиб кетган китобларини кўп кўрганман. Бу – ижодкор учун катта баҳт. Айниқса, “Баҳор қайтмайди”, “Қалбингга қулоқ сол”, “Дунёning ишлари”, “Икки карра икки – беш”, “Тушда кечган умрлар”, “Икки эшик ораси”, “Дафтар ҳошиясидаги битиклар” китобларини китобхонлар қўлмақўл қилиб ўқиганини биламан. Бундан қарийб эллик йил аввал талаба ёзувчининг биринчи асарига оқ фотиҳа берган ўта талабчан устоз Абдулла Қаҳҳор “бирдан лов этиб алнга билан бошланган ижоднинг келажаги порлоқ бўлади”, деганда тўғри башорат қилган экан. Ўткирнинг ижоди ҳамон ловуллаб турибди.

АЗИЗ ДЎСТИМ

Одам бу дунёда дўстсиз яшай олмайди. Менинг ҳам дўстбиродарларим оз эмас. Шулар орасида энг сирдош, энг қадрдон, оғир-енгил паллада ёнма-ён турадиган дўстим Ўткир Ҳошимов. Мен унга ҳамиша “азиз дўстим” деб мурожаат қилишимнинг боиси шу.

Қалбида истеъдод ўти бор қаламкаш бошданоқ ярқ этиб тезда муҳлислар ихлосини ўзига тортади. Мен рўзномаларда Ўткиржоннинг оддий мақолалардан тортиб, лавҳаю очеркларини ҳеч қолдирмай завқ билан ўқиб юрадим. Бир куни Эскижўвадаги китоб дўконидан “Пўлат чавандоз” деган кичкина рисола сотиб олдим. Бу Ўткиржоннинг “Тошкент” нашриёти чоп этган очерклар тўплами – биринчи китоби эди. Унда одамлар, воқеалар, гўзал табиат жонли тасвирланган, қаламкашнинг тили ширинлигидан ғоят равон ўғилар эди. Орадан бир йилча ўтмай, 1963 йил 17 апрел кунги “Тошкент ҳақиқати” рўзномасида Ўткиржоннинг “Тўрт мактуб” сарлавҳали ҳикояси босилиб чиқди. Мароқ билан ўқидим. Бу ёш ижодкорнинг ўқувчиларга ҳадя этган биринчи бадиий асари эди. Ўткиржонни ажойиб ҳикоя билан табриклидим, шунда мени жуда яқин олиб, “Тўрт мактуб” асосида бир қисса ёзиш нияти борлигини айтди.

Яхши ният – ярим давлат экан. Ўткиржон Тошкент давлат дорилфунунида ўқиб юрганида “Чўл ҳавоси” деган қисса ёзди. У “Шарқ юлдузи”да чиқди, тезда эл оғзига ҳам тушди. Китобхонлар қиссаси қўлма-қўл олиб қизиқиш билан ўқишар, айниқса, ёшлар соғ муҳаббатнинг қудрати ҳақида баҳслашар эди. Турмуш қийинчиликлари боис кундузи рўзномада ишлаб, кечқурунлари муаллимлар олийгоҳига ўқишига қатнардим, қаламкаш сифатида унчамунча ҳикоялар ҳам машқ қилиб юрадим. Ёзганларимни кўпинча “Тошкент ҳақиқати” рўзномасига олиб борардим. Бу ерда адабиёт бўлимига хушфеъл, бағри кенг, ёшларга меҳрибон устоз шоир Назармат ака мудир эдилар. Ўткиржон эса дорилфунунинг тўртинчи курсида ўқиши билан бирга адабиёт бўлимида ходим бўлиб

ишларди. Бир куни “Кўштерак” деган ҳикоямни Назармат акага бериб кетдим. Уни Ўткиржон ҳам ўқибди.

– Ҳикоянгиз менга ёқди, – деди одатдагидек хушнуд табассум билан, – яқин икки-уч кунда чиқиб қолади.

Ўткиржон билан у ёқ-бу ёқда сұхбатлашиб ўтирилик. Шу қисқа дақиқада юз-кўзларига разм солиб нимадир кашф этгандек бўлдим. Юзидан фақат ҳалол ва холис одамларда бўладиган нур ёғилиб тургандек эди.

– Айтгандек, Тўлқин ака, сизга китоб ҳадя қилмоқчийдим, – деди ва стол ғаладонидан бир рисола олиб қўлимга тутқазди. – Сизга атаб ёзиб қўйгандим. Китоб муқовасига қарадим. Бу 1965 йилда “Ёш гвардия” нашриёти тўрт муаллиф асарларини мужас-самлаб чоп этган китоб эди. Унинг номи Ўткиржоннинг “Гунафша” асари билан аталиб, “Чўл ҳавоси” қиссаси, “Гунафша” ва “У кетди” ҳикоялари киритилган эди. Ўткиржоннинг бу китобдаги асарларини тоза ҳаво олаётгандек мириқиб ўқиб, адабиётимизга тили жозибали ёзувчи кириб келаётганидан тўлиб-тошиб севинардим.

1966 йилнинг иссиқ ёз кунлари эди. 26 апрель тонготаридаги қаттиқ зилзиладан кейин ҳам Тошкент замини бот-бот беланчакдек тебраниб, зилзила сони уч юз мартадан ҳам ошиб кетган эди. Ўша пайтда “Ўқитувчилар газетаси” Пушкин кўчасидаги 1-йида жойлашган бўлиб, “Правда Востока” кўчасидаги нашриётда чоп этиларди. Рўзнома тайёрланадиган куни навбатчиликка шу ерга келардик. Ўткиржон ишлайдиган “Тошкент ҳақиқати” рўзномаси нашриёт биносида, тўртинчи қаватда бўлиб, биз сахифа ўқийдиган хона Ўткиржоннинг хонаси билан ёнма-ён эди, тез-тез дийдор кўришиб турадик.

Бир куни навбатчиликда эндингина сахифани ўқиб ҳам бўлгандим, Ўткиржон келиб қолди:

– Юринг, театр майдонига чиқиб, фонтан олдида бир шамоллаб келамиз, – деди.

Нимагадир Ўткиржоннинг руҳи паст, тажанг кўринарди. Ҳайрон бўлиб эргашдим. Иккаламиз Навоий театри фаввораси тўғрисида ўсган қайрағоч тагидаги скамейкага ўтирилик. Ўткиржон сигарет чекарди.

– Хафа кўринасиз? – оҳиста сўрадим.

– Э, дунёнинг ишларидан хафа бўлиб кетасиз, – деди сигаретни тутатиб: – Биласиз, уйга қаравай деб университетнинг сиртқи бўлимига кирдим, “Темир йўлчи”, “Қизил Ўзбекистон” газеталарида куръер бўлиб ишладим, тўртинчи курсдан кундузги бўлимга ўтиб, “Тошкент ҳақиқати”да ярим кун ишлаб, ярим кун ўқишга югурдим.

– Бу яхши-ку, Ўткиржон, – дедим тасалли бермоқчи бўлиб.

– Ҳа, яхши, – деди Ўткиржон чимирилиб. – Ўзингиз ўйланг, газетада ярим кун ишлаганимда, редакторимиз Аҳмаджон Исмоилов, бўлим мудири Назармат ака, “Сен ўзинг кимсанки, бунақа чиллаки ишлайсан”, деб бир оғиз танбех сўз айтишмади, ҳаммалари хурмат қилишади. Энди бўлса янги ташкил этилган “Тошкент оқшоми”га ўтиб ишлашим керак эмиш. Ҳозир Марказкомга бориб келяпман, “Оқшом”га ўтасиз дейишиди.

– “Оқшом” жуда ўқимишли газета бўлади, – дедим маслаҳат тарзида, – адабиёт-санъат бўлимини гуллатиб ишлайсиз...

– Ишлайманку-я, – деди Ўткиржон ҳамон куюнчак оҳангда. – Аммо “Ҳақиқат”даги устозларимни ташлаб кетгим келмаяпти. Ўшанда Ўткиржон нима учун “Тошкент оқшоми” газетасига ўтишини хоҳламаганини тушундим. Одатда одамлар мансаби бир пофона кўтарилиб, маоши бир мунча ошса хурсанд бўлади-ку... Гап шундаки, Ўткир Ҳошимов андишали одам! “Тошкент ҳақиқати” раҳбарияти унинг тушгача ишлаб тушдан кейин ўқишга югуришига, ҳатто бир ойдан ортиқ пахтага боришига ҳам рухсат берганини унутмаяпти, истихола қиляпти...

Дарвоқе, мен ҳам кўп ўтмай “Тошкент оқшоми”га ўтиб ишлай бошладим. Иккаламиз ўн олти йил бир қаватда, ёнма-ён хоналарда меҳнат қилдик. Ёзувчининг ўзига хос хусусияти – ниҳоятда тез, шиддат билан ишлайди. Бунинг боиси – у қўлига қоғоз-қалам олганидан кейин эмас, ундан анча аввал ёзилажак нарсани пишишиб кўяди. Ўша йиллари чиққан “Оқшом”ни варакласангиз, “Очилов”, “Бозорбоев”, “Ҳамидов”, “Ҳамдамов” каби имзолар билан эълон қилинган ўнлаб ҳажвияларни ўқишингиз мумкин. Буларнинг ҳаммаси Ўткир Ҳошимовники! Кўпларини Ўткиржон тўғридан-тўғри машинкага “диктовка” қилиб ёзган.

Адибнинг “Баҳор қайтмайди”, “Қалбингга қулоқ сол”, “Нур борки, соя бор” каби роман ва қиссалари, сахна ва телевидениеда намойиш этилган “Инсон садоқати”, “Тўйлар муборак”, “Хазон бўлган баҳор” каби асарлари ўша йиллари ёзилган эди. Мен бу-

ларнинг деярли ҳаммасини қўлёзмада ўқиганман. Муаллиф ижобий фикрни ҳам, танқидий мулоҳазаларни ҳам оғринмай қабул қилганини кўп бор кўрганман.

Ўткир Ҳошимовнинг саксонинчи йиллари телевидениеда олиб борган “Баҳс” кўрсатуви бутун мамлакатда машҳур бўлиб кетди. Эсимда бор. “Баҳс”ни минглаб томошабинлар ҳамма ишини йиғишириб қўйиб кўрар эди. Сабаби – бу суҳбатларда Ҳақиқат деган тансиқ неъмат бор эди. Адигининг Чилонзордаги ижодхонасида “Баҳс” бўйича келган икки мингга яқин хатни ўзим кўрганман...

Телевидениеда “Баҳор қайтмайди”, “Инсон садоқати”, “Дунёning ишлари” йиллар давомида неча марта намойиш қилинмасин, одамларни ларзага солгани ҳаммага маълум.

Мен Ўткиржонлар хонадонининг аъзосидек эдим. Ўткиржон – менинг онамни, мен Ўткиржоннинг онасини “оий” деб атар эдик. “Дунёning ишлари” қиссаси нақадар изтироб билан туғилганига гувоҳман. Адигининг онаси (оиймлар) нихоятда қўнгли кенг, меҳри дарё аёл эдилар. Менга “сиз менинг бешинчи ўғлимсиз”, дедилар. Бу асар адигининг бошқа йирик роман ва қиссалари каби бир зарб билан ёзилган эмас. Ҳар бир боби (ҳар бир ҳикоя) алоҳида-алоҳида, қарийб бир йил давомида қофозга тушган. Уларнинг деярли ҳаммасини қўлёзмада ўқиганман. Мен ҳам муаллифга қўшилиб изтироб чекканман.

Ёзувчининг энг катта бойлиги – китобхон меҳридир. Шу ҳақиқатдан келиб чиқадиган бўлсак, азиз дўстим Ўткир Ҳошимов чинакам “миллионер”. Уни чин дилдан севадиган миллионларча китобхонлар бор!

ЯЛПИЗ СОМСА

Ўтган асрнинг етмишинчи-саксонинчи йилларида Тошкент вилоятининг Калинин (ҳозирги Зангиота) туманида “Москва” жамоа хўжалиги бўларди. Мен шу ерда боғбон эдим. Боғ унчалик катта бўлмаса хам, чиройли узумзор, олмазор жуда файзли эди. Ўша йиллари “Тошкент оқшоми” газетаси қўлма-қўл ўқилар, шу таҳририятда хизмат қилувчи Ўткир Ҳошимов, Тўлқин Расулов, Солих Ёқубов сингари қаламкашлар боқقا тез-тез келиб туришар, қозонга шўрва солиб қўйиб узоқ-узоқ сухбат қуардик. Ўткир аканинг уйи яқин бўлгани учун баҳор кезлари ўғли ва қизалоғи билан шу ерга келиб, яйдоқ далада варрак учирашди.

Мен оддий боғбонман. Ёзувчиликка даъво қилган эмасман. Аммо кўнглимга келган баъзи ибратли воқеаларни қофозга тушириб турар, ҳеч кимга кўрсатмас эдим. Бир сафар уларни Ўткир акага журъат қилиб кўрсатдим. Адиб бўш машқларнинг камчиликларини очик-ойдин айтди. Улар орасида яроқлиларни кўриб қувонганини таъкидлади, газета ва журналларга тавсия қилди. Шу баҳона кейинчалик чоп этилган бир неча китобчаларимни ўзи таҳрир қилиб, сўзбоши ёзиб, нашр этишга ёрдам берди...

Эсимда, эрта баҳор кезлари эди. Тушлик қилиш учун уйга кетаётсам, дала йўлининг четида Ўткир аканинг ҳаворанг “Жигули” машинаси турибди. Яқинроқ бориб қарасам, ёзувчи умр йўлдоши Ўлмасхон опа билан анҳор қирғоғида юришибди.

Ялпиз теришаётган экан. “Нега шийпонга бормадингиз?” десам, “Сизни ишдан қолдиргимиз келмади”, дейиши... Эртасига нима сабабдандир шийпонга пешиндан кейин бордим. Қарасам, шийпон устунининг михида бир халтача илиғлик турибди. Очиб кўрсам, ичида қофоз пакетга солинган ялпиз сомсалар бор экан. Газета таҳририятига қўнғироқ қилдим. “Эрталаб ишга келаётганда чайлага ўтган эдим, йўқ экансиз, сизнинг насибангизни қолдирдим”, деди Ўткир ака...

Хаётда ҳар хил одамга дуч келаркансан. Бир хиллар бор. Мансаби жиндай кўтарилса, ёки назарга тушса, эртасигаёқ бошқа одамга айланиб қолади. Саломингга ўйлашиб алик олади. Ўткир

Ҳошимовни билганимга қирқ йилдан ошди. У халқнинг севимли ва энг машҳур адибларидан бири. Турли юқори лавозимларда ишлади. Аммо бирон марта димоги кўтарилиганини кўрганим йўқ. Ёши мендан каттароқ бўлса-да, мени Фанижон aka деб атайди. Ҳар гал кўришганда мендан олдинроқ салом беради. Унинг самимияти асарларида ҳам яққол кўриниб туради. Эҳтимол, юз мингларча китобхонлар уни чин дилдан севиши, асарлари ўқувчини ларзага солиши ҳам шундандир.

*Абдулаҳад ЎРМОНОВ,
Асака*

“БАҲОР ҚАЙТМАЙДИ”НИНГ БИРИНЧИ ЎҚУВЧИЛАРИ ЭДИК

Атоқли ёзувчимиз Ўткир Ҳошимовнинг “Баҳор қайтмайди” китобини қўлимга олар эканман, беихтиёр талабалик йилларим ёдимга тушади. Умримнинг қаймоғи, қайтмас тўлқинлари бўлиб қолган у кунларни эсласам юрагим орзиқади.

1969 йилнинг кеч қузи эди ўшандা. Биз талабалар Фаргона вилоятининг чекка туманларидан бирида пахта терганмиз. Янги йилга яқин ўқиши бошланган эди. Қўлимга “Шарқ юлдузи” журнали тушиб қолди. Журнал Ўткир Ҳошимовнинг “Баҳор қайтмайди” қиссаси билан бошланган эди... Бунгача ҳам ёзувчи бизга жуда яқин, қадрдон бўлиб қолганди. Чунки унинг “Одамлар нима деркин?”, “Шамол эсаверади” қиссаларини талашиб-тортишиб ўқиганмиз, ёзувчи иштирокида баҳс-мунозара уюштирган, саволларимизга адебнинг ўзидан жавоблар эшитиш баҳтига мұяссар бўлганмиз. Журнал талабалар, хусусан, филологлар ўртасида қўлма-қўл бўлиб кетди. Жасорат ва кучли илҳом билан ёзилган бу оташин қисса университет талабаларининг баҳс мавзуи бўлиб қолди.

Домламиз, адабиётшунос олим (Ўткир аканинг ашаддий муҳлиси) Йўлдош Солижонов бизга янги хушхабарни етказди. “Баҳор қайтмайди”ни муҳокама қиласиз, чукур таҳлил қиласизлар, Ўткиржоннинг ўзи келадиган бўлди”, деди. Белгиланган кун етиб келди. Мажлислар залига одам сифмай кетди. Учрашувда ўша бизга таниш қиёфа, ўрта бўйли, қоп-қора соч, самимий боқувчи кўзлари билан Ўткир ака ҳар бир сўзга чиққан талабаларни эътибор билан тинглар, жилмаяр, қофозга алланималарни ёзиб ўтиради. Саволлар ёзма бериладиган бўлди. Адиб саволларни ўқиб, қисқа, лўнда жавоб беряпти.

– “Ўткир ака, қиссадаги Алимардон Тўраевнинг прототипи ўзингиз эмасми?”

Залда қийқириқ, кулги кўтарилиди, онда-сонда қарсак чалганлар ҳам бўлди. Бизнинг тахминимизча бу савол ёзувчини гангиратиб қўйиши, жавоб бермай ўтиб кетиши мумкин эди. Йўқ, ундей

бўлмайди. Пастки лабини тишлаб, ўзи ҳам кулгига қўшилиб турган Ўткир ака ниҳоятда самимий ва босиқлик билан жавоб бердилар.

– Савол берган талабанинг жасоратига балли. Бундай савол, албатта, қақажон қизлардан чиқади. Афсуски, ўз имзосини қўймабдилар... – Ўткир ака кафтдеккина қофозни қўлида тутиб давом этди. – Йўқ, мен Алимардон эмасман. Аммо унинг жасоратига тан бераман, иқтидорини қадрлайман.

Баҳс давомида биз Ўткир акани ниҳоятда билимдон, жаҳон адабиётининг энг дурдона асарларини ўқиб, ҳатм қилган, рус тилини мукаммал билгувчи ёзувчи эканлигини чукур ҳис қилас ва уни ниҳоятда ҳурмат қиласдик.

Орадан йиллар ўтди. Севимли ёзувчимизнинг бирин-кетин иирик асарлари – “Нур борки, соя бор”, “Дунёнинг ишлари”, “Икки эшик ораси”, “Тушда кечган умрлар” дунё юзини қўрди, китобсевар халқимизнинг маънавиятини янада бойитди.

Таассуфлар бўлсинки, кейин бизга ёзувчи билан учрашиш, янги асарларини адиб иштирокида муҳокама қилиш насиб этмади. Чунки биз олийгоҳдан учирма бўлган, турли манзилларга парвоз қилгандик. Иттифоқо, айни қунларда бир қанча газеталарда Ўткир Ҳошимов имзосини кўриб қувониб кетдим. Ўша ўзига хос услуби, теша тегмаган мавзулар, ширави тили, бир оз қув, қайсар қаҳрамонлари таниш бўлган адибнинг ҳикоя, ҳажвияларини ўқирканман, ёзувчи билан боғлиқ хотиралара бир-бир кўз ўнгимдан ўтди!

Хурматли Ўткир ака! Биз сизни ўша биринчи асарингиз “Чўл ҳавоси” билан кашф қилганимиз. Сизнинг ижодингиз бизнинг кўз ўнгимида униб, ўсди, камол топди. Мамлакатимизнинг барча худудларига етиб борди. Хорижда ҳам сизнинг китобларингиз таржима қилинмоқда, севилиб ўқилмоқда.

АДАБИЁТ – САККИЗИНЧИ МЎЪЖИЗА

Ўтмишда бирор нарса сабаб бўлиб, ғурбатни ихтиёр айлаган аждодларимиз ўзлари билан бир сиқим тупроқ олиб кетишар экан. Машақкатли сафарларда, фароғатли дамларда, беморликларда, амалдорликларда... сўнгги сафаргача бу тупроқ сиқими Аёзнинг чориги каби уларнинг доимий ҳамроҳи бўлган. Ёзувчи ҳам адабиёт мулкига сафар қилганида бир сиқим Ватан туйғуси билан чиқмоғи зарур. Чунки «Миллий руҳи йўқ асар қофоз гулга ўхшайди. Ҳусни бору, хиди йўқ...»

Ижод жараёнини узок сафарга, адибни эса йўловчига менгзаш янги ташbihҳ эмас... Йўловчи ўз сафари давомида ўзи учун энг керакли нарсаларни олиб юради, энг азиз нарсаларини бошига қанча қийинчилик қилич қайраб туришидан қатъи назар, ўзи билан охиригача олиб кетади. Ижодкорнинг сафар тўрхалтасида маҳорат, малака ва тажрибадан ташқари хотира юки ҳам бор. Хотира – камолот ёшидаги одамлар учун умумий хусусият. Хотирагўйлик тарзидан ҳам инсоннинг феъл-атвори, шахси ҳақида хулоса чиқариш мумкин. Баъзиде ёзувчилар учун ёш бир жойга бориб қолганда «жабрдийда», «мазлум», «эзилган» қиёфага киришни, «жасорат» ва «қаҳрамонлик»лари ҳақида қалин-қалин «Эсадаликлар» чиқаришни хуш кўрадилар. «Саккизинчи мўъжиза» китобининг муқаддимасида эса, муаллиф энг нурли, энг ибратли хотираларини ўқувчилар билан баҳам кўради, «фош қилиш» – касофат, бировни уялтириш – ҳаром эканлигини билиб туриб, фақат яхшилар ва яхшиликлар ҳақида гапиради. Кимнингдир хатоси ҳақида гапирса ҳам, унда таъна-маломат йўқ, надомат – ачиниш ҳисси устун. Шукур Холмирзаев шу хислатини назарда тутиб, «Ўткир – самимий ёзувчи» дея таърифлаган бўлса, ажабмас...

Хар бир миллатнинг ўзига хос адабий диди бўлади. Араб ўқувчисини ҳаяжонга соглан нарсани инглиз ўқувчиси совуққонлик билак қабул қилиши мумкин, француз китобхони «классика» деб қабул қилган асар ўзбек ўқувчиси учун фахш ва зўравонликдан бошқа нарса эмас... «Саккизинчи мўъжиза» китоби «сариқ матбуот»даги рангиз адабиёт туфайли анча ўтмаслашиб қолган ўзбек

адабий дидини юксалтиришга хизмат қилувчи, адабиёт ва ижод ҳақида тасаввурларни кенгайтирадиган китоб...

«Мўъжиза» сўзига «Ислом энциклопедияси»да «инсон тафаккури англашга ожиз қоладиган амаллар» дея таъриф берилган. Диний таъриф бўйича, мўъжиза – Аллоҳ таолонинг энг азиз бандалари – пайғамбарлар томонидан содир бўладиган фавқулодда амалларнинг умумий номидир.

Сехр деган нарса ҳам бор, у инсонга таъсир кўрсата олади. Куръони каримнинг «Бақара» сураси 102-оятида Аллоҳ сеҳрни ҳаром қилди. Шу билан бир қаторда, «баъзи бир сўзларда сехр, баъзи шеърларда ҳикмат бор» ҳадисига таяниб, ҳақиқий адабиёт намуналарини ўтмишдаги алломалар «сехри ҳалол» дея таърифлаганлар. Сехри ҳалол – инсон тафаккури маҳсули бўлмиш мўъжизалар мажмуи, десак, янгишмаган бўламиз. Ўткир Ҳошимов дунёдаги саккизинчи мўъжиза – Адабиёт аталмиш муқаддас ўлканинг содик фуқароси сифатида бадиий ижоднинг сир-синоатлари, ижодкор ва даврнинг ўзаро муносабатлари, ижодкор сийрати ва ижод маҳсулининг боғлиқлиги, тил ва бадиий ижод, адабий тил ва бадиий тил, «классик»лик офати, асар оҳанги, туйғу ва тафаккур, бадиий ижоднинг бошқа санъат турларидан фарқи сингари «шахри юз рисола бўлғуси» (ҳазрат Навоий таъбирлари) масалалар ҳақида ўз мулоҳаза ва кузатув, хулоса ва фаразларини ихчам, фасоҳатли, таъсирчан, «сехри ҳалол» даражасида баён этади.

Француз адиби Шарл Бодлер айтганидек, ҳар бир адабий асарнинг қиймати уни бошқа ёзувчи ёза олмаслиги билан белгиланади. Бу – асарнинг муваффақиятли ва бетакрор чиқиши, энг аввало, адибнинг индивидуал маҳорати, оригиналлигига боғлиқ демакдир. Бугунги кунда сон жиҳатидан кўпдан-кўп шоиру ёзувчиларимиз борлиги билан уларнинг ҳаммаси ҳам ўз овози, ўз услубига эга эмаслиги ўзларига ҳам маълум. Мамнунийт билан айтиш керакки, Ўткир Ҳошимовнинг қаламидан чиққан сўзларнинг ўз қиёфаси, ўз эгаси, ўз оҳанги бор.

* * *

Ҳақиқий асар яратилиши имкониятдан кўра ниятга кўпроқ боғлиқ экан. Акс ҳолда бир умр дарбадарлик ва муҳтожликда яшаган Сервантес, Гулханий, Машраб, Горький, Хемингуэй... лар мангууликка даҳлдор асар яратишга қурби етмасди. Ўз даврининг

ижтимоий-сиёсий ҳаётини белгилаб бериш қудратига эга бўлган Алишер Навоий, Мирзо Бобур, Лев Толстой каби зотлар эса адабиёт билан шуғулланмаслиги ҳам мумкин эди. Зотан, адабиётга дахлдорликнинг ўзи камлик қиласи, билим, зехну заковат ва энг асосийси, покиза ният ва ижод дардига лиммо-лим қалб ҳам зарур. Зоро, адаб китобида таъкидланганидек, ҳақиқий ёзувчи қалби буюрганини қоғозга туширади.

Мен ижодкорларни ёши ёки жинсига қараб таснифлашга мутлақо қаршиман. Мавлоно Лутфий биргина байти эвазига бутун бошли девонини алмаштиришга тайёр бўлган Алишер Навоий тўқиз ёшдаёқ тилларда достон бўлганди. XX асрнинг энг сара романларидан бири – «Тинч Дон» йигирма тўрт ёшли йигит қаламига мансуб эди. Гуржи адабиёти классиги Николаз Варашвили ўттиз ёшда оламдан кўз юмди. Бугун бутун дунё қунт билан ўрганаётган Артур Рембонинг адабий мероси 19 ёшгача таълиф этилган. Йигирма тўрт ёшида қатағон қурбонига айланган Усмон Носирнинг биргина «Шеърим, яна ўзинг яхисан» шеъри узок умри давомида ўн-ўн беш том хомсемиз китоб нашр этган айрим маддоҳларнинг бутун ижодидан устун туришини иккита олий ҳакам – Вақт ва Китобхон белгилаб берди.

Биламизки, ижод – мукаммал ва охирга етган асарлардангина иборат эмас. Ўз ниҳоясига етган ва одамлар қўлига етиб борган асарлар ижод маҳсулидир. Ижод жараёни эса ҳаммада ҳар хил амалга ошади. Қайсиdir ижодкор ўзининг энг яхши асарини 20 ёшида ёзиб қўяди, бошқа ижодкор эса, ўз ижодининг шоҳ асарини қарилик чоғида яратади. Ўтган асрнинг сўнгги чорагида катта шовшувга сабаб бўлган «Дата Тутаҳҳиа» романи 60 ёшдан ошган Чабуа Амирэджиби қаламига мансуб эди. Инглиз адаби Уильям Голдинг 70 ёшида Нобел мукофоти совриндори бўлди. Бу тарзда мисолларни кўп келтириш мумкин, лекин моҳияти – Худо берган истеъдод ва заҳмат туфайли камолга етган ижодкор ўзгармайди... «Саккизинчи мўъжиза»да айтилганидек, «Ёзувчи бўлиш учун истеъдоднинг ўзи камлик қиласи. Қалби қоғоздек оппоқ, қоғоздек ловуллаб ёнадиган одамдангина чинакам адаб чиқади».

* * *

Китобда бир неча маротаба Ҳазрат Навоийнинг исмлари эҳтиром билан тилга олинган, шунингдек, «Ҳайрат ул-аброр»

достонидан қуидаги байт Қуръони каримнинг «Қаҳф» сураси асосида таҳлил қилинган:

*Қаҳфи фано ичра алар бўлса гум.
Мен ҳам ўлай «робиъуҳум калбуҳум».*

Муаллиф «Асҳоб ул-Қаҳф» қиссасини келтирганидан сўнг фикрини қуидагича хulosса қилади: «Гап шундаки, «Ҳамса» яратишдек улуғ ва машаққатли юмушни Алишер Навоийга қадар Низомий, Дехлавий ва Жомийгина уddaлаган. Бу ўринда ҳазрат Навоий устозларига содик ит каби эргашиб, шундай улуғвор юмушга бел боғлаганини айтаяпти...» Манбаларга кўра, Қаҳф эгаларининг илини вафодорлиги туфайли қиёмат куни инсон қиёфасида тириларкан...

Демак, яхшиларга эргашиш, улардан мерос қолган эзгу амалларни баҳолиқудрат бажо келтириш, улуғлар каби бўлишга интилиш, уларга вафо кўргузиш -инсонийликнинг энг муҳим шарти экан.

“Ҳар гал ўқиганингизда янги маъно топиш мумкин” бўлган асарни катта истеъдолларгина ёзиши мумкинлигини эътироф этган ҳолда, мен ҳам ўз фикримни уч нуқта билан тугатмоқчиман...

Барча яхши асарлар ёзилмайди, улар айтилади...

Менинг назаримда, «Саккизинчи мўъжиза» битиклари ҳам «Дунёнинг ишлари», «Баҳор қайтмайди», «Икки эшик ораси» каби айтилган. Китоб ўқиётганингизда ёзувчи сиймоси қўз ўнгингизда гавдаланади, сиз билан бевосита мулоқотга киришади, ичингизда туғилган мулоҳазаларингизни дикқат билан тинглайди, йиллар давомида тўпланган билим ва тажрибаларига асосланган ҳолда ўз хulosса ва кузатувларини баён этади... Энг муҳими, ҳеч кимни алдамайди. Сирасини айтганда, рост гапириш ҳам унчалик жўн нарса эмас.

Умурзоқ ЎЛЖАБОЕВ,
филология фанлари номзоди, доцент

ЁЗУВЧИ ҲАЁТИДАН БАЪЗИ ЛАВҲАЛАР

Ўткир Ҳошимов билан яқиндан танишишимизга ажойиб инсон, моҳир таржимон, шунингдек, нозиктабъ шоирлик ва носирлик истеъдодига ҳам эга, ижод оламидаги кишиларга яхши таниш бўлган Низом Комилов сабабчи бўлган эди. Низом ака билан 60-йилларнинг охирларида тақдир тақозосига кўра, “Талабалар шаҳарчаси”даги “Аспирантлар уйи” деб аталган манзилда икки йилча ҳамхона бўлиб яшаш баҳтига мұяссар бўлганман. У киши менга нисбатан 5-6 ёш катта бўлиб, ҳаётда анча-мунча нарсаларни кўришга улгурган, масъулроқ бўлган лавозимларда ҳам ишлаган, муайян сабабларга кўра буларнинг ҳаммасидан воз кечиб, “кеекса аспирант” бўлишни бўйнига олган одам эди. Низом акани бу ерга бошлаб келган ҳам ва биз билан таништирган ҳам дўстимиз Абдулла Орипов эди. Мен бу ерда “биз” деган сўзни ишлатаяпман. Бу – бежиз эмас. Чунки ётоқхонада ўзаро яқин бўлган кичик бир даврамиз бор эди. Бу даврага кейинчалик таниқли олимлар бўлиб етишганлардан Бегали Қосимов, Зокир Қутибоев, Маъмур Абдуллаев каби (жойлари жаннатда бўлишсин!) ва ҳозир сермаҳсул ижод қилишаётган Сотим Холбоев, Шавкат Каримов каби дўстларимиз кирап эди. Низом аканинг бу даврага келиб қўшилиши унинг кўламини кенгайтириб, руҳини янада жонлантириб юборди. Олдинлари бу даврада тез-тез меҳмон бўлиб турадиган Абдулла Орипов, Мухаммад Алилар сафига биз узоқдан бўлса ҳам саломлашишни орзу қилиб юрадиган, Низом аканинг яқин қадрдени бўлган Учқун Назаров, Ўқтам Усмонов, Шукур Холмирзаев каби ўша пайтларда анча танилиб бораётган ёш ёзувчилар келиб қўшилди. Уларнинг орасида Ўткир Ҳошимов ҳам бор эди. Албатта, мен бу ёш, истеъодли ёзувчини олдиндан ҳам танир эдим. Чунки у билан филология факултетининг бошқа-бошқа бўлимларида бир курс фарқи билан ўқирдик. Талабалар ўртасида бўлиб турадиган адабий мавзулардаги сұхбатларда Ўткирнинг номи ҳам тез-тез тилга олинниб туради. Айниқса, унинг Абдулла Қаҳҳордек ёзувчидан хат олгани бўлажак филолог ва журналистлар ўртасида кўп шов-шувларга сабаб бўлган эди. Лекин шундай бўлишига қарамас-

дан, у ўзини нихоятда камтар тутар, иложи борича кўпчиликнинг эътиборидан четроқда юришга харакат қиласади. Шунинг учун, кўпинча, дарс бошланишига бир икки минут қолганда шошиб келаётганини ва дарс тугаши биланоқ яна худди шундай шошиб чиқиб кетаётганини кўп кўрардик. Кейинчалик билсақ, бунинг сабаблари бор экан. Ўткир ўқиш билан бирга ўша пайтлари ишлар ҳам экан. Шунингдек, ўша вактдаги бошқа ёш айрим ижодкорлар каби ўзини ҳадеб минбарга уравериш одати ҳам йўқ эди. Менинг Ўткир ҳақидаги бу кезларгача билганларим тахминан шу даражада эди. Низом ака “Аспирантлар уйи”га келгач, бошқалар қатори Ўткир ҳам бу инсонни тез-тез йўқлаб келадиган бўлди. Шу аснода мен ҳам у билан секин-аста анча яқинлашиб, қадрдонлашиб қолдим. Дастрлабки чиққан қайсиadir китобининг гонорариға Ўткир “Запорожец” машинаси сотиб олди. Бу машина бизнинг кўришиб туришимизни янада тезлаштириб юборди. Низом Комилов, дўстимиз Бегали Қосимов ҳақида ёзган хотирасида, Ўткир Ҳошимовнинг ижодидаги бир сирни айтмоқчиман. У ўзининг “Қалбингга қулоқ сол” қиссасидаги анча-мунча тасвирларни биз яшаган “Аспирантлар уйи”дан олган. Айрим қаҳрамонларга прототипларни ҳам биз танийдиган одамлардан танлаган, деган гапларни айтган. Дарҳақиқат, қисса чиқиши билан биз ўзимизга маълум бўлган одамларни ҳам, манзараларни ҳам танигандек бўлганмиз. Умуман, бошқа айрим асарларида ҳам Ўткир биз биргаликда гувоҳи бўлган бирон детал ёхуд воқеани фойдаланганини кузатганмиз. Ва бунда унинг ҳақиқий ёзувчилик маҳоратига, истеъдодига тан берганмиз.

Ёзувчи билан бундай яқин муносабатимиз мен аспирантурани битириб, Сирдарё педагогика институтига ишга келганимда ҳам давом этди. Бу пайтлари ёшларнинг севимли ёзувчисига айланган Ўткир Ҳошимов институтимизга тез-тез келиб турар, учрашувлар ўтказар ва деярли ҳар бир янги асари ҳақида талабаларнинг ҳаяжонли, жўшқин, завқ-шавққа тўла фикр-мулоҳазаларини ўз қулоғи билан тинглаб, катта рағбат ва қониқиши оларди. Собиқ шўролар даврида ёш ижодкорларга бериладиган Ёшлар мукофотига Ў.Ҳошимов ўша кезларда шу мукофотга ҳам сазовор бўлган эди.

70-йилларнинг бошларида бўлиб ўтган бир воқеа гоҳ-гоҳида эсимга тушиб қолади. У пайтлари Ўткир “Тошкент оқшоми” газетасида бўлим мудири лавозимида ишларди. Тошкентга бир иш билан тушиб, қайтишда бир хабар олиб ўтай, деб унинг олдига

кирдим. Қарасам, анча кайфияти йўқдек. Бунинг устига унинг кўриниши одатда худди бир жойи оғриб турганда бўладиган ҳолатни эслатарди. „Тинчлиқми?” деб сўрасам, “Бир оз чарчагандек бўлгаяпман”, деди. Бунинг устига бир кунми-икки кунми олдин ўзининг қўл остида ишлайдиган Насриддин билан (Насриддин Мухаммадиев ҳозирда шоир, таржимон бўлишидан ташқари таникли сиёsatшунос ва жамоат арбоби ҳам) қаергадир тушлик қилгани боришган экан. Қайтишда олдиларидан бир музлаган сирпанчиқ жой чиқиб қолса, иккаласининг ҳам болалиги тутиб кетиб, шу жойда сирпанмачоқ ўйнамоқчи бўлишибди. Бу ишни бошлашда ташаббускор ҳар ҳолда Насриддин бўлган бўлса керак (бундай дейишимнинг сабаби кейин маълум бўлади). Хуллас, болаларга тақлид қилишнинг бундай кўриниши Ўткирнинг йиқилиши ва унинг бир қўлининг бир оз қайрилиши билан тугабди. Унинг юзидағи бояги ифодалар мана шу йиқилишнинг асорати экан. Бу воқеани шу ернинг ўзидаёқ қулгили гапга айлантирилган ва Насриддиннинг ўзининг иштирокида қайта ишладик. Гўёки, бу ишнинг ҳаммасини у онгли равишда қилган, ўша ошхонага боришида йўлда шундай музлик бор эканини билгани ҳолда, Ўткирни у ерга атайлаб олиб борган. Сирпанмачоқ ўйинини ҳам Ўткирнинг йиқилишини олдиндан мўлжаллаб уюштирган. Бундан мақсад – уни жароҳатлаб, ўрнига ўзи ўтириш. Бу ҳаракатни бемалол Ўткир Ҳошимовга нисбатан уюштирилган “суюқасд” деб аташ мумкин. Албатта, бу ҳазил эди. Ўзимиз тўқиган бу чўпчакдан учаламиз ҳам маза қилиб, мириқиб кулишдик. Кейин эса мен Ўткирни, сал чарчоқларни чиқариб, айланиб келасиз, деб Сирдарёга таклиф қилдим. Гарчи ўзим умримда бирор марта ҳам овга чиқмаган бўлсан-да, уни қизиқтириш учун шундай ишларни ҳам қилса бўлади, деган мазмунда шама ҳам қилдим. Ҳар ҳолда бу таклиф дам олиш кунларига яқин пайтда бўлган шекилли, у дарҳол рози бўлди ва иккаламиз Сирдарё шаҳрига – биз яшаётган жойимизга келдик.

Ўша пайтлари менинг уйланганимга унчалик кўп бўлмаган, шу боис институт томонидан чала битган икки қаватли уйдан квартира беришган эди. Уй хақиқий маънода чала эди. Бу ердаги хонадонларнинг фақат эшиги ва деразаси борлигини ҳисобга олмаса, одатда бундай “дом”ларда бўладиган, яшаш талабларига жавоб берадиган бошқа биронта қулайликлари йўқ эди. Ёз пайтларида хоналар қанчалик нафас олиб бўлмайдиган даражада дим бўлса, қишида

совуқнинг ўтиш даражаси ҳам шундан қолишмасди. Иссиқ-совуқнинг бундай “роҳатбахш” таъсирини бизга ўхшаб иккинчи қаватда яшаётганлар, айниқса, яхши билишарди. Чунки уйнинг томига бетон плиталар шундай ётқизилгану устидан қора сақич эритилиб қуилган эди, холос. Шунинг учун хоналарга ёғингарчилик бўлаётганда, қор эриган пайтларда узлуксиз чакки ҳам ўтиб туарди. Хуллас, кечга яқин Ўткирни ана шундай “ажойиб” ҳужрамизга меҳмонга бошлаб келдим. Баҳоли қудрат дастурхон ёзик. Ҳам ташқаридан совқотиб келганимиз, ҳам уйнинг ўзи ҳам бу борада ташқаридан унчалик фарқ қилмагани боис қитдай-қитдай “бадан-қиздирар” дан истеъмол ҳам қилдик. Сухбат ҳам бундай совуқ уйда у қадар қизиши қийин эди, албатта. Кечаси совқотиб қолмаслик учун бисотимиздаги бор кўрпанинг қўпчилик қисмини меҳмоннинг устига ёпишга ҳаракат қилдик. Кўз хийла илинган экан, бир пайт Ўткирнинг ғудраниб нималардир деяётгани қулоғимга чалиниб қолди. Сўзларнинг ҳаммасини тушуниш қийин бўлса-да, ора-чурода қаттиқ койиниш сўзлари ҳам айтилаётганини пайқадим. Балки уйқусираётгандир деган фикрда секин “Ўткир” деб чақирсан, у дархол “Ҳа” деб жавоб берди. Демак, уйғоқ экан. “Бировни урушгандек бўляпсизми?” дедим. “Э-э, Насриддинни айтман-да, – деди у инграб: – Мени бунчалик йиқитиб, жароҳатлаб ўтириши шартмиди?! Ака, ўрнингиз керак бўляпти, шу жойни менга беринг деса, бўшатиб берардим-ку! Бунинг учун шундай “суиқасд” уюштириб, мени қийнаб ўтириш керакмиди?!” Бир оз у ёқ, бу ёқдан гаплашиб, яна ухлаб қолдик.

Эрталаб ўрнимиздан тургандан кейин, ўйлаб қолдим: бу уйқу аралаш койинишлар хақиқатдан ҳам Насриддинга тегишли эдими ёки бундай совуқ уйга меҳмон бошлаб келган менга қаратилганмиди? ...

Нонушта қилиб бўлганимиздан кейин яна ўйда қолдим. Чунки кеча мен Ўткирга “Ов ҳам қиламиз” деган гапни айтиб юборганман. Ўша пайтлари ёшлигим, тажрибасизлигим туфайлими, бундай нарсаларга у қадар ақлим етмас экан. Бўлмаса, Сирдарёда нима кўп-кўллар кўп (Масалан, ҳозир қаерларда ов қилиш мумкинлигини яхши биламан!) Лекин қизиқмагандан кейин қийин экан-да. Энди бугун нима қилиб бўлса ҳам, бир йўлини топиш им керак. Бўлмаса, меҳмонни алдаган бўламан. Ўйлай-ўйлай калламга, “Гулистон” совхозига – тоғамларникига борамиз. У ерда қишлоқ

яқинида кўл бор, деган фикр келиб қолди. Бу ерда кўп ҳаялла-масдан, дарҳол йўлга тушдик. Икки ўртоқ – икки ҳаваскор “овчи” эгнимизда кўчага, ишга киядиган кийимлар, бўйнимизда галстуклар билан қишлоққа бир-бир ярим соатлардан сўнг кириб келдик. Сўрашиб бўлгач, мақсадни тоғамга тушунтирган эдим, у киши кула-кула қаерданdir битта милтиқ, отишга тайёрлаб қўйилган учта-тўртта патрон топиб олиб келиб берди. Кўлгача меҳмонга оғирлик қилмасин деб милтиқни мен қўтариб бордим. Манзилга етгач, “бу ёғи энди сиздан бўлади”, деб уни кўш қўллаб Ўткирга тутқаздим. Иккаламиз кўлнинг атрофида айланиб юрибмиз. Оёқдаги ботинкалар, шим тиззагача хўл бўлиб кетган, лекин атрофда милтиқни бундай қўлга олиб, отишга мўлжаллайдиган нарсанинг ўзи йўқ. Кўлда балиқ ва андатраларнинг сувнинг бетига бир чиқиб, яна қайта шўнғиган пайтидаги шалоплаб чиққан овозларни ҳисобга олмаганда худди бу ердаги қушлар ва ўрдаклар ҳам, бошқа жони-ворлар ҳам бизнинг келишимизни олдиндан билгану бошқа томонларга кетиб қолгандек. Бу ҳолатга унчалик ҳам парво қилмасдан иккаламиз сухбатни қизғин давом эттиряпмиз. Баъзан қизиқ жойлари келиб қолганда мазза қилиб, овозни барадла кўйиб хо-холаб кулиб қўйаяпмиз. Ўша пайтда бир одам йўққи, “Хой инсонлар, сизлар бу ерга ов қилгани келганимисизлар ёки сухбатлашгани, хо-холаб кулгани”, деб бизга дакки берса. Кейинчалик билсак, овчиликнинг ҳам ўзининг қатъий қонун-қоидалари бўлиб, бунга амал қилмаган “овчи”ларнинг бизнинг аҳволимизга тушишлари муқаррар экан. Кечга яқин бирорта ҳам патронни ишлатмасдан тоғамнинг ҳовлисига қайтиб келдик. Бу ерда бир дараҳтнинг устида бир гала чумчук турган экан. Мен Ўткирга қараб, “Адабиётчилар ўртасида ўқланган милтиқ отилиши керак, деган гап бор. Овимиз қуруқ бўлмасин, шуларга қараб бир тепкини босинг”, – дедим. У шундай қилди – дараҳтдаги чумчуклар галасига қараб тепкини босди. Сочма ўқлардан айримлари нишонга тегди шекилли, икки-учта чумчук пастга юмалаб тушди. Бир кунлик ҳаракатимиз, саргардончилигимиз ҳар ҳолда кичкина бўлса ҳам бундай натижа билан тугаганидан иккаламизнинг ҳам қўнглимиз қўтарилгандек, кайфиятимиз яхшилангандек бўлди. Меҳмонлар учун маҳсус иситиб қўйилган хонага киришимиз билан кайфият яна бир поғона кўтарилгандек бўлди. Чунки кеча кечаси танага сингишиб кетган соvuқлар секин-аста бадандан чиқа бошлаган эди. Тоғам кўнглига

яқин бир-икки улфатларини меҳмоннинг олдига айтган экан, шу боис оқшомги сухбат ҳам ёмон бўлмади. Нима бўлгандаям эрталаб меҳмонимизнинг ранг-рўйи ҳам, кайфияти ҳам яхши эди. Эҳтимол, бунга кечаги бизнинг мазмунсиз бўлса-да, “ов”имизнинг таъсири бўлгандир... Балки шаҳарнинг биқиқ ҳавосидан кейин тоза қишлоқ ҳавоси фойда қилгандир... Барибир ҳам хижил, ҳам мамнун ҳолатда Сирдарё шаҳрига келиб, Ўткирни Тошкентга жўнатиб юбордим.

Умуман, Ўткир Ҳошимовнинг сирдарёлик муҳлислари билан алоқаси ҳамма вақт яхши бўлиб келган. Хусусан, Сайхунобод туманида кўп марталаб ҳар хил учрашувлар қилганидан, тадбирларда қатнашганидан хабардорман. Бунинг боиси бор эди, албатта. Бу туманда узоқ йиллар давомида биринчи раҳбар лавозимида ишлаган менинг қариндошим Шавқиддин Мирзаев (жойи жаннатда бўлсин) адабиётнинг ашаддий муҳлиси эди. Шунинг учун у ёзувчиларни тез-тез бу ерга таклиф этиб, турли адабий тадбирлар уюштириб туради. Шу инсоннинг шарофати билан Сайд Аҳмад (охирати обод бўлсин), Худойберди Тўхтабоев, Умарали Норматов, Абдуғафур Расулов, Муҳаммад Али, Носир Фозилов, Неъмат Аминов (жойи жаннатда бўлсин) каби қалам соҳиблари бир неча марта бу ерда бўлишган. Шу Ш.Мирзаев билан Ўткир ўртасидаги муносабатлар оддий “меҳмон-мезбон”лик даражасидан анча юқори кўтарилиган, кўнгил яқинлик, қадрдончиликка айланиб кетган эди. Шунинг учун “Шарқ юлдози” кунлари дебми, бирон ёзувчининг юбилейи муносабати биланми ёки ўзининг янги нашр этилган асарининг муҳокамасида қатнашиш учунми, Ўткир бу ерга бот-бот келиб туради ва ўзининг бу эътибори билан сайхунободлик муҳлисларига қувонч ва завқ-шавқ бағишларди.

Эҳтимол, шунинг учундир, Ўткир Ҳошимов 50 ёшга кирганида телевидение учун ёзиб олишга мўлжалланган китобхонлар билан бўладиган учрашувни айнан Сирдаёда, янаем аникрофи, Гулистон давлат университетида ўтказилишига розилик берган. 1991 йилининг кузида бўлган бу тадбирга жамоамиз астойдил таёргарлик кўрган. Бу жараёнда ҳамма ҳаракатлар яхши давом этаётган бир пайтда талабалар паҳта теримиға оммавий жалб этилиб қолди. Табиийки, бу ҳолат тадбирнинг асосий ташкилотчилари бўлган бизни анча ташвишга солиб қўйди. Шу сабабли биз, профессор А.Каттабеков бошлигига бир-икки киши ўша пайтдаги ректоримиз Комил Эшҷонов ҳузурига кирдик. Бу киши бизнинг

хавотиримизни тушуниб, масалани ижобий ҳал қилишга ҳаракат қилишини айтди. Кейин маълум бўлишича, ректоримиз бу масала юзасидан вилоят партия қўмитасининг биринчи котибига чиқиб, қанчалик машаққатлар билан ўзбек филологияси талабаларини бир кунга университетга олиб келишга, уларнинг шу учрашувда қатнашишларига рухсат олган экан. Бу ишни қай даражада жасорат эканлигини пахта терими мавсумининг талаблари қандай бўлишини тушунадиганлар яхши билишади.

Хуллас, бу юбилей тадбири белгиланган вақтда жуда тантанали бир шароитда ўтказилди. Университетнинг 750 кишилик муҳташам зали лиқ тўлди. Бу ерда бизнинг талабалардан ташқари шаҳар жамоатчилигидан ҳам вакиллар кўп эди. Тадбирда, аввало, Тошкентдан жуда кўп меҳмонлар иштирок этишди. Телевидениенинг ўзидан 15-20 чоқли киши маҳсус автобуси-ю, керакли барча аппаратлари билан келишди. Бир гурӯҳ санъаткорлар ҳам ташриф буюришиб, Ў.Хошимовнинг ҳажвий асарлари асосида бир қатор саҳна кўринишларини намойиш этишди. Уларнинг орасида Э.Каримов, Х.Саъдиевга ўхшаш Ўзбекистон халқ артистлари ҳам бор эди. Саид Аҳмад бошчилигидаги ёзувчи – олимлар таркиби эса О.Шарафиддинов, Э.Воҳидов, У.Норматов, А.Расулов каби атоқли ижодкорлардан ташкил топган эди.

Учрашув жуда самимий руҳда, гоҳ жиддий гапларга, гоҳ ҳазилхузулларга мойил бир қайфиятда ўтди. Унинг бундай енгил, завқли бир тарзда ўтишида Саид Аҳмад, Эркин Воҳидов, Озод Шарафиддиновга хос бўлган юморнинг таъсир кўрсатишидан ташқари бунда Ўткирнинг ўзининг ҳам хиссаси сезиларли даражада бўлди. У ўша пайтлари ўзига яқин бўлган айrim таниқли ижодкорлар ҳақида “Шумликлар” – кулгили воқеий ҳикоялар ёза бошлаган эди. Шулардан баъзи бирларининг ўқилиши залда ўтирганларга ўзгача қувноқ, самимий бир қайфият бағишилади. Устози О.Шарафиддинов ҳақидаги “Памидор” операцияси” деб номланган “шумлик”-нинг қаҳрамоннинг ўзининг гувоҳлигига ўқилиши эса бундай қайфиятни яна ҳам юқори пардаларга кўтариб юборди.

Мазкур учрашувдан ёзиб олинган лавҳалар кейинчалик телевидениенинг бир ярим соатлик (аслида у уч ярим соат давом этган эди) кўрсатувига асос бўлди. Тадбирдан ёзиб олинган материалларни монтаж қилаётган пайтда залдан берилган савол-жавобларга ҳам маълум ўрин ажратилган экан. Берилган саволларнинг ҳам-

маси ҳам, асосан, шу ерда бўлаётган гапларга, бевосита ёзувчининг ўзининг ижодига алоқадор эди. Лекин бизнинг собиқ талабамиз, ўша кунларда малака ошириш институтига тингловчи бўлиб келган ховослик бир ўқитувчи томонидан берилган савол эса кишини адабиётдан сал ташқарига ҳам назар ташлашга мажбур қилган. Масалан, учрашув асосида тайёрланган ушбу телекўрсатувда у ёзувчига ўша пайтдаги Олий Кенгаш депутатларининг фаолиятидан қониқасизми, деган мазмундаги савол билан мурожаат қиласди. Шунда Ўткир бу масалада танқидий қарашга эга эканини айтиб, фикрини бир неча мисоллар билан асослаб беради. Эшиттириш эфирда кетгандан сўнг орадан бир оз вақт ўтиб, ёзувчининг бу гаплари Олий Кенгашнинг йиғилишида маҳсус муҳокама қилиниб, катта норозиликларнинг келиб чиқишига сабаб бўлди (Бу пайларда Олий Кенгаш сессиялари тўғридан-тўғри эфирга берилар эди). Айрим депутатлар минбардан туриб, бу гапларни ўzlари учун ҳақорат деб эълон қилишди. Баъзилари жазавага тушиб, ҳозироқ бу ёзувчини шу ерга олиб келиш керак, токи у айтган ҳамма гапларига бизнинг олдимизда жавоб берсин, дейиш даражасигача боришиди. Агар Президентимизнинг ўзи бу баҳсга аралашиб, Ў.Хошимовнинг виждонли, истеъдодли ёзувчи эканлигини буларга тушунтириб бермаганларида, жанжал нима билан тугашини тасаввур ҳам қилиш қийин эди...

Умуман, ҳаёт шуниси билан қизиқ эканки, унда кутилмаган, ҳатто тасаввур ҳам қилиш қийин бўлган ўзгаришлар рўй бериб тураркан. Бир пайлар айтган танқидий гаплари учун депутатлар томонидан сазойи қилинмоқчи бўлган шу Ўткир Хошимовни бир оз вақтдан сўнг халқ ишонч билдириб, Олий Мажлиснинг иккита чақириғига кетма-кет депутат этиб сайлашди ва у ҳар иккала муддатда ҳам унинг қўмиталаридан бирини бошқаришдек масъулиятли лавозимга лойик кўрилди. Ўткир шу лавозимда туриб бир қанча муҳим қонунларнинг қабул қилинишида фаол иштирок этди. Бу энди ижод кишисига нисбатан бўлган том маънодаги эътибор ва эъзознинг белгилари эди.

Яқинда бир докторлик диссертацияси ҳимоясида қатнашишга тўғри келди. Дисертант, устозимиз О.Шарафиддинов домланинг қизлари, ҳозирги кунда етук адабиётшунос олималаримиздан бири бўлган Мухаббатхон Шарафиддинарова эдилар. Мавзу жуда муҳим ва миллий адабиётшунослигимиз учун ғоят долзарб бўлган “XX

аср ўзбек романчилигининг ҳикоялаш тарзидағи ўзига хос хусусиятлар жаҳон адабиёти контекстида” деган муаммога бағишлиланган. Унда ўзбек адабиётшунослигига биринчилардан бўлиб миллий адабиётимизнинг айрим намуналари жаҳон адабиётидаги машҳур асарлар билан қиёслаб текширилади ва баҳоланади. Мазкур ҳимояда ўтириб, аввало, мени қувонтирган ва ғуурлантирган нарса шу бўлдики, диссертацияда қадрдоним Ўткир Ҳошимовнинг баъзи асарлари XX аср бошларида янги ўзбек адабиётининг тамал тошларини қўйган А.Қодирий, Чўлпон каби буюк адибларимизнинг асарлари билан ёнма-ён қўйиб ўрганилади. Тадқиқотчининг масалага бундай дадил ёндашувини Илмий Кенгаш аъзолари мамнуният билан қабул қилишди. Ҳатто беш бобдан иборат диссертациянинг иккита боби айнан шу ёзувчи ижодига бағишлиганига ҳам йиғилиш қатнашчилари мутлақо табиий ҳодисадек, олдиндан шундай бўлиши керакдек муносабат билдиришди. Иккинчидан, Ўткирнинг ижоди ҳақида, айниқса, бу ерда текшириш обьекти бўлган «Икки эшик ораси», «Тушда кечган умрлар» романлари хусусида бизда жуда кўп тадқиқотлар эълон қилинган. Уларнинг муаллифлари орасида О.Шарафиддинов, М.Қўшжонов, У.Норматов каби устозларимиздан тортиб, мен тенги адабиётшунослар билан бирга илмга эндиғина дастлабки қадамларини қўяётган ёшларгача бор. Ўша ҳимояда М.Шарафиддина олдин билдирилган фикрларнинг биронтасини такрорламаган ҳолда юқоридаги икки романни янгидан кашф қилди, бу асарлар ўзбек романчилиги тараққиётини қанчалик юқори поғоналарга кўтарганини ўтирганларга яхшилаб эслатиб қўйди, деса ҳеч муболаға бўлмайди. Йиғилишда ҳимоя қилувчига бир оз илмоқлироқ бўлган саволлар ҳам берилди. Шулардан бири “Сиз У. Фолкнернинг «Ўлар чоғимда» асари билан Ў.Ҳошимовнинг «Икки эшик ораси» романини солишириар экансиз, уларнинг қайси бирини бадиийлик жиҳатдан устунроқ деб ҳисоблайсиз?” деган мазмундаги савол эди. Мухаббатхон бу саволга «Афсуски, «Икки эшик ораси» романнининг рус тилига таржимаси мувваффақиятли чиққан деб бўлмайди. Шунинг учун диссертацияда асардан келтирилган парчаларини ўзим таржима қилишимга тўғри келди. Лекин ҳақиқатни айтадиган бўлсак, «Ўлар чоғимда»га нисбатан «Икки эшик ораси»нинг бадиийлик жиҳатдан устунликлари кўпроқ дейишга тўғри келади»,

дея жавоб берди. Бу энди ёзувчининг бутун ижодига ҳам, тадқиқ этилган муайян асарига нисбатан ҳам берилган жуда юқори баҳо эди.

Одатда ҳар бир қалам соҳиби ўз ижоди давомида доимо юқорилаб, юксалиб боришни орзу қилиб яшайди. Лекин бу орзуга эришиш осон ишлардан эмас. Чунки, пировардида, унинг ижоди маълум бир босқичларга, умр чегараларига етиб келганда бериладиган баҳо шу пайтгача қилган меҳнатига, изланишларига ва истеъдод даражасига қараб белгиланади. Назаримда, Ўткир мазкур Илмий Кенгаш йиғилишида ўз ижоди ҳақида айтилаётган мулоҳазаларни эшитиб ўтирас экан, кўнглидан кўп гаплар ўтган бўлиши табиий. Буларнинг орасида Абдулла Қаҳҳор, Саид Аҳмад, Озод Шарафиддиновдек устозлари берган ўгитлар, кўрсатган йўлйўриклар ҳам бўлиши мумкин. Ҳам ҳаётда, ҳам ижодда бошидан кечирган анча-мунча қийинчиликлар ҳам шу кайфиятда неча бор хаёлига келиб-кетган бўлиши эҳтимолдан ҳоли эмас. Барибир қандай ҳолат ва вазият бўлмасин, у фақат бугунни эмас, балки эртани ҳам ўйлаб, унга умид билан қараб яшаганидан, меҳнат қилганидан ва бу меҳнатлари беҳуда кетмаганидан ҳозир мамнун бўлиб ўтиргани шундок юзидан кўриниб туради.

Мен шу йиғилишда рўпарамда ўтирган кўп йиллик қадрдоним, катта истеъдод соҳиби, улкан ёзувчимиз Ўткир Ҳошимовни кузатар эканман, “Илоҳим, шундай мамнун ҳолат сизни ҳеч қачон тарк этмасин! Сизга фарзандларингиз каби азиз бўлган асарларингиз ҳақида ҳамиша шундай яхши гапларни эшитиб юриш насиб этсин! Халқимиз, адабиётимиз баҳтига доимо омон бўлинг!” деган гаплар беихтиёр хаёлимдан ўтарди.

“ЧҮЛ ҲАВОСИ”ДАН СҮНГ

1963 йил кузда биз – ТошДУ филология факультети журналистика бўлими талабалари Бўка туманидаги колхоз пахтазорларида пахта тераётган эдик. Курсдошимиз Тўлқин Алимов қисқа муддатга уйига бориб қайтди ва катта янгилик олиб келди...

“Чўл ҳавоси” қиссаси Ўткирнинг биринчи катта насрий асари эди. Унинг бу муваффақияти билан биз курсдошлари ҳам табриклигани эдик. Ўша даврда республикадаги адабий жараёнга раҳбарлик қилиб турган Абдулла Қаҳхордан мактуб келиши Ўткир учун кутилмаган қувончли воқеа бўлди. Ўшанда ёш адибнинг тинчи йўқолди: тезроқ пахта мавсуми тугаса-ю, Тошкентга қайтиб, Абдулла Қаҳхор ёзган хатни ўқиса. Ниҳоят, пахта мавсуми тугади, Тошкентга қайтдик. Шаҳарга келгач, Ўткир Дўмбирабоддаги уйига эмас, кўрпа-ёстигини орқалаб, Тўлқин Алимовнинг эски шаҳардаги квартирасига йўл олди. Кейинроқ у Абдулла Қаҳхор хузурига борди. Абдулла Қаҳхор ёш ҳамкасбига “Чўл ҳавоси” қиссасининг фазилатлари ва камчиликлари ҳақида батафсил гапирибди, насиҳатлар қилибди. Ўткир бизга шуларни сўзларкан, худди ўзига-ўзи гапиргандек: “Мен устозимнинг ҳафсаласини пир қилиб қўймаслигим керак”, деди. Шу ўринда ўзим пайқаган бир ҳолатни қайд этсам. Абдулла Қаҳхор 50-60 йилларда ўзининг биринчи йирик асари билан матбуотда кўринган ёзувчиларнинг анчагинасига йўл-йўриқ берган, илиқ сўzlари билан руҳлантирган.

А.Қаҳхорнинг назарига тушган, унинг самимий ўгитларини тинглаган ёшларнинг деярли ҳаммаси устоз ишончини оқлашди. Булар Саид Аҳмад, Озод Шарафиддинов, Абдулла Орипов, Эркин Воҳидов, Ўткир Ҳошимов, Шукур Холмирзаев, Учқун Назаров ва бошқалардир. Абдулла Қаҳхор билан танишиб, сухбатлашиб келганидан кейин Ўткир китоб мутолаасига илгаригидан ҳам зўр шижаат билан киришди. Ижодни ҳам тўхтатмади. “Чўл ҳавоси”дан сўнг бир неча яхши ҳикоялар ёзди.

1964 йили биз университетни тамомлаб, республиканинг турли шаҳар ва вилоятларига тарқаб кетдик. Мен Сирдарё вилояти газетасида ишлай бошладим. 1968 йилнинг бошида Ўткир менга Тошкентдан қўнғироқ қилиб: “Чўлқувар журналист, чўлда юрга-

нингиз етар. Тошкентга қайтинг, бирга ишлаймиз”, деди. Мен рози бўлдим. Шундан кейин Тошкентга қайтиб, “Тошкент оқшоми” газетасида ишлай бошладим. Ўткир газетанинг адабиёт ва санъат бўлимини, мен эса саноат бўлимини бошқаардик. Ўша пайтда “Тошкент оқшоми” жамоасида анча қобилиятли журналистлар тўпланганди. Улар орасида энг пешқадами Ўткир Ҳошимов эди. Муҳарриримиз Саъдулла Кароматов ҳам мажлисларда ҳамиша уни мақтаб, “Ўткирдай бўлинглар”, дердилар. Ўткирдай бўлиш эса осон эмас эди. Мен бу фикримни таҳририят йиғинларида айтганман. Бошқа ҳамкасбларимизнинг ёзганлари оддий ипдан тўқилган матога ўхшаса, Ўткирнинг ёзганлари хитой шойисига ўхшайди, деганман. Унинг хоҳ бадиий, хоҳ публицистик асарларини ўқисангиз, мазза қиласиз. Чинакам беллетристика деб шуни айтса керак. Бундай халқона, ширали, жозибадор тил камдан-кам ёзувчидаги бўлади. Унинг 60-70 йилларда ёзган “Қалбингга қулоқ сол”, “Бахор қайтмайди” қиссалари, “Нур борки, соя бор” романи ёзувчига катта шухрат келтирди.

1985 йили Ўткир Ҳошимовнинг “Шарқ юлдузи” журналига бош муҳаррир этиб тайинланиши узукка кўз қўйгандек бўлди: журнал мундарижаси тубдан ўзгариб, ўқувчилари сони кўпайди. Ҳар бир газета ва журналнинг ўқишли бўлиши биринчи навбатда бош муҳаррирга, унинг мутахассис сифатидаги лаёқати, дадиллиги ва ташкилотчилигига боғлиқ. Агар муҳаррирда бу фазилатларнинг биронтаси етишмаса, шубҳасиз, нашр оқсайди. Ўткирда эса бу фазилатларнинг барчаси бор. Мен бунга у билан университетда бирга ўқиб, ўн беш йил “Тошкент оқшоми”да, ўн йилдан зиёд “Шарқ юлдузи”да ишлашиб, кўп бор иқрор бўлганман.

Олий Мажлисга депутатликка номзод Ўткир Ҳошимов билан 1995 йилда Зангиота туманидаги “Корасув” жамоа хўжалигига бўлган учрашувда “Ўзгариш” қишлоғилик бир кекса муаллим сўз олиб шундай деган эди: “Дунёда туғиладиган ҳар ўн-ўн беш минг одамдан биттасининг юраги кўкрагининг ўнг томонида бўларкан. Бу – одамнинг жасур инсон бўлиши белгиси саналади. Мен Ўткир Ҳошимовнинг ёзган асарларини ўқиб, бу кишининг юраги кўкрагининг ўнг томонида бўлса керак, дердим. Мана, бугун ҳурматли ёзувчимизни кўриб, қўлларини олганимдан ҳаяжондаман. Республика Олий Мажлисига шундай дадил,adolatparvar, фикр-мулоҳазали инсонлар депутат этиб сайланса айни муддао бўлади”.

Хеч ёдимдан чиқмайди, 1968 йил баҳорда Абдулла Қаҳхор вафот этганди. Бу хабар тарқалган куни эрталаб Ўткир ишга кела солиб, Абдулла Қаҳхор ҳақида мақола ёзишни бошлади. Тушга яқин мақолани тугаллаб, остига ўзининг ва Озод Шарафиддиновнинг имзосини қўйди. Сўнг менинг олдимда Озод акага қўнғироқ қилиб, мақолани ўқиб бериб, имзосини қўйиш учун розилигини олди. “Мақола шу ҳолида бўладими ёки яна қучайтирайми?” деди у. Озод ака шошиб: “Йўқ, йўқ, шу етади!” дедилар.

Эртаси газетанинг биринчи бетида Озод Шарафиддинов ва Ўткир Ҳошимовнинг “Халқ ёзувчиси” сарлавҳали мақоласи эълон қилинди. Кўплар “юқори”га ёқмай қолган Абдулла Қаҳхор ҳақида бир оғиз гап айтишга қўрқиб турган паллада Ўткир Ҳошимовнинг бундай қилиши бир томондан адибнинг жасорати бўлса, иккинчи жиҳатдан шогирднинг устоз хотирасига ҳурмати ифодаси эди.

Ўткир Ҳошимов “Шарқ юлдузи” журналига ўн йилдан ортиқ бош муҳаррирлик қилди. Бу йилларни мен журнал тарихидаги энг нурли йиллар деб биламан. Муқаддас Қуръони карим таржимаси, “Темур тузуклари”, “Дулбаржин”, “Ўғузнома” асарлари, Аҳмад Яссавий ҳикматлари, Вамберининг “Бухоро ёхуд Мовароуннахр тарихи” асари, давра сұхбатлари ва мақолалар, Туркистон ўлка-сининг Чор Россияси томонидан босиб олиниши ва мустамлакага айлантирилиши ҳақидағи ҳақиқатни очиб берувчи Ҳ.Зиёевнинг “Чоризм истилоси”, Фозилбек Отабек ўғлининг “Дукчи Эшон воқеаси”, Баёнийнинг “Шажараи Хоразмшоҳий”, А.Авлонийнинг “Афғон дафтари” асарлари айни шу даврда журнал юзини кўрди.

Ўткир Ҳошимов сермаҳсул ёзувчи. У ўз ижоди давомида 70 дан зиёд китоб чиқарди. Булар уч роман, саккиз қисса, тўрт драма ва комедия, ўнлаб ҳикоялар ва юзлаб публицистик мақолалардан иборат. Ёзувчи асарлари фақат Ўзбекистонда эмас, балки қардош халқларнинг тилларида, чет элларда ҳам нашр этилган.

1997 йили “Шарқ юлдузи” журналига Нью-Йорк шаҳрида дунёning бир неча тилларида нашр этиладиган “Икарус” журналидан қўнғироқ қилишиб: “Журналимизда Ўткир Ҳошимовнинг “Тушда кечган умрлар” романидан боблар бермоқчи эдик. Шунга муаллифнинг розилигини олмоқчимиз. Агар у киши рози бўлсалар, шартнома қофозларини юбормоқчимиз” дейишиди.

Эртасига ёзувчи билан “Икарус” журнали муҳаррири ўртасида телефон орқали сұхбат бўлиб ўтди. “Тушда кечган умрлар” рома-

нидан боблар журналда босилди. Шу пайтгача Америка журналида бирон-бир ўзбек ёзувчининг асари эълон қилинмаган экан.

80-йиллар бошида Ўткир Республика телевидениесида туркум баҳслар олиб борган, телетомошибинлар уларни катта қизиқиши билан томоша қилиб, телевидениега юзлаб, минглаб хатлар ёзишган. Телепублицистика намунаси бўлган бу баҳслар, шубҳасиз, Ўзбекистон телевидениеси кўрсатувлари тарихидаги ёрқин саҳифани ташкил этади. Лекин ўша пайтда бу баҳслар кутилмагандан тўхтаб қолди.

Ўткир билан бир учрашувимизда шу ҳақда сўз очиб:

– Телетомошибинларни соғинтириб қўйдингиз-ку, – дедим.

Шунда Ўткир аввалига индамай қўл силтади. Кейин деди:

– Мени Марказкўмга чақиришиб, телевидениеда даҳрийлик ҳақида баҳс ташкил этасиз, дейишиди. Мен бу иш қўлимдан келмайди, буни шу мавзуда диссертация ёқлаб, фан номзоди, профессор бўлган кишиларга буюинглар, деб чиқиб кетдим. Шундан бери мени телевидениега чақирмай қўйишиди... Мен ҳам бормай қўяқолдим. Уларнинг айтганини қилсан мухлисларимнинг юзига қандай қарайман, Алиназар! Отам билан онам гўрларида тик туришмайдими?

Ўткир Хошимовнинг “Авлодларга нима деймиз?”, “Мантиқ қани?”, “Қалбнинг оппоқ дафтари”, “Муқаддас қасамни бузганлар”, “Дўстлик ҳурматдан бошланади” мақолаларида, қатор бадиий асарларида мустабид Шўро тузумининг энг оғриқли муаммолари ўртага ташлаган эди. Бу асарлар Истиқлол ғояларига хизмат қилди.

*Ойша ТҮРАЕВА,
профессор*

ЎТКИР ҲОШИМОВ ҲАҚИДА БИЛГАНЛАРИМ

Ўзбек адабиёти ривожига, мустақил республикамиз камолотига муносиб ҳисса қўшган, ўзининг қанча-қанча китоблари билан халқ дилидан ўрин олган Ўзбекистон халқ ёзувчиси Ўткир Ҳошимовни билмаган, китобларини қайта-қайта завқланиб ўқимаган одам топилмаса керак. Истеъодли адибнинг “Баҳор қайтмайди”, “Қалбингга қулоқ сол”, “Нур борки, соя бор”, “Дунёнинг ишлари”, “Инсон садоқати”, “Тўйлар муборак”, “Икки эшик ораси”, “Тушда кечган умрлар”, “Икки карра икки – беш” каби қисса ва романлари, юздан ортиқ дилбар ҳикоялари халқ орасида жуда машҳур бўлиб кетгани аниқ. Ўткиржоннинг ёзган китоблари чамамда 70 тага борган. Ўткир Ҳошимовни 1970 йиллардан буён биламан. Ўша йиллар Ўткиржон “Тошкент оқшоми” газетасида “Адабиёт ва санъат” бўлимининг жонкуяр раҳбари бўлиб ишлаганлар, ўша даврда “Тошкент оқшоми” республикада энг нуфузли нашрлардан бири бўлган. У йиллар “Оқшом”нинг ўзига хос ўсиб-улғайиш йиллари бўлди. Бу нарса газета саҳифаларида эълон қилинган мақолалар, танқидий фикрлар, кишини мулоҳазага чорловчи турлитуман жанрларда ёзилган материаллар, ахлоқ-одоб мавзуларидаги чиқишлилар, адабиёт ва санъат масалаларига бағишлиланган саҳифалардан шундокқина кўриниб туради. Энг муҳими шуки, “Тошкент оқшоми”да ёзувчи бениҳоя фидоий, бениҳоя соғдил инсонларни учратдилар. Шулардан бири, хеч шубҳасиз газетанинг бош муҳаррири Саъдулла Караматов эди.

“Оқшом”нинг машҳурлик даражасига кўтарилишида Ўткир Ҳошимовнинг ижодкор сифатида қилган ишлари таҳсинга сазоворлигини алоҳида қайд этишни лозим деб ҳисоблайман. Ўткир Ҳошимов ўзининг энг яхши асар ва китобларини шу ерда ишлаган чоғларида ёзганлар. Дўстларининг айтишича, Ўткир Ҳошимовнинг суюги “Оқшом”да қотган. “Оқшом”нинг деярли ҳар бир сонида майший, оиласвий, ахлоқий мавзудаги материаллар бериб борилди. “Оз-оз ўрганиб доно бўлур”, “Саксон ота шаҳар кезади” каби рукнлар ҳамиша газетхонларни ўзига оҳанрабодек тортиб келган. Ҳар бир ижодий ходим янги-янги рукнлар топиб, газетани янада

қизиқарли ва мукаммал бўлишига ҳаракат қиласди. “ХХ аср овози”, “20-йиллар адабиёти” каби саҳифалар газетхонларга манзур бўлган эди. Тоталитар тузумнинг бузуқ нияти авж олган бир пайтда Ўткир Ҳошимовга “Ўзбек иши”, “Давлат сири”, “Дўстлик ҳурматдан бошланади” каби ўнлаб мақолаларни ёзиш учун катта жасорат керак эди. Ардокли ёзувчимиз ана шу жасоратни ўзида топа олди. Ҳар қандай зарбадан, ҳужумлардан қўрқмай, баъян ҳатто ҳаётини ҳавф остида қолдириб, халқ дилида туғён уриб турган гапларни очик ва ошкора айтишга ўзида куч-қувват топди.

ХАТЛАРДАН САТРЛАР

«Ўткир!

«Чўл ҳавоси»ни ўқиб суюниб кетдим. Бирдан лов этиб аланга билан бошланган ижоднинг келажаги порлоқ бўлади. Қисса жуда соғ, самимий, илиқ, табиий, роҳат қилиб ўқилади.

Қиссанинг хат шаклида бўлиши кўп жойларда ритмни бузади, сизни чеклаб қўяди. Ҳикоя биринчи шахс тилидан олиб борилса ҳам шундай бўлур эди. Келгусида буни ўйланг, ҳисобга олинг.

Шу аланга ҳеч қачон пасаймасин, ижодингиз ҳеч қачон тутамасин!»

Хурмат билан **Абдулла Қаҳҳор.**
1963 йил. Октябрь

* * *

«Укам Ўткир!

Сени аввалдан яхши кўриб, ижодинг меваларини қониқиш билан қузатиб келардим. Гарчанд бирон матбуотда фикримни изҳор қилмаган бўлсам ҳам сендан умидим зўр эди. Назаримда, шу умидимга етдим. Мана, ҳозиргина «Дунёнинг ишлари»ни мамнуният билан охирги варағини ёпдим. Раҳмат, ука! Бир одам она ҳақида сўз айтса, шунчалик айтар-да! Жуда етилибсан, ука! Илоҳим, бадният ёмон кўздан ўзи асрасин! Қаҳҳорона кузатувлар. Қаҳҳорона жумлалар. Бир жумланинг ҳар бир ҳарфини асти жойидан қўзғалмас қилиб, бир-бир михлабсан! Ўзбек тилининг кўрки-жозибасига яна бир бора қаноат қилдим. Омади келмаса ҳам ижод заҳматини чеккан бир кекса сифатида жуда ҳурсанд бўлдим. Бундай енгилликка қандай қилиб эришганингни биламан. Модомики осон ўқилар экан, минг азобда ёзилган бўлади! Қисса эмас, насрий бўлса ҳам она, оналар мадҳияси деса бўлади. Шояд шоиртабиат Озодми, Иброҳимжонми, асарнинг ўзидек жозиба билан тақриз-тахлил ёзса! Бор бўл, укам!»

Кувониб-кувониб, дуо билан **Шуҳрат.**
17 март. 1982 йил. Москва, Малеевка

* * *

Телевизорда «Инсон садоқати»ни кўриб, юрагим ёмон бўлиб қолди. Бир вақтлар мен ҳам Элёрнинг онаси сингари ўз «бахтимга

эргашиб» Чимкентга кетиб қолган, боламни тирик етм қилган эдим. Энди кеч... Асар учун Сизга раҳмат демоқчи эмасман. ўзимга лаънат деяпман...

Имзосиз.

* * *

«Мен уруш кўрган одамман. Кўзингиз тушган бўлса, Константин Симоновнинг «Халхинголдан Берлингача» китобида менинг ҳам номим бор. Уруш хақидаги кўп асарларни ўқиганман. Аммо «Икки эшик ораси» романи менга бутунлай бошқача таъсир қилди. Ҳамма-ҳаммаси ҳаққоний акс эттирилган. Китобни ўқирканман, ўша машаққатларни яна бир бор кўргандек бўлдим... Биламан, сиз ёшсиз. Урушга бормагансиз. Аммо китобни ўқиб туриб, бу одам чиндан ҳам урушга борган, деб ишонгим келди... Бу китобни ҳамма ўқишини хоҳлардим. Токи, биз кўрган кунларни ёшлар кўрмасин! Роман, ҳеч қачон уруш бўлмаслиги керак, деб огоҳлантиришдир...»

Ҳасан АБДУЛЛАЕВ.
Иккинчи жаҳон уруши ногирони. Тўрақўрғон.

* * *

Дунёда оналарни мадҳ этувчи, оналарни шарафловчи асарлар кўп. «Дунёнинг ишлари» китоби шулар орасида алоҳида ажralиб туради. Бу – ўзбек аёли, ўзбек онасини ҳаммага кўз-кўз қила оладиган асардир.

Азиз ҚАЮМОВ, академик

* * *

«Бу хатни сизга ғамбода бир аёл ёзмокда. Менинг ўғлим Афғонистонда ҳалок бўлди: жасади темир тобутда келди... Она учун бундан ортиқ азоб борми? Адойи-тамом бўлдим. Кўзимга ўлимдан бошқа нарса кўринмай қолди... Шунда... қўлимга «Дунёнинг ишлари» китоби тушиб қолди. Ўқиб бир қадар ўзимга келгандек бўлдим. ўйлаб қарасам, мен ҳам сизнинг онангизга ўхшар эканман. Бир илтимосим бор: менга ўғил бўлинг!»

Мушаррафхон СИДДИҚОВА.
Фарғона вилояти, Қува тумани,
1984 йил.

* * *

КИМСАН ҲУСАНОВНИНГ РОБИЯГА ЕТИБ КЕЛМАГАН ХАТИ («Икки эшик ораси» романини ўқиб...)

«Робия! Мен ўлган эмасман, ишон!
Ишон, Ватанимнинг юрагидаман!
Тинчликни истаган жами одамнинг
Оппоқ орзулари, тилагидаман!
Эргашали ака мина остида
Қийма-қийма бўлди, ўзим қўрганман.
Вася амакининг шилиниб кетган
Жасадини тортиб, ерга қўмганман.
Даҳшат! Нимасини айтай, Робия?!

Қўйган болакайнинг кўзчалари йўқ!
О, бунинг ҳар бири осколка бўлиб
Дардли юрагимда қотиб қолган ўқ!
Робия, одамлар эшитсин, айтгин:
Номаълум аскар – мен, мағрур ҳар маҳал.
Мангу олов бўлиб, ўчмас ном бўлиб
Қалбингда тикланган ҳайкалман, ҳайкал!»

**Нодира БАРАТОВА,
ТошДУ талабаси. Бухоро**

* * *

«Баҳор қайтмайди», «Нур борки, соя бор», «Дунёning ишлари»
китобларини катта қизиқиш билан ўқиган эдик. Анча бўлди. Қайта
чиқмай қолди. Яна нашр қилинадими-йўқми?»

Салим ШЕРМАТОВ.
Самарқанд шаҳар ишлаб чиқариш
(кўзи ожизлар) комбинати ишчиси

* * *

«Телеграмма. Тошкент шаҳар, Навоий кўчаси, 30 уй. F.Ғулом
номидаги нашриётга. «Дунёning ишлари» китоби менда катта
таассурот қолдирди. Бизнинг бригадамиз китоб муаллифи Ўткир
Хошимов номидан бир қути кўшимча пилла бокди ва ундан тушган

маблағни Тинчлик фондига ўтказди. Бу ҳақда газеталарда ҳам эълон қилинди».

Жаъфарали ПАЙҒАМОВ.

Фарғона вилояти. Ўзбекистон тумани,
Ғаниобод совхози пиллачилик бригадаси бошлиғи.
1984 йил.

* * *

«Мен қишлоқда яшайман. Қишлоқда китоб дўконлари йўқ. Жиззаҳга борсам, бозорда сизнинг икки жилдли сайланмангиз – «Баҳор соғинчи» билан «Ҳадикли тушлар»ни сотаётган экан. Нарҳини сўрасам, етти минг сўм деди. Ростни айтсан, пулим етмади. Биринчи жилдини уч ярим минг сўмга олдим. Иккинчисини келаси бозор куни келиб олишимни айтдим. Кейинги сафар «Ҳадикли тушлар»ни оламан, десам, китобни чиройли салапан қоғозга ўраб, лента билан боғлаб, орқасига яна учта китобчани тиркаб қўйибди. Баҳоси олти минг сўм, деди. Менга анави китоблар керак эмаслигини айтсан, «бу китоб ёлғиз сотилмайди», деди. Баъзи «савдо-гар»лар халқ севган бошқа шоир ва ёзувчиларнинг китобларига ҳам «ўтмас матаҳ»ни қўшиб сотишни одат қилган. Ҳайронман, нега энди мен ўзим хоҳлаган китобга қўшиб хоҳламаган китобни ҳам олишим керак? Нима, сизлар бошқаларнинг шалдироқ вагонини судраб юрадиган «паровоз»мисиз?»

Т.ЭГАМҚУЛОВ.

Оқдарё тумани. 2002 йил, июнь

* * *

«Икки эшик ораси» романи ғоявий-бадиий жиҳатдан бақувват, оригинал услубда ёзилган, ҳаётый ва ўқишли асар сифатида адабиётимизда алоҳида ўрин тутади.

Нуриддин ШУКУРОВ.

Филология фанлари доктори, профессор

* * *

«Мен Андижон облатининг Марҳамат районида яшайман. Ёшим 23 да. Касбим – иқтисодчи. Ёшлигимдан бадиий адабиётга қизиқаман. Учинчи синфда ўқиётганимда «Ғунча» журналида биринчи шеърим босилган. Ватанини, дўстликни, ҳақиқий севгини

куйлашни истайман... 1989 йил 31 январ куни «Совет ўзбекистони» газетасида босилган «Нега? Нега?!» сарлавҳали ҳикоянгизни ўқиб юрагимда бир нарса узилиб кетгандек бўлди. Шу асарни ўзимча шеърга солмоқчи бўлдим. Биламан, шеърим ҳеч қаерда чиқмайди. Мухлисингиз, ўқувчингиз сифатида жавоб хати ёзсангиз, ўзимни баҳтиёр санаган бўлур эдим.

Кўнгли тоғдай. Мактуб келибди бугун
Ёлғиз ўғли – Раҳматдан, – зоридан.
“Мени кутинг, уйга қайтарман тез кун” –
Дебди. Мана бу хат ифтихоридан.
Хаёл кетди... Остонада келинчак
Кўлларида сочиқ тутар, чой тутар.
Уй тўрида гўдак ила беланчак,
Бобо “дея” ҳар кеч йўлини кутар.
Ширин ўй-ла кетиб борар бош эгиб,
Кун санашга бармоқлари етмайди.
Шунча қунни ўтказди у зор кутиб,
Ўғли келар, шубҳа безор этмайди...
Остонада пайдо бўлди бир одам,
Кучоқлади ва зўр бардош тилади.
Совуқ хона... Нега унмайди қадам?
Нега музлар, нега нотинч юраги?
Ана! «Секин!» Наҳот, шу ўғли бўлса?
«Ота!» деди инграниб жонсиз овоз.
– Болам! Болам! Қани қўзим кўр бўлса?!
Сочлари оқ, рангпар юзи оқ қофоз!
– Тур, жон болам, тур ўрнингдан, кетамиз!
Онагинанг сени муштоқ кутмоқда.
Тур, жон болам, тур ўрнингдан, кетамиз!
Бир биз эмас, бутун қишлоқ кутмоқда.
Ва... устидан юлқиб олди адёлни
Шунда кўрди... ярим йўқ тирик жонни!
Қонга ботган ярми кесик ўғлонни!
Шунда кўрди қонли Афғонистонни!
«Қўзингни оч! Кел бағримга. Кел ўғлим!
Нега? Нега?! Нега чиқмас ҳеч овоз?
Боламда не гуноҳ? Бу қандай зулм?

Қани пахлавоним? Қани у шоввоз?!
Эй Худо! Суянчим, тилагим қани?
Нега ўн тўққизда сочи қордек ок?
Белимнинг мадори, юрагим қани?
Болам! Бўлолмадим мен сенга паноҳ!
Нега? Нега? Нега-а-а?!»
Сен кечмаган қонларни кечиб келди-ку ўғлон!
Кушмас, ажал бўйлаган осмонларда учди-ку!
Юзлаб асил ўғлонларнинг бошига етди Афғон,
Етди ўғлинг бошига, қаторингдан кетди у!

Мунаввар ТОШПЎЛАТОВА,
1989 йил 12 февраль

МУНДАРИЖА

227

ТАҚДИМ (Ҳ.Болтабоев)3
ЭЪТИРОФЛАР
*Сайд Аҳмад. Ижод ва жасорат*7
*Озод Шарафиддинов. Эл ардоқлаган адаби*15
*Пиримқул Қодиров. Санъаткор адаби*45
*Матёқуб Кўшижонов. Онага таъзим*47
*Эркин Воҳидов. Дўстим тўғрисида битиклар*54
*Умарали Норматов. Насрдаги шоир ёхуд руҳият манзиллари*56
*Абдуғафур Расулов. Диңга яқин одамлар*75
*Ҳафиз Абдусаматов. Адиб драматургияси*87
*Иброҳим Гафуров. Ёзувчи ва китобхон*98
*Сайдулла Мирзаев. Сўз санъаткори*103
*Бахтиёр Назаров. Халқ меҳрини қозонган адаби*109
*Мирпўлат Мирзо. Истеъдод сеҳри*120
*Хуршид Дўстмуҳаммад. Машҳурликнинг бир сири*122
*Муҳаббат Шарафутдинова. Тасвирдаги ўзига хослиқ*128
*Ашурали Жўраев. Севимли ёзувчим*141
*Сайди Умиров. Ўткир публицист*143
*Эркин Усмонов. Асар тили – ёзувчининг қалби*149
 *Абдусаид Кўчимов. Қовурдок*156
 *Носир Муҳаммад. Устоз ҳақида сўз*165
 *Мираббос Мирзаҳмедов. Телевизион сериаллар шундай яратилган эди*168
*Ўлмасхон Ҳошимова. Ёзувчи нега йиглайди?*174
*Йўлдошли Солижонов. Адабиётимизнинг пўлат чавандози*180
*Йўлдоши Мансуров. Тўғри чиққан башорат*185
*Муҳаммад Очил. “Сўққабош бевагина” васфида...*188
*Карим Норматов. Аланга билан бошланган ижод*191
 *Тўлқин Расулов. Азиз дўстим*194
 *Фани Абдуллаев. Ялпиз сомса*198
 *Абдулаҳад Ўрмонов. “Бахор қайтмайди”нинг биринчи ўқувчилари эдик*200
*Олимжон Давлатов. Адабиёт – саккизинчи мўъжиза*202
*Умрзоқ Ўлжабоев. Ёзувчи ҳаётидан баъзи лавҳалар*206
*Алиназар Эгамназаров. “Чўл ҳавоси”дан сўнг*216
 *Ойша Тўраева. Ўткир Ҳошимов ҳақида билганларим*220
ХАТЛАРДАН САТРЛАР222

Адабий-бадиий нашр

Нашрга тайёрловчи: Ҳ.Болтабоев
Масъул муҳаррир: И.Фафуров

Нашриёт муҳаррири: Маҳкам Маҳмудов
Мусаххиха: Камола Болтабоева
Техник муҳаррир: Беҳзод Болтабоев

«MUMTOZ SO‘Z»
масъулияти чекланган жамияти
нашиёти

Нашриёт лицензияси АI № 103. 15.07.2008
Теришга берилди: 01.07.2011
Босишга рухсат этилди 29.07.2011
Қофоз бичими 60x84 1/32. Офсет қофози
Times New Roman гарнитураси. Ҳисоб-нашиёт тобоғи 13,5
Шартли босма тобоғи 15,0. Адади 300
Баҳоси келишилган нархда

Тошкент, Навоий қўчаси, 69.
Тел: 241-60-33

«MUMTOZ SO‘Z»
масъулияти чекланган жамиятининг
матбаа бўлимида чоп этилди. Буюртма 30/11
Манзил: Тошкент, Навоий қўчаси, 69.
Тел: 241-81-20

Электрон манзил: mumtoz_soz@mail.ru